

續碑傳集卷八

江陰繆荃孫纂錄

道光朝部院大臣

黃鉞傳

安徽通志

黃鉞字左田當塗人家於蕪湖乾隆庚戌進士授主事籤分戶部時和
珩管部務鉞告歸嘉慶四年

仁宗睿皇帝親政以安徽巡撫朱桂薦

召見養心殿

諭曰朕在藩邸卽知汝汝因何告假鉞據實陳奏奉

命懋勤殿行走由主事改擢贊善直

南書房未補缺

特旨與考試差嗣是典湖北山東順天鄉試任山西山東學政密摺奏
事由贊善洊擢至禮部尚書

賜紫禁城騎馬肩輿入直二十五年放會試正考官榜首陳繼昌以三

元及第時稱盛事秋隨扈灤陽

仁宗睿皇帝龍馭上賓

行在喪儀禮部無例案可循皆鉞悉心擬奏

宣宗命加太子少保銜在軍機大臣上行走調戶部尚書鉞敬共所事

實力匡襄京察議敘道光三年

錫宴玉瀾堂繪像鉞爲十五老臣之一

御製詩褒之云豈獨文章禁省冠一德密勿惟幾康四年

仁宗睿皇帝聖德神功碑恭代書成拜蟒服大緞之

賜五年乞休

溫旨慰留六年屢申前請情詞肫切

予告回蕪湖在家支食半俸瀕行暨十八年兩次

恩賞濫枝

諭曰知卿不假濫苓之功聊申眷念卿其善自靜攝二十一年卒於蕪湖年九十二初鉞幼喪父母鞠於外家乾隆中以廩貢挑膽錄議敘吏

目兩次

召試二等年四十一始爲部員數月卽歸掌教皖南北者十載其後不

次超擢屢司文枋蒙

仁宗批諭云汝本寒士因石君薦拔遂至於此能法石君先生人品學

業必能永沐朕恩鉞感激圖報矢勤矢慎
內廷宣力二十有七年克盡厥職故能渥荷

兩朝恩眷不徒以工書善畫見長嘉慶道光年間兩次

賜第內城三次太醫視疾妻喪軍機章京郎中趙元祿齋

硃諭賜慰切勿過有哀傷七十八九十生日疊蒙

御書福壽扁聯壽佛如意朝珠珍玩文綺用迓福祉又蒙

恩諭伊子禮部小京官黃富民加恩作為該部主事俾聞之益增慶慰

又前在戶部右侍郎任內以錢局爐頭增復料錢部議降二級奉

旨調任禮部右侍郎明年即轉補戶部左侍郎後以戶部任內失察假

照降為三品頂戴明年蒙

賞還一品頂戴皆

異數也遺疏奏聞

宣宗成皇帝悼惜有學問優長持躬端謹密勿宣勤之

諭晉贈太子太保銜入祀賢良祠照尚書例賜卹原任內一切處分悉

子開復

子謚勤敏史館立傳

諭賜祭葬碑文葬當塗南褐山下先是道光辛卯安徽濱臨江淮州縣水災鉞首捐千金助振癸巳復水捐百金助振乙未蕪湖洊饑倡建豐備倉儲穀千石倉旁造鄉塾月課生童鄉人德之及是請入祀當塗蕪湖兩縣鄉賢祠奉

旨允准著有壹齋集四十卷二十四畫品一卷

劉環之傳

汪封滄

劉環之字信芳父堪早卒伯父墉撫教之乾隆五十四年進士改翰林院庶吉士授檢討累遷兵部尚書嘉慶十八年兼順天府府尹林清之變部議以環之失察應左遷

上加恩改爲留任是年冬奏請酌改順天府屬各事宜一治中應改爲題缺一府屬各員與直隸各缺通融升調一四路同知所轄千把外委應覈明功過賞罰一酌添大興宛平兩縣遞馬及所屬壯丁均下部議行嗣以緝捕逆匪功加太子少保調戶部尚書以大宛二縣所部地界廣長向但設有營弁巡捕請移縣丞駐逢戈莊資協緝

從之二十二年

秋獮迴鑿奏對失

旨貶秩旋守兵部左侍郎兼刑部左侍郎晉都察院右都御史仍兼府尹二十五年調兵部尚書加太子少保其年九月

今上卽位調吏部尚書充

經筵講官道光元年卒於官鑲之廉正既卒

上謂其明白敢言深為悼惜

賜祭葬諡文恭

子告刑部右侍郎秦公遂庵墓志銘

陳用光

道光元年秋七月初十日予告刑部右侍郎秦公遂庵以疾卒於家是年四月廿三日公嘗致書於新城陳用光曰余衰病增劇恐旦暮入地君知我又素知古文敢以他年墓石之文相屬余生平治行子弟無能盡知者當略具梗概屬瓊山張編修岳崧為行狀以授子余得書為憮然者累日既得訃益愴然以悲謂公何相信之深而自知之審也既見張編修問以行狀則自海外來過惠山未嘗見公未幾公弟永平守沆以書及公子緇武所為行狀來速余踐前言余雖不能文然辱公知如是其曷敢辭按狀公諱瀛字凌滄一字小峴晚又號遂庵宋龍圖閣直學士少游先生後也學士子湛政和中為倅於常州因家焉十傳至諱

惟楨者始遷於無錫明湖廣巡撫諱耀者公八世祖也入本朝舉康熙己未鴻博歷官至左春坊左諭德諱松齡者公本生高祖也曾祖諱實然祖諱春田父諱鴻鈞三世皆以公官

贈光祿大夫兵部左侍郎妣皆

贈一品夫人公兄弟五人于次爲長也幼有異稟讀書能兼人學爲詩古文輒千言立就外祖徐二磯某及從曾祖文恭公皆器之年十六補縣學生年三十二以貢入京師是年遂舉京兆丙申春

純皇帝巡幸山東公獻賦

行在試以能知題所自出己黜而特爲

純皇帝拔置一等

賜內閣中書未幾入直軍機丁母憂歸旋丁父憂治喪葬一以禮旣服闋補中書以京察一等擢內閣侍讀復以京察一等記名以道府用尋遷戶部郎中癸丑出爲溫處兵備道調杭嘉湖兵備道擢浙江按察使調湖南按察使壬戌引疾歸嘉慶九年病痊補廣東按察使擢浙江布政使入

覲乞內用補光祿寺少卿轉太常卿順天府府尹擢刑部侍郎緣事左

遷補光祿寺卿擢左副都御史充會試知貢舉擢總督倉場戶部右侍郎旋奉

命以三品頂戴爲左副都御史擢內閣學士兼禮部侍郎遷兵部右侍郎調刑部右侍郎以目疾乞病歸自是家居者十有一年卒時享年七十九公旣以文名而六應禮部試旣得復失當直

內廷時益訪求

國家掌故爲有用之學性耿直而仁恕勇於任事意所不可雖遇權貴持論不少假借而不爲震厲之色又勤於其職故雖不爲和珅所喜而不能不循資例以簡缺道府薦其特畀以繁劇者

純皇帝知公也公之勇於任事在溫處時除永嘉數十年以生監充莊長之弊而民旣免役賦亦無逋擢浙江提刑甯紹台大水歲饑甚有司匿不請振公請於撫軍曰預報收成乃約計通屬爲言今猝有水患正可據實

上聞何忍立視民死力爭得請及調湖南歲又饑長沙衡陽及他縣姦民聚眾奪米者事數起公旣設法禽治其渠魁而不爲株連徧曉諭之民乃定而衡陽大水漂沒人民田廬無算先一年衡州歉收有司匿不

報聞而是時陝西奏撥兵米其派及湖南者衡州與焉公言災傷如是奈何不議振而議餉力請於撫軍得截留他縣兵米而減價平糶民乃定公之急紓民患如是及其讞獄則寬猛相劑而務得其情在溫處時據乾隆初年徐兵備縣永文檄明曠金埋樁爲會之非邪教以釋瑞安民池聖功等之罪而訊得仙居縣道士李鶴皋以無爲教聚徒眾者計禽治之誅渠寇數人而寬其連染者有差提刑浙江促水師提督援定海普陀之盜警撫軍難之而制軍卒用公禦盜策以戢盜治韓球闖阿三之獄皆當其罪提刑廣東禽治亂民梁修平而以功讓制府倭公治吳蝦喜之結黨於順德者撫黎民之爲亂於瓊州者懲賭博之號爲白鴿標者而其在浙江平反定海難民蔡長興十二人之非盜兩上書於撫軍卒得釋及海盜江文五誣其族與某通實則某嘗首文五於縣有縣牘可證撫軍旣以入告而卒能聽公言以釋某尤爲世所難行者爲太常時嘗奏陳廣東事宜謂剿捕海盜之法在討軍實樹聲威戒虛飾而治內地之姦民句連海盜者則嚴防守必先澄吏治澄吏治必先固民心其要則清訟獄抑冗濫懲蠹滑

睿皇帝亟稱善焉故旣調府尹而遂任以司寇之職其在司寇屢有平

反而糧船運丁盜米事發有謂用藥置米中米立溢者公試之不驗以入奏則

睿皇帝已手試其藥不驗知其枉因益器公故公雖以事鐫級一歲六遷而仍畀以司寇蓋知公之耿直而仁恕爲能勝祥刑之任也公於詩古文及制舉業皆力追古人風格而能有所自得少時爲齊次風杭堇浦所知既得舉則見重於竇東皋官京師與王惕甫魯山木先生以文字相質論及見姚姬傳先生而彌有契合焉當官太常時用光嘗質以文公策勵之甚至歲壬申訪公於無錫公來舟中語移晷欲留之遊惠山不果自是雖以書相往復而不及見公矣有自南來者輒問公近狀知公推其孝友嫻睦之意設義田置祭田修家譜而復以其餘修縣志誨誘後進勤懇如不及而每與余書較若其意有不釋然於中者蓋公之所志者大欲以才副其學而嘗患於不得行其意其官中外及家居旣已卓卓有所表見矣而歆然猶以爲合於俗之難而力學古人固未易言也公所著有淮海公年譜六卷己未詞科錄十卷無錫金匱縣志四十卷小峴山人詩文集三十六卷板藏於家公生於乾隆癸丑正月二十八日卒於道光辛巳七月初十日

誥授榮祿大夫兵部左侍郎配朱夫人前卒

贈一品夫人子四人長緇武監生江西候補知縣歷署彭澤峽江樂安
宜春縣次緇文監生以後其仲叔某皆朱夫人出次緇承殤次緇業幼
皆側室戴出孫七自緇武出者昌熙昌煦昌烈自緇文出者昌熾昌煌
昌煜昌焯昌煜府學生其入泮時與公補縣學同歲公所為賦重遊泮
宮詩者也曾孫二人若璜若珩某月日葬公於某原銘曰

錫山之麓淮海裔曰生俊傑昌厥世尚書諭德名相次抱仁趨義富文
字迴翔禁省歷卿寺中粵越楚勤吏事其學既殫才則試摧剛煦柔播
威惠抉剔疑似無障翳意所孤行屹不避終達厥誠溥厥利其文龍轡
才鳳翽

帝惜其歸温語被一星將終伏衡泌遙慟

鼎湖惟掩涕公懷坦坦性樂易我昔與游數談菽諾公見屬為公志千
秋萬世名不替

戶部左侍郎提督江蘇學政周公神道碑銘

魏源

上之是非不明則其公在天下之是非不明上之是非明則其公在上
公在下則是非與黜陟出於二公在上則匪直出於一且以黜陟正是

非尤克昭蘇萬物平概羣品

國家承明之敝決塞去壅而

今上六七載各直省若涇縣之獄渭南之獄太原之獄德清之獄匹夫

匹婦猶有不獲其情者輒煩

朝廷重臣親跋涉萬里或內付廷尉而後平反之重蔽牢蒙或卒破壞

故幽隱畢達而吏不敢以民命草芥其尤甚者湖南湘潭之獄侍郎周

公以手書爲撫臣訐奏身譴職削吏乘勢益無忌黨并雷同剷根滅跡

巨姦逸法網良牧絀劾議萬夫吞氣放臣息影惴惴蝸居灰心絕望矣

而雷霆忽發於

新政之初起廢之詔舊撫之譴與一二嗣治獄之督撫按察相繼盡投

閒散而復公舊職敷歷中外復爲

天子重臣使獄事虛實曲直出覆盆而照日月者皆出

天明天聰特照獨斷嗚呼豈非公在上而是非出一者與方獄事之起

始以江西客民之獷橫繼以湖民之報復大吏不善鎮撫以致閉城罷

市械鬪兼旬人心洶惶幾激大變時值

仁廟六旬萬壽之年撫臣慮干不測初奏至卽諱匿不以實聞而首羅

織在籍石給事中爲鉗塞言路計識者蚤知其無意獄事矣公詢其齎
奏材官盡得狀知虛實大懸慮釀湖南巨患旣面奏本末有
敕馳詢猶不以撫臣爲不可與言手書忠告撫臣方倉皇於
廷敕不德反讐遂一意護前反噬構陷公以是獲

嚴譴然天下亦遂曉其一樸誠一傾險一忠直一罔上詩曰云不可使
得罪於天子亦云可使怨及朋友古今君臣寮友之際詎不甚難哉以
公至誠無逆億若是設遇軍國事重且大於此者必不肯隱忍卻顧矚
嚅明矣遇友有賢於舊撫者其必竭誠無不盡明矣被放南歸先後尚
蒙樸實之
褒鯁直之
諭

仁廟知公不謂不深乃守制起復未幾而被議

今上再起駮駁

嚮用而遂不祿士功業顯不顯於世固自有命焉於人又何尤公文學
在士林典刑在鄉邦政績在海內有李君兆洛行狀及江蘇請祠名宦
公狀在惟湘潭一獄本末則迄今海內傳聞尚有不盡其情者故敬揭

國家所以重民隱決壅蔽使孤立樸誠之士百擠不傾有以作百世臣子之氣者於前而後以公生平他行銘諸後公諱系英字孟才號石芳湖南湘潭縣人乾隆戊申鄉試舉人庚戌進士授翰林院編修歷官詹事府右春坊右贊善司經局洗馬翰林院侍讀侍講學士侍讀學士光祿寺卿內閣學士吏戶兵工四部侍郎兼署禮部右侍郎充

高宗實錄館纂修官

仁宗實錄館總纂官副總裁

咸安宮總裁治河方略館副總裁

文淵閣直閣

日講起居注官

南書房

上書房行走嘉慶戊午庚申順天鄉試壬戌會試同考官福建江南順天鄉試副考官四川山西江西江蘇學政卒道光四年七月三十日生乾隆三十年二月二十五日年六十歲奉

旨祀江蘇名宦祠曾祖某祖某父某妣某以上皆

贈如例配謝夫人子銘恩副貢生江華縣教諭貽棫監生貽樸廣東鹽

庫大使孫二葬某原銘曰

帝選宿學入侍

講幄公矢其慤匪夕伊朝受知

兩朝若雲在霄曰汝教督於汾於蜀士宵其讀曰汝司衡於南於京士

春其英曰汝貳部司空司馬朕肱且股

天鑒其衷民顛其恫公蹇其躬雖則蹇難

仁廟斯眷溫綸載渙卒俟其定以貽

嗣聖大正厥命臣受於君子受於親惟命之循

實錄手輟中夜感泣曰思

先帝弗懲厥前益矢厥肩揀民恐遭手拮口瘖大災克蘇士氣克桴庶

公其宰以潤四海曷云不待公重如山公粹如璠萬夫之憲公位日崇

公產不充一畝之宮顯顯令哲皤皤黃髮曷云其忽穹碑湘濱公配恪

勤以教事君

又戶部左侍郎提督江蘇學政周公神道碑包世臣

公諱系英字孟才號石芳湖南湘潭人曾祖新彩祖昭俊考世字皆不

仕曾祖妣胡祖妣謝前妣唐妣王以公貴

封贈如例榮祿公有三子伯系蔚副榜貢生永綏廳學訓導仲系莢早世公其季也公生二歲而孤稍長穎慧端重若成人甫弱冠以乾隆戊申舉於鄉庚戌登第以疾故癸丑改庶吉士乙卯授編修嘉慶戊午庚申皆充順天同考官己未充

實錄館纂修官壬戌充會試同考官其夏擢右贊善充

咸安宮總裁癸亥大考二等遷右中允甲子擢司經局洗馬直

文淵閣事福建副考官乙丑充

日講起居注官其冬授四川學政擢翰林院侍講轉侍讀進侍講學士

丁卯入都供職戊辰轉侍讀學士充江南副考官己巳以講官扈

蹕

東西兩陵五月

命直南書房九月擢太常寺卿庚午

特旨改

上書房行走充 三阿哥師傅 三阿哥今惇邸也以大雨曠班實鐫

一級仍留直

上書房八月扈

蹕熱河左授光祿寺卿旋授山西學政辛未擢大理寺卿癸酉擢內閣學士兼禮部侍郎入都供職復入直甲戌擢兵部右侍郎充

殿試讀卷官兼署工部右侍郎管錢法堂充治河方略館副總裁乙亥

四月奉太夫人諱回籍丁丑起復署兵部右侍郎戊寅補吏部右侍郎

充順天副考官己卯轉左兼署禮部右侍郎充

殿試讀卷官兼署工部右侍郎九月降編修逾月除名勒回籍庚辰八

月

今上登極十月

特召以四品京堂起用辛巳正月至都

特派

實錄館總纂官其冬補翰林院侍讀學士旋擢內閣學士壬午正月授

工部左侍郎充

實錄館副總裁二月授江西學政其秋調任江蘇甲申改戶部左侍郎

仍留任是年十一月三十日卒於江蘇學政官署時公正六十也公金

聲玉色鬚眉如畫望之若神人故事小翰詹任學政請

訓止一面公以洗馬使四川獨

召見至再知

上之眷公者深及己巳

陵差屢

召對和

宸章尤稱

旨時

南齋需人

上命掌院學士保薦考授曰朕意中止一周系英卿等可將其名列入

薦牘未幾

上書房出缺例由掌院擇翰林之可者擬正陪而公由

特簡且

命公曰不但授讀作詩文須教阿哥爲人居心以忠厚爲要公因奏書

房例課入韻詩臣愚以爲宜令阿哥加讀資治通鑑以知今古治亂興

衰之故悉民間之疾苦

上是之公服闋還朝年才逾五十詣熱河

行在上謁

上見公鬚髮盡白訝曰居憂兩載乃至此乎嗟歎者久之公徧歷卿貳

翱翔

內廷每奏對必移晷然慎密甚雖子弟莫能聞之其降守編修也以是年五月湘潭土民與江西客民構鬪讐殺者累日公見撫臣初奏與所聞殊異遂於

召對時力陳其狀

上命軍機大臣據公言詰撫臣旋又調撫臣撫福建而敕督臣就鞫撫臣候代未行因摺差附書問起居公以撫臣出都時曾約地方事有見聞必無相隱恐或受屬吏愚弄為地方深憂因覆書告其實撫臣既疑為公所短及得公覆書而公長子汝楨附摺差致書在籍之給事石承藻詢本案曲折并入其手因先奏陳公書事下都察院臺臣當以因事屬託私罪例革職

上諭閣臣曰案關地方公務非伊一家私事周系英不妨具摺再奏乃輒向本省巡撫私致書函本應斥罷念其人樸實著以編修用公既左遷而撫臣續奏陳汝楨書由是汝楨得減杖徒而公被

嚴譴然

上猶於飭督臣確審本案詢內
硃添曰周系英平素鯁直故

今上承

仁宗畀遺老臣之至意

命公視學東南皆許以夾片言地方緊要事及人材賢否公之視學江蘇也適值大潦災振事向無與於學臣公所駐之江陰縣地瀕江災尤劇而其文武之素得民者皆當代去公札商當路而留之並假庫銀三萬采客米以平市價又倡捐以濟例振之不足高堰之潰也公臥疴已數月聞信驚悼病遂亟口授遺摺猶諄諄以河事水患爲念嗚呼哀哉公飭身至嚴肅而性和易遇人輒傾吐無餘體察人情至委曲專掩覆過失然嫉惡深至於舞弊骯行者無少縱而劣員較轢庠序及姦民藉端傾陷士類公必力護持以直之若士林自涉訟或以爭家產鬩牆公則深悼教導之不行引咎自責其奏報考試情形也事無鉅細雖案已外結必詳列無隱飾而雨暘苗勢穀價以及勤心民瘼之員有實蹟或輿論所可否尚未自得確據者皆分別入牘至如分校必反覆三場主試必徧按敗卷固亦近人所難能而不足語公之盛節也嗟夫愛憎之

至變也自古歎之豈唯君臣人之情於夙昔親近一旦罣誤心移則前所聽受悉若被愚舊有勤勞皆成罪狀當公之初被吏議迹疑涉私而仁廟褒其樸實及放逐之餘復引鯁直追念平素旣不以一眚遷怒又不以曲全致屈成憲是固

大聖人無必無我度越尋常萬萬者而公之造膝輸忱其所以自結主知亦必有在矣迄於

新政錯枉舉直嚮用方隆遽爾奄忽相公之所以自處固非曰侍從詞臣矣士患無所挾持有挾持患不遇遇患不久公以樸誠動

天鑒者前後且二十年而所就遂止是豈非命也哉夫人謝氏

誥封一品夫人子三長汝楨以免徒後復奉

恩旨改名銘恩副榜貢生江華縣學訓導次貽棫國子監生次貽樸廣東候補鹽庫大使孫某某銘恩等以公卒之次年某月日葬公於某鄉公家無一椽銘恩薄宦留故土夫人率貽棫貽樸還都下壬辰四月六日夫人卒於京寓而世臣適在貽棫貽樸衰經雪泣而言曰母氏又棄養不孝今當以喪歸而先大夫墓碑未立以屬吾子世臣自著籍門下者於茲二十有五年顛躓百出重爲公知人累唯不苟爲文尚足取重

後世以永公德故次其狀而繫以詩曰

天篤哲人於湘之澣弱冠起家班於鵷鷺再躋列棘十枋斯文匪惟造士抑孔勤民誠格

兩朝欲試以事天不憚遺周行空寘位并道崇澤乃未溥日營寰中志齋泉下爰伐貞石以紀名德必有達者善繼無極

兵部侍郎吳公墓志銘

蔣湘南

本朝取士之制專重進士科進士科得人之盛莫如嘉慶四年己未蓋當

睿皇帝親政之初星輝雲爛景運方新而總裁官又爲朱文正公以神化之丹青亭毒羣品故能選驥躍龍而取之五十年來所稱名臣循吏儒林文苑皆輻輳於此榜而吾師吳公美存先生年方二十有一爲此榜最少年入翰林習

國書文正公尤愛偉之六年散館改主事翌日奉

特旨授翰林院編修文正公之薦也公諱其彥字美存先世由江西遷固始明正統時有諱思名者輸粟振饑以義民旌至公之五世祖大朴公天啟二年進士知廬州府禦寇贈太僕寺卿高祖德昌曾祖夢巖俱

縣諸生祖雲亭公諱延瑞乾隆三十一年進士官至廣東糧儲道自高祖以下三世皆

贈光祿大夫妣皆

贈一品夫人公父鑑庵公諱烜乾隆五十二年進士官至禮部右侍郎

誥授光祿大夫妣許太夫人

誥封一品夫人公生有至性讀書穎異年十四補縣學弟子員十七中

乾隆六十年河南鄉試舉人大為座主襄平蔣礪堂先生所器據文章

定福澤特置弟十七名以寓傳衣之意蓋襄平鄉舉時名在十七也襄

平後大拜門生屬吏徧天下獨於公奇賞不去口嘗語人曰凡為國家

辦大事者皆有福人也及公以四十之年官至少司馬人始服襄平有

人倫鑒云公既受

睿皇帝特達之知為編修官又兼方略館繙書房

文淵閣校理諸職踵鑑庵公後以史局為家學詞館榮之嗣後每晉一

階皆出

特旨二十年春以侍讀學士與工部侍郎顧皋內閣學士張麟同修

石渠寶笈亦

特簡也每

召對

天顏溫霽獎其謹慎二十四年秋督順天學請

訓時

上曰汝父在京以汝爲順天學政便於歸省未一月擢兵部右侍郎

諭之曰汝父子同官二品當思爲國報效

聖情肫篤不異家人父子矣公感

知遇之隆以翰林官專司文字無可圖報每於使旌所蒞矢公矢慎務

使海無遺珠且以文章觀人福澤預儲爲

國家異日之用凡同考順天鄉試者四典江西鄉試者一湖南鄉試者

一所取之士中外官皆有名於時洵能傳朱文正蔣礪堂兩先生之教

也先是公父鑑庵公爲順天學政性剛正人畏之如嚴師公則休休有

容納士於春風中而薰沐之薄技片長獎借無己人樂其寬一時文風

丕變多士鼓舞於不自知焉道光元年鑑庵公卒於京邸明年春公扶

柩歸里居里門者兩載值大水漂没人品無算公捐資拯救多所全活

已斃者予棺以葬復置悅生堂於東關以惠窮民之無告者聞倡家有

蘇州世族女贖之招其父來爲具匭嫁於士人蓋公之好施出於天性自其爲翰林時已時時以周急爲務不足則典衣佐之又好栽植後進選入家塾督課而獎勵之湘南卽親受業於公者也道光三年十月服闋以微疾遽卒年四十有五聞之者異聲同歎莫不謂天奪善人之速也公蘊和平篤厚之德擅承明著作之才木天起家卿雲繼武持節以導揚

皇化爲職業居鄉以扶樹善類爲事功

聖天子方以公輔待之天下人亦想望風采以爲儀廷之鳳然而回翔侍從未親簿書霖雨之施涵而不潤徒令人致歎於經綸之未竟而已公生於乾隆四十四年十月初九日卒於道光三年十月二十八日元配周氏寶雞縣知縣諱賡公女繼配戴氏兵部尚書諱聯奎公女皆封一品夫人子集禧正二品蔭生刑部山西司主事側室郭安人出女三長適翰林院編修郭道闔次適某又次適某以某年月日葬於固始縣某山之原銘曰

清曜秉精嶽靈育德繼體二勳庭聞是則攬轡皇衢
帝心攸屬黑頭稱公蒼生錫福文章報

國霖雨未施儲才備用亦惟

天知天不祚年朝野同歎棣萼方滋佑啟彌健大別巍巍淮水孔長靈風不沫以惠梓桑

吳芳培傳

安徽通志

吳芳培字霽菲涇縣人乾隆甲辰進士選庶常授編修嘉慶初歷侍讀典試四川時教匪蔓延秦蜀遂駐沔縣為畫城守事宜賊遯兼程進事訖還京具奏匪情

上深加褒諭明年督學河南秩滿入都遷右庶子累擢詹事府詹事督順天學政升內閣學士兼禮部侍郎知貢舉再任順天學政擢兵部侍郎歷吏部右侍郎都察院左都御史署吏部尚書以事左遷兵部侍郎復歷署左都御史充庚辰會試副總裁尋調兵部左侍郎道光二年蒙恩以原品休致歸甫二月卒

光祿大夫禮部右侍郎王公墓志銘

姚文田

道光三年十二月戊申禮部右侍郎勿庵王公卒於位文田方奏事乾清宮歸聞之往哭於其邸第蓋文田與公生同里舉同歲又同官於朝者幾三十年氣誼之親逾於兄弟不自禁涕淚之橫墮也公為人渾

厚和易與人處終日無戲言平生口不言人過亦未嘗臧否人物其視天下人無一非君子故自達官貴人下至內侍官役無一人不稱爲長者其胸次洞然未嘗有絲毫蒂芥城府蓋天性然也文田好肆論時或觸忤人事過常輒自悔每見公歎以爲不可及公領乾隆己酉鄉薦六十年乙卯捷禮部試第二第一人卽公弟以錕一二名皆浙卷前此所未有時總裁竇東臯先生謂論次當以文不當以省故力排眾議焉亦不意其適爲兄弟也先生碩學前輩平居每詆訶後進人多積憤欲借是傾先生雖其門下士亦有下石者因磨勘停以錕對策四科又謂殿試卷過劣不能足向例十本之數思以此激

上怒及拆封則公實爲舉首

高宗純皇帝謂讀卷諸臣曰是天也於是謗燄遂熄公兩充順天鄉試分校官再出典江西省試一充順天副考官提督江蘇學政所取文皆平正通達一洗險怪蕪雜之習由修撰擢司業歷遷工部左侍郎調禮部右侍郎六曹惟禮工事最簡不能有所見長公素善啖飲食常兼人體豐碩不能任勞苦故心亦頗安之然公事未嘗稍廢嘗以薦入直

南書房

仁宗睿皇帝素知公端謹克盡師道又改直
上書房公卯入酉歸恪勤匪懈及

今上卽位以

潛邸時見公出入億甚因

命專理部務然

眷待之恩如舊公以此益自勉易簣之日部中方有奏事先雞鳴興肩

輿詣

東華門例當下公兀坐如睡家人輩屢請不應時子景瀛姪涑皆從亟
命昇歸已不能復言及辰刻嗒然化去倉卒變生舉家號慟然公實未
嘗有疾痛危苦其生也有自來故其終也亦灑然去耳性孝友沈太夫
人年八十不能至京師又不欲公歸養公望雲之慕無日無之先是兩
世以下兆未定久而不葬公持喪歸與諸兄謀速就窆焉以錡旣被議
後仍入詞館未久卒公傷痛之甚兄子丙從公京師由編修今官侍御
史歷華資陟清要皆公之教也所作詩文皆有集藏於家公諱以銜字
署冰號勿庵先世由休甯徙歸安曾祖祖考及妣並以公貴
封贈如例公生於乾隆辛巳十一月二日享年六十有三配程夫人先

公十四年卒側室石氏

例封安人子一景瀛道光元年正二品廕生女一適編修今官雲南大理府知府吳振棫孫一志楓孤景瀛既扶櫬歸里將定葬於郡城南之射村以書來乞銘墓幽文田誼不可辭銘曰

充然者其容粹然者其德思警歎之猶聞悲泉壤之難卽瞻馬鬣之崇

封兮願永峙兮無極

從兄子鍾溪侍郎墓志銘

陳用光

吾世父恕堂府君之次孫由乾隆己酉鄉舉弟一癸丑進士以

殿試一甲第三人為編修歷官至工部右侍郎名希曾者吾伯兄節庵府君之次子也少孤而敏於學工為文有治事才既官侍從屢膺使事

逮陟卿貳

仁宗睿皇帝益深器之既

命督學江南甫半歲

召為刑部右侍郎旋

命偕戶部右侍郎成格讞獄浙閩蓋將大用之矣復

命未幾咳疾發乞病踰時終至不起遺疏聞

仁宗爲歎息者久之吾世父四子伯兄旣早世季兄仁山府君由陝西布政使

內召爲太僕寺卿旋再擢爲倉場侍郎與鍾溪同居朝列季兄卒而鍾溪繼之其撤瑟之辰相距甫半月蓋丙子之季冬也家門方慶振興而有顯望者先摧鍾溪之身雖顯而志亦未究可悲也夫君字集正又字雪香鍾溪其初入詞館時所自號也其官由編修擢贊善六遷至內閣學士兼禮部侍郎擢工部右侍郎自江南還爲刑部右侍郎調左侍郎旋補工部右侍郎其使事典雲南貴州江南試督四川山西江南學分校丙辰會試主庚午順天鄉試讞獄於浙閩其任史館編纂事充

國史館

武英殿

實錄館纂修

熙朝雅頌總纂官及擢卿貳充

武英殿

國史館河渠方略館文穎館副總裁讀

殿試卷閱

朝考卷直省選拔貢生

朝考卷而充教習庶吉士則戊辰己巳凡再膺

命其充

文淵閣直閣事則

命於閣學時充

經筵講官則署吏部右侍郎時也其與

重華宮聯句茶宴者四其被

賜有

御製詩文集及文綺字畫筆硯書籍不可勝紀晚名其室曰

賜書千卷之廬以全唐文千卷特紀

恩遇也君之督學蜀中也士多客籍文有假手君禁約書吏僕從杜其
根株其馮於法非甚不可教者輒懲其惡而導以善其士之有才者獎
勵甚至以故士畏其嚴而仍樂其寬及在山西士習樸於蜀中鮮馮於
法者君煦嫗以教士乃奮興於治經而詩亦漸諸聲律矣稷山令及校
官爲士論所薄有攻其冒試者倡言欲罷試君不爲動徐開示之按冊
唱名以使諸生進而黜其所攻者終試時士無譁既効令及校官而士

亦曉然於法度咸悅服其在江南僅試蘇州太倉松江常州所取多知名士士爭濯磨而以其未終厥任爲悵也在工部考核工程慎屬曹司擇其端謹與爲淬厲在戶部時亦然有曹司欲兼他司主稿者君不同畫諾曰是嘗辦某事安可兼司若吾所見不當則侍郎固可聽劾也終皆從君言先是有御史劾總辦秋審處多紕袴貲郎者既得

俞旨及君貳刑部而總辦猶未補人君曰是職安可曠今所欲掄委雖非紕袴亦資淺望輕者曷不遴資深望重者眾方議而君以使事出矣君之在部能虛懷以接曹司使得盡其言而及其有不可者則又持之甚力蓋君沒而朝士嘗舉其軼事以相與稱述如此君性開敏而喜求實用明輕重慎取舍遇事亦敢爲有氣少時諸叔祖嘗使之句稽質庫事他人不能得其要領者君至一按其籍主進者咸懾服眾謂君才任治劇也當壬子北上時先府君笑謂之曰汝成進士且作知縣否君曰希曾雖得部曹亦乞假歸佐叔祖治義田祭田及諸鄉義莊事以究闡先人之緒也先府君喜曰集正有器識矣其爲編修典雲南試還有欲借置資於納資官主進者君笑謝之曰是得無非公儀子拔園葵之意乎且翰林不可有市心也及爲卿貳朝官之業離者或欲議媮亦笑謝

之

睿皇帝嘗詢其有往還否既知其不相識則曰朕知其與汝異趣也其初得閣學時語同年潘芝軒尚書曰

國家之設此官欲使閱題本而兼嫻六部事儲材之意也吾輩可憚煩而不一審其所畫諾之事乎其爲

國史館副總裁於本

朝大臣之有政績者錄其副以時省覽而於江西之有著述入

四庫書目者自明以來皆錄取而纂輯之欲都爲一書而未及焉蓋先大父凝齋府君嘗有輯江西文統之意矣未及爲而遽卒君與余偕受業於魯山木先生略知先大父之意又嘗奉先府君命偕余同檢閱凝齋府君藏書編爲目錄以藏之五宅故其欲推衍先志如此君之文得山水清剛之氣而傳以所博采及居館中作詩賦皆能工與翰詹都試皆得前列循資遷至卿貳惜其所欲爲者未能究厥志也君兄弟三人兄希祖庚戌進士官至浙江道御史弟希孟辛酉選拔貢生君事母孝而友愛兄弟篤母黃太夫人性嚴毅君先意承志能得其歡心女弟二人同居京邸諸甥皆賴其提攜以充裕其家兄雖爲部曹而其家計皆

君爲區畫之弟佐治家事以拔貢可得知縣欲出就官君挽留之而爲
納資得同知比得選而弟以病卒矣當癸酉督學江南時與余別嗚咽
言曰希曾尚爲能知先人之志事者欲推究之而恐其弗及焉惟吾叔
自幼與同筆硯其有以明之也余曰君年甚壯受

國恩甚厚今所以報

國恩而衍先澤者其事未艾三年之別何遽言是雖人事錯迕難以自
行其意然寬裕其中優悠以埃之君才無不克遂也嗚呼孰謂其言乃
若讖自江南還雖尚同居京師二年餘而終以咳疾不起吾今乃銘君
墓也余能無感於中乎君之疾自典試江南時勤閱卷而得之亦足見
其不苟於使事也嗚呼悲夫曾祖道世所稱凝齋先生也祖守誠恕堂
府君也仕至金衢嚴道父元節庵府君也皆以君貴

贈如其官妣皆

贈一品夫人君卒後一年母黃太夫人攜其子婦諸孫歸後君四年卒
於家娶同邑江氏生子二晉恩孚恩縣學生側室子一升恩女五幼者
未字壻江承誥臨川壬午科舉人李鳴珂嘉善錢沂南豐趙登峻君以
嘉慶二十一年十二月二十四日卒年五十一某年月日葬於某山某

原爲之銘者從叔用光也銘曰

先君昆弟曰維五支世父之澤伯兄培之孝友溫恭鬱而早世德馨所襲茂於厥嗣三子皆雋仲也尤才

帝眷上承家聲是恢駘駘原隰與與著位和而有守廉而不剝黎水湯湯邑之西鄉居是望族朝頌載揚季父晚登同朝半載再旬偕喪士悲友駭宗生族茂洪幹俄神高曾矩矱孰繼孰承繫余弱植曷以負重求福不回庶偕羣從列君懿美式告將來幽宮旣安無恫君懷

禮部尚書姚文僖公墓志銘

劉鴻翱

道光七年十一月十一日酉時

誥授光祿大夫秋農姚公卒於京寓距生於乾隆二十三年七月二十六日寅時壽享七十歲遺摺入

天子震悼諭內閣禮部尚書姚文田嘉慶間由修撰洊陟卿班入直南書房晉階卿貳朕御極後擢任左都御史本年復授禮部尚書久直內廷歷司部務清勤敬慎克盡職守方期益資委任乃遘疾數日卽爾奄逝聞之殊堪軫惜著照尚書例賜卹任內所有處分悉予開復應得卹典該部察例具奏欽此越五日禮部請諡奉

旨予諡二十七日内閣上諡勤學好問曰文恭慎無過曰僖
賜諡文僖

諭祭葬八年春公子晏等扶公柩歸里卜於某月某日葬公於蘆泉圩
以翱列公門牆二十餘年知公最深以狀乞銘於是翱泣而言曰
天子之惜公可謂至矣按狀姚氏系出吳興自元以後爲湖州府歸安
縣人隸浙江世居府東北鄉姚家埭明萬曆中徙居府城東後徙居月
河是謂月河姚氏公少居貧父贈光祿公客游四方母沈太夫人曰授
經日或不再舉火對居有舊房廢地親戚勸鬻以餬口太夫人曰吾子
會有宦達時留此地建一品坊耳乾隆己酉公以拔貢生領鄉薦甲寅
高宗幸淀津

召試授內閣中書嘉慶四年己未成進士

殿試一甲一名及第授修撰官階右春坊庶子國子監祭酒詹事府詹
事內閣學士兼禮部侍郎署吏部工部侍郎任戶部禮部兵部侍郎晉
都察院左都御史署禮部工部尚書終禮部尚書內差

文淵閣校理

國史館總纂

實錄館纂修

日講起居注

文淵閣直閣事稽查中書科教習庶吉士管理工部戶部錢法堂事務
南書房行走

經筵講官總裁丁丑會試正副考官庚申廣東辛酉福建丁卯山東乙酉順天鄉試學政廣東河南江蘇文武

殿試讀卷者三

朝考讀卷者一學正學錄教習拔貢閱卷者各一由通籍至正卿多

賞賚尚方珍物

仁宗時伊犁進馬

恩賞凡二年在江南

頒福至官廨嘉慶閒惟公一人爲異數

今上四年

賞紫禁城騎馬公生平以文章經術結

主知嘗謂士或泥於古而戾於今是迂儒之爲也故孔子曰誦詩三百授之以政不達雖多亦奚以爲公使粵時奉

旨密查地方事公奏廣東遼闊人犯審解重費宜由巡道勘定又奏大吏因沽民譽汰舊規致官吏掣肘又奏大吏輕受下控致民不畏上又奏提督玩視洋寇致海氛不靖皆報可嘉慶十八年林逆不靖擾及宮庭是時

仁廟引咎責躬詔求直言公上疏謂唐虞三代無過教養南方之民患在賦重北方之民患在徭多久督撫之任則州縣之供費省寬州縣之考則人材之顧忌寡

仁廟用公言諭吏兵二部刪減則例復陳急農桑緩刑獄疏曰下之於上不患其不畏而患其不愛任刑之世無過使民畏老子言民不畏死奈何以死懼之漢文帝時法漏吞舟之魚而吏治蒸蒸不至於姦者民愛故也秦人專尚法律其勤至於衡石程書而一夫夜呼亂者四起由於但使民畏故也衣食者百姓養命之原飢寒切身雖慈父不能保其子而君安得有其民故孟子言民事不可緩也

仁廟用公言諭天下貴農重粟尚德緩刑公使江南時復進崇正論一篇

仁廟褒獎

今上繼理大臣有陳漕務欲禁浮收不如明與入折與民便者公復論東南之大勢小民州縣旗丁各有不能上達之情奏入折收之議遂寢湖南耦庚賀方伯擇入皇朝經世文編讀之者以爲如良醫之診脈癥結畢見雖久任封疆未有能如此之詳且盡者制義之興七百年莫盛於明之正嘉國朝熊劉諸家各自開生面惟安溪李公東臯竇公及公力追取正始公學問無所不貫不僅制義爲學者宗而天下稱公之制義知與不知曰此今之安溪東臯也安溪李公在

聖祖時東臯竇公在

高宗時皆以釐正天下文風爲己任公當嘉慶丁卯官

起居注禮部先一日題請山東鄉試正副考官山東爲附畿大省向用大僚典正

仁宗已簡用公因

召見語軍機大臣朕明日用一極有名人爲山東考官汝等當非意度次日宣

旨公名下眾咸服

仁宗重公制義故雖經術如公條奏地方利弊如公籌畫國計民生如公終不用公作督撫以公司天下文衡幾三十年蓋以李安溪竇東皋待公然東皋竇公中間不無蹉跌恩遇不如公安溪李公進位大學士過於公使天再假公數年亦必陟綸扉參贊密勿方期益資委任遽爾奄逝誠如今天子明詔之所惜公既貴曾祖諱德謙升

誥贈光祿大夫妣沈氏

誥贈一品夫人本生曾祖諱德謙

誥贈光祿大夫妣沈氏生妣許氏皆

誥贈一品夫人祖諱世孝

敕贈承德郎晉光祿大夫妣沈氏

敕贈安人晉一品夫人配周氏

封一品夫人先公七年卒子三人長晏二品廕生刑部候補主事次衡國學生候補布政司大使出嗣皆周夫人出次倍勤側室王出孫男四經輔生員經炳經旬經第公初字經田後欲易名夢神以今名示疑所

出神言不記見龍在田天下文名乎號秋農及營墓田號梅漪莊因稱
梅漪老人性恭儉平生行必踐言衣服未嘗鮮好待人常無所忤人亦
不敢干以非義於書無所不讀學宗程朱嘗言五代後人道不至陵夷
者宋儒之力著易原一卷春秋日月表五卷說文聲系三十卷說文考
異三十卷古音諧八卷四聲易知錄四卷後漢郡國志校補一卷廣陵
事略七卷邃雅堂集四卷詩二卷賦一卷進
御集二卷四子義一卷旁及天文五行雜占醫經著內經脈法一卷疑
龍撼龍經注二卷相宅一卷皆藏於家夫文章之遇合難矣遇而得供
奉

內廷從容侍

天子翰墨之娛外而育秀掄才舉一世之文復之於古可謂儒者不世
之遭與公少困躓場屋多年卒以天下第一人受

三朝厚恩上封祖父下廢子孫蓋太夫人所謂留地建一品坊者以公
卜也公於斯文可以無憾銘曰

會稽之嵯峨兮錢塘之澎湃兮實生公兮公之著作與江山以俱永兮
經筵講官戶部右侍郎顧公墓志銘 陳用光

歆齋顧公以戶部侍郎致仕歸逾二年以道光壬辰四月八日卒於家享年七十其同年友陳用光於癸巳春過無錫以詩哭奠於帷堂其孤子詒綬以銘幽之文請嗚呼余與公相知自未爲同年時及同官翰林居京師益相契合數十年如一日今乃過里第而哭公其安能不爲銘按狀公姓顧氏名皋字緘石一字歆齋明端文公之兄性成是爲公七世祖四傳爲翰林院侍講學士仔公之曾祖也祖維錡父洵三世皆以公貴晉

贈光祿大夫如公官曾祖妣薛祖妣華王薛妣吳皆晉

贈一品夫人公自幼穎異十歲能爲擘窠字顧年廿四始補金匱縣學生而冠其曹乾隆乙卯中順天鄉試嘉慶辛酉會試成進士

殿試以第一甲第一人授修撰充

高宗純皇帝實錄館纂修國史館協修甲子督學貴州激濁揚清弊祛士懷其奏改永從黎平開泰學額至今人以爲便也任滿旋京充

文淵閣校理

文穎館總校擢國子監司業晉翰林院侍讀充

國史館總纂

日講起居注官丁父艱歸服闋補侍讀教習庶吉士乙亥與編輯祕殿

珠林石渠寶笈於

懋勤殿擢右春坊右庶子轉左庶子丙子典陝甘試還擢侍講學士丁

丑轉侍讀學士戊寅奉

命直上書房蓋

仁宗夙知公當擢司業時兼有贊善缺公名第九

仁宗以司業職任學校視贊善爲重乃越次用公至是而

眷顧逾篤矣及七月扈

蹕熱河廿五日

仁宗龍馭上賓而是日辰刻

御筆已擢公詹事

今上卽位次日

召見公與同直

上書房學士徐頤

上親執公手而大慟也道光元年擢內閣學士兼禮部侍郎是年辛巳

恩科

命充順天鄉試副考官授工部右侍郎兼管錢法堂事務壬午典浙江
試癸未充會試知貢舉調戶部右侍郎兼管錢法堂事務乙酉署兵部
左侍郎充順天鄉試副考官丁亥補戶部左侍郎管理國子監事務
命紫禁城騎馬充

經筵講官戊子署禮部左侍郎己丑以疾乞假請至再始
俞允而具摺謝

恩時

召見慰問有加焉公之在戶部也不爲激亢之行而攷覈利病慎稽出
納懷乎其不可干以私嘗與余言學期見諸實用而迴翔於文學侍從
之職久及任經世理物之責復未能壹志向專思慮以求稱職爲足愧
耳嗚呼公之自言如此則其中之所存者何如哉公於詩文詩餘字畫
皆澤古得其自然之趣見之者如見其性情之易良慎密也自直
懋勤殿得見

內府珍藏畫益進

上數以扇紙命作畫以進焉公篤於倫理友愛仲弟督之學而任其婚
娶事必加厚公少從吳雲峰某學雲峰器公字以孫女公歸田後旣出

資修端文祠宇贖學士墓前田一區栽樹編籬以垂久遠又爲雲峰置祭田十五畝以報其教養之恩其在官時祿食常不給而敦恤親族常若不及也公之爲文武

殿試讀卷者二新進士及拔貢

朝考閱卷者三庶吉士散館翰詹大考閱卷者四蒙

兩朝錫賚書籍墨刻人濩貂皮等物者歲以爲常及旣歸以戶部失察假照案降四品頂戴辛卯

上推五旬萬壽恩復公侍郎銜公之乞假歸也余方視學閩中及使還見公於里第公約余遊惠山顧時已歲暮辭不往公猶視余於舟中語移時別去嗚呼孰意今再過無錫而遽哭公於帷堂也公配吳夫人雲峰女孫也

誥封一品夫人先公三年卒於京師子三人詒綬以增生得三品廕爲中書科中書娶王氏繼娶虞氏次恩綬以

國史館謄錄議敘候選通判娶孫氏次元綬國子監生娶楊氏繼娶查氏辛酉同年陝西糧道查簡庵納勤之女也簡庵夫婦歿而查氏幼養於余家公爲元綬擇繼室娶焉元綬勤苦於學戊子應順天鄉試不遇

邁疾卒未幾吳夫人卒查氏所舉遺腹子復不育余在閩中數以書慰公及過公里第公掩泣命元綬之嗣子曾煦出見余也公孫五人曾祺縣學生娶毛氏次曾煦曾樹曾蕃曾獻曾孫家康家吉銘曰

端文之裔文學騫上第既掇星使聯躬躬寅畏心彌虔受

知入直登三天邪蒿斥饌
帝曰賢試之吏事覘所研度支名實期無愆樸誠自矢心悁悁乞疾歸去剴惠泉課孫日持手一編少歷艱苦學則專貴而澹泊性弗遷儒素不替涇里傳琢詞紀實垂新阡燾厥後世德其緜

戴司寇別傳

潘啓

金溪司寇姓戴氏諱敦元浙江金華人也乾隆癸卯年十五舉於鄉庚戌成進士由刑部主事歷官中外至刑部尚書以甲午十月卒年六十有七

贈太子太保

子諡簡恪凡其行業宦蹟當掌於史氏獨平生志趣有足述者非久與交處不能悉也君性一如諡內甚慧然簡而寡營凡人事居處若時當適來而適應之皆非所必爲者然居不廢職行無異趨蓋其恪也平生

惟喜見書姿稟殊絕每日成誦書可高七八寸彭文勤公視學浙江君
年十歲郡縣以神童舉試公呼至案前問讀書幾何書一字引音義旁
通者問之君乞筆註所出書多在所引外驗書皆實故名早稱於大人
長者其一生綽得自行其志趣者亦名有以先之也言動樸訥對人無
容儀交人無問訊共坐無談論終日冥默類窮山方外遺形去識之士
至寒暑飢渴亦似未嘗切膚然不如方外屏絕感際初履曹職未嘗識
上官及出任觀察至爲藩撫亦不知其身在羣吏上治官事亦如身事
默默寡可否遇案牘如讀書一日所見必盡而後已每至一官取積牘
覽一過他日吏誤摘語之故吏亦無敢欺者復居京師同僚非公不得
見部事畢歸坐一室家人爲之設食飲暮則置燭對書坐倦而寢否則
坐暗中倦亦寢雖飢甚不言也窺其室積塵漠漠坐臥處皆亂書無完
軸者行巷塗嘗無車馬假歸武林時大憲某公宴之雨著屐往終飲羣
官擁送鼓吹門啟呼戴大人轎馬君笑索繖自執之揚揚出門去其一
生行動自由每如此然亦非傲兀視旁無人也目短視看書以紙磨鼻
一磨則終一紙面時黟然晚自言善忘嘗試之猶不遺一字然寡爲詩
文終歲或不舉管晚好天文算學亦無所論說蓋善照者光著物而不

必凝澁於物君於讀書亦適然目之適然不忘非必欲有事焉耳其一
生類動以天未嘗近邊際其遭遇亦適如生質時至而自合自少至老
不計得失亦竟無得失以內實勤恪之故遇人脫略無訾謗人以其簡
樸信之不謀食終身得食爲士大夫處顯位則天厚之也卒之日笥無
餘衣困無餘粟庀其產不及百金其廉潔亦性成者非意於廉也不知
有無之切於身也

潘諮曰唐史於李泌奇不能測司寇爲人洵奇矣哉凡人知覺寓於運
動聖人明粹純一故百事中矩老氏之流則落漠其外而鍵閉其內然
皆有窮日不足之力以自固若司寇皆無事也天地生材固有不落規
矩而自成一規矩者使遇聖人不知其所裁就終何若也

又戴簡恪公紀略

陳奐

刑部尚書戴公諱敦元諡簡恪浙江開化人也公少有神童之目年始
冠舉於鄉二十四成進士宦京師者三十年奐識公於嘉慶戊寅年間
寓居京師外城公頻來曰子無來吾念子可日月至焉也於後移館內
城公亦頻來坐久之或入坐卽便去由是得知交於公公初任刑部史
官力辨某太史得罪事從末減與明臣王公之麟爭臨江守持法緩死

先後同轍有聲於曹旋入總辦秋審處援案審情無縱無濫直省庶獄
胥賴清平每屆良辰佳節他史官皆歸私宅公乃信宿本衙門辦事如
平日其勤敏如此也庚辰京察一等出巡廣東高廉兵備道與之室在
山東東平州不得歸公曰子姑將小車先反東平我妻孥至偕南行可
乎公出都從旱路公眷從水路水路遲數月竊謂公行粵久矣比至蘇
州猶訝及見之又遲之數月迺獨至廉州迎官者皆不知公所在新官
赴任憑限路程廣東九十日踰限處分著爲例人有以此誚公公笑曰
功名有定數得失無介意是何急急爲蓋公以在部之日久而地方情
形未能躬自經歷蘇州南濠一大都會粵人作賈來去如梭殆無虛日
故賃屋而居雜處於廣稠之中風俗之監惡輿情之凋敝早已知之詳
聞之熟履斷決治不啻燭照而數計焉粵人咸歎服公之神道光壬午
由江西臬升山西藩來都之一日與適過其館公短褐出與亦不具冠
相見三更乃罷公歎曰吾自江西來今晚始得食大米飯途次日以麪
餅六枚作爲三餐不解衣不下車五更呼夫驅而行而已凡上官自臬
藩過境州縣設公館給供應盡送迎禮公獨行數千里而車子館人初
莫知其爲新任藩司者到京始喚僕使令客至屏僕戶外烹茶漉酒皆

躬爲之踰年護理湖南巡撫旋入內爲刑部尚書乙酉與從子兆熊典
試閩闈告假歸里猶道公存問意氣勲勳懇懇明年兆熊不祿與再至
都門公猶步送長春寺從此則不復見公矣甲午冬十一月公遂薨於
位公之在豫章也幕無賓客延熟悉刑名之屬吏襄助共理不數月清
全省積卷陳案四千餘件有縣令某素與公善獲盜多名在例獲鄰境
斬梟犯自三名以上者送部不及三名者不送部公定斯讞分案申詳
議止加級其人忖然公乃婉喻之曰吾與汝固友善必積陰德於子孫
戕人命升己官君子哀矜不善是也於以知公之仁公離豫章之日告
家人某日啟行至是不果行又告家人某日必啟行至是復不果行家
人曉其意爲治裝先發軔公素不預問家事誠慮家人門子自本官去
後需索擾地方官耳山西藩署向有陋規上自本官下至僕御分得贏
餘謂之釐頭銀兩公至則曰本官有養廉者也僕御皆豢養於本官者
也何贏餘之與有於以知公之清山西汾州府志爲休甯戴東原先生
經修天下志斯稱第一矣偶言及之公曰欲此書當寄子客有知公者
謂公生平無浮語雖不意之言要必踐其實旣而書果至於以知公之
信公每物色人材置行篋中片長薄技無有棄遺公治經不尚專家人

或有擲揄焉者必正色立辨之嘗自言弱歲習制舉文僅八月功耳惟
專好雜學無少倦曾贊外家時堂中有書八架一月盡讀之最喜觀天
文厯算與歸安陳靜安杰甘泉羅茗香杜衡往復討論究未嘗立一說
以爲昔人之言備矣公素性簡易凡酬酢讌飲之盛一概屏絕弗與親
戚亦罕見其面面之又藹藹然若平常乙未公之喪回浙遺言擇兆在
浙垣之西湖兆穴未卜停靈於西湖之德生庵僑杭州往與弔焉其
孤子樹琴屬免爲公作傳免未有以應嗚呼公敷歷懋績中外所共知
其立朝之梗概自有史臣載筆直省之名宦郡城之鄉賢宜乎廟貌烝
嘗紀功載德揄揚謳頌稱道弗衰免不足爲公傳又曷足以傳公今幸
見公門人吳姓舫侍郎爲刻遺集郡人胡琅圃主政次瑤孝廉昆季董
其校役走詢公之佚事免遂類敘公與下交之始末耳濡目染申紙播
毫筆雖不文辭得其實亦聊以答孤子之前請云耳公春秋六十有七
配方夫人子某某孫曾孫某某樹琴奉母淹留於京邸貧不得歸葬其
父奠每當春草之發生秋螢之流火留連河壩俯仰澤畔過拜公靈追
懷公德徒令陳人長物顧此低徊而不忍去不禁悲愴興悼而增慨也
已

刑部尚書陳公墓志銘

陳壽祺

吾鄉刑部尚書陳公既薨之二年葬有日嗣子兵部主事景亮以公陷幽之文屬壽祺曰先人願有託於太史壽祺惟昔者虞史臣繼堯典特陳皋陶謨所以重民命著維明維允納一世於仁之治其旨微矣公由翰林改刑曹訖爲大司寇前後在刑部者二十八年膺

兩朝之知以繼者無人數久其任宜得如虞史臣者載筆比公皋陶壽祺何足任此雖然壽祺前史官也嘗與修國史又獲銘當世名公卿勳績鄉有大賢敢不竭知畢慮以報故不辭謹按公諱若霖字宗覲一字望坡閩縣螺洲人乾隆丁未進士改庶吉士散館授刑部奉天司主事進四川司員外郎總辦秋審進直隸司郎中嘉慶八年秩滿截取知府本部奏留又五年以資深超擢四川鹽茶道旋授山東按察使未上移廣東再移湖北廣東就進布政使歷雲南廣東河南浙江巡撫以道光元年進湖廣總督二年移四川四年入爲工部尚書管順天府事轉刑部公精於律學善折獄廷臣莫及長官有疑獄必歸公鞠奉命必以公行卽他部有交辦事亦請以從其隨太常寺卿邵自昌讞獄易州由

特旨派蓋是時

先帝已知刑部有陳某矣及乞留疏上遂

兩記名屬新授甯紹台道張燮

陛辭奉

諭旨陳某承總部務有年爲刑部不可少之員他日可按察使故爲四川鹽茶道未三月遂有山東之

命再移廣東湖北最後移四川凡四爲按察使廣東四川案牘紛糾倍於他省其爲廣東

召見養心殿二次爲四川

召見勤政殿三次皆

諄諭而後遣天下曉然知二使爲

特簡用非常調也公旣熟刑名倍加勤慎積牘一清新牘無留裁決稱上旨陳臬八載部無駁語而迴翔四省止舊職難其替人也故爲布政使未一年卽

授公巡撫

今天子嗣初服黜陟幽明內外臣工爲

先帝簡用者悉加隆擢而公進總督蓋公負經世之略于水利扼塞行師控夷捕逆諸大端莫不通究而歸本于愛民其于治獄亦體

上好生之德以洽民心異夫察察之爲赫赫之名卽所樹於天下者可參互而得也公四爲巡撫遇水旱災祲輕則奏緩重則奏蠲奏借籽粒

浙江災尤數凡三請

命焉其督兩湖奏減苗租二萬餘石豁積逋七萬二千五百餘石往時南新北新二關罰商漏稅十倍本貨公撫浙止令半入歲課轉充四川中江覃萬典犍爲道上蕭來修妖言煽眾時公爲督止法爲首數人姦宄自戢夫漏稅干禁妖言干紀一與輕比一誅止其魁可想見公廣大之政焉其治水於浙江奏修會稽新沙裏山陰宋家樓上虞呂公埠余埭巷蕭山上新廟新林塘動帑幾萬金其新林塘距海遠公奏新林雖潮汐不至而竈牧兩地多積水遇漲則壅而塘當其衝易潰請濬竈地舊溝洫俾多容納就牧地西北低下者引水分洩移其土培塘根補築馬塘閘段可期一勞永逸在刑部尙書時奉使勘湖北京山王家營潰口奏襄河上游民請廢隄行故道督臣嵩孚奏依治河工程報銷均不可行請先造攔水柴壩次挑潰口南胡李灣沙塊俾下流宣暢然後添

築潰口各壩護隄工省而事集可期不壞并如議行其于扼塞以湖南
洞庭君山孤懸湖中盜賊所窟奏移岳州府同知水師守備鎮之以辰
州大油溪舊產金沙封禁後時有匪徒出沒請移辰溪守備駐其地兼
轄北溶界亭二汛以四川南部縣新鎮壩爲商鹽要地舊制裁鹽大使
改鹽務歸縣縣距鹽井遠請移富邨驛丞于新鎮壩驗引緝私公私交
便其行師於權廣東藩印降海寇郭學顯得其人船器械毀之既回臬
任以舟師生擒西路烏石口斬徇粵洋無盜

賞戴花翎爲四川布政使平中瞻對夷酋洛布七力巡撫雲南平臨安
府江外夷并得其要領移時而靖其控夷不煩兵力而安輯者越南國
水尾州與雲南開化府河口汛接壤其正州目黃金珠仇殺副州目李
文政家六人內地姦民薛奉彰與同亂及彼國大索已爲汛弁趙秉忠
縱之歸以狀聞公曰此亂民也不治無以服外夷心捕訊吐實解赴邊
界斬梟傳首水尾州夷人悅服湖南苗當蠲逋減租已慶更生公並嚴
禁往時徵租婪索與僞充差員詐錢諸弊益感戴如親父母及公大閱
湖南沿邊二千餘苗寨陳兵護行父老領子弟焚香跪迎道左公爲宣
布

天子仁恩咸呼萬歲道旁觀者以爲前此未有也四川九姓長司官不
諳吏治公奏考試訟獄改歸瀘州並于瀘州置九姓鄉學諸司嚮化比
內地其捕逆獲河南白蓮教首柯老八又獲首逆王五保窩主楊子住
計公旌節所及幾盡東南西省及中州而廣東湖北再至四川三至皆
曰我舊使君也故從怡如歸入爲工部尙書兼管順天府事振饑疏河
捕蝗如故操公化又浸浸漸於北矣

天子曰陳某被知

先帝由刑曹其爲刑部尙書自是掌邦刑者九年歸老而薨廷臣計在
刑部之久無如公者仰見我

國家慎重民命於六卿爲重選甯久一人以活天下至意而公所以答
兩朝之知者始之終之亦藉是可告無罪於
天與萬方百姓嗚呼懿哉公初還

朝蒙

恩賜紫禁城騎馬年七十又蒙

恩賜壽

錫敬典承麻額又四年以疾乞休給假一月假滿

子致政歸以十二年四月十五日酉時薨於天津舟次距生乾隆己卯年四月十五日午時享壽蓋七十有四也

天子震悼照一品給全葬銀五百兩遣官致祭曾祖智祖郡學生藻父國學生秉綸以公貴

誥贈振威將軍光祿大夫妣皆一品夫人公篤內行長兄故遣二寡媳

歲明五百緡錢諸季各分金業其家公仕宦四十年未嘗一日忘族里

族里凶荒異事每令子弟家報彙敘以聞既創螺洲宗祠梓族譜凡育

嬰恤發振災修貢院悉郵金助成之先是公撫廣東修通志及本省貢

院竣餘資數萬即致書故制府孫文靖公請修本省通志時公已逾七

十獨拳拳鄉國文獻如此妻氏李

誥封夫人子三長景福閩縣學生未仕卒次即景亮補蔭兵部主事三

景曾閩縣學生孫承寬府學生承厚承謙承裘承庠曾孫敦初以道光

十四年某月日葬於北園山頭嶺之陽銘曰

有清彌教出吾宗以刑郎始司寇終昔尹制刑具訓蒙公少精律輕重從周誥有倫昇弟封公起閭閻任特隆和聖直黜不枉容公結

主知一于忠長官受質屬協恭三陳邦臬罔奏空持節地盡西南東布
吾

皇澤臣何功議蠲議緩起罷癘有災必告齊豐凶馳關橫索罰半充南
新北新集賈脩滌淤石坡潤枯農宣防瓠子歌融融孤險環湖羣醜叢
建牙移鎮銷伏戎平夷平海兵無攻豸服花翎邀

酬庸九姓侍學苗趨風越南君長懽呼嵩圍空潛伏戮逋兇莽莽千里
息吹隳王臣蹇蹇致匪躬

帝曰汝勤來侍中終始秋官九載供比虞皋陶亮天工皋陶有謨今宜
同壽祺筆弱慙獨扛勉勒斯銘上大蓬

續碑傳集卷九

江陰繆荃孫纂錄

道光朝部院大臣

都察院左副都御史提督安徽學政鄂木順額公遺事述

沈堯

堯至當塗學使署與寶應喬君守敬交君先佐前學使鄂木順額公幕
時時道公之賢又悲公早逝無子恐懿德美行之不克聞於人也屬堯
撰述其遺事堯仰公明德又感喬君謀不朽公之意因為撰次之俟能
文君子擇焉公姓鈕祜祿氏諱鄂木順額字見吾一字復亭滿洲正藍
旗人也始祖某從

太祖高皇帝征伐有功授某官曾祖爾滿達任某官祖伊都任某官父
明安泰江蘇按察使公由貢生授七品筆帖式嘉慶十八年鄉試中式

二十五年成進士改翰林院庶吉士

今上道光二年散館授編修尋升贊善進庶子四年大考山陽汪文端

公奇公文列一等第三名滿洲翰林列一等自公始升授侍講學士轉

侍讀學士遷詹事府少詹事充

日講起居注官

上謁

祖陵

車駕所過

命公與隨

駕諸大臣分視馳道時中官前驅者率踐馳道行諸大臣莫能禁公獨

鞭中官使改行左右道中官愬於

上公卽奏曰關外地與關內異先驅蹂踐則路不平正慮驚

乘輿且

御道非

大駕不得行臣不敢不鞭

上是公奏

輦路肅然

上知公可用陝甘湖南學政先後出缺皆

詔公補授公時丁內艱皆力辭

上益重公服闋數月卽補授安徽學政在任授光祿寺卿十一年夏大

水江溢安徽沿江諸府州田廬悉湮沒公首出養廉銀督守令勸捐士

民皆踴躍當塗縣知縣趙汝和請帑五千兩救民飢巡撫但許給錢二千緡汝和曰下官此請非爲入己計也下官雖無狀斷不忍侵剝飢民如有絲毫入己者身首分離子孫絕滅巡撫大怒竟不許而汝和已被布政司檄將入鄉闡矣公慮汝和去而來代者處置或不當飢民且生變卽馳書巡撫曰趙令查勘災戶章程略定民心粗安事急之時不當改換他人或乖處置夫事必責成於一人斯功罪各有所屬某職司學校豈敢蹈干與之嫌但民命所關不容漠視巡撫得書乃屬布政司改檄他知縣入闡旋勘災至當塗入見公曰汝和所請過多且其言無禮公曰令北人性戇故開罪於公然爲民請命之心殊可原也巡撫曰凶荒振卹總在士民捐助動請官帑存活幾何公曰官帑不發士民豈肯捐貲巡撫曰閣下客官耳乃捐五百金給民獨不爲我地乎沿江災區有重於當塗者焉得人濟之公正色曰某駐當塗故救當塗之災他處濟否恃有公在非某所敢主也學政無撫民之責故但出己貲給民公以

天子重臣巡撫斯土凶荒水旱例得陳請振救事權在己膏澤由心豈學政比哉巡撫默然無以應於是巡撫續以當塗災傷入奏捐己貲百

金助當塗振而給汝和錢三千緡是時當塗不得公民幾殆事頗聞
上益重公有

詔留任遷大理寺卿尋擢都察院左副都御史十二年秋補行正科鄉
試公又將赴江甯錄遺忽中暑治益劇仍力疾上道到試院卒七月十
四日也年四十有一總督陶公澍經紀其喪公器量宏達遇事敢爲不
克竟其用士論惜之公自奉儉甚衣服器用雖敝不肯易而樂周人急
一武生求謁門者辭之乃踰署垣入公詰之泣曰生有老母不食三日
矣稔公盛德願活之公諭教官申飭而陰以金給其母性謙沖不伐當
塗民蒙全活者具聯額奉公公曰此守令之勞我何功焉卻弗受大學
士英和公爲公

朝考閱卷師公在翰林非有故不通謁及以事謫戍公送至數十里外
英和公歎曰吾自恨不知人平日何曾好待君也掌院玉麟公新入軍
機公往謁闈人弗納公叱曰英相國之獲罪皆汝曹爲之奈何猶不知
懼翌日玉麟公往謝焉故相松筠公欲引公爲同志會居母喪乃入弔
公謝曰某平日未嘗修謁蒙公賜唁竊所未安松筠公曰我所以重君
者正以不輕謁人耳君光明挺直

上行將大用後事君好爲之公知星術自言當死於外及疾呼妻女與訣而行夫人哈達那拉氏先公十餘年卒繼娶瓜爾佳氏一子早殤遂無子女二皆未字公待喬君厚喬君彊記過人遺事皆君所記錄可謂不負公者矣

誥授光祿大夫太子太保經筵講官刑部尚書史公神道碑銘徐肅

揚州代儀徵阮相國作

宮保諱致儼字容莊號望之又號問山年七十後自號榕莊老人又自

號樗翁先世出漢溧陽史崇後傳至諱必相者於明洪武四年遷揚州

之江都縣曾祖道義祖積學父元善皆名諸生有隱德以宮保貴累

贈光祿大夫刑部尚書曾祖母董祖母魯母蔣皆累

贈一品太夫人元善公生四子宮保其仲也八歲讀書卽攷訂周禮人

民物產室恆不舉火太夫人以鍼帶易油父子一席讀年十六入江都

學學使謝金圃先生墉歎爲奇才詢知家貧給膏火以助讀焉家無書

詣學宮讀所頒書於尊經閣年二十七補廩生乾隆甲辰

純皇帝南巡以學使薦赴

召試時與試者車馬僕從甚都宮保囊餘十餘錢薄暮無所投宿露坐

田家石磨上後婁述之謂彼時心無所慕臥觀星斗頗覺自適蓋富貴貧賤恬然胷中自少已然矣壬子舉於鄉嘉慶己未會試元副朱文正公珪為總裁宮保中式第一名

仁宗問元日會元是汝揚州人元對以寒士有品學及居尊經閣讀書

狀自元副至書狀四十五字相國增入

殿試

賜進士出身改庶吉士是科得人最盛績學如武進張惠言高郵王引之歙縣鮑桂星全椒吳鼎福州陳壽祺德清許宗彥棲霞郝懿行武威張樹其通顯揚歷中外者則自湯相國金釗盧敏肅坤以下又數十人而宮保為之冠是年太史奏五星聚奎文正因作五緯聯珠圖議者謂國家科目斯最盛也辛酉散館一等授職翰林院編修甲子充順天鄉試同考官累充

國史館協修纂修總纂本衙門撰文丁卯視學四川捐廉修成部考棚刻詩韻辨字略明音訓之學所拔皆知名士有曾為宮保戒飭者十餘年忽來謁曰吾非師幾為名教所不容也辛未充文淵閣校理教習庶吉士癸酉充

日講起居注官

咸安宮總裁京察列一等覆帶引

見記名以道府用尋升國子監司業乙亥三月進翰林院侍講轉侍讀

七月進右春坊右庶子八月

命爲河南學政河南承十八年逆賊李文成之變羽黨未盡有紅鬚賊

劫掠燔燒爲民害

仁宗諭宮保知汝品學兼優操守自好並

諭宮保察視地方盜賊及官屬捕緝事宜宮保以滑縣之亂總由積習

釀成凡地方吏治河工小事言之有司大不便者入告無隱廉知彰德

衛輝府屬吏民習教者眾因將實在情形入奏兼陳州縣官編察保甲

有名無實狀商邱廩生陳忠錦以不濫保爲童生張某毒歐知府暨經

歷某受賕誣陳加斥責陳忿縊死其弟勉旃訟冤宮保列知府經歷罪

於

朝分別鐫革由是上下畏法兩河肅清每疏入

仁宗嘉歎稱爲實心化導者再累遷左春坊左庶子翰林院侍講學士

仍留學政任回京轉侍讀學士

今上御極之元年奉

特旨充

實錄館漢文總纂官秋七月典試湖北累升詹事府少詹事

文淵閣直閣事稽察西四覺羅學壬午升內閣學士充武鄉試副考官

己酉以刑部右侍郎視學福建尋調禮部右侍郎福州試院有地溝運

竹筒傳遞宮保捐廉修號積弊始清漳泉諸州尚械鬪上杭生員何某

者強宗也以爭墳地械鬪上控宮保飭學扣考何訴之撫軍撫軍咨送

考試宮保不可治益急由是械鬪之風頓減臨行生員獻詩送者幾千

人已丑充會試知貢舉轉禮部左侍郎

命偕侍郎鍾昌馳驛審山西平定州朱葛氏一案究出知州錯擬罪名

並門丁受賄狀人稱明允是歲

賞紫禁城騎馬署兵部左侍郎改倉場侍郎壬辰調刑部右侍郎

命爲順天鄉試副考官癸巳進都察院左都御史充

經筵講官甲午春仲

經筵充直講進禮部尚書

命爲順天鄉試副考官調工部尚書會刑部尚書戴公敦元卒

上以刑部事煩重調宮保為刑部尚書宮保謂人命至重侵晨進署書吏司員未至恆一人坐堂上閱視案件如老諸生日暮未畢則攜歸燒雙燭審定遇疑獄與同官難論再三或格於例則於

聖前直陳其情一事未安思之終夜積三年以為常體素健自是苦不能寐會丁酉京察屆期

制書褒美謂宮保刑名詳慎精力如常與湯相國金釗同列一等議敘宮保益不敢自安然用是體益瘁矣是年夏至後病下利夜數十起旬餘稍瘥

上召見溫諭力疾視事冬至前更苦煩躁叟請致仕

上諭以安心調理不許次年二月復固請

上不得已許之猶諄諭以病痊後具摺請安蓋是時

上倚宮保方殷每

召對廷臣

詢問宮保疾狀至於再三宮保亦欲以餘生報

國臨終尚書祁公墳來視疾與談國事疊疊如平時午後嘔吐作旋端坐逝面目如生壽七十有九時道光戊戌七月之十日也遺疏奏聞

上悼歎久之

贈太子太保降

制賜卹有品行端醇學問優裕明允精詳克盡厥職之語嗣於七月三

十日

命禮部尚書吳公椿率太常寺司員為文致祭相國於致祭下加有性

針一可謂知遇之隆而哀榮之備也矣宮保性情誠摯讀書實事求是

終身不為門戶見嘗謂刑以弼教近世吏治不如古者以分刑教為二

也故為學政時抑豪猾伸冤滯勤於有司官及官刑部戒飭屬員如子

弟於浙江汪宗炎一案論大宗小宗引律據經作說帖數十紙曰倫常

者弼教之本也前後主試三為學政三閱會試覆試

殿試

朝考卷四累遷五部所歷官雖一日必勤所事性尤介為諸生時富賈

某持百金求製壽文鄙其人弗許其視學福建也囊空至不能還京立

朝四十年自

兩朝恩賞書籍珍玩數十種外歿後家無餘財其呈請開缺摺有云卅

年京宦參養

恩深僑寓京師家無半畝非虛語也配蔣夫人先宮保卒子三丙榮道光乙酉舉人戊戌進士安徽卽用知縣悠辰廕生廣西試用知縣以芳林渡勦殺搖匪軍功升直隸州知州璜河南試用知縣女一許字秀水汪氏未嫁守貞孫三久開久恩久齡孫女三以十九年己亥十二月之十日葬宮保於甘泉縣廟山旁團山之南闕家莊蔣夫人祔焉以下並撰國丙榮等來乞爲神道銘元耄矣謹按狀序而銘之曰

五星聚奎爲文之祥人文大啟爲邦家光尙德緩刑皋陶拜颺帝用刑官空冬居陽故所

衰者學行爲長一日明允再曰純良以此銘碑佳城後昌

肅爲宮保撰行狀橐成公子穎生持橐乞相國製神道碑銘相國年旣高厭碑文煩重因撰銘詞而屬肅序碑文焉

額侍郎別傳

包世臣

故戶部侍郎額公之卒也史館例立專傳其叔子冠軍使寶奎以狀上史臣旣撫其政績入

國史矣閱三年當道光壬辰余適至都下冠軍以別傳請爲予得交於公久知公深且素爲文不妄有稱述可傳信故也夫徵信莫如史然必

載筆者其事專其業世所見所聞所傳聞莫不真確又深通情勢達事
理之所以然是以紀述籌議計畫本末賅備而筆力恣肆又足以發之
使讀者如見其人如聞其聲故兩漢三國之事蹟數千載猶彪炳人耳
目者以其爲世業專門之私書也晉書以下大都成於後代爲時旣促
速又與斯役者唯論官閥罕能悉典要故英雋之士非常之謨不復湧
見楮墨閒無以稱讀者之意今

國史固皆以時人紀時事矣然以謂徧采家傳及散見他說者或多恩
怨抑揚不足昭詳慎故一以紅本爲据其科鈔所不及軍機檔冊所不
載雖

列聖憂勤惕厲與二三大臣從容論議於以救民間所疾苦爲天下傳
誦讚歎者檢核科鈔軍機檔冊無可證驗則不得恭紀簡冊至部院題
奏事件例係六堂僉畫非一人所可主名又率由胥吏具稿白司呈堂
文采不足以照耀方來若在司員卑分例無專達卽有碩畫顯著不登
紅本唯封圻特使政得自主而決策之故多在牘外又或中途受事未
歲已移溯前則無源考後則缺委其是否奏績能垂久遠紅本無文悉
從蓋闕至其人學問所就心術所存概以傳例摹寫尤難宜冠軍之不

能已於此請也予以嘉慶丙寅夏識公於揚州時公視淮漕已三年淮
 漕繁富甲天下使者驕貴簡出則輿從華盛倍封圻而公常從二三
 騎自策羸穿街巷嘗禱雨於甘泉山步烈日中往返至三數十里梅花
 嶺旁有書院爲使者課士所唯存枯槎一二公補植五百株以還舊觀
 公故善其山長沂州知府歛洪梧時時相過從攜中冷泉煮茗輒遣
 騎招予或追取廚饌作竟日歡肴蔬不過數事又嘗訪予於逆旅談笑
 忘倦同舍生羣驚訝而令節纔以果餌兩器相餉曰極念吾子旅因此
 聞弓庫歲徵且數百萬乃漕賈結納勢要物非所以待吾子僕爲鹽政
 吾子爲鹽政客殆爲揚州開一生面也戊辰秋公被議入都漕賈送至
 王家營環跪納會子四紙紙鏹各十萬公詰其所爲僉曰大人節官費
 歲數十萬又奏增鹽息至分半歲溢且二百萬計大人按臨六載眾商
 所受恩且累千萬區區者誠不足言報稱公笑曰我前節官費以爲今
 日地是攬察案所應有也請增鹽息者爲岸猾持若短長耳若等竟以
 作市價是哀民以益商我負疚滋重況分若肥耶必不聽者以狀上聞
 矣是年秋公故當入

觀例以珍玩爲面貢公閱實製備僅值十六萬先期貯京第及至都部

議當差熱河不得面無所用貢公瀕赴戍遣使悉送還揚州費腳價銀六千實已資也揚州士民前聞公少時奔喪至山西土人醵四萬金爲賻公一無所受事聞

達聰猶疑信相半至是乃莫不歎其廉介矣性嗜易通志堂所刻七千家易說皆能條列而縷舉之偶爲小詩栩栩有蘇陸之意己巳春子初入都公已起視長蘆齋不相值辛未再至則公已失明家居然聞子至必迎至中門握手坐絮語移晷及己丑春公年已八十餘子寓外城宣南坊去公第十里公猶數見過使短童掖下車劇譚今古事無少舛失子之所知於公者如此皆狀所未及也其世家官階本傳例不詳備者皆按狀而次之曰

公諱額勒布字履豐號約齋姓索佳氏先世居鄂爾坤部落歸附後爲滿洲正紅旗人祖彰萊盛京副都統父農起山西巡撫管提督事任安徽布政使時以辨災勤民有聲公雖世祿子然好讀書如寒素成童補弟子員旋食餼入試不得於有司乃棄舉子業筮仕工部歷筆帖式主事員外郎迴避改戶部擢郎中徧本部各繁要差以管部王大臣密薦廉能第一徑擢本部右侍郎管錢法堂事旗務則爲副都統者四護軍

統領者一公中佐領者二兼官則爲內務府大臣者二管理三山總理
工程處總理奉宸院事者各一差遣則查辦陝西軍需報銷兼祭告西
鎮山川督辦河南衡家樓大工審辦山東陳文思控案查看天津河道
者各一爲司員時一隨本部尙書查辦甘肅監糧虧空一保用坐糧廳
一加四品服總監督

昌陵工程外任一署倉場侍郎兩爲長蘆鹽政一爲兩淮鹽政一以主
事銜爲熱河副總管虛授未之官則爲鴻臚寺卿大理寺卿者各一降
譴則侍郎任內失察寶泉局銅斤左遷本部郎中兩淮鹽政任內以前
監督

昌陵工程漏參同官侵剋工價充熱河馬甲公去兩淮時已病目再任
長蘆則益亟力請解組旋失明閱二十有二年以道光十年八月二十
有五日卒於私第年八十有四

光祿大夫兵部尙書戴公墓志銘

姚瑩代

道光元年十二月提督浙江學政如皋戴公拜復授兵部尙書之
命將回京師有疾明年二月初四日薨撫臣以
聞

天子軫悼悉免在官處分遣大臣致祭給全葬如典烏虜公之蒙
恩可謂盛矣方嘉慶庚辰之春

睿皇帝將謁

東陵兵部不知何時遺失行印諸堂官皆得過失公以本部尙書降太
常一月奉

命視學浙江

召對良久退而歎曰

聖恩如此臣何以堪臣老矣死之日當不使有餘布餘粟負
國家也

今上登極元年擢復禮部侍郎仍留督學公感時疫且疾思入
覲未敢乞假及得復職回京

旨公感泣曰吾瞻

天有日矣促治裝未啟竟以疾終

新天子於公未嘗一見以獲咎在外之老臣未再朞盡復其官方
內召大用而遽逝

恩綸褒卹優渥至極知公耿耿丹誠九泉之下猶當瞻依

陞闕也某自嘉慶元年受公知侍公前後十年見公德行文章甚悉公歿之歲某奉

命撫粵西未親執紼門下士各以所聞知作表狀將上史館而公子以隧道之文屬某其何敢辭謹按狀公姓戴氏諱聯奎字紫垣先世以國初遷江南之如皋遂爲如皋人族頗式微考蘧庵公寄籍大興故公以乾隆三十九年鄉試以順天解元明年成進士授庶吉士肄

國書散館授編修始改復原籍四十四年遭嫡母憂旣闋又遭父憂除喪補編修嘉慶元年擢贊善五遷而至詹事擢內閣學士兼禮部侍郎轉兵部侍郎歷禮部吏部復調兵部十八年遭生母憂逾三年起署工部尋補吏部擢左都御史明年進禮部尚書充

經筵講官二十三年改兵部尚書署戶部明年兼署左都御史再署吏部後降太常寺卿道光元年復禮部侍郎再復兵部尚書公少篤學從邵二雲先生受經爲文有聲譽久官翰詹故雖敷歷劇要兩充會試同考官又充雲南江西正考官充文武會試正考官充

殿試及

召試讀卷大臣又出爲安徽山東浙江學政惟山東之役以生母憂未

行故公門下所得士最多公既受

兩朝之知而謹慎小心始終彌篤自躋卿貳出入

禁闈二十餘年

顧問之語未嘗一洩時有

密諭深夜自書復

奏至歿人莫能見其草尤好慎言雖家人未嘗妄發其周密如此與人交無所競大廷議有不合惟以理辨無疾言憤色退亦未嘗有所菲薄其和平如此然風節素峻在翰林久不遷掌院爲嵇文恭相國公座師也將保御史列公名滿掌院某公曰吾未識面何以論其才否相國以語公令往見公漫應之及舉京察又列公名某公言如前相國怒召公曰是汝自誤也公曰有命苟不得徒往無益不然若吾師者豈有所干哉相國咨嗟而罷大學士和珅掌院莅任屬官見者皆降禮公獨長揖和訪時望爲額駙師或薦邵二雲先生及公邵辭不就和以爲愧欲延公堅辭邵先生語公曰吾老矣行移病去子宜爲後計公曰吾師行弟子從之矣邵果乞休和曰吾非必相強邵君何爲此悻悻益重公禮貌有加公持躬儉自少未嘗衣綺貴後燕居乃一縕袍曰秀才時服不可

棄每食盤蔬箸肉或疑其矯公曰仕宦者莫不欲有守而或改操華膻累之也惟不受華膻之樂乃不覺淡薄之苦以存吾廉不亦可乎某在京師侍公久公尤愛之嘗語云武侯天才猶一生謹慎我輩何人此心一放則無所不至矣故惟敬爲入德之階子其勉旃某服膺此言數十年然後知公生平之所得力上以結

主知雖偶有升降而

恩遇不衰中以待僚長雖屢拂權要而聲名益泰下以對妻子雖日處狎近而言動無失信乎其有所主也公會祖某祖某皆以公貴

贈光祿大夫考之承安慶知府以公貴

晉贈如公官妣三世及生母皆

贈一品夫人配某氏

誥封一品夫人子三長鳴皋官某次一芝次一騏孫某某以某年月日

葬公於某山之原銘曰

川嶽蕩蕩儲瑤英上燭樞斗光天庭貞一在抱晶且誠咳唾熠燿舍元

精上爲

國望下藝林彝鼎之重百世欽公曰昭事惟小心對揚夙夜一戰兢大

哉敬勝古帝箴

鐵煤庵先生墓志銘

汪廷珍

公棟鄂氏諱鐵保字治亭一字煤庵世爲滿洲人曾祖賽柱祖富起臣父誠泰官至泰甯鎮總兵官自曾祖下俱

贈光祿大夫曾祖妣馬佳氏祖妣劉氏妣輝赫氏俱

贈一品夫人公年十九舉乾隆庚寅順天鄉試二十一歲成進士授吏部文選司主事累遷至翰林院侍講學士仍兼部事大學士阿文成公器之舉爲副都統

純廟素稔公名謂副都統尙未足盡其才迺

召試五言詩稱

旨越三日又集諸儒臣同試之擢第一遂改授內閣學士時乾隆五十二年十二月公之受

知自是始旋遷禮部侍郎嘉慶元年恭值

大廷

授

受式贊

上儀三年調吏部右侍郎遂改授內閣學士至是凡九年知貢舉者三
總裁會試者二主考順天江南山東鄉試者各一得人稱盛四年轉左
侍郎時

仁宗睿皇帝親政命公留守陪都督理九邊門出爲漕運總督八年巡
撫山東加

太子少保十年總督兩江所莅之區凡治吏治兵治河及學校財賦刑
獄諸大端靡不竭力措置各有法度可循以詔來者其與人也開誠布
公不設城府與屬吏接款款如一家務使上下之間情意通徹而公私
之界截然不淆雖有時爲屬吏所累不以易其愛才之念卽遇嚚悍之
俗而終不忍行操切之政蓋其得於天者厚而其居心也恕欲使吏民
皆化於祥風和氣中也素性儉約私居飲食衣服及家人子女衣著與
寒素無異蓋行其所安而無所矯異如此尋以失察山陽振案戍烏魯
木齊踰年起爲喀什噶爾參贊大臣公居輪臺八月無遷謫意惟聞江
南河漕諸政有未盡善輒日夜焦思自念身在謫籍雖有所見無從上
達一經嚮用卽上書千百言論列私弊不避越職之嫌不畏在廷之謗
蓋其忠愛之忱不以不在其位忘也十六年起禮部尚書轉吏部尚書

復以回疆疑獄戍吉林尋起爲司經局洗馬道光元年引疾

賜三品卿銜致仕公旣以治行報

國舟車案牘靡有暇晷而又以其餘力著爲文章嘗表進所輯八旗詩一百三十四卷

賜名熙朝雅頌集晚歲家居頤和多暇自編年譜二卷復第其所著爲文鈔六卷詩鈔八卷詩餘一卷尤工書法所刻雉清齋帖藝林寶之四年正月初三日卒於家年七十三公少孤事太夫人色養盡孝與弟閔峰侍郎友愛甚篤娶夫人甯古塔氏賢達知大體子二人瑞元廕生道光辛巳舉人刑部員外郎瑞恩國學生女子十人俱適名族五年某月某日將葬公於八寶莊之原夫人遵公遺命以側室馬宜人附於其旁宜人溫恭勤慎事公數十年先公二十四年卒瑞元宜人出也銘曰太上立德次功與言程才殊致考道同原觥觥我公克茂克醇上善若水與物爲春循規神禪領聞篤厚初酌藁賜爰探岫嘯萬物芄蘭六經發葩著爲元文鉤丁貫酉升華九列發策五科凝熙庶績惟勤惟和東南秉鉞西北止戈以藩以翰播爲賡歌惟功與言歸於令德騶虞仁厚羔羊正直身成邊圉心馳京闕抱此丹心迄於黃髮引禮致仕返樸歸

眞蒔花揮翰脫略公卿惟茲醇德以啟後人千秋萬世眠此貞珉

博啟圖傳

吉林通志

博啟圖姓富察氏隸滿洲鑲黃旗嘉慶二年由五品廕生襲一等誠嘉毅勇公爵授頭等侍衛歷遷戶部左侍郎兼正黃旗蒙古都統出爲察哈爾都統道光七年調吉林將軍明年疏言雙城堡公倉應糶歸款穀石請照時價出糶又請添設圍場卡倫增設弁兵嚴定章程以防姦民潛入偷參斫木並

從之冬疏陳吉林各站內過往馳驛各項差務請給廩糧

詔以來京首站新定之例一體給與廩糧以歸畫一尋以甯古塔水災疏請蠲振

允之九年

命籌辦雙城堡屯田事宜時雙城堡移駐京旗願往者少以霜早氣寒歲惟一熟又乏幫助耕耘之人因疏言擬減原定京旗戶數酌爲添給地畝始可漸形充裕至京旗閒散未習農事請準其買僕代耕又原定京旗住房寬闊難居請戶改草房三間周圍加塗草土禦寒均在中屯建蓋準於黃泥河左近伐木取材較爲近便

從之累官領侍衛內大臣工部尚書管理行營事十四年卒於海澱加

太子太保銜

賜祭葬諡曰敬僖

汪守和傳

江西通志

汪守和字惟衣樂平人父士誥拔貢生宜黃教諭工詩古文守和初由拔貢官新喻教諭嘉慶元年一甲二名進士授編修充順天鄉試同考官

起居注官進贊善歷洗馬充會試同考官累遷奉天府府丞父憂歸起

補少詹事充

文淵閣直閣事簡山東考官尋授內閣學士兼禮部侍郎教習庶吉士

坐事降二級出為浙江學政旋丁母憂歸起補原官復充

文淵閣直閣事歷禮部左右侍郎督安徽學政調戶部左侍郎充漢教

習閱卷官覆試嚴核得字蹟不符者十五人

上嘉之後充武會試正考官

賜紫禁城騎馬戶部書吏滋弊凡舊堂官皆下部議守和議降調

上改留任出為江蘇學政擢禮部尚書再充武鄉試正考官權吏部尚

書年七十頌

御書寅清受祉及壽佛如意諸珍賞充順天鄉試副考官再調禮部尚書權都察院左都御史守和根柢實學歷官四十餘年以恭謹受主知屢掌文衡皆稱得士卒於位

贈太子太保

賜祭葬

汪巽泉師事略

吳昆冊

道光辛卯之歲樂平汪公守和爲江蘇學政秋闈涖金陵考優貢向止一場經解一策一試帖一公以新自安徽學政調任未嘗按臨考校特加一場四書文不發案及正場會考者爲江蘇巡撫陶文毅公樹其日始入城公已點名待文毅至始出題日昃矣昏黑繳卷者寥寥數人諸生請給燭格於功台不許余詩有四句未繕真繳之公接卷見名而進之獎賞前場文急繙閱本日經解策亦嘉歎至篇終見詩缺四句怒詰責數四命於案頭燭光之下續成墨淡行斜旋榜發尚列副取屬所識同邑嚴教授來慰勉之甲午應京兆試獲售公以禮部尚書爲大主考進謁喜曰真吾門生矣時公邸第在張相公廟昆田寓圓通觀居密邇

三日不造門則來召公門無雜賓而喜談讌每宴必命陪餽饌豐腆勸食殷勤而不一舉箸時年已七十日淡食晨興白飯一大盃米可六合餘不食肉無菜羹食畢白水二三口而已家極貧而性好施與俸入有餘輒以分故舊好蓄名書嘗以百金市文徵明楷書已而審視則贗物也同朝善公者謂曰盍歸諸直固無所出也公曰吾既許之矣急取貂裘付質庫償其直誠信不欺皆此類也昆田時欲入貲爲郎以請於公公曰不可讀書人須守分安命因自述通籍之年正和珅柄政之日也嘉慶元年丙辰會試

太上皇帝御殿閱殿試卷

睿廟跪於前和珅次焉定一甲三人和珅主之狀元趙文楷榜眼爲公探花帥承瀛和珅欲三人爲弟子使人道意皆不往適廣東學政缺出和珅以之陷三人曰誰來吾門卽以此與之趙介山帥仙舟二先生同謂公曰吾兩人不貧君可往聊以救貧耳公婉謝之以是閣十日

命始下乃和珅家教讀師某翰林也又十日某銜

命行甫出國門而
純廟賓天和珅奉

旨擊問某翰林不敢就道駐長興店候

旨月餘事定得

旨歸休矣公因誨昆田曰若其時一躁動則歸休久矣祿位之不可干也如是公與湯文端公爲至交因聯嫻好文端鄉舉得解元因和珅知名訪求不赴禮闈以此與公同受知於

睿廟顧文端剛方而公謙退不苟取與有柳下惠之風仕宦四十年薨之日一貧如洗諸子奉柩出京舟行至泃河阻凍資斧告竭昆田走三百里昇來淮浦遂南歸嗚呼公期望昆田最殷每下第必慰勉再四乃蹉跎至老豪無寸進負公實深握管敘此不禁涕泗之橫集也公三子次體孚舉人仕工部主事三十年淹滯以終次體信舉人與昆田爲甲午同年生早卒有子元慶優貢生由內閣中書出守貴陽府

那彥成傳

徐士芬

那彥成字繹堂章佳氏滿洲正白旗人協辦大學士刑部尚書阿克敦曾孫大學士公阿桂孫乾隆五十四年進士選翰林院庶吉士散館授編修五十六年升侍講入直

南書房遷國子監祭酒五十九年四月擢詹事充

日講起居注官十二月晉內閣學士嘉慶元年入直

上書房三年二月

命在軍機處行走五月遷工部右侍郎四年正月調戶部左侍郎授翰林院掌院學士充教習庶吉士擢工部尚書充

實錄館總裁二月充

經筵講官

國史館副總裁

賞戴花翎三月

賜紫禁城騎馬七月管戶部三庫並總管內務府大臣

上以公三歲而孤其母那拉氏撫孤守志三十餘載表其門

書勵節教忠額以榮之先是湖北白蓮教匪樊學明等反襄陽其黨張

漢潮寇秦中

詔參贊大臣明亮討之而成都將軍慶成陝西巡撫永保與明亮有隙

師行不相顧八月

命公爲欽差大臣督明亮軍褫慶成永保職畀按治十月明亮破賊誅

漢潮

上曰明亮因朕特派那彥成督辦不敢再似從前玩愒且聞那彥成已由西安入山是以上緊截勦獲此凶渠是那彥成雖未經臨行陣而先聲奪人故能得此捷音也十一月敗賊於五郎疏言軍餼前費八千餘萬賊未殄滅今刊刻糧單按程期覈給以杜冒銷又言秦中前將帥各爲一路致賊乘閒遁逸今相機分合聲息相通使賊所至必有官兵追

勦

上以所論切中從前積弊甚爲嘉許尋疏請五郎設重鎮子午峪等隘口分置小營控制增總兵一員編鄉勇於新營更置縣丞巡檢分防從之時賊竄秦嶺老林官兵由漁砦子蹋冰入分道進攻自山梁下破之賊匿高關峪夾嶺我軍潛師夜擊賊奔鳳凰山中乃使將士夜縋下殲六百餘賊斃僞元帥黃爾雄等餘匪走平利旋奏老林樹密雪深進勦艱難狀五年正月蜀匪二萬竄秦略陽公破之獲襄陽起事賊三十有奇禽賊首高遇春等授參贊大臣賜玉鞞金台佩囊下部議敘越數月詔還京尋以賊勢漸張賁公玩縱斥退軍機處五月抵京奏對不稱再革去都統尚書講官花翎用爲翰林院侍講在

實錄館效力六年二月擢少詹事九月充順天鄉試副考官升詹事七年二月遷內閣學士八月扈

蹕木蘭獲鹿復

賞戴花翎十月

命往江西鞫巡撫張誠基被揭事會廣東永安客籍游民結添弟會與士民構鬪博羅諸邑匪徒響應總督吉慶討平之尋悔釋囚留孽且疑巡撫瑚圖禮密劾遂自戕

上命公往鞫之得其實時永安匪黃亞程等遁入鐵籠嶂嘯聚為盜八年二月公率提督孫全謀等進攻克之誅亞程及其黨數百人毀山寨闔境肅清條上善後九事並以惠潮民悍請令道員得便宜調兵疏入上嘉其辦理妥速調度得宜升署吏部侍郎七月擢禮部尚書九年六月仍授軍機大臣鞫河南嵩縣民王雷傳習邪教事未竣以秦隴收捕餘匪攝陝甘總督理善後事十一月調補兩廣總督十年十二月俄羅斯夷船求通市關監督延豐率允入奏公以越界貿易恐夷商因緣為姦亟請止之先是粵東盜首李崇玉黃正嵩依朱潰橫行海濱公撫降正嵩計禽崇玉檻送京師先後招降五千餘人悉賞銀幣率先降者予

千總外委銜巡撫孫玉庭以其賞盜劾之降藍翎侍衛充伊犁領隊大臣旋謫戍伊犁十二年正月再授三等侍衛爲領隊大臣三月授喀什沙爾辦事大臣五月調西甯辦事大臣時野番侵略內地戕兵丁故有是

命八月偕將軍興奎總督長齡攻克沙卜浪番境悉平十三年三月擢江南副河道總督是秋河決荷花塘九月合龍十二月塘復蟄降二等侍衛復爲喀什沙爾辦事大臣十四年二月調葉爾羌辦事大臣六月授頭等侍衛爲喀什噶爾參贊大臣十五年正月復任陝甘總督十八年九月河南天理會教匪李文成等謀逆陷滑縣犯直隸山東邊境命公帥師討之賊屯滑縣及桃源集道口公由衛輝進軍分擊新鎮丁樂集連破之道口賊出掠中市所公斷其歸路使別將楊遇春等迎擊破道口殲賊萬餘焚其巢出難民八九千人遣別將德甯阿楊芳率勁旅攻克滑城文成自焚死賊黨悉殲賞太子少保銜三等子爵雙眼花翎紫禁城騎馬是冬授直隸總督十九年正月巡閱開州條陳善後五事上獎以克副委任並在文成公墓

賜祭一壇用示殊眷二十一年以前在陝甘與藩司陳祈商挪振銀並
誣奏捐廉事褫職下獄論死尋以繳納賠銀改戍伊犁留家終養九月
丁母憂

上念其滑縣功免遣令閉門思過二十三年復授侍講轉侍讀二十四
年正月擢侍讀學士三月升詹事充會試副總裁五月遷倉場侍郎七
月以漕政著效

賞戴花翎二十五年九月擢理藩院尚書十月調吏部尚書十二月
命紫禁城騎馬道光元年五月兼翰林院掌院學士七月調刑部尚書
二年十月復授陝甘總督五年十月調直隸總督六年八月逆回張格
爾入卡犯喀什噶爾諸城檄東三省官兵剿之公以兵丁口糧按例日
給銀五分不足飲食請加五分又藥鉛火繩由京運解供應既難且恐
雨溼請以甘肅籌備者充用又以新疆遣戍積久人多夷民雜處易生
事端請量地改遣七年十一月以回疆未靖

命以欽差大臣往勦未幾張格爾就禽十二月疏陳回疆積弊略謂回
人素恭順此次張逆煽惑各城響應半由平日撫馭失宜參贊大臣等
三年換班上者未必遽能盡善次者祇存五日京兆之見不肯認真下

此竟有視爲利藪搜括甚工且各長其疆無維制考覈之分不相顧忌
應請分隸考覈俾有所糾察至各官原設養廉不敷辦公懇稍爲議增
並準各大臣一律攜眷使專心辦公

上如所請行八年公以安集延進販內地大黃茶葉硝磺接濟外夷私
於卡內置產安家竟敢相率助逆今查十年以內寄居與現販違禁物
者逐出其餘暫準居住又準普爾錢以一當五今阿克蘇銅未豐旺請
改鑄當十錢相間通行皆

從之又奏各城相沿陋規貪黷求取苦累回民今悉裁革勒石永禁
手諭曰行同饕餮殊出情理之外非公忠體國之人臣孰肯和盤托出
可嘉之至八年請移建葉爾羌城於罕那里克又請於喀喇依外之
七里河築堡設兵六百防守並另建業沙爾城又疏言曩者伯克闕每
以賄得補而大小伯克遂誅求小回子以取償嗣後請由本城大臣先
儘有功及家口被害之人次死事人子孫次出力世家視其人才保送
參贊大臣驗看奏補又酌定回夷難蔭章程皆中款要時張格爾瓦誅
其妻孥潛匿浩罕使人詐投賀書伺隙公陳兵護其出入不使與卡內
回子交接不允貿易亦不犒賚

上以所辦甚得大體嘉之八月繪像

紫光閣

御製贊曰勦辦滑城曾著勳績功成定後用長是擇嘉汝忠直殫心籌畫勦之撫之同一敦厯九年正月以使人出卡搜求逆族有意邀功

召還京六月入

覲回直隸總督任是冬西陲復不靖十一年將軍長齡奏事由驅安集延誤國肇釁革職十三年二月卒

賞尚書銜照尚書例賜卹

子祭葬如例諡文毅公生於世胄性好學工詩能書遇事有執持於權要人無所屈勦辦川陝楚及滑縣教匪尤有功任總督時三次考績皆特旨優敘雖屢起屢躋中外想望風采

上眷公不少哀嘉慶中英吉利入貢頗不恭順惟問福中堂及那大人見居何官蓋外夷夙所敬憚者祇此兩人云

誥授光祿大夫經筵講官戶部尚書晉贈太子太保諡文安何公神道

碑銘阮元

公諱凌漢字雲門亦字仙槎先世青州益都宋南渡至道州爲東門何

氏曾祖蓋生員祖志儀廩生父文繪廩生三代皆以公貴
贈光祿大夫妣趙周鄭皆一品夫人公幼慧能盡孝敬九歲應童子試
若成人年十六州府試皆第一補附學生家極貧連丁內外艱困苦思
自振拔益勤於學夜不能具燈燭恆然松枝自照讀經書必兼傳注食
餼後文譽日起從學者自遠至嚴立課程至今其鄉學者謂吾州經師
人師自公後無能繼者嘉慶六年充辛酉科選貢生明年
朝考一等爲吏部七品小京官文選司行走有雜職官被議鐫級聲明
乾隆某年有

恩詔加級或以無冊可稽駁之公曰冊雖毀

恩詔固在也豕宰臆其言許之九年應京兆試中式舉人十年成進士
殿試卷進呈名列第四

睿皇帝拔置第三

賜及第授翰林院編修十二年充廣東鄉試副考官明年散館一等充
順天鄉試同考官累充

文穎館

國史館纂修總纂

文淵閣校理

咸安宮總裁

武英殿提調十九年升國子監司業轉左春坊左中允充

日講起居注官升司經局洗馬轉翰林院侍講侍讀右春坊右庶子二十
十四年充福建鄉試正考官升國子監祭酒

今上登極

覃恩得廕一子時已命次子紹業爲兄凌灝嗣令得四品廕生以慰兄
心

昌陵奉安

派扈

駕大臣隨入

地宮道光二年充山東鄉試正考官留督學政轉翰林院侍讀學士每
試日靜坐堂皇閱卷胥役悉閉置一屋不少假嘗入奏云場中多一查
弊之人卽多一作弊之人又云臣以爲防弊之道苟挈其要領無事煩
苛奉

殊諭褒許甚渥歲試時通諭各屬生員於來年科試年貌冊中自行填

注誦習何經以便考校故所取乙酉科拔貢生多治樸學者試院中種竹數百竿忽產蒼六莖數日高七八尺因顏曰瑞蒼書屋並爲之記四年轉通政使司副使五年冬差滿入都

派稽察右翼宗學六年春補授順天府府尹時前尹朱公爲粥無被議事而調任府丞公蒙

特擢

召對時有人品學問朕所深知之

諭蓋在

帝簡中久矣甫莅任卽立內號簿飭屬訊案每月按簿催結得無留獄八年元旦逆回張格爾就擒

上以公於協勒回疆之吉林黑龍江官兵由京進發彈壓靜謐支應妥速兩次交部優敘順天所屬州縣擢至四路同知更無升途公以人材須鼓勵會大名府缺出與直督熟商會奏得

旨以西路同知辛文泚補授遂開此例京畿獄訟繁多自府縣收理各案外由刑部都察院提督府奏交咨送無虛日公盡心研究大要以罪疑惟輕務歸仁厚如宛平縣民張文恭等曾習天主教改悔免罪漏繳

經卷蔓累多人涿州民果三毆死白兒棄屍大清河三載無獲等案
一則援例減等一則奏請暫行監禁惟於兇盜案件謂宜懲一警百如
獲拏奪犯傷差窩賊馬七等拏究兇惡棍匪王殿臣等皆從嚴訊辦府
廨後有廢園就蒔花竹爲退思之地顏其亭曰佳晴喜雨快雪之亭志
無忘民事也十年立春日循例迎春

上召問春牛顏色起於何時公奏月令稱出土牛並無顏色宋時頒行
土牛經支幹各色略與今同始於仁宗景祐元年其博洽強記多類此
七月有

旨命大阿哥祭

孝穆皇后陵寢公以大雨時行橋道難恃面奏請改派親王大臣

上深然之卽改派尹茲五年地方綏靜命盜各案甚稀

聖心特注久任不遷是年復調吉林黑龍江兵征臺灣彈壓

子優敘如前八月授大理寺卿仍署府尹事十一年署兵部右侍郎授
都察院左副都御史升工部右侍郎兼管錢法堂事務署禮部左侍郎
充浙江鄉試正考官留督學政重經解訪優行試事整肅士習益醇廨
有桃李門元督學時所署也公補植桃李數百株蔚然成林長興學附

生葉大成丁降服憂有增生缺出公咨禮部略曰例載爲人後者爲其
本生父母齊衰不杖期注云仕者解任士子輟考學政全書載廩增生
遇降服喪不許應試無庸出缺至廩增缺出是否敘補例無明文致歷
來辦理參差夫官員降服已無升補之班士子降服猶循敘補之舊於
例本未畫一旦親喪固所自盡降服已屬抑情若復使之敘補一如無
服之人於情亦有未安應請核准通行是時又

特命公偕督臣程祖洛審訊山陰會稽紳幕書役勾結舞弊一案研究
月餘定讞擬在籍臬司李澧褫職餘犯軍流有差

帝嘉明允十三年春調補吏部右侍郎兼順天府府尹事

命卽來京供職時歲試未終也公益靖共爾位和而不同如吏部原議
捐振鼓勵章程有各衙門候補人員准捐銀儘先補用一條已具稿矣
公曰儘先可捐則正途之缺轉可爲捐班所有而正途亦非挾貨不得
於官方吏治所傷實多同人以爲然原議乃寢時濬九門護城河以工
代振數萬人

上問工竣如何資送公奏附近京城之民無庸資送其隸外州縣及外
省者應於散工日給盤川錢二百文再給印票一張注明制錢五百文

回本籍衙門承領貧民歸有餘資散歸必速奉

旨允行調補戶部左侍郎兼署右侍郎管理錢法堂事務再調吏部右侍郎仍署戶部右侍郎時湖廣總督訥爾經額等奏苗疆屯防變通章程

命戶部議奏同官因係湖南事情專屬公具稿乃援據舊章體察現在情形逐條籌覆准駁相半總歸於遴選廉能代謀生計同官折服不易其一字十四年升都察院左都御史仍兼順天府府尹事

賜紫禁城騎馬進工部尚書仍兼署左都御史奉

命查勘明陵充

經筵講官十五年充會試副總裁教習庶吉士十六年奏永杜回漕錮弊公飭查順天各屬大小水路績圖籌緝始奏定水次鋪戶存貯租米不得過十石之例疊署吏部尚書十七年吏部因京察一等人員有先由御史改官者已議駁矣公以不勝御史非不勝外任者比如此苛繩有妨言路援筆改議遂奉

俞旨十九年春調補戶部尚書仍署吏部尚書是年秋充順天鄉試副考官時公長子編修紹基亦典試福建距公使闕時恰二十年父子同

科典京外試者前此惟乾隆丙子科劉文正文清公父子庚寅科劉文定公青垣侍郎父子而已後先濟美同朝羨之公於吏戶工三部皆久任遇公議事件多賴公爲主持從容正直熟思利弊鉅細一無所苟於政體人才特爲顧惜當戶部假照案發先後在捐納房司員皆獲咎嘗爲

上言其中人材甚有可惜者而准其捐復之

旨隨下吏部考功司議處有近於文致者必往復剖論冀存寬大於工部司員拔其樸實任事者夤緣悉絕升轉之路遂通二十年值

孝全皇后喪齊集西淀十餘日歸寓偶病寒猶力疾趨公因精神短少陳請

賞假甫

命下遽不起口授遺摺而逝時是年二月五日也年六十有九上嗟歎悼惜久之有品行端謹辦事勤慎等

諭

贈太子太保

賜祭葬諡文安據諡法勤學好問曰文止於義理曰安我

朝二百年來得此謚法者自公始易名之典洵足與先儒陸文安公金文安公相媲美云公孝友純篤居恆莊敬刻厲家範嚴肅爲時所稱通籍四十年未嘗一干吏議在詞館攻苦如秀才時治官書自立程法國史傳志手錄其子目以便檢校於蒙古地名滿洲人名尤詳總辦起居注所爲前後序掌院曹文正公稱爲傑作未嘗與本衙門撰文遇誥冊文字重大者多屬公撰擬以公書法重海內屬敬書全唐文御序付梓兩次以講官隨

圍和

仁宗御製詩甚多壬申戊寅大考皆二等

賜文綺辛未甲戌己卯三爲庶常小教習其

殿廷文字之役自辛卯迄丁酉

派閱覆試

朝考散館試差大考漢教習卷絡繹無閒前後任京兆最久凡察吏安民弭盜備荒諸政不勝書勘估督修諸要工十餘次承辦

孝穆皇后梓宮由寶華峪奉移至龍泉峪奉

特旨改派公代賽公尙阿往每有遷擢必兼他職九掌文衡五權冢宰

四

派經筵直講以京尹而歲

賜參貂以尙書而

賜二等參頭等貂六次

賜福字皆

特命入乾清宮侍書

寵光稠疊錫類便蕃可謂人臣知遇之最榮矣著謨詩文爲雲腴山房集所書碑版學者珍習之配廖夫人子四紹基丙申進士翰林院編修紹業廕生候選縣主簿出爲兄嗣先歿紹祺紹京皆舉人孫慶涵監生慶深鼎官聯官孫女八紹基等奉柩歸葬於谷山下九子嶺之陽將至揚州先以狀來乞元爲神道碑元荒耄家居因與公雅故又紹基爲余教習庶吉士之翰林在京嘗以學術相善謹按狀敘而銘之曰

自公幼學經師人師

帝擢魁鼎館職試詞

冊誥鴻文屬鉅筆爲文章經史班韓是追書法晉唐寶若鼎彝奉使衡
文品學兼資魯齊教行室生瑞著卿歷五部職效三司久任京兆三輔

安治鋤奸弭盜儒雅便宜愛人節用慎於度支弼

聖敷化謨慮書思官四十年吏議弗罹循理度義易名典垂公子大器

繼昌於時我衰穎突勉文此碑

工部左侍郎浙江學政李公墓志銘

陳用光

臨川李春湖少司空性開明而質厚重篤倫理而勤問學家席華廡而能澹泊以自持官登卿貳而務謙抑以取善其爲詩得松甫先生家法而拓之以蘇韓其於書博究唐宋以來支派而於虞歐爲尤近所蒐輯字畫石刻石蹟盈篋笥索書者踵相接也其鄉舉以壬子而癸丑遂成進士其官由編修五轉而至學士由學士四轉而至工部左侍郎其膺使事則典福建浙江鄉試而督湖南浙江學政居浙江兩年餘以道光辛卯三月初四日終於衢州舟次享年六十有三諱宗瀚字公博一字北溟又字春湖世爲江西臨川人與余從子希曾爲舉進士同年遂申之以婚媾而與余交亦最密道光戊子五月

御試二三品官論及詩公與余同橐筆詣

乾清宮

上書房而公招余同硯席於一室六月公旣奉

命典浙江試遂留視浙江學政而余亦視學閩中過武林謁公既別去至閩中數以書問相砥礪也及庚寅聞公以校士勞得嗽疾至失音公體素充碩及是而聞公瘖逾於常人心竊憂之辛卯春正月聞公丁本生父松甫先生憂及三月遂聞公卒矣嗚呼六七年閒人事之不齊如此余自閩旋

朝既悲不及再見公於武林而今且繼公視浙中學已竣事將旋

朝也公素喜余文字余自聞公訃後欲作文以報公願逾二三年未能成今乃爲之志以寄公之仲子聯珂悲夫公先世居臨川之楊溪自公大父丹臣府君以饑業起家於粵東西僑居於桂林而樂善好施爲鄉閩交遊所推重公之本生父松甫先生以工爲詩善禮接文士益擴大其家聲五六十餘年閒海內稱德門者咸曰桂林臨川李氏云曾祖燕祖宜民世所稱丹臣封翁也嗣父秉仁本生父秉禮世所稱松甫先生也嘗爲刑部江蘇司郎中旣以其階

贈祖考爲中憲大夫及公爲侍郎三代皆

晉贈晉封爲光祿大夫曾祖妣袁祖妣駱本生嫡母曹本生母劉皆以一品夫人夫人爲

晉贈晉封焉松甫先生於丹臣翁爲次子秉仁其兄年二十前卒公之嗣母駱太夫人撫孤兒宗誠甫七歲而殤劉太夫人娠公而駱太夫人有宗誠來歸之夢故公旣生而松甫先生以後其伯兄公之嗣父庶出也其生母爲

誥封一品夫人戴太夫人公之奉劉太夫人諱也旣終喪遂乞終養嗣大母戴太夫人居家幾年齋業稍替松甫性恬靜年已逾七十乃退齋業而讓於庶弟秉綬公實贊成之凡齋業中應得之財一絲一粟無所取而自治園林日研習詩詞翰墨父子以文雅著望於桂林而願有訐齋務者謂公不能遠絕聲利公笑不與校蕭然事外有終老泉石之意而松甫謂公以文字受知於

朝廷今終養事畢矣不可以不出公乃出公未乞養時由宗丞擢副憲余與居臺中意殊洽嘗惜余之不久居諫垣也及再出補副憲居未幾遂擢少司空其當官明大體務持正而不爲矯激之行

上意方向用之而以校士勞不究其志凡知公者莫不爲公惜也公配朱夫人翰林朱章浦紱女子四人聯璧前卒聯珂道光壬午舉人吾從子鍾溪壻也皆朱夫人出聯璣娶江南上元孫氏聯琇聘南豐趙氏孫

四長翊勛娶南昌徐氏嗣聯璧次翊華皆聯珂出次翊軒翊耆聯璣出
孫女七長適霸州吳曾蔭今東河總督吳邦慶孫也銘曰
承先澤之崛起擅儒雅於中朝日趨善而恐後申余契以久要愴搏搏
之委化目既瞑而餘哀抗孤志以永慕距朝服而襲衰過三衢而賦些
悲前塵於帶水銘幽宮於既窆庶燻覆其孫子

又工部左侍郎臨川李公行狀

鄧顯鶴

公諱宗瀚字公博一字春湖江西撫州府臨川縣人家世有厚德貢生
公以業鹺家粵西故公生長於粵刑部公有詩名詩學唐賢韋左司自
以韋名廬世所稱韋廬先生者也刑部有庶長兄年二十卒葬於梧卽
贈學士公也遺一子宗誠殤其配駱夫人賢而有識一日夢宗誠至驚
呼曰兒歸矣其日公生於桂林寓舍駱夫人泣請於貢生公願得公爲
子故公爲贈學士所後子而刑部公爲本生父公幼多病駱夫人視之
謹稍長病愈穎悟異常讀書有夙悟博極羣籍年十八學大成乾隆五
十七年中式江西壬子科鄉試舉人明年成進士
殿試二甲改庶吉士六十年散館授編修嘉慶二年充
武英殿纂修三年大考二等擢詹事府左贊善充

國史館協修四年充

實錄館纂修兼本衙門撰文尋擢侍讀轉左右庶子侍講學士充

日講起居注官五年充福建正考官六年丁駱太夫人憂服闋踰年入

都補原官其年九月充武會試副考官轉侍讀學士十二月授湖南學

政在任晉太僕寺卿十五年任滿入都授宗人府府丞十七年以本生

嫡母曹太夫人憂解官十九年終喪補原官授都察院左副都御史九

月充武會試正考官二十年丁本生生母劉太夫人憂服闋即在寓籍

奏請終生祖母戴太夫人養既奉

俞旨公遂築宅於桂林櫛湖之濱日侍戴太君暨刑部公側有終焉之

志二十四年一詣

闕與祝

睿皇帝萬壽次年秋

仁廟升遐公以遠阻遐荒攀髯莫及哀不自勝道光三年遭戴太夫人

喪先是道光改元禮臣建議天下爲父後者爲生祖母終三年喪公毀

瘁之餘竊幸奉功令三年得久侍刑部公左右四年部議仍改歸期服

刑部有眾子四人公以出繼例不得終養以故刑部日趨公之官遂以

五年秋赴

闕候補既

陛見

皇上垂詢家世官資甚悉公奏對移晷具陳感念

先帝恩眷及陳情終養始末

聖顏愴動六年夏補原官八年轉授工部左侍郎故事侍郎官資由右

轉左公由副憲徑轉左侍蓋

上之眷待優矣是年六月奉

命典試浙江八月有

旨留學政任公素患下血按試各郡積勞過甚風眩遂作繼以喘嗽然

猶力疾校閱十一年正月刑部公以疾卒於桂林公南望號痛絕而復

甦病遂劇迨扶病星奔就道而已不可支矣以三月初四日終於衢州

府舟次子聯珂殮殯如制以其喪歸江西省治方公初殮時以朝服進

公右臂倔強不伸聯珂持衰麻泣曰吾父以致終今茲意在禮服乎乃

議易衰麻為裏具始伸臂就殮蓋公之孝思也篤生死不易如此公清

素簡約恬退謙謹與人交坦夷誠懇言恂恂恣傷人而沈毅內斷所守

介然人不敢干以私自其少時已端重如成人刑部公多聞好善矜尚
名義篤嗜風雅天下士多樂就公自幼侍刑部側及見當代巨人長德
凡名公卿與夫碩儒耆彥通人才士先後至粵者爭相刮目公虛懷善
下質疑問難舍短集長識者卜爲公輔器通籍後益自砥礪嘗謂士大
夫不幸生長富貴多財叢過晏安溺志故雖服官通顯刻苦踰寒素公
善韜晦雅不欲以文名旣以文學受知
先帝爲講幄侍從之臣

朝廷有著作多出其手久之文采四映海內識與不識爭相嚮慕公謹
避之曰盛名不可居也歷官十數絕無旁援所至無赫赫聲必求盡乎
其職曰吾以求此心之安而已退食蕭然一榻權要之門終身絕迹又
每歷一階輒以憂去服闋遲迴久之始就補最後請終生祖母養棲遲
嶺外者十年計公自釋褐後凡五遭大喪唯貢生公喪公以庶長孫不
承重餘皆解官奔赴故公於

中朝諸老資望最深而官階差後

睿皇帝知公久以養假居粵時粵大吏入

覲輒蒙

天語詢及

今皇上鑒公忠誠柄用日隆公感

兩朝知遇之恩又刑部公命諄諄以力圖報效勿戀餘年爲屬不敢遽
言退迨再以憂去而公遂不起矣公內行醇篤終身孺慕當公之終養
於粵也刑部公嘗以先業推讓諸弟公亟贊成之曰吾不幸有富名亦
以其應得之產同讓諸父家居久不取公中一絲粟貢生公有子八人
惟刑部爲嫡長餘年皆差等於公小者與公子齊年公循循執猶子禮
時戴太夫人年幾百齡刑部公亦近耄刑部待公嚴公愉愉色養入侍
重闈出隨諸父委宛將順人無閒言暇則端坐臨池賦詩遣興或卉衣
草笠與樵夫牧豎雜坐山澤間神致蕭閒怡然自得時得徘徊原野若
有所思遇者不知其爲京朝貴官也在籍十年當途罕見其面歲時通
問一報謁而已而是時公諸父兩罷觀察使家居工部尚書郎名秉綬
者方繼先業主鹺務工部故豪邁散金結客座上常滿輿馬冠蓋相望
公杜門卻軌工部知公畏慎亦不强也公無他嗜好獨喜聚書癖嗜金
石文字所藏多名拓築湖東樓度之名其園曰拓園又於其西購廢圃
築屋三間名湖西莊手植花木春秋佳日奉太公及同志徜徉觴詠其

中尤好名山水遇佳處流連竟日桂林山水奇秀洞窟巖壁閒多唐宋
人手蹟公登椒窮邃摩挲嗟玩手自摹搨殆徧又嘗得元康里氏所藏
唐拓廟堂碑及唐拓化度寺碑皆親自鉤摹上石均極神妙公詩初守
刑部家學及高密李少鶴憲喬所論列後稍變其格晚年益務精進鏡
刻堅厚必極於微妙而後已故所存不多今所刻行楷湖酬唱詩略則
皆與顯鶴唱和作也書法尤推重一時人得其片紙藏弄以爲榮論者

謂

本朝書家自張文敏照王吏部澍外得公而三百餘年來前後輝映爲
他家所不及殆不誣也公春秋六十有三夫人新建朱氏翰林院編修
掌廣西道監察御史諱紱之女賢明淑慎克配君子子六人長聯璧早
卒次聯珂道光壬午舉人候補內閣中書次聯璣國子監生後公一年
卒次聯琇餘先殤女三人一適南昌國子監生徐之瑀一適山西候補
布庫大使新淦劉錫疇一未字孫四翊勛翊華翊軒翊耆顯鶴依公桂
林周旋於紀羣左右閒六易寒暑實蒙忘分與年形融神愜迨後別於
京寓公執手嗚咽曰恐此後無復相見期矣余以刑部公方在堂公年
又甫艾也竊訝其不祥嗚呼孰知其言之遽驗耶綜公生平志行以樸

誠爲主以清淨爲宗以奔競爲恥以盛滿爲懼讀書取自娛爲善不近
名境豐而志約履夷而心危清望名德世所共見其居官政績屢秉文
衡兩司風憲釐姦剔弊振興士習整飭官常皆中人所勉能不足爲公
異至於論思密勿嘉謨造膝獻替可否事關軍國大計公畏慎不洩雖
其家亦不與聞世固莫得而知也謹次公居官本末出處大節言行學
識梗槩爲狀冀他日史館君子論撰得備采擇焉

續碑傳集卷九

續碑傳集卷十

江陰繆荃孫纂錄

道光朝部院大臣

光祿大夫兵部尚書王公墓志銘

梅曾亮

道光八年西功成

皇帝臨午門受俘兵部尚書以組縛逆酋張格爾跪

闕下萬眾爭睹歡歎而青陽王公實長兵部禮成以軍功受

賞公供職益久不懈任兵部尚書凡十六年道光十七年薨於位年七十四

賜祭葬如禮子元榜以公狀請爲之銘公諱宗誠字中孚又字廉甫文

僖公子也母阮太夫人以乾隆庚戌年成進士及第第三人授編修歷

禮部工部侍郎工部尚書終兵部尚書

經筵講官

賜紫禁城騎馬階光祿大夫當乾隆嘉慶時嘗爲雲南四川陝甘鄉試

考官會試同考官文武會試總裁道光時閱卷大臣門下士旣多貴顯

矣又貴公子早取高第官學士時隨文僖公扈

蹕東巡

睿皇帝賜翰林宴父子同席

純皇帝實錄成以纂修官宴禮部文僖公官尚書主席又繼直

上書房

奎章珍器

賞賜稠疊其父子同時極優渥之遇蓋近今所無雖

睿皇帝亦以其兩世知遇廉謹自將時發

天音而垂

清問也而公謙退自牧接同官後進皆自居敵以下嫻友見多避去不能敵其謙任學政優禮愛士然遇弊必發不稍受私居京師宅當冠蓋衝軒車皆過不留其嚴峻不苟如是而不有其名故人皆習其和而忘其介公之薨也

詔稱其清勤端慎清慎勤人所知也若公之端惟

聖主知之配江夫人繼配翁夫人及子元林元棻元琛皆先公卒次子元榜官兵部員外女三適上海趙榮貴州邱煌上元董斯廣以道光某年某月某日葬公某鄉某原銘曰

九乳垂天作鎮青陽歸神於公父子正卿公逢福世以約斂位植棟如
林不私一士高門峻城私莫敢攀惟其和光化怨而慚克永

天寵保世視躬我發其蒙以告代工

誥授資政大夫都察院左副都御史姚公神道碑銘

張履

道光二十有二年九月日左副都御史錢塘姚公終於里第年八十有
一粵三年某月日葬於某鄉之某原公之子文奉行狀請辭以刻石公
姓姚諱祖同字秉璋又字亮甫少穎悟年十一作游西湖序人服其工
二十一應科舉爲學使寶公光肅所稱許乾隆四十九年

高宗臨幸杭州獻詩

召試入一等

賜舉人授內閣中書六十年

冊立

皇太子典禮重大

派入樞廷同辦旋考取章京嘉慶四年回內閣大學士韓城王文端公

重公文值

山陵大事章奏一日數上悉以屬公委署侍讀掌

誥敕仍入直軍機存升兵部武選司武庫司主事職方司員外郎武選司郎中擢鴻臚寺少卿通政使司參議內閣侍讀學士鴻臚寺卿歷充玉牒館膳錄

方略館分校纂修提調

文淵閣校閱中更湖南北苗匪邪教之亂繼又川楚陝三省不靖閩粵洋盜鴟張青海番賊竊發十八年九月教匪闖入

禁門公常直

方略館累以軍務出力保奏列一等奉

諭優敘書名於軍機大臣之次屢承

命覈廢員公私罪過秉公予奪又嘗有疑案刑部京尹相持不下軍機大臣派員審訊亦不能決

特命公覆訊讞上咸以爲平二十年授河南布政使明年調山西又調直隸河南自十七年荒旱之後繼以兵燹河決疫癘盛行民氣傷殘公與爲休息秋閒陝州及所屬靈寶閿鄉地震躬徧履勘死者葬之傷者療之司庫支取浮濫河工爲甚防險提用之銀向不逾三十萬近或至百萬公援舊例請示之限制州縣虧空日積

陸辭日奉

諭清釐於是舉各屬交代未清者凡六十餘案並立限結算丁賦無論正雜既征悉令同解是年庫貯五百六十五萬兩各屬倉穀七十三萬石在直隸適虧侵浮冒及州縣自報虧數各數十萬乃令凡新任不得私受虧空仍嚴杜各屬新虧並將虧空之員停其升補先是自乾隆五十一年以後經費不敷歲向它省奏撥或數十萬或百萬末年庫貯僅二十餘萬迨公去任時乃實貯四百二十餘萬倉穀自經饑侵兼軍需支動蕩然無存飭各屬糴補亦數十萬石直隸水利如雄縣馬道正支河及蘆僧諸河在在淤阻致上游安州新安泛溢爲害安州更如釜底而新安在安州下流乃先濬新安之長流河及馬道支河尤淤處以通水之去路高陽瀦龍河自小莊決口舊河淤塞別由劉果莊等處衝刷成河致境內及安州數十村莊連年被滂並遴員治理至於澄汰屬員貪墨之輩望風引去排日傳見需次以察其行能奏改按班輪委法俾人地相宜以收實效一時吏治尤蒸蒸日起二十二年順天保定等處被旱災重者凡二十九州縣先令停征請截漕十萬石貯北倉備振並由豫東二省撥米協振時公疾新愈卽徧歷災區劾其辦振不實者發米

賈國積數十萬石責令平糶民賴以濟明年七月

聖駕東巡值連旬甚雨公督造灤河橋成

賜花翎並

諭是賞非爲橋工因汝平素實心辦事云二十四年擢安徽巡撫值鳳
潁水災親加撫卹亳州城外渦河因祥符六堡決口灌入洶涌下注又
鹿邑紅山廟南岸漫缺下流州縣先後被淹公乘小舟上下巡視自五
河歸權夜半大風陡作激水滿船明年調河南時沁黃並漲漫及馬工
壩尾相機疏導化險爲夷七月

仁廟龍馭上賓

今上登極命堵築儀封口門每屆十日將進占丈尺奏聞至冬閒口門
漸窄而大河冰堅合龍逾限公親乘小舟督令開鑿臘月初啟放引河
復加進占不數日大工告葺

聖心嘉悅道光元年二月公奏豫省近年情形河工之敝壞顯而易見
民生之凋瘵隱而難知河工加價自常賦三百六十餘萬外逾額攤征
衡工未已接征睢工睢工未已又將接征馬工儀工此外復有各處隄
工隨時攤徵之款民力支絀請概停緩三年蒙

俞允公素留意武備每閱兵必明示賞罰雖參游大員不稍假借是年兵部議裁減名糧而豫省方議添設並請於考城增游擊一員二年議馬營壩工河督嚴公烺欲拋護碎石

旨已依議復

命公籌度公奏時當大隄放淤過其奔衝既非順水之性而遇伏秋盛漲壩西水勢加高上游隄埝愈險則河北可虞且慮攔沁轉致攔黃於事實爲未便奉

命交河臣復議卒如公言七月閒防汛黑壩遇有儀工被誣事儀工經費經公嚴覈弊竇所省帑金不下百萬至局員報銷往往截長補短以求符合成規挾嫌者遽指爲浮冒事幸得白而八子錢五萬六千餘緡責償於公八子錢者局員以雜用不敷勅議以銀易錢每兩加扣八十分置不問遂代受其過旋奉

召還士民數千擁塞行館門外瀕行遮道攀轅路出安陽察看漳水情形應任其北徙致書新撫程公祖洛勿瞻顧前議是冬補太常寺少卿久之授陝西按察使接署藩篆陝地人尚節義時表揚之盤屋縣自川楚滋事岐郿廂匪蹂躪死節義甚多公爲請建流芳祠陳臬不及二月

小大之獄必當其情時總督某公氣燄甚盛切誠從者勿以私干姚按察云六年入都明年八月奉

命偕刑部尚書陳公若霖赴湖北京山縣察勘王家營隄工宜修復故道定議入奏往反道經河南士民迎謁相屬一路撫慰情殊依戀旋補廣東按察使屢平反冤獄各屬瘐死累累發檄嚴禁未幾又內補通政副使十一年升通政使遷左副都御史兩次

召見以年老重聽乞歸田里奉

諭以原品休致公以強幹之力精白之心踐歷樞廷洞悉機要至秉鞭作牧懲治蠹役寬免雜繇承吏治積弊之餘帑藏空虛仰體

宸衷力圖整頓願取怨於下僚必不肯苟且因循以致

國家有一旦卒然之患而無其備此公之立志然也迨

簡畀封圻河防水利營伍諸大政悉心籌畫必躬親不避艱險雖古人

戴星之勤叱馭之勇曾無以過常荷

仁廟褒嘉有云一清如水萬事認真

今上復疊降溫綸謂汝能如此盡心民事實不負

皇考委任之意公感激

主知彌矢報稱自儀工被誣

朝使廉問卒不得其毫髮之私

天子亦諒其無它既改京卿復出司風憲已而屢經內

召三遷其官仍駸駸嚮用矣而公遠陳情乞歸天下惜之公事親孺子慕供職內閣日臚列所作事三日附急足寄呈執喪盡禮窀穸之事歷三年不懈自京卿出任藩撫每之任及以事行部必飭所過州縣毋得遠迎撤供應絕饋遺輿馬皆自給雇直去官之日宦橐蕭然平生好學不倦尤喜陸宣公集司馬溫公資治通鑑自少善爲詩既以召試授官歷次扈從並有

命和之作當

高宗內禪禮成進闈蘊一首發明

聖德以敬爲本

仁廟六旬萬壽進仁壽頌深當

上意命陳設

殿廷其以文字受

知又如此曾祖諱廷錫祖諱遠翻刑部郎中考諱思康兩淮分司運判

並以公爲安徽巡撫時

贈如公官曾祖妣

旌節孝趙祖妣陳前妣李妣金並

贈一品夫人配吳

封一品夫人子八人大成江南常熟縣丞保舉知縣德基由附生廕通

判加知州銜灋山東萊陽知縣文出爲□□後候補知縣德普候補縣

丞皆吳夫人出德用候補鹽大使德舒德寶並候補縣丞女四人皆適

名族孫十三人近寶進士刑部主事近韓進士內閣中書近維近斗並

舉人候補知縣銘曰

吏習之鄙迺家是肥垂橐而至糶載而歸公懷蓋忠深維國計塞彼漏

卮正供自裕吏心之媮置民則愬疾痛顛連視同秦越公竭勞勤以拯

天災環顧羣赤已溺已飢公昔壯年萬里思騁晚自西歸猶躋華頂手

攀鐵索五千餘仞及公南下又躡岱巔天門石級上下幾千公齒雖墮

公氣獨盛十載縣車厥施未竟施雖未竟厥後則昌子姓林立接武巖

廊繇公獲報驗公之德仁恕內含清而不刻紀公治行職在史臣勒銘

埏道萬古不泯

誥授光祿大夫經筵講官工部尚書加二級諡文簡伯申王公墓志銘

湯金釗

道光十四年冬十一月二十四日工部尚書王公卒於位遺疏入

上心軫惜

命照尚書例賜卹

賜諡文簡越明年秋孤子壽昌等奉靈櫬反葬於安徽天長縣諭興集之東原將以十二月初七日期以金釗與公同年進士知公深可為種幽之文雖不文不敢辭按狀公諱引之字伯申號曼卿姓王氏先世由江蘇蘇州遷高郵五世祖開運州學生治尚書有聲高祖式耜副貢生博通五經貧而好行其德曾祖曾祿拔貢生遂於理學祖安國由一甲二名進士授編修歷官吏部尚書

賜諡文肅

國史有傳文肅公之祖父母父母俱以文肅公貴

誥贈如例父念孫由庶吉士歷官永定河道著有廣雅疏證讀書雜誌諸書行於世以公貴

封光祿大夫工部尚書加二級母氏吳

贈一品夫人吳太夫人孕八月而生公公身小氣弱性穎異好學年十七補州學生從事聲音文字詰訓之學以所得質於光祿公光祿公喜曰是可以傳吾學矣乾隆乙卯舉順天鄉試嘉慶己未成進士

殿試一甲第三名授編修癸亥大考翰林

欽取一等第三名擢侍講厯官庶子侍講學士通政司副使太僕寺卿大理寺卿左副都御史晉禮部侍郎教習庶吉士調吏部侍郎累署兵部刑部戶部侍郎授工部尚書

事 賜紫禁城騎馬署吏部尚書調禮部尚書父喪服闋復授工部尚書公

君以誠持己以正擾而能毅直而能溫忠愛之念上結

主知凡民生國計之大講求諮度知無不言林清之變有議加培

圓明園宮垣者公具疏切辨蒙

召見嘉納閩省署龍溪令朱履中誣方伯李賡芸受賕總督某劾方伯罷其任既對簿無左驗而按事者持之急方伯不能堪遂雉經事

聞

命公偕熙少宰昌往讞之悉得其情獄遂平反爲少宰時有議爲生祖

母承重丁憂三年者公力持不可會奉使去持議者違奏行之公還疏陳庶祖母非祖敵體不得以承重論緣情卽終身持服不足以報罔極制禮則承重之義不能加於支庶請復治喪一年舊例遂更正其長冬官也鈎稽必嚴察核必至素精算術嘗取奏銷冊覆核所用帑無慮數十百萬執管以計日未移晷而畢僚屬皆驚歎又河工工程名目歲修之外又有另案廳員率藉此自肥而工反遜於舊光祿公官河道六年所屬不報一另案公習知其弊故有請嚴禁東南兩河另案工程之奏得

旨允行恭脩

仁宗實錄充總裁官敬謹編輯始終其事總裁

國史細心簽酌務臻允當充

武英殿正總裁

召對時從容奏言字典一書當年成書較速纂輯諸臣閒有未及詳校者應加校正

上然之公手自校勘凡訂正二千五百八十一條輯考證十二卷以進他若畿輔歲歉則請寬京城米禁以濟民食山左旱蝗則請設廠收買

以杜胥吏奉符滋擾身無地方之責而殫心民瘼皆此類也辛酉典試貴州甲子典試湖北戊寅辛巳兩典浙江試己卯癸未兩典會試所取多知名士視學河南則捐廉購十三經注疏百餘部分貯各屬學宮教士子以根柢之學訂詩韻以導諸生韻語之不協律者爲山東學政時值教匪滋事壹以正風俗爲先撰闡

訓化愚論見利思害說刊布以曉愚民至地方官有聲名平常者直陳無隱按驗皆實則又公之公忠足以仰副

委任者也公天性純孝官庶子時居母喪哀毀盡禮光祿公以河工漫口罷觀察居京邸公侍色養志退食之暇以考訂經義爲承歡光祿公重宴鹿鳴公撰杖以侍都人士豔稱之居喪年已六十有七孺慕之色結心而形篤於本根置田以贍族人之貧者子孫自幼訓以朱子小學及陳文恭公養正遺規莫不循循有規矩政事之外以纂述爲事著有經義述聞三十二卷不爲鑿空之談不爲墨守之見聚訟之說則求其是假借之字則正其解又就古人名字音義之相比附以觀聲音訓詁之會通作周秦名字解詁又考明漢志太歲在子爲在寅之譌爲說二十八篇以正之名曰太歲考又以小學之書皆釋名物實義若經傳語

辭釋之者無幾語義未明經義反因之而晦爰博考九經三傳及周秦西漢之書發明助語古訓分字編次爲經傳釋辭十卷以補爾雅說文方言之缺公說經尤精於轉注假借之字幼承庭訓精通於光祿公古均廿一部之分於九經楚詞諸子之有韻者剖析精微又熟於篆隸遞變源流因聲音以審文字因文字以察詁訓凡漢唐諸儒就借用之字望文生義而未安者公釋以本字無不冰釋理順公生於乾隆三十一年三月十一日享年六十有九元配沈夫人孝謹德讓動合禮法歸逾年而歿葬於天長縣石梁鎮祖塋側繼室范夫人孝慈勤儉侍養光祿公數十年一飲一食必手治以進綜理家政內外秩如教子以嚴御下有恩雖膺極品之封家居衣猶補紉族黨稱之先公八年卒葬於天長縣諭興集之東原公子遵公命合葬焉子四人壽昌正二品廕生由戶部主事洊升河南歸德府知府彥和廣西鬱林直隸州知州壽朋早歿壽同拔貢生八旗教習候補郎中女五人孫七人女孫八人嫁娶皆名族銘曰

通儒之子克承家學聲音文字詁經精確繩其祖武洊爲正卿嘉猷入告忠愛篤誠屢掌文衡得人爲盛經術造士士習以正大臣規畫昭垂

信史名山著述足傳千禩長淮之南大江之北子孫繁興視此兆域

又工部尙書高郵王文簡公墓表銘

龔自珍

公諱引之姓王氏江南高郵人祖安國禮部尙書諡文肅祖妣車氏徐氏考念孫四品卿銜前分守永定河兵備道妣吳氏公乾隆六十年舉人嘉慶四年進士由翰林院編修累禮部尙書改工部尙書卒於位賜諡文簡生乾隆三十一年卒道光十四年明冬十有二月七日葬於州治之

賜瑩公典鄉試事四典會試事二龔自珍則其典浙江鄉試所得士公之學及其著書大凡嘗不以自珍爲不可裁而請之矣其行誼始末自珍又窺其數大端矣將葬公第四子壽同則使自珍表諸墓自珍爰述平日所聞於公者曰吾之學於百家未暇治獨治經吾治經於大道不敢承獨好小學夫三代之語言與今之語言如燕越之相語也吾治小學吾爲之舌人焉其大歸曰用小學說經用小學校經而已矣又聞之公曰吾用小學校經有所改有所不改周以降書體六七變寫官主之寫官誤吾則勇改孟蜀以降槩工主之槩工誤吾則勇改唐宋明之士或不知聲音文字而改經以不誤爲誤是妄改也吾則勇改其所改若

夫周之沒漢之初經師無竹帛異字博矣吾不能擇一以定吾不改段借之法由來舊矣其本字十八可求什二不可求必求本字以改段借字則考文之聖之任也吾不改寫官槩工誤矣吾疑之且思而得之矣但羣書無佐證吾懼來者之滋口矣吾又不改又聞之公曰吾之學未嘗外求師本於吾父之訓先是兵備公校定晚周諸子太史公書一時言小學者宗之公所著書三十二卷謂之經義述聞述聞者乃述所聞於兵備公也通說四十餘事又說經之大者在述聞之末又聞之公曰吾著書不憚放其辭自珍受而讀之每一事就本事說之栗然止不溢一言如公言公之色孺子色與人言未嘗有所高論吳譚年近七十爲禮部尙書兵備公猶在比丁憂服闋再補工部尙書而公旋卒矣公終身皆其爲子之年門下士私相謂曰以王公名位齒髮而辭色如子弟所學殊與所養殊與其諸人論歸之師海內歸之福也與公以事親爲讀書以讀書爲事親門內之士勉勉頽頽人知之立

朝循典常俟

乾斷無所表暴天下頗無由測公嘉慶十八年巨逆林清以七十七人

入

禁門既殄定同朝有議

圓明園宮牆高厚者有議增

圓明園兵額者公皆不謂然具摺上

睿皇帝大動容

召對良久乃罷

上諭軍機大臣王引之言人所不敢言其事卒見施行與否海內弗知其奏牘何辭海內迄今弗知也由此例之公之風旨其視徒表暴於道路者何如哉公配沈繼配范子四壽昌彥和壽朋壽同范出孫七銘曰璞之瑟瑟外有文也鏐之沈沈中有堅也君子肖之以事其親也於乎欲事親者考斯欲事君者考斯斯人而不敢承孰為大道

白鎔傳 畿輔通志

白鎔字小山先世由洪洞徙通遠祖為襄城伯裨將甲申之變授命都城鎔乾隆五十四年舉於鄉嘉慶四年成進士改庶吉士散館授編修

實錄館纂修官十八年遷贊善提督安徽學政十九年累遷至侍講在皖三年士林悅服有

旨令條奏安徽吏治民生利弊疏言皖省錢糧惟鳳陽泗州積逋較多推原其故因二屬瀕臨湖河每遇黃流漫溢減洩之水悉由鳳泗一帶匯歸洪湖湖水漲滿各州縣田畝多被淹沒是以緩徵之數陳陳相因如遇安瀾豐稔之歲照例帶徵舊額在小民以一年而輸數年之賦雖逢樂歲不免拮据而官吏懼干處分又復多方規避積重難返臣愚以為與其存徵之名致小民日受追呼於國計依然無補何如核徵之實使官吏從容辦理於舊額尚可漸清請嗣後二屬錢糧遇成熟之年或儘年分最遠者或儘年分最近者每年祇帶徵一年儻遇歉收再行遞緩如此則民力漸紓民氣漸厚而催科者自願考成亦必行之有效矣

奏入

上韙之青陽有徐孝子者四歲而孤事母孝母沒後廬守墓側哭泣不絕聲逾三年鄰人勸之歸孝子不歸鎔按試其地親造廬墓所慰勉之贈賻甚厚次日復書匾額率生童張鼓樂親送其墓於是觀者男婦近萬人皆嘖嘖稱歎又訪桐城左忠毅公後裔取之入學士論翕然二十一年試竣還京轉侍讀教習庶吉士充

日講起居注官二十五年遷詹事府右庶子是年擢侍講學士道光元

年轉侍讀學士二年督學廣東所拔多知名士士論翕然如安徽時逾
年遷內閣學士兼禮部侍郎銜六年還京七年擢工部右侍郎兼管錢
法堂事務九年四月

命偕兵部尚書松筠往保定按事五月復

命往永平審辦撫甯民楊智王俊等案鎔鞫實請分別按律治罪均下
部議行十年充

經筵講官提督江蘇學政尋

命會同戶部侍郎寶興查勘河埭料鎔據實入奏

上切責河督張井未能查出弊竇下部嚴議以鎔辦事持正次年五月

詔授都察院左都御史來京供職尋以高郵湖河漫溢田廬被淹

詔偕工部尚書朱士彥查驗江南各處災振并履勘沿河閘壩工程鎔

北行至馬棚灣與士彥相遇遂會同查驗新壩南關壩兩耳壩招關壩

等工又自林家西查勘智信二壩暨范公隄高家堰各堡工程新舊段

落閒有坍卸衝刷處與制軍陶澍商議以工代振事竣由江甯赴安徽

周歷太平甯國池州安慶廬州各郡沿途察捏災侵振弊先後疏奏之

時又疊奏

諭旨偕士彥審辦唐汝旬湯天賜張鳳儀等案均訊明覆奏鎔往返江蘇安徽二省閱時凡七八月舟車況瘁刻無暇晷十二年二月還朝復命即日

召見垂詢情形甚悉鎔剴切陳奏俱稱

旨六月因都城缺雨應

詔陳言皆切中時弊七月署翰林院掌院學士旋充順天鄉試考官向例籍隸本省者例不聽宣鎔是日奉

特恩都下榮之十二月

賜紫禁城騎馬十三年擢工部尚書充武會試考官以錯誤鑄級左遷大理寺卿十九年乞病歸卒於里年七十有四鎔孝友性生母鄧素畏雷每夏秋日夜侍幃榻不敢違為弟子女婚嫁愛如己出在官剛正自持不肯苟同於人然綜理部務遇事悉心商榷務求其是同僚中未聞以言事齟齬者前後蒙

恩遇三十年事無大小總以竭誠致慎上答

主知官詹事時奉

召入對

上曰朕精神日退御事輒煩當作何修養對以清心寡欲莊敬日強上爲動容給諫劉啟南以直諫獲遣鎔力爲申解

天顏頓霽東南錢漕積蠹日甚尤賴鎔歷疏其弊民困以甦云

又白鎔傳

安徽通志

白鎔字小山順天通州人嘉慶四年進士十八年以詹事府中允授安

徽學政

仁宗睿皇帝諭以汝學問素好故放汝安徽學政汝去考試須拔真才二十年遵

旨奏稱安徽民欠錢糧惟鳳陽泗州爲數較多該二屬瀕臨湖河每遇水漲各州縣多被淹沒請嗣後帶徵錢糧每年祇帶徵一年倘遇歉收再行遞緩得

旨允行又嘗撰正人心論一首發交各州縣刊示張貼至下學講書士林齊集常將孝弟忠信禮義廉恥八字就其切於該處士習者諄切懇諭多有聞而心動歡欣領會者桐城童生左鳴岐前明左忠毅裔孫也年十三鎔特拔取之並勉之以詩青陽孝子徐守仁母歿廬墓鎔按試至池造廬賻贈並會同督撫題請建坊道光十一年以左都御史查勘

江南災振捐助千金平反多案又密保宿州知州周天爵可大任後卒如所言

誥授榮祿大夫戶部右侍郎兼管錢法堂事務春海程公墓志銘阮元公諱恩澤字雲芬號春海程氏東晉時有爲新安太守者居篁墩又遷歙南代有隱德曾祖筠祖步矩郡生員父昌期乾隆庚子進士第三人及第

上書房行走翰林院侍講學士母項氏總兵穆木女公幼穎異毀齒經傳皆成誦尤好讀古書遇疑意必考問釋然而後快鄉先達曹文敏公金輔之先生皆語學士曰此子逾冠所學不可量矣乾隆六十年學士卒於山東學政任公甫十一歲哀毀力學及長補學生員益博綜經史從外祖學騎射能挽強弓最後乃從凌仲子先生遊及其闢輿先生曰天人並至博而能精將來所成者大也嘉慶甲子鄉試中式舉人居京師益勤於學天算地志六書訓詁金石皆精究之辛未會試中式殿試二甲改翰林院庶吉士散館授編修道光元年

命在南書房行走
召諭曰汝父蘭翹先生品學朕昔年最敬汝之聲名朕亦皆知宜更守

素行今戶部侍郎祁公騫藻同

召見親聆

聖訓出語同朝皆榮之旋奉

敕校刻養正書屋集是年充四川正主考二年補春坊中允校刻

御製詩文初集三年放貴州學政補翰林院侍講轉侍讀五年補春坊

右庶子冬補侍講學士次年調湖南學政回京

詔充春秋左傳纂修官補國子監祭酒九年項太夫人卒丁憂歸歛十

一年起服入都仍在

南書房行走十二年以候補祭酒未與考差

特放廣東正主考十二月

命在上書房行走課惠親王學王敬禮師傅出於至誠講學爲詩古文

書法皆日有進甚相益

上與王論公爲人有和而不同之目十二年擢內閣學士充

文淵閣直閣事十四年授工部右侍郎兼管錢法堂十五年會試知貢

舉調戶部右侍郎管錢法堂充

殿試讀卷官閏六月

諭程恩澤部務較繁著無庸在上書房行走十六年復充

殿試讀卷官十七年充

經筵講官夏受暑醫逾月病愈深遽以七月二十九日卒明日遺疏入上嗟歎悼惜久之

諭曰程恩澤由翰林洊升卿貳前在南書房上書房行走有年人甚謹飭辦理部務克盡厥職近因感受暑溼賞假調理方冀速就痊愈益資委任茲聞溘逝殊堪軫惜伊子程德威著加恩賞給舉人服闋後準其一體會試公學識超於時俗六藝九流皆好學深思心知其意本工篆法益熟精漢許氏文字之學官貴州學政時與布政司吳榮光勸士民育粟蠶其利大行於民又重刻岳珂五經以訓士及奉

詔刻春秋左氏傳與祁公共議推本賈服不專守杜氏一家之學平日好士說士技若己有典試廣東期取實學之士知曾釗之名必欲得之釗久丁憂公不知也書榜大失望然所得佳士亦甚多出闈後與學海堂學長吳蘭修等遊白雲山名士會者數十人有蒲澗賞秋之圖所著述惟國策地名考二十卷已寫定本其餘多未成書實不自料其遽折詩文雄深博雅彙亦盈篋其孤方治喪待錄成卷帙就有學者擇之當

成佳集公又多藏書宋元以來子史雜錄博覽強記金石書畫亦多考
訂苟有叩者必舉以應元入京與公居相近常以暇相講習元偶校毛
詩有椒其馨椒字訛本是馥字其訛久在六朝罕可相語者持以示公
公獨深會其意謂詩苾芬孝祀韓詩作馥芬孝祀馥字毛韓兩見彤聲
不謬於六書爲加一證公又謂近人治算由九章以通四元可謂發明
絕學而儀器則罕有傳者乃與鄭君復光有修復古儀器之約又嘗深
究開元占經謂道光十五年木火同度當有火災人驗其言而韙之
吉地案發因水之故曹文正問公古有之乎公曰水齧王季墓見棺之
前和呂覽載其事所撰國策地名考如謂孟津在河北非今孟津縣亦
非古河陽縣蒲反非舜都乃衛蒲邑以嘗入秦仍歸故謂之蒲反諸條
皆確不可易公之歿也年僅五十有三朝野皆悼惜之金夫人以道光
元年卒二年繼娶劉夫人孫一名新寵公於元例稱門人且仲子先生
爲吾友學術相契因爲之志銘曰
公之爲人和而不同厓岸內峻德氣外冲兩世
內廷在位靖共聲名品學守之惟公公學之大啟於凌氏約禮博文實
事求是研究經義及於子史卽以其學望之於士嗚呼天命限公不祿

帝諭飾終

賞延世篤遺書未定集之可讀我鐫此銘永貞宰木

光祿大夫經筵講官吏部尙書管理順天府府尹事務追贈太子太保

寶應文定朱公神道碑

季芝昌

道光十有八年秋八月甲子吏部尙書寶應朱公薨於位春秋六十有八事聞

天子震悼追

贈太子太保

賜諡文定

賜祭葬如禮

詔長子百順業經出仕外其次子附生百行廩生百城廩貢生百谷附生百梅俱俟服闋後交部帶領引見天下咸歎

君臣知遇之隆古今不數觀也越年其孤扶柩歸里以某月某日葬寶應某所之原與劉夫人同兆禮也前事郵狀來京屬門下士芝昌爲文於神道之左伏念公以文學受知

睿廟嘉慶七年由一甲三人

賜進士及第授職翰林院編修敷歷

兩朝孚嘉一德其宣猷俾燮黼黻於總章衛室之床龔軒於緡或哲陽
之化者不可得而詳也其經術秉哲作咎翳之謨明疇采負曾史之淑
性直聲者乃可得而述也公諱士彥字休承號詠齋先世居吳宋時有
之修者為學博徙徐州元時寶臣為將軍明初入三始家揚州之寶應
累傳皆齒于庠其通顯者曰訥曰應登曰藩入鄉賢名宦文苑清興克
簡順治丁亥進士官御史克簡生經經生澤代邑附生公會祖也澤代
生宗贄恩貢生公祖也宗贄生彬乾隆乙卯舉人國子監學錄銜公考
也三世皆以公貴

贈封如其官公兄弟三序長仲士達季士廉竝起家進士公累踐清要
洊躋上卿計為宮贊善一中允二洗馬侍講各一庶子學士各二少詹
一內閣學士兵部侍郎左都御史各二工部兵部尚書各一吏部尚書
三管理順天府府尹事務一鄉試正考官一會試同考官二學政總裁
各三

殿試讀卷官教習庶吉士各一武會試監射大臣三
上書房行走二

經筵講官四於戲公在

睿廟時婁膺非常特達之遇九年

駕幸翰林院禮成

命諸臣賦詩公獻頌九章

帝嘉賚之

賜味餘書室全部杜詩九家集注名茶文綺八角硯藍瓷杯各色十七
年大考翰詹獲高等逾歲五遷其官至學士旋督湖北學政自是而公
之位業日隆矣越六年大考雋如前擢少詹二十五年秋七月以閣學
直

上書房傳

皇五子今惠親王讀扈

蹕避暑山莊驚聞

睿廟升遐倉猝扶惠邸詣

闕號慟跪迎

梓宮道旁

今上在梁閣召對諭以

先帝付託甚重當據所見直陳時

上方求紹聞衣惠之言公亦進毋劾弗違之訓繕孫文定公三習一弊原摺以上

上嘉納

御極後嚮用益殷班九列冠六卿綜理封圻

賜紫禁城騎馬公以受

恩深重遇國計民生所關悉心籌畫陳謨入告道光四年冬高家堰掣通過水疏進河防五策

上遣使勘之次第如其言初公居翰林充

國史館纂修手成河渠一書故公於河淮最熟

帝亦任之專十一年秋

命勘河湖及十四堡馬棚漫口并大江南北被水州縣公至駕小艇冒風濤周履各村莊問民疾苦復設粥以濟倡捐制錢三百緡高郵兩隄災黎以工代振其無爲江壩桑田變爲滄海急請帑興修俾民得還故居十二年冬持節濬于灣引河並督洪口合龍相度高堰山盱揚糧河揚裏河各廳分別急修緩修如式尋築黃河大隄中運兩河緯隄次第

修舉無廢法十六年夏奉辦豫皖蘇浙贛粵六省事件道次帶查南田
禁山乍浦海塘南河料埭泗洲挑河工段公綜履名實山以官海以府
甫後服官四十年五持英簫九掌文衡輶軒所至尤留心民政在荆時
白蓮天主教興公撰闢邪教說進奉
帝稱可命刊刻頒行嗣是而邪詖息在浙時因訟戶積習抗糧治之嚴
猾者不便遂播謠言入

宸聽

上命大吏查辦事白

帝益用嘉悅下優詔嗣是而士習敦在皖時適貴池青陽二縣水洊至
穀不升公以緩徵陳得

旨賴存者無算嗣是而民生厚公之公忠體

國類如此其苞淳也川洛內涵其設施也山嶽外發其廉明也不爲皎
皎之行其撫字也不爲煦煦之仁芝昌忝列門牆未窺堂奧竊謂矍鑠
精神功業靡旣乃天不憖遺棟木其頽謹譔鴻烈用效景鐘之鏤衛鼎
之銘至其闕闕敘次門徒譜籍以及奏牘忠言庭儀懿節詳之

國史家乘不能縷述也銘曰

懿鑠洪業翊贊斯文山爲時雨泰山之雲度己以繩照人以鏡文學侍

從

先聖

後聖惟公宿學

睿皇夙識翰林供奉是儀是式惟公秉直我
皇其信節以絳麾頒以金印楊柳雨雪周道逶遲翁河時額豢獄時宜
猗嗟我公鞠躬以報生榮死哀

帝用追悼指厥阡隴若斧若防式提言行兼苾馨香

禮部尙書山陽李公墓志銘

徐士芬

道光丙午四月大宗伯山陽李公卒其秋將歸葬故里公弟宗晟以公
行狀屬爲銘公門下士中外無慮千數百人士芬受知最先受恩亦最
深因不敢以不文辭謹按公諱宗昉字靜遠號芝齡先世有號金竹翁
者元時以醫名濠泗開明初徙居山陽子孫世其學故至今猶稱金竹
李氏曾祖諱培庠生祖諱慶曾考諱崇德皆貢生二世並以公官
封贈光祿大夫妣皆一品夫人公生而岐嶷穎悟絕倫考光祿公課子
嚴四歲時卽令夙興誦讀八歲能作文十六入縣庠甫弱冠試藝爲錢

黼堂學使所擊賞首列食餼科試以國士無雙命題卽指公也尋選辛酉科拔萃卽於是秋舉鄉試壬戌捷南宮

廷試第二人及第授翰林院編修充

實錄館纂修

國史館

文穎館協修甲子充陝甘副考官己巳會試分校壬申大考二等升贊善癸酉遷中允視學貴州時巡撫某以黔賦寡疑田多隱匿擬疏請丈量全省田設局調吏銳意必行公知其不可而無以折之也會公方以志乘闕略檄各校官蒐采載記適得乾隆初前學使鄒一桂請丈田御史包祚永極陳其害當奉

俞旨故事以示某撫曰部臣必援此以議駁且以匿前事詰君君無辭矣某撫大悟事乃寢黔民得安未幾歷侍講侍讀庶子洊擢國子祭酒召回京丙子考試差

上親閱卷卽命督學浙江調翰林院學士越日入謝

諭曰汝考差第一浙江人文淵藪當取有用之才公益感

知遇日以作養真材圖報稱先是山陽汪文端公視浙學三年士子欽

其學行服其藻鑒以爲極盛難繼而公適代之凡所以陶鎔浙士者一
如文端蓋公卽文端弟子淮陰人物浙中學校並以二公傳盛事焉丁
丑擢少詹事己卯升詹事庚辰秩滿還京充

日講起居注官稽查左翼覺羅官學遷內閣學士兼禮部侍郎銜辛巳
道光改元監臨順天鄉試稽察中書科壬午遷禮部左侍郎充會試副
總裁

殿試讀卷官是秋充江西正考官接任學政調戶部左侍郎南昌試院
有高阜傳遞者向於此通綫索公爲起亭三閒試日危坐其中周覽無
所蔽弊以絕會選拔屆期甄擇精慎彌愜眾望丙戌差竣調工部左侍
郎兼管錢法丁亥調戶部右侍郎兼管錢法是冬充

經筵講官戊子管國子監事充順天鄉試副考官己丑充會試副總裁
朝考閱卷官教習庶吉士署兼管順天府尹庚寅署吏部右侍郎尋
以失察戶部書吏偽造捐照降三品服留任辛卯再署吏部侍郎充順
天鄉試副考官未出闈

賞還二品服開復處分壬辰充浙江正考官癸巳調吏部右侍郎旋丁
內艱乙未服闋署吏部右侍郎丙申補吏部左侍郎尋擢都察院左都

御史次年丁外艱庚子起復充武

殿試讀卷官署兵部尚書是秋補原官癸卯

賜紫禁城騎馬甲辰升禮部尚書乙巳兼署兵部尚書冬以疾請假開

缺未半年卒遺疏入

上以公學問優長辦事勤慎深致軫惜

予祭葬如例公生有至性事二親盡孝至老孺慕人稱羨之弟少公二

十七歲自幼授讀友愛甚篤朝夕飲食與共數十年無閒廉俸所入分

贍戚族必徧能讀書者培之尤厚於服官以盡職爲心忠愛之忱措諸

實事絕不以矯激沽名疾亟時僚屬入問猶勸勸詢部務無一語及私

生平胷無蹊徑口無臧否與人晤對落落不暱近然視人事如己事扶

植門弟子傾囊助之無所惜賴以離枯集苑者不可勝計所著聞妙香

室詩集十二卷文集十九卷經進集五卷詞一卷黔記四卷唐律賦程

若干卷金石存若干卷謹案金石存山陽吳玉搢撰宗伯刊行非自撰也致用叢書若干卷與

制舉諸體皆行世生於乾隆己亥七月初三日卒於道光丙午四月初

十日年六十有八配沈夫人以賢孝稱先卒弟子鼎琛嗣銘曰

淮之水兮瀾瀾鍾毓名賢兮一其揆觥觥文端兮無與比公起卓然兮

獨媿美科名仕宦兮如一軌各有不朽兮照青史南郭之南有高粱兮

十五里奠幽宮兮蠶封峙世萬子孫兮永繩此

陳慶鏞

誥授榮祿大夫工部左侍郎沈公墓志銘
公諱維鑄字子彝一字鼎甫號小湖浙江嘉興人曾祖暉妣于祖廷煌

妣諸父學堦妣陳皆以公貴

贈如例公兄弟二序長少從父學不名別師毀齒經傳卽成誦年十七
補弟子員旋奉母諱讀禮畢補增廣生嘉慶辛酉舉於鄉壬戌成進士
改庶吉士於是年二十五矣以疾故乞假未至聞父喪奔歸服除乙丑
散館授編修辛未會試同考官壬申翰詹大考

記名遇缺題奏癸酉順天鄉試同考官乙亥除國子監司業旋遷司經
局洗馬丙子湖北學政丁丑擢翰林院侍講轉侍讀庚辰差竣入都官
如故道光辛巳補翰林院侍講學士壬午福建正考官尋拜福建學政
是年轉侍讀學士癸未補大理寺少卿丙戌差竣入都官如故八月放
順天學政庚寅授太僕寺卿辛卯授宗人府府丞是冬差竣入都署都
察院左副都御史壬辰拜真除八月復放安徽學政甲午八月期滿仍
留任其冬進工部左侍郎丁酉差竣道上籲請開缺回籍營葬奉

旨賞假三箇月毋庸開缺戊戌以兩耳重聽乞休不允尋署錢法堂事務六月

上察耳疾加甚

諭開缺安心調理一俟痊愈卽行具摺請安欽此於戲綜公爲仕凡三十七年由文學侍從洊升卿貳仰荷

兩朝知遇入則屢與修書出則疊膺文柄星使絡繹同朝諸臣無有如公多者其在

仁宗朝奉

特旨輯全唐文纂

西巡盛典分辦一統志臣工列傳復奉入直

懋勤殿纂辦

祕殿珠林

石渠寶笈書成

賜賚有差其在

宣宗朝

特派總纂

實錄兼提調并

命詣

皇史成恭查

尊藏得如式以報書成亦

賜賚有差先後充

文穎館

國史館協修各一

國史館總纂一

文淵閣校理二

日講起居注官一分教庶吉士二稽查覺羅學幫辦內閣學士批本各

一閱新貢士覆試卷庶吉士散館卷各二閱新進士

朝考卷考試差卷

殿試讀卷大臣各一而五任學政兩逢拔萃尤學臣中不可多得之數

所至風清弊剔振拔皆知名校士而外兼留心民瘼視湖北首禁邪教

士氣一新視福建奏飭州縣官毋私設班館毋以監生任緝捕催科諸

政視順天尤以畿輔重地體察民隱時或入牘以告視安徽值濱江各

郡水潦成災與撫藩分籌備振復捐廉佐事民以安公爲人極和易至其舞文訛法無少縱而劣員較轅庠序及姦民藉端傾陷士類必力持以直之故今楚閩燕皖士民無論知與不知聞其名皆矜式生平喜讀宋五子書以爲典章制度與夫聲音訓詁文字之學必宗漢人而道理則備於程朱自明薛敬軒胡敬齋以及

國朝陸稼書諸書靡不沈潛玩索求爲身心有用之學所校刊有程畏齋讀書日程羅整庵困知記祝人齋淑艾錄汪雙池讀近思錄張楊園年譜陳確庵聖學入門陸桴亭思辨錄方小春讀易日識最後訂姚文僖公古音諸序其書讀與唐韻合然則公之志向與其誘進後學益可知矣慶鏞久隸門牆當公養疴京邸得造膝請業嘗曰爲學當從實踐下工夫又曰居官須熟讀通鑑礪益至丙午慶鏞鐫秩回籍公倦倦不忍舍瀕行復贈以詩而公亦以是年南旋越己酉主講敷文敬業兩書院時浙江水忽漲禾被淹十八九公札商當道輓粟飛芻其言凱以詳事未竣遽以是夏六月二十七日疾卒於家年七十二遠近相與悼之邦人士以狀上得

旨崇祀鄉賢祠而吾閩自林文忠公則徐出公門下而外暨諸後進並

以名宦請疏具未上蓋公之明德固在人也初娶顧夫人元和國子監生有篁女嘉慶十七年卒繼娶虞夫人金壇盤屋縣丞書寶女道光二十五年卒子二長宗涵刑部司務次宗濟監生女四殤者二一適甲辰進士工部主事李德莪一未字皆虞出今以咸豐元年某月某日葬公於某所之阡移兩夫人之殯祔焉前事長公子具狀來請銘慶鏞文弱無能道揚盛美然以受知於公也深又安敢以無質之言重爲公知人累謹序其次弟而爲之銘曰

天篤哲人生於樵李文學起家以佐

天子屢持英蕩振興斯文匪惟造士抑孔勤民誠格

兩朝特隆

帝眷稽古之榮

賜書

賜膳立身衛道先民是趨一生私淑維程與朱爰伐貞珉以紀名德必有達者善繼無極

工部左侍郎羅公神道碑銘

湯紀尚

代

南海羅公既薨四十年而外碑未立孫崇齡游吾門既舉京兆試始奉

狀乞神道之文某弟子之夙者誼何以辭按狀公諱文俊字泰瞻因所居自號蘿村先生世由祥符一再遷入粵析居外郡歷三世始占籍南海考華妣潘生泰冕泰建泰交晚娶側室張公生母也以公貴自考以上曾祖某祖某累

贈光祿大夫自妣以上曾祖妣某祖妣某累

贈一品太夫人光祿公之卒也公方四齡依張太夫人貧幾廢學陶然清苦中藹藹孝弟不以他聞由副貢生嘉慶二十四年鄉試中式道光二年會試中式

殿試一甲第三名

賜進士及第守親不出既除憂始入都供職十一年

記名以御史用明年大考列一等第二擢左庶子再轉侍讀學士十九年大考列二等

賞緞匹遷通政司副使歷詹事府詹事內閣學士署工部右侍郎尋授左侍郎中間典順天鄉試者一視學山西陝甘浙江者各一充武鄉試考官武會試總裁並磨勘弓刀石力大臣者一查勘

東西陵工程者再以疾乞告疏三上始

俞允回籍四載值

種碑傳卷十

宣宗成皇帝上賓哀痛攀號疾遂革遺命縞服斂時道光三十年二月二十四日也享年六十以咸豐二年月日葬於邑西長蛇嶺道光之季大學士穆彰阿秉政榮納一時閃榆浮媚之士咸鞶門下然風裁峻厲頗規才敏爲異同旣而廣南異釁則不能無所憚伎於是侯官罪黜蒲城憤死南山具瞻始赫然指目於天下矣公會試隸其門獨謝不往釋褐三十年回翔九列翬翬守職未嘗爲高論吳談然義立不附矚然有以自異蓋公以上第結

知進則特簡退則力請出處之際有獨審乎幾先而無神迹可闕者人故莫得而述也公當官廉靖持大體正眠繩行矩德外絕敦比纖蹟而不難乎名勢先後視學減侍從卻供億一以經史造士英彥蒸起而兩浙尤美按試處州海警至獨夜撫劍誓以身殉在部時戒子弟毋與京兆試座主湯文端公篤契之謂羅某立朝敬慎斯言得其槩已配孔夫人有婦德妾霍陸子三景蘇啟漢廷琛某官女二孫八某某其一崇齡也公有高世之懷縣邈清瑕嘗欲肆志於山水爲文章不以臺閣夷憚見重而清言絜均標然秋雲之端自始仕以至移病遇事頽頽持一節

以風誼高天下而不褻其聲聞故朝野歸公長惠銘曰

帝有儒臣娟娟孤童十弼一褻闕極斯通始對大策灤火笙鏞搏霄威
鳳天際之靈覽輝而出勇拔其豪冥按大索何埴不陶桃李四滿烝彼
俊髦符應繚繚有禽來敖不以歲深雲而勿霖還公

朝右協維

帝心匪躬矢慤祿不可侵丹石堅赤萬口同瘖如佞而進孰讒而止我
義非安賣聲則佞鑿爾儂媮絜茲貞履杲弗得征良乎前趾大林邱山
湛德泮泮江湖榮暎卻嶮蹈夷我嘗識公睢首雪髭載道于兒不怒而
怡自隸公門斯鎔斯冶軌迹奚儀有隕若瀉高墳嶠如嶺雲之下銘厲
媿媿敢告來者

誥授資政大夫工部左侍郎韓公神道碑銘

鄧顯鶴

道光十一年六月癸卯資政大夫工部左侍郎韓公以疾終於家其年
十月丁未公子湛等奉公匱葬於長壽韓家嶺于子墳而神道之左禮
宜銘公子瀉使人礮石於巴以書暨公手輯年譜來屬其門下士新化
鄧顯鶴文於碑先是顯鶴入都爲選人謁公於宣武門邸第臨別公出
年譜命序且曰吾老矣身後不知誰屬將待子文以瞑目顯鶴斂容避

席對曰

朝廷方以柱石待公願吾師長爲國家元老顯鶴執筆紀功德祝眉壽
仰視公色黯然惘惘而別無何公以疾歸歸後踰年遂捐館舍顯鶴於
弟子籍中受知最深公之喪在數千里外無由視含殮葬又不克襄凡
役事滄書五六至敦促不厭其敢以不文辭謹按譜次其略於左公諱
鼎晉字樹屏四川長壽縣人曾祖某祖某均縣學生父某某乾隆十五
年舉人甘肅碾伯縣知縣曾祖妣姚氏謝氏祖妣聶氏妣曾氏皆
封贈如例碾伯生三子公次二韓氏始居湖廣麻城縣明季徙蜀自碾
伯公以上世以名德重於鄉里碾伯居官有政績未竟其用公天性夙
成四歲隨父任八歲回蜀以碾伯罷官刻苦自勵年十一屹然若成人
十六碾伯歸自肅州公學已成二十四補縣學生二十五補優廩膳生
試皆第一三十充乾隆己酉拔貢生是科舉於鄉迨成乙卯進士改庶
吉士年三十六矣嘉慶改元散館授職檢討旋乞假歸省是時白蓮教
匪起楚之當陽躡樊襄窺荆峽沿途多警公晝夜馳歸抵家而達州已
告變公奉碾伯公遷涪遷渝靡有暇晷二年丁碾伯憂遺命長壽爲賊
衝不可居乃全家移寓重慶而舊宅遂燬於賊四年服闋奉張太夫人

入都供職充功臣館提調

國史館纂修官六年充辛酉科順天鄉試同考官八年以御史

記名九年充甲子科湖南鄉試副考官是年補河南道監察御史十年冬以母老乞養歸蜀十二年春丁太夫人憂服闋踰年赴都補官十六年補江西道御史掌河南道御史巡視南城巡視東漕十七年署禮科掌印給事中十八年京察一等轉工科給事中升光祿寺少卿督陝甘學政是年冬擢鴻臚寺卿十九年遷通政司副使再遷大理少卿二十年遷太常寺卿二十三年轉大理寺卿二十四年擢都察院左副都御史祭告豫楚嶽瀆陵廟差旋督福建學政二十五年在福建學政任聞仁宗睿皇帝升遐自以邊隅寒峻受

特達知一旦攀髯莫及悲慟欲絕道光二年回京供職五年署刑部右侍郎兼署禮部右侍郎六年六月授倉場侍郎九月因病解任七年四月病愈仍署禮部右侍郎是年十月授工部左侍郎兼署禮部右侍郎公體素健中年後以勞失血在倉場任內病霍亂後時患頭目昏眩猶力疾治事

上賞假者再嗣請解任調理養病都門至八閱月之久病起授冬官兼

權儀部公趨積勞益以痰喘往往而劇屢值

召對面陳衰病情形願乞骸骨

上領之八年正月

詔以原品休致歸後二年卒公狀貌英偉言論慷慨少有經世之志通籍後值教匪擾蜀親見軍中勦辦事宜於地方利弊民生休戚蒿目忧心時思建白嘗言教匪之起由莠民日多邪說易入其始一二姦回假大乘天主名目相蠱惑而無業流民椎埋博徒展轉糾結馴至大逆而不可解故欲息邪說先除莠民除莠民自博徒始初至諫垣卽上言天主教流傳之害請禁本師燬經卷以絕根株再至卽力言四川應除積弊六條首曰除咽匪以防積漸其年復言關東三省及各直省賭博之弊由於游蕩閒民聚眾搗引官吏書役得受陋規官爲之倡民受其誘俾有業之良民忽成無賴之匪類其機甚微其受害甚大又言京師首善之地各王公大臣豈肯使左右警御蹈此惡習臣近聞京城驕子房賭風漸熾內城旗人多受其累以有限之錢糧供無窮之揮霍當生齒日繁之時其流弊有不可言者次日復言臣昨日請禁賭博一摺欽奉諭旨令臣據實指明臣實不敢稍存迴護且臣業將王公大臣陳奏於

前更復何所避忌

先帝嘉公言確即日獲博徒三起一時親貴近臣莫不悚息而

睿廟之知公亦自此始矣入奏時或疑博徒事小王公位尊不宜牽連

陳奏不二年而林清之黨嘯聚畿輔震驚

宮闕大抵多流蕩失業之民附之然後知公之所見者大而所慮者遠

也公歷官一十四任未履外臺而於農田水利漕務振荒詰戎諸大政

講求不遺餘力在巡漕時履勘十七州縣泉源以爲舊泉實力疏浚足

利運行不必添設新泉徒爲民累又奏復東省運河挑工舊制東人稱

便在倉場時值初試行海運籌議迎卸兩運數百萬

天庾視常年倍捷在陝甘時言榆綏各屬倉貯空虛宜設法籌補榆綏

資蒙古糧接濟今腹裏口外俱荒宜分別安置撫恤當是時方勦辦南

山賊匪而林逆餘孽尚有稽誅未盡獲者公首言南山逼近老林與蜀

道通賊匪所在掠食宜行堅壁清野之法山內流民雜處最爲姦數宜

嚴行保甲使逆黨無所匿而賊匪亦易蹤又請嚴禁弁兵擄掠難民子

女慎選南山附近地方及豫東三省經兵州縣牧令又以其時言川北

荒歉與南山毗連鹽梟嘔匪多出其中請先事預防設法調濟在福建

時言閩省積弊甚深由吏治久弛請不限資格用廉明幹吏調補汀漳泉望緊要缺久任以專責成漳泉營伍向有通盜叅賊惡習請責成提鎮大員立予重典毋稍袒護最後乃條陳學政事宜四公方職文字所言皆軍國大計封疆要務公不以出位爲嫌

上亦不以侵官爲慮奏夕入旦卽下所司議行蓋公忠誠上結

兩朝

聖明之知見諸施行彰彰若是其他心有所欲言與言而未盡者雖其家不與聞無由知若其著於譜者又不能悉載也公學無不窺以窮經致用爲本文不取艱澀以達爲主所上封事洞胸而出悃悃款款曲盡情事論者謂其近古名臣奏議嘗奉

命恭擬陝甘平原地方教民論二篇

睿廟稱其通暢奉旨刊行西人至今能誦之者有樹屏文集年譜族譜若干卷性至孝先後陳請歸養終身孺慕督學陝甘時過碾伯舊治訪求先公手治故牘遺蹟見舊時老吏悽然涕下歸田後以私宅作家廟以祖遺產爲祭田兼贍養疏族之貧而無告者與人交胸無城府義之所在斷斷不少屈人有片長稱道不釋口屢掌文柄凡爲考官學政外

知會試貢舉一監順天鄉試繙譯會試各一武會試總裁一會試覆試
朝考翰林散館閱卷大臣七稽查左右翼學二大挑直省舉人一拔識
多知名士督學時尤兢兢以正人心端士習爲亟世競稱其在閩時誓
關廟文此特公借以警愚頑之苦心無足爲公異獨念公抱經世才未
得大展其用或以公孤立寡援爲惜嗚乎此尤見公遭際

聖明恩禮始終之大節爲暢然無憾者矣公春秋七十有二配李夫人
淑慎慈惠先公八年卒子四人浩早卒湛優貢生候選知縣滄三品蔭
生通政使司經歷改補貴州印江縣知縣李夫人出潤側室李孺人出
女四人李夫人出者一乙酉拔貢蕪湖知縣陳葆森其壻也餘側室出
孫十人慶棨郡學廩生慶楷縣學附生曾孫十五人蓋公之後方昌矣
公歿後鄉人以公行誼上於

朝奉

旨入鄉賢祠銘曰

奕奕韓公西土之光南國之紀爰自臺館洊歷卿貳迄歸田里其氣嶽
嶽其論侃侃無少挫靡公言言官以言爲職當持大體公爲大臣以言
造福施及四海凡公所言協乎筮龜人厭

天喜百練之精兼金之純以礪以砥謂宜秉軸持天下衡萬物受理孰云去國曾不崇朝嶽頽星隳哲人之痛朝野同聲豈獨小子述德表哀伐石刻辭敢告來禩

光祿大夫前刑部左侍郎黃公行狀

孫衣言

公黃氏諱爵滋字德成號樹齋其先自閩徙江西今爲江西宜黃人曾祖國偲妣紀氏祖太學生捷岡妣潘氏父縣學生錫禧妣周氏皆

贈如公階公年十六爲撫州府學生二十二以拔貢朝考一等爲瀘溪儒學訓導嘉慶己卯舉人道光癸未進士改翰林院庶吉士授編修補福建道御史轉陝西道御史歷兵工科給事中鴻臚寺卿大理寺少卿通政使司通政使禮部右侍郎刑部右侍郎轉左侍郎以戶部銀庫失察落職候補六部員外郎咸豐三年四月卒於京師年七十有一公之爲御史遇事精銳鋒發無所回避

宣宗成皇帝屢用其言不四年擢至四品卿爲之通

諭御史臺以公爲敢言當是時英吉利夷橫海上夷船屢至閩浙江南山東諸洋面刺朝事摹寫山川地圖疆吏不敢問公言夷人不可以恩拊而海邊無備可危

成皇帝用其言夷船載鴉片煙至海口歲漏中國銀數千萬中國銀益貴公言曰耗銀由於販煙販煙之盛由於食煙之眾欲斷夷煙必先禁吸食以杜興販宜爲厲禁期以一年之外殺無赦

成皇帝以爲然下中外大臣議多以爲宜禁而湖廣總督林公則徐主公議尤力

成皇帝意亦銳甚煙禁定連擢公官至侍郎林公以

欽差大臣統水師駐廣東夷酋義律悉獻所來煙燬於海口者二萬箱當是時煙幾絕矣而義律襲陷定海投書直隸總督琦善言通商琦善至廣東

欽差大臣伊里布駐浙江

上命公與都御史祁霽藻馳往福建會同總督鄧廷楨閱海口公因與祁公合言控海口莫如以礮墩易礮臺法以囊沙爲墩以小漁舟層疊沙囊之外以兩船首尾夾縫爲礮洞賊礮不能洞我沙而我兵隱墩內可於船罅擊賊於是福建廈門爲礮墩賊果不能近琦善屢言英夷願納定海復通商而福建總督言官兵屢挫英夷於廈門

上疑之復命公與祁公往視至則言廷楨所奏皆不誣復與祁公合言

犬羊之性少勝必驕今日之勢定海不可不速復而水師人才有專門之技宜破格用人因言所以戰守甚詳又言浙江爲閩粵之心腹與江蘇爲唇齒宜令伊里布深思遠慮不可偏聽英夷赴粵之言信其必退及還

朝復極言英夷勞師襲遠不足患宜竟與絕市募兵節餉爲持久計可不攻自潰且以海防圖表進旣而林公成伊犁英夷據香港定海再陷大學士耆英督兩江夷就撫於江甯上海甯波廈門福州香港各通商天下遂無事煙禁少弛矣其明年公以父憂去會銀庫事奪職而公稽察銀庫時嘗極言庫丁經收虧短國帑至是失庫銀九百餘萬嘗察庫者皆落職次第責賠旣足次第

予官公得候補員外郎初太常少卿許乃濟奏請弛鴉片煙禁取稅以爲利及

上用公言遂黜許乃濟旣而英夷犯海上中國騷然或以爲不禁鴉片不至是然英夷之橫不自禁煙始鴉片毒內地其禍不止耗財固無可以弗禁之理而海外蠻夷越重洋七萬里分兵內犯據我土地朝廷出兩大將不能制伏卒許互市沿海而後已此固前古所未聞而

亦非公所料也公既去官

成皇帝猶思公言每召見內外大臣即問公何在而公已得腳氣疾道光三十年公始至京師會

成皇帝崩公疾亦未已越三年遂卒公自少以詩名入翰林爲御史詩

益工與歙徐編修寶善以詩提唱後進而與建甯張際亮山陽潘德輿

論詩尤相得一時言詩者爭轅公每夜閒閉閣草奏平明騎從出徧視

諸故人名士飲酒賦詠意氣豪甚四方士以詩謁公公必爲置酒召客

出其詩徧視坐上人數日姓名傳都下公去官十餘年四方士負才名

至京師者以不及公爲憾也所著奏議三十卷海防圖二卷表一卷文

二十六卷詩三十四卷及他雜著又百餘卷配李夫人側室楊孺人子

五人秩模秩林秩渠秩柄秩桓孫九人曾孫一人秩林道光癸卯舉人

揀發湖北知州謹狀

魏元烺傳畿輔通志

魏元烺字麗泉直隸昌黎人幼而穎悟好學嘉慶五年舉鄉試十三年

戊辰成進士改翰林院庶吉士散館除山西洪洞知縣歷官至閩浙總

督道光十二年英夷船至閩之五虎希求貿易元烺檄將弁驅之出洋

奏入

上韙之是年臺灣匪民張丙陳辦等糾眾倡亂先後戕知府呂志恆知縣邵用之復攻陷斗六門元烺聞信星夜檄提督馬濟勝以兵二千渡臺勦辦凡十戰而臺平逆首就獲十九年疏請試習礮陣略言閩省爲濱海巖疆武備最要而火器爲先火器中有速戰陣者於軍尤利能合眾志爲一心統全軍爲一伍其布陣式如額兵一千酌選其半以五人爲伍五伍爲排爲小隊兵百人爲大隊遞用外委千總把總管領積五隊計兵五百爲一旅以將弁統之數十旅總以提鎮統由伍而排而隊使將皆識弁弁皆識兵如臂之於身指揮如意其操演之法兵分兩翼立每大隊百兵礮二每旅前列礮十繼以烏槍接以矛刀弓箭如牆而進對壘交鋒又以馬隊立於陣之兩翼爲游兵四隅關顧聯絡相維其進退疾徐則分旗色以爲號令法旣簡明用又敏捷無論營之大小兵之多寡皆可遵循練習以壯軍威奏入

上如所請是年入

覲補大理寺卿擢至禮部尚書調兵部以疾乞假尋卒

賜祭葬諡文恪

刑部尚書李莊肅公墓志銘

黃雲鶴

公姓李諱振祐字受之號錫民安徽太湖人明時有貢士巨誠者白江西鄱陽徙太湖遂家焉曾祖家仁祖聲節兩世竝以公父子貴

贈資政大夫晉光祿大夫考長森乾隆口口科二甲一名進士江甯布政使授資政大夫

贈光祿大夫妣吳夫人

封一品太夫人實出公公由太學生中嘉慶戊午科舉人辛酉成進士入中書轉兵部郎授御史歷典雲南廣西陝甘鄉試視學山東躋寺卿奉

命巡漕擢吏工二部侍郎歷職皆清慎晉刑部尚書明允無冤獄宣廟廉公能以刑名關繫重俾久於職方七十生日時晉宮保秩賚上方珍玩甚多

御書慎典凝禧以榮之時論以爲無忝云公自以受恩重盡瘁所事不敢乞明農洎

宣廟升遐悲慟成疾遂不起

文宗深悼惜之

續碑傳集卷十
子諡莊肅恩卹有加禮公承世業以儒學起家遭時承平受殊遇生爲名臣歿載國史異世讀公列傳猶當慨然興慕況及見公者乎公配同邑曹夫人有令德後公沒於京邸會東南多故不克歸太湖遂合葬於都城安定門外之花椒館是爲同治二年十月十五日公得年七十有五夫人得年七十有七側室郭氏李氏子世侃郭氏出直隸候補道加運司銜取侯氏女三長適會稽梁某次適漢陽易某次適九江蔡某均曹夫人出世侃持狀乞予銘爲銘曰
惟帝祐時篤生耆耇清望靡倫秋官攸首讞獄慮囚矜慎無苟有功之平行儉之厚彼生匪辰此逢哲后老成雖殂令聞不朽神戀
闕廷魄寄京藪縣而延而佳城世守

續碑傳集卷十一

江陰繆荃孫纂錄

咸豐朝部院大臣

何汝霖傳

江甯府志

何汝霖字雨人一字潤之江甯人曾祖祥生祖世榮父天錫世有隱德汝霖少好學為諸生日有名充嘉慶癸酉拔貢考取七品小京官分工部舉道光五年順天鄉試再試禮部不第遂補都水司主事充軍機章京洊歷員外郎郎中論俸截取知府復試御史皆記名

特旨改京堂擢內閣侍讀學士歷太常寺少卿轉大理寺少卿例應出直留為軍機大臣再遷宗人府府丞左副都御史與道光二十二年元

旦

正大光明殿

賜宴明年計典有何汝霖夙夜在公勤勞備至之

諭進兵部侍郎調戶部管錢法堂尋升兵部尚書年甫六十

賜紫禁城騎馬奏事

給扶凡直軍機處幾四十年其訏謨辰告皆造膝密勿雖其家人莫得

而聞也屢奉使勘東南兩河以及振災讞獄必不苟焉負

朝廷之重顧所以盡乃職者終未嘗自言其簡淡澹晦有非常人所能及者未幾丁母憂歸適江甯大水首捐白金二千兩為眾倡先是兩江總督安化陶文毅為民食計創立江甯豐備倉以備荒至是總督陸建瀛持穀價六千緡欲抵知縣某虧汝霖力爭不得則謂之曰頃奉

旨命汝霖與君會辦振務倉穀本以備凶今歉象若此汝霖不敢欺朝廷當各為奏上建瀛際不敢抗乃取以給用振局既設分遣官紳親歷災區計口授食或移舟粟就人或給見錢代米九月後兼施棉衣全活甚眾服闋入都以一品銜署禮部左侍郎旋署戶部尚書三十年正月受

宣宗顧命

文宗御極補禮部尚書屢以年高乞休不許咸豐二年十一月薨年七十有二其遺疏有云恭儉以立裕國之本勞謙以廣納諫之基慎號令以免叢脞之虞明賞罰以一軍民之志奏入

上震悼

命恭親王奠醑輔國公奕湘致祭

贈太子太保銜

子諡恪慎同治十一年奉

旨入祀鄉賢祠

光祿大夫吏部右侍郎王公神道碑銘

方宗誠

代

同治四年六月前吏部右侍郎歙縣王公卒於里第時鴻章署兩江總督以公遺疏聞於朝

上震悼降諭以公由部曹洊躋卿貳廉靜敢言忠愛出於至性加恩賜卹嗣

賜祭葬如制朝野以為榮蓋公自

宣宗成皇帝時登仕籍即以忠孝清正上結

主知

文宗顯皇帝御極之初擢為監察御史時天下承平久吏治習為粉飾因循言官習為唯阿緘默即有言多瑣屑無關時務之要其非言官則自以為吾循分盡職苟可以寡過進秩而已視天下事若無與於己而不敢進一辭釀為風氣軍國大事日即於頹壞而莫之省公始入臺粵賊之禍已見端矣即奏陳用人理財之道其論振興人才尤以講求務

本崇實黜華爲先戶部以需餉孔殷請許士子捐納舉人生員公疏爭無益目前徒貽譏後世且言籌餉之法不徒在開源而在於善用若不求餉之用必得濟委諸盜賊之手靡諸老弱之兵銷諸不肖之員弁雖日推廣捐輸何濟於事又極論銀票虧商銀號虧國之弊以爲經國謀猷下同商賈體爲至褻而利至微初時虧不能見及虧甚雖重治其罪亦復何補旣其言果皆驗未幾公擢至戶部右侍郎兼管錢法堂事時方行大錢公奏陳大錢利弊極言當百當五百當千三種折當太重分量懸殊種類過繁市肆紛擾及

召見又面陳當百以上大錢之不能行後又奏稱大錢私鑄繁興虧國病民懇請停止而請暫緩

幸御園一疏尤人所不敢言者識者稱爲有古大臣格心防微之風三年賊勢日熾天象屢見公復疏言天時人事危迫日深誠得天心一轉則賊匪自滅天下自平然欲轉天心必求盡人事必求協民心其要一在省己一在用人二者皆承於一心而其樞則繫乎聽言之際反復至千百言

文宗卽日降諭省躬克己竝飭中外臣工夙夜靖其交相儆惕其他朝

政之得失人才之賢否軍事之利害亦皆知無不言言無不詳

文宗往往虛衷以受或卽時俞行或付之公議或始雖留中旣而思其言然卒皆聽用公亦自以遇

聖主之優容日夜籌思盡言無隱不以非言官而自沮也五年公疾請開缺十一年

文宗上賓

今上降旨以公志慮忠純直言敢諫將起用公感激

恩遇且自恨無以報

先皇帝特達之知思補報之於

皇上乃疏陳五事以端治本一日天象示警急宜修省二曰責任重大務宜專一三日言官宜務優容四曰府尹不宜兼部務五日奔競之風

宜杜其漸

上連降五旨施行同治元年四月復奏陳封事遂奉

命權左副都御史旋授工部右侍郎二年調吏部左侍郎時公以奉

命使山陝差次丁繼母憂回籍越二年葬親事畢疾作遂不起距生於嘉慶三年三月年六十有八歲公諱茂蔭字椿年一字子懷安徽歙縣

人三代皆

贈如公官妣皆

封一品夫人公幼敦謹好學中道光辛卯恩科順天舉人壬辰成進士授戶部主事三次乞假歸省丙午始補授雲南司主事丁未升貴州司員外郎戊申二月以御史記名三月聞父病急歸至則已前卒丁憂服闋咸豐元年辛亥補授江西司員外郎八月補授陝西道監察御史壬子巡視中城癸丑四月授太常寺少卿六月擢太僕寺卿十一月補授戶部右侍郎兼管錢法堂事務懇求解職不許甲寅調補兵部右侍郎轉左侍郎丙辰

命充進士朝考閱卷大臣九月武會試

命充宿字圍較射大臣丁巳二月

經筵侍班十一月

賜紫禁城騎馬戊午

命辦理五城團防事宜六月事竣以疾請假開缺辛酉

今上登極十一月奉傳知至軍機處察看疾狀遂再起用至吏部左侍郎公識量沈宏事無巨細必研究原委不敢苟且遷就內行尤篤居繼

母喪年逾六十矣猶不飲酒食肉家居言及

國事與

君恩未報往往哽咽涕零居官數十年未嘗挈妻子侍奉家未嘗增一
瓦一隴麤衣糲食晏如也故海內稱大臣清直者必曰王公妻吳氏繼
妻洪氏

誥封夫人子三人銘詔增貢生中書科中書銘慎國史館謄錄議敘鹽
大使銘鎮監生早卒銘詔將葬公於邑之某山以狀乞文其神道之碑
乃爲之銘曰

伊古治亂疊起環生主聖臣直靡陂不平皇路清夷言官布樹侍從卿
相袞職是補嗟彼斗筭狃於恬嬉緘口持祿盡若痺痿國家利病視如
秦越厝火積薪罔顧顛蹶主非不聖臣道謂何不愧簡書不畏斧柯我
峩黃山來自衡嶽磅礴蜿蟺崢嶸卓犖鬱積靈秀篤生名臣股肱

良辟直哉惟寅言責官守職或有異進忠陳謨義無二致根於天性發
於至誠

天子嘉之死哀生榮昔仲山甫小心翼翼輔周中興式於四國古之遺
直今有王公清操勁節百世可風

袁侍郎家傳

黃雲鶴

故署兵部侍郎袁希祖字荀陔世浙江上虞人父作霖公商於楚家漢陽公歿時侍郎才數歲邑部郎袁某見而器之俾就學其家學成以部郎得與漢陽試遂入邑庠道光丁酉舉於鄉旋考授學正丁未成進士由庶吉士改編修咸豐壬子大考二等第四擢侍講游升內閣學士兼禮部侍郎己未典福建鄉試歷署戶工兩部侍郎性伉直喜嫚罵雅不喜道學家言然樂引後進故鄉人畏愛者參半庚申秋夷人犯順京師戒嚴大臣請

巡狩木蘭侍郎屢疏阻不得遙望屬車痛哭不止遂得疾無何和議成改署兵部左侍郎與侍郎某同日履任時疾已甚某以吏胥拜謁不恭震怒數之曰爾等獨不見夷酋乎夷酋甚知禮侍郎聞言面忽頰起罵曰公休矣僕因茲病聞公言僕且死公獨不許僕少活乎公休矣某怒少解未幾侍郎竟不起侍郎有內兄早歿其妻守義無依侍郎養諸其家事之甚敬侍郎每怒罵人見內兄嫂至輒止不罵先是雲鶴嘗館於蔡編修壽祺家其長女茗從學焉壬子歲館侍郎所授其子晉讀晉幼岐嶷編修過予館見之使雲鶴媒長女字之至是晉聞父歿自楚觸暑

馳至都浹旬以勞歿年十九編修長女聞訃矢守貞晉無家殯於尼庵
中乃麻衣赴其殯所居喪路人見者皆泣下侍郎內無五服親立其族
人炳鍾子嘉麟爲晉後今將十年矣

論曰侍郎以善罵負俗累庚申之哭士論乃翕然稱之比蒞兵部履任
時罵聲震屋瓦士皆匿笑其後某侍郎竟以私干親邸爲親邸舉發敗
侍郎以忠憤歿子死孝其子婦守貞以繼侍郎與晉之絕嗚呼世士常
謂無天道豈信然哉豈信然哉

李菡傳

順天府志

李菡字豐垣號滋園寶坻人嘉慶二十三年舉人道光二年進士改庶
吉士習國書散館授編修十七年升贊善十九年大考翰詹得拜宮錦
之

賜旋升侍講學士充

日講起居注官二十二年晉少詹事

簡安徽學政菡嚴考經古以覘實學親記號戳以杜槍冒發案後比對
連卷必親校閱有不符者立予扣除恐贗鼎不祛則真材屈抑場規務
極於嚴而愛才之殷待士之厚出於夙性少年寒峻尤必力爲成就期

望殷拳彼都人士欽黜陟之公仰培植之厚凡應試入都及以事至者無不依戀門牆望風恐後其感激之意有更深於鄉會座主者鳳陽某生以犯規應革菑憐其少年績學特予薄懲臨行時此生奔走數十里外遮道泣送述及過蒙矜恤當益濯磨菑愈勉以自新力求補過後其人旋膺薦擢巍科罕有知其事者菑亦不欲彰人之慝也所得士如孫侍郎家鼐孫廉訪家穀李制府瀚章李伯相鴻章林方伯之望方觀察濬師或名重藝林或身膺疆寄或宣

命遐陬尤爲青目所垂極一時之選任滿還京改都察院左副都御史署禮部左侍郎時

文宗顯皇帝登極菑應

詔陳四事一臣工因循之習宜振作一臣工欺飾之弊宜擴清一臣工玩法之漸宜預防一臣工偏執之私宜屏除按切時弊一以得人爲急務奏入得

旨嘉納咸豐四年授兵部右侍郎兼署倉場未幾實授十年再補工部左侍郎十一年調吏部左侍郎同治元年補工部尚書專辦實錄藁本二年薨於位

子諡文恪

前工部侍郎潘公神道碑

吳汝綸

公諱曾瑩字申甫吳潘文恭公次子也少承門軌續聞趾華蚤有嘉聞以道光二十一年成進士改庶吉士授編修

宣宗皇帝以公宰相子能用儒業自進

召見嘉歎二十六年以編修充雲南鄉試考官阮文達公贈詩爲道公與文恭公仍父子先後使滇試士以爲滇光寵三十年以侍讀學士充會試同考官又躡文恭公官侍讀時故迹當道光之季

國家席太平久矣

天子好文公卿用儒雅雍容登進文恭公於時久錄機事作傳皇子文學尤重於

朝廷而公又以名三公家子能詩善書文采毫翰暉映門闕中朝名德皆慕與交遊使滇行來戴文節公熙爲作飛雲覽勝之圖勝流交口歌詠之而公在清要右職亦能其官

上每召對便殿論說未嘗不移晷也

文宗御極加禮師傅家眷遇彌篤珍器祕物寵賚相屬遂躋三事辯歷

六曹是時文恭公尙無恙三年以侍郎充會試考官而文恭公以其年重宴瓊林入

國朝以來太平公輔世家盛事無有比榮者焉尋拜吏部右侍郎遭文恭公憂去官續遭母憂於是東南方用兵有

詔在籍治團練服闋

召還朝既上道疾作

敕且毋行公曰吾敢以疾故苟止遂行至則命爲工部左侍郎他曹乏使公一兼攝科場獄起辭連公子編修祖同主者危法中公

上寢不問海上戒嚴疏止出巡

上亦不以爲迂也蓋公自

宣宗時特被榮寵度次除拜及

文宗尤加任使解職居憂

上遲其至旦夕且大用繼文恭公後朝士目相語人以漢韋平擬公矣

會劇勞得疾謝歸邸第

穆宗既踐祚公曰吾再世受恩

先朝

今天子幼四方多艱不可以疾故營自便遂力疾起然是時人材新舊充周庶位竟不獲更進用自是閒居京師十有七載纂著自娛所為書都二十六卷而詩尤多時時招攜故人游詠郊畿徜徉山水間聞其風者慨然想見嘉道人物平世公族餘韻焉光緒四年三月以疾終年七十有一夫人同郡陸氏賢孝嫻詩畫已而棄不為與公同歲生同日卒子五人祖同編修祖喜戶部郎中祖福祖楨皆殤祖保兵部郎中後公五月卒女適內閣中書汪克昌公與某先人同歲鄉舉其教習庶吉士也某實與在館知公為尤祖同以狀來請遂為銘曰
惟才與世視屈信據勢冥會蛇升雲不者泥蟠下沈淵豈此不能獨彼賢揆元都卒遭勢然不信竄視公後前有傑然起世轉旋誰歟風波成世屯隕涕寤歎念故先橋於萬安潘氏阡有永不磨此刻文

吏部左侍郎潘公墓誌銘

俞樾

公諱曾榮字申甫別字星齋江蘇吳縣人太傅大學士潘文恭公之仲子世牒炳然可無述也道光十四年應順天鄉試中式舉人旋考補國子監學正二十一年中式進士改翰林院庶吉士散館授編修以大考翰詹名在高等遷詹事府右春坊右庶子累遷翰林院侍講學士侍讀

學士光祿寺卿內閣學士吏部左侍郎公以大臣子風貌清嚴文章爾雅道光咸豐閒屢蒙

召對便殿奉

命恭繕

仁宗睿皇帝神牌恭送

孝和睿皇后神牌升附

太廟

聖駕謁東陵

命隨扈

臨雍

命撰尙書講義

親耕

命從耕充雲南正考官會試同考官副考官各一讀卷大臣三閱卷大

臣五教習庶吉士者三

賜宴

賜茶

賜克食

賜玉佛玉如意及其他器用食物無算咸豐三年文恭公重宴瓊林而公奉

命典春官試士論榮之俄以文恭公薨去官回籍時粵寇久踞金陵大江南北戒嚴乃

命公督辦江蘇團練公會同大吏布置周密又集貲以濟大營兵餉設廠以待江北流民檠散亂黨擒斬其渠以安市井故雖鎮江已陷於賊

而吳中安堵及公還朝未再稭而蘇常相繼陷延及兩浙無樂土焉公至京師授工部左侍郎公會歷署戶禮兵刑四部侍郎至是徧歷六官

矣文廟方嚮用公而公與權貴用事者齟齬會有科場之獄株連及公之

長子翰林院庶吉士祖同禍且不測幸上矜全得免尋

命公辦五城團防事既而夷人內犯諸權貴用事者請上幸熱河公與廷臣交章爭不納公憤懣憂懼先是公在籍辦團練已

積勞得疾至是益劇乃疏請解職於京寓養病同治初

天子冲齡踐祚

皇太后垂簾聽政時事方亟公曰此何時也豈吾養病時乎乃强赴宮門請安

朝廷亦知其衰老不復煩以官守矣公學有根柢尤長於史學所著有賜錦堂經進文稿一卷小鷗波館文鈔四卷詩鈔十二卷補鈔二卷詞鈔一卷題畫詩四卷畫識三卷畫品畫寄墨緣小錄各一卷畫以青藤白陽爲宗書則初學吳興晚學襄陽尤得其神髓配陸夫人亦知書工書畫同時女史汪小韞鑄小印以贈文曰潘江陸海性仁恕每大雨中聞門前有荷瓜果者曰清涼如此誰與售者徒賴其肩耳命盡買之偶有兩甌墮地一甌一否顧諸子曰汝曹識之薄者破厚者完也晚年頗信佛法光緒四年二月旣望夫人已示疾猶誦經禮佛如平時四月壬子强出至中庭向西南膜拜其扶掖入室時公亦寢疾與夫人異室而處得南中所寄金橘呼次子使奉其母夫人猶問汝父寢乎明日癸丑雞鳴時夫人卒公未之知也俄而曰天明邪祖同對曰尙早命進飲飲已復睡日加巳亦卒公生於嘉慶十三年十一月乙丑夫人生於是年七月癸酉至是歲皆七十有一生同年死同日士大夫以爲美談子五

人祖同翰林院庶吉士卽以科場之獄免官者也好學能文有父風祖福殤祖喜工部虞衡司郎中祖保兵部武選司郎中後公五月卒祖楨前卒孫七人皆卒今存者祖喜之女二祖保之女一某年月日祖同祖喜葬公與夫人於吳縣萬安橋浜以狀乞銘銘曰

古重世臣同國戚休公生相門楊班之儔弱冠登朝風舉雲搖長承

帝眷一德允孚辰彼碩女君子好仇悅弧並設鸞鶴同游僉曰異哉其

生有由千載而下式此松楸

魁端恪公遺事

譚宗浚

魁端恪公齡壬子進士官戶部尙書余甲戌座師也性謹外和而內介時明善貴保等用事屢請修

圓明園欲糜公帑以肥私橐公任內務府大臣與桂公清屢駁之而爲羣小所構鬱鬱不得志每月請假恆數次余時往謁但長歎公事難辦而已及丙子歲余督學四川卽公一言以爲韋佩公曰作官如讀書讀書能專未有不淹貫羣籍者也作官能專未有不通達政體者也子素以博雅稱願移讀書之聰明才力以作官則事無不辦矣余欽爲名言及庚辰還京而公已卒遺一子尙幼門庭冷落聞公雖屢任優缺然處

脂不潤歿時僅中人貲云

續碑傳卷十一

九

續碑傳集卷十一

續碑傳集卷十二

江陰繆荃孫纂錄

同治朝部院大臣

李文清公行實

王

輅

公諱棠階字樹南號文園又號強齋先世自山西洪洞遷河南河內縣之保封村世力田曾祖琮祖成章父賡颺邑庠生三世並以公貴贈光祿大夫公母姬太夫人以嘉慶戊午二月十七日寅時生公生之夕夢居室前桂樹一株大數圍而無花葉寤而公生幼不好弄靜重如成人七歲就傅端謹不隨羣兒嬉戲時歲饑家貧屢斷炊煙至歲終無升合儲父嘗遠出貨友人升斗米負以歸公侍母忍飢以待舉火故公一生自奉儉約既貴澣衣濯冠敝車羸馬終身如一日祿入稍餘則以恤宗族贍姻鄰調故舊振饑困每罄所有而後已嘗曰憂患者生之門吾終身不忘忍飢待米時也稍長攻苦力學每五更起讀夜分始寢父見其羸瘦令少休息公每夜以盆覆燈聞父寢卽啟燈潛讀由是經籍淹貫義理大明乙亥補郡庠生己卯中河南鄉試舉人道光壬午成進士改翰林院庶吉士癸未散館授編修乙酉充四川鄉試正考官復任

雲南學政辛卯充順天鄉試同考官甲午升國子監司業乙未升詹事府右中允十二月丁外艱丙申丁內艱喪葬動依古禮己亥入都仍補詹事府右中允庚子升翰林院侍講旋轉侍讀六月充教習庶吉士七月充山西鄉試正考官以發題錯誤自行檢舉部議革職奉旨留任辛丑充

日講官壬寅接任廣東學政癸卯留任十一月升太常寺少卿仍留任所至痛除宿弊倡明正學七月河南中牟河決公捐廉五百兩振災黎乙巳以再繼祖母艱去官建家祠立義塾凡來問學者開導警勉媿媿不倦仍歲薦饑散米濟貧無少貸旋因廣東學政任內取年老武生不合例部議降三級調用己酉主講河朔書院四方問學者益眾庚戌文宗顯皇帝御極

詔復日講之儀又

奉 詔內外大臣薦舉賢才禮部侍郎曾公國藩薦公學術醇正堪備講官

上諭命河南撫臣查李棠階病是否痊愈能否來京蓋公氣體素弱宿疾屢發丁未服闋後曾以病請故也時公患怔忡呈請醫治痊愈即當

赴部再奉迅速來京之

諭後日講中止公遂不起咸豐癸丑粵匪猖獗九江江甯相繼失守
上諭紳士會同地方官舉辦團練公爲河北紳士之望乃督民閒各村
辦團互相聯絡名曰友助社酌定條款商之府縣官刊諭曉示各里勒
限舉行商約未定而粵匪已於五月二十一日由鞏縣渡河盤踞溫東
河灘柳林中四出搶掠民心大憤二十五日河內武涉溫縣各村約於
二十六日攻賊於柳林是日公率村人往攻沿途殺賊謀數十人柳林
賊張兩翼出戰而村民未習戰陣兼乏鎗礮遂敗北然賊自粵西造亂
以來轉戰數省所至披靡甫渡黃河卽遭截擊賊鋒少挫甲寅以堵禦
功賞四品卿銜並花翎公深以不能保護鄉閭濫邀寵榮爲歉後入直時
蒙
太后面詢得翎之由公仍以無功受賞對是年秋河內以收漕事民幾
致變公妥爲調處因以無事辛酉
今上御極奉
諭來京有學養深遂老成方正之

褒公深念主少時艱正臣子竭力之時卽於同治壬戌四月入都五月十八日疏陳時政之要

上嘉其深識治體剴切詳明足資采擇二十三日補授大理寺卿六月派充拔貢

朝考閱卷大臣又上申明公論疏十八日升補禮部右侍郎七月升授左都御史八月署理戶部尙書專司順天鄉試貢院稽察復

命時進言治天下只在安民安民必先察吏今日之盜賊卽前日之百姓多由地方官貪虐逼迫激成變亂今非輕徭薄賦不可而非擇廉正之督撫則不能得人因極言河南近日情形及直省諸利病皆持大體恭親王謂公不愧風憲爲近來所未有也閏八月會商保甲團防事公陳三利二戒利認真利簡便利周密戒張皇戒粉飾也十三日奉旨

在軍機大臣上行走具疏懇辭上不許十九日

賜紫禁城騎馬時天下多事

上勵精圖治每奏對後輒旁及吏治得失民生疾苦盜賊起滅往往移時始出公宿疾本未痊一日以奏對時久忽眩暈仆地

上急賜人蔭賞假調理

命查賜坐舊制公固辭乃已自後

召對

上輒諭公先退以示優禮癸亥二月調補工部尙書又充

實錄館正總裁三月充會試正考官公自入樞府贊襄密勿類非外人所能知十二月

慈禧太后手書砥德勵行四字以賜甲子金陵克復加太子少保銜

上諭以金陵克復於論功行賞外諄諄以兢兢業業與中外臣工相勉勵公與親王及同僚語謂當設誠而致行之久益不懈勿徒作空言恭

王深然之次日

召對時恭王反復陳交儆之義公與同僚協助之

上嘉納焉二十五日調補禮部尙書八月充順天鄉試副考官九月十七日

太后垂簾恭講治平寶鑑公講漢文帝卻千里馬事因復推言人主總不宜有所嗜好以啟窺伺之端自是公每講後皆推原反覆歸於責難惟進講時久時形氣促乃改派文尙書進講十二月

皇帝手書篤行不倦四字以賜公入直嘗值雨雪

上念公年老特令太監於養心殿前扶掖乙丑三月恭親王被劾退出軍機公切念咸豐庚辛年閒內憂外患華夷交訐恭王獨力支持除大

姦定大難卒奉

鑾輿奠安

神京同治改元以來雖未即太平而東南底定財賦有出不可謂恭王無功至用人行政閒有缺失致滋物議誠亦難免今大局所繫正須力言之耳次日

兩宮召對因力言恭王非有心之失嗣王公大臣會議惇親王醇郡王亦各奏恭王未可遽罷恭王乃再入軍機是月覆試貢士
派充閱卷大臣五月僧邸在山東陣亡公以
朝廷賞多罰少疆臣藐玩懇切言之奉

上諭申飭各督撫九月

文宗顯皇帝奉安隨扈

定陵公自入軍機軍書旁午每早入直日昃始出每念用人行政有未安者終夜不寐憂形於色十月公以積勞病發請假調理

上屢遣大臣問疾命勿宣

旨蓋不欲以謝

恩重勞之也大臣問疾還復命

上問之對病狀畢且曰屋宇衣裳皆寒士本色

上爲之惻然十一月初九日薨於京寓壽六十八遺疏入

上震悼奠醊

賞銀二千兩治喪

贈太子太保照尚書例賜卹

子謚文清自公初入翰林卽潛心理學常手鈔湯文正公全書以自勵
乙酉在雲南遇佟觀察景文講程朱之學公與之論其旨毅然以聖人
爲可學而至癸巳遇新鄭王孝廉鈐於京邸語連日夜覺所學未得其
要乃相與講王文成羅念庵之學晚歲融貫諸儒無所偏主而潛修默
勘刻苦用功要祇以聖人克己兩言爲把握故凡問學者皆以實做工
夫勛之壬戌入都疏陳時政首言臣在籍多年自治之功未敢稍廢蓋
本其自得者以爲獻納之本非空言也原配和繼配鄭邢並
誥封一品夫人子洵

恩賞舉人郎中孫續午葆貞丙寅子游扶柩旋里三月初七日葬公於村東先塋之次焉

贈太子少保兵部尚書曹恭愨公神道碑

穆荃孫

同治丙寅三月二十日己卯兵部尚書江陰曹公薨於位遺疏聞

皇上軫悼丙戌

命惠郡王詣靈幃奠醑

贈太子少保

子諡恭愨

賜銀二千兩治喪是年八月公之子鍾彝扶柩回籍六年正月葬公於本邑東郊定山之西麓越三十年鍾彝昆弟來請銘公神道荃孫屬在年冢子之列不敢辭謹按狀公諱毓璜字子瑜號琢如宋時自中州遷江陰爲邑望族曾祖岐附貢生祖學禮父昶以公貴

贈光祿大夫曾祖妣章氏吳氏祖妣趙氏妣繆氏朱氏皆一品夫人公幼而岐嶷及長有名庠序武進李申耆先生主講暨陽書院特器公勉以遠大道光丁酉拔貢生朝考一等得兵部七品京官遷主事直軍機處癸卯中式順天舉人累升郎中記名御史擢鴻臚寺少卿咸豐十年

英法俄美四國兵犯京師

上駐蹕木蘭時江浙陷於粵寇豫東困於捻寇黔苗滇回四顧騷動鄭親王端華等方用事內外不靖政務殷繁

上意欲令章京中資深而才贍者在軍機大臣上學習行走公在直最久內嫻掌故外悉四方政令端華等欲以公名舉奏公辭至再三遂越次授焦佑瀛

本朝之制凡章奏陳達

制詔宣降皆軍機大臣取進止

朝廷黜陟誅賞之事悉以咨之位望與前朝宰相等同列以公力辭咸詫之公卒不就十一年

文宗顯皇帝賓天

毅廟冲齡踐阼端華等矯旨自爲議政大臣與決機務是冬

毅廟奉

梓宮還京

兩宮太后垂簾聽政暴端華不法狀與載垣等皆伏誅次者遠戍次者褫職佑瀛亦與焉人以是服公之明而知公進身之不苟也旣而

朝廷簡恭親王輔政始

命公在軍機大臣上學習行走升順天府丞同治元年正月轉大理寺少卿旋兼宗人府府丞二年升工部左侍郎調兵部左侍郎克復金陵加頭品頂戴

賞戴花翎權兵部尚書四年升都察院左都御史再升兵部尚書公貌甚魁偉以積勞內損然孜孜自力從公未嘗乞假三月遘病甚劇猶欲強起足弱不能支乃止寢疾六日而歿年五十有四公爲軍機大臣凡五載贊襄領畫盡心竭力內則調護

兩宮外則指揮諸將數年之間東南底定巨憝悉誅公但歸功督撫凡所納獻未嘗告人人視之若無異於眾人而不知一言之褒貶一事之成敗皆足以幹旋大局輔佐中興則所處之地不同也臨歿時猶以豫皖捻匪未淨隴滇回匪未平爲恨其燕閒之論謂軍旅之事患信任不專事權不一古來良將多以掣肘不能成大勳咎在執政又云唐末藩鎮之禍誤於羈縻方其效順時不過假以爲名作恢拓疆土計當事者苟且偷安遂入其彀迨勢旣盛不可復制

朝廷任用督師大臣及勦辦苗沛霖皆如公言以奏功此卽公立朝之

大指也公天性爽亮與僚友交極矜慎取予不苟事父母色養兼摯在京寓歲時伏臘必邀集桑梓故舊談讌竟日以博歡顏朱夫人夙患乳岩公購珍藥訪名醫費千金弗倦棄養後哀慕弗衰初入直奉

賞珍食名果恆捧以獻親欣躍逾常迨為軍機大臣
恩賞稠疊拜領後反鬱鬱不樂傷二人之弗及見也嗚呼此則公侍親之至性也已公娶同邑薛氏

封一品夫人妾胡氏鍾氏子四鍾彝

賞員外郎分刑部四川長壽縣知縣鈞彝舉人先卒錦彝員外郎分戶

部貴州黔西州知州鈺彝光祿寺署正鍾彝薛夫人出餘胡氏出女二

同邑孫汝楫浙江龔家誼其壻也爰作銘曰

申甫治內方召治外中興之功赫赫獨大維

皇首出撻伐用彰惟公崛起啟沃謀臧始登郎曹遂履

禁幄星紀一周淵淵嶽嶽泊膺大任密勿論思發揮宇宙綏鞏華夷粵

西倡亂虻蚩四起用師十年蔓延未已自公贊畫五載經營楚蜀江淮

以次削平既靖東南將事西北惜哉陽烏方中旋戾公志未伸公言不

矜我銘公烈惇史是徵

光祿大夫刑部右侍郎吳公神道碑銘

方宗誠

代

國朝自平湖陸清獻公以正學清德爲

聖祖朝名臣論者謂其學之精純直接程朱之統越百餘年而有少司寇霍山吳公承清獻之後而獨有得於程朱論學之宗其行身居官清風直節又足與之相埒天下知與不知皆不偁其官而偁其德尊之曰竹如先生云公諱廷棟字彥甫一字竹如安徽霍山人生長桐城曾祖均祖鉢父正湖三世皆以公貴

贈光祿大夫妣皆一品夫人公生於乾隆癸丑五月十八日端重渾厚聰明內涵十餘歲時偶得近思錄讀而好之雖從科舉師而超然不溺於文藝之末功名富貴泊如也道光乙酉以選拔科貢太學丙戌朝考一等以七品京官簽分刑部學習庚寅辛卯丁內外艱又以承重孫丁龔太夫人艱服闋入都學習期滿改官主事廣西司行走丁未始補江西司主事明年升福建司員外郎己酉升河南司郎中植節嗜學潛心職守長官重其才而尤賢其無一營求遇優差示意公而公若爲不知也者咸豐壬子京察一等曾公國藩周公祖培亦特薦引見記名以道府用

召見詢在刑部承審私酒案數陳反復毫無瞻徇且進言治道之要與君子小人之辨獄得平反而

文宗皇帝之知公守正不欺自此始旋放直隸保定府遺缺知府補授河閒府俗好訟京控省控案充斥公爲之訟簡刑清時粵賊北竄府當東道之衝公日夜團練巡防不震不懣深得民心賊屢窺末由入癸丑冬升授永定河務道甲寅春署理天津河閒兵備道七月擢授直隸按察使總督以河閒京師門戶公防守嚴不得驟離河閒府任及乙卯軍務平始任按察使事丙辰大名災稽察振務實惠及民盜賊斂迹冬升授山東布政使明年入

覲時直隸奉嚴旨行使大錢官民苦之總督不敢言公因上問乃反復開陳竝及鐵錢鈔票之弊且曰

國家立法必先便於民而後可行必先信於民而後能行於是文宗益賢公而直隸行使大錢之議遂寢其後布政山東亦請巡撫疏明不行使大錢停止鈔票與海口加稅抽釐民免紛擾爲布政使三年署理山東巡撫三月專以察吏安民爲心己未以代補歷任虧歉未足部議降一級調用

特旨改授直隸按察使同治元年壬戌調山東按察使公治獄勤明尤
慎重服制之案每平反冤獄不使有司受過故人樂從癸亥內遷大理
寺卿夏升刑部右侍郎調戶部左侍郎兼管三庫事務又兼署吏部右
侍郎乙丑復調刑部右侍郎丙寅春因病乞假

子告回籍公霍山無田廬曾文正公泊鴻章延之至金陵遂寓金陵七
年以癸酉閏六月朔卒年八十有一公學務實踐不爲空言篤守孔子
下學上達之序程朱居敬窮理之訓生平進退取與必嚴義利之介嘗
鐫朱子論是非不論利害二語爲印章以自檢於身心事物之間順逆
常變守之如一視聽言動從容中禮當官盡職不立異不苟同尤不喜
急功近名所與同官上下多薰蕕異趣而公毫不以賢智先人律己嚴
待物恕常存與人爲善之心潛移而默誘之故雖異己者終無不感其
誠而服其德善政亦因之以行或疑公依違遷就及觀義所不可雖王
公不能奪也其論天下治亂每以君德人才爲根初

文宗皇帝召見時方勵精圖治而疑學程朱者爲拘迂公對曰此不善
學之過也程朱以明德爲體新民爲用天下斷無有體而無用者

皇上讀書窮理以裕知人之識清心寡欲以養坐照之明寤寐求賢內

外得人天下何患不治其後

穆宗冲齡卽位公上書宰相請舉倭文端公任師傅培養元德而時詢聖學之進退以爲喜憂金陵告捷天下方謂中興大業成矣公獨憂之以爲治亂決於敬肆敬肆根於喜懼從古功成志遂人主喜心一生而驕心已伏宦侍左右容說之臣屏逐之姦皆將乘此喜而貢其諂媚肆其欺蒙巧其夤緣害將何所不至因上疏請加敬懼持之以恆永固長治久安之基

上嘉納存

弘德殿省覽竝申戒天下蓋公之學所蘊蓄者甚深志量尤極宏遠其所欲忠於君於天下國家者固無涯而靡已也已見於政事者特其淺焉者耳然公知命樂天雖不能盡行其志而無愠無悶惟聞然自修終其身於學焉而已故世亦罕知其所至也公居恆不以講學立名始在京師與唐確慎公倭文端公曾文正公何文貞公竇蘭泉侍御切磋砥礪而與倭文端性行尤相近其後再官京師倭文端公以首輔爲師傅河內李文清公以尙書掌軍機海內翕然望治俾爲三大賢公亦深服文清公之德行而論學則與文端爲最契公不事著述退居金陵時文

端公屬校理學宗傳辨正八卷桐城方宗誠輯公讀書札記及與人論學書爲十卷曰拙修集六安涂宗瀛爲栒行其於理氣心性之辨格致存養之功皎然如日月之明聖人復起殆無以易也妻葉夫人先公卒權葬諸城二子應熾早卒應焯嗣公仲弟後公卒之二年孫兆張將奉公櫬歸葬霍山之東六安州界復覽山麓應焯以書來屬爲墓碑文公與先光祿公同官刑部鴻章少從官京師卽得親公言行義不可辭公之德行學術政事方宗誠所撰年譜載之詳矣茲不具著其大者銘曰維學有統維道有宗卓哉徽國伊洛是從千五百年上續鄒魯精理微言昭晰萬古異學差謬小儒和同不有真知孰開其蒙洪維

聖清重儒崇道哲人挺生爲

國大老曰潛曰見未究厥施閭然下學終身以之精純如金溫良如玉斯文在茲賴公以續同時真儒惟有羅山體立用行伯仲之間峩峩霍山雅傅南嶽惟岳降神生此先覺歸神天柱存順沒安我銘其幽永世弗栒

予告刑部右侍郎霍山吳公墓誌銘

方濬師

本朝理學名臣最著者曰睢州湯公平湖陸公湯公師夏峯和同發源

餘姚陸公則專宗婺源一以明體達用爲本百數十年繼陸公而得婺源真脈厥惟霍山吳公公在

宣宗朝官京師四方學者咸宗仰之

文宗登極知公名得

召見首問公讀何書公以程朱對又

問學程朱者何以多迂拘公對程朱以明德爲體新民爲用天下斷無有體而無用者凡臨事迂拘正由平日不能如程朱格物窮理而徒資記誦非學程朱之過又

問明臣楊漣及侍郎曾國藩倭仁等公一一具奏

上頷之荷學問結實之

褒由是嚮用凡有遷擢皆出

特簡迨

穆宗奉

兩宮太后垂簾聽政公在九列中年高德劭值奏事日腰輿入朝白鬚飄蕭目光炯炯四射望之尊嚴若河岳然一日入對兩宮面諭曰汝受

先帝恩最深皇帝沖齡踐祚汝老臣也國家大事汝宜直言無隱毋負先帝之知公伏地感激出涕至不能起立公時年已七十三矣素患眩疾久不愈陳情乞假

九重憐念准開缺調理遂僑寓江甯未幾左體偏枯而精神食飲如舊同治十二年六月初一日某時偶覺體中不適沐浴端坐而薨遺疏入上軫恤有加

賜祭葬逾常儀嗚呼君臣遇合終始爲難如公遭際夫豈偶然哉光緒改元二月十九日公子應焯扶靈輻歸霍山下三月二十八日葬公於縣東鄉虎皮尖之原應焯子兆毅濬師壻也應焯先期寄狀來屬爲埋幽之文公之出處濬師知之頗詳雖不文其奚敢辭謹案公姓吳氏諱廷棟字彥甫號竹如晚自號拙修老人籍安徽六安直隸州霍山縣世有隱德曾祖迺成公諱均祖東安公諱球父信泉公諱正潮曾祖妣孫氏祖妣龔氏妣葉氏三代皆以公貴

誥贈至光祿大夫戶部左侍郎加三級妣皆

贈至一品夫人東安公家貧服賈於桐城縣之新安鎮卒後信泉公復承父志隨其叔祖垠仍居新安己而公生容貌端慤言笑不苟鄰有質

庫公嘗嬉戲其中司事某欲試之聞公來以碎金散置於地自匿帳中
公入門見卽揚聲止步不入某起詢之公謂金在而不見人脫遺失豈
能自白某大驚歎葉太夫人博通書史治家嚴肅公四歲卽能授以經
籍過目成誦有過手撻之公泣太夫人曰汝頭有顛骨痛吾手矣公捧
母手撫摩再四曰母再撻兒可用絰細裹也太夫人爲之霽顏公每欲
著好衣又欲以功名顯太夫人訓之曰人以衣服愛汝慕汝是汝徒以
衣服重矣功名者儻來之物無學問濟之何貴乎功名耶公恍然曰兒
知之天爵爲貴太夫人曰然蓋公生平得力於母教最多識者謂不在
廬陵眉山山下云年十九就桐城商籍應試邑侯拔置第一無賴子輩譁
於眾將興訟公坦然不與校不應府試而歸旋補霍山庠生次年食餼
道光乙酉受知湖州張小軒先生鱗舉選拔貢生丙戌

朝考一等引

見以七品小京官用簽分刑部廣西司行走任部四年讀律益精熟丁
信泉公憂回里旋接丁葉太夫人憂甲午服闋入都供職又十五年戊
申補江西司主事次年升福建司員外郎河南司郎中公自分廣西司
在司辦事幾二十年案經手判屹如山岳不可動坐辦秋審處提調律

例館各堂官倚重如左右手當是時山陰譚端慤公與公同總秋讞天下呼爲二竹焉庚戌春

文宗詔舉賢才周文勤公曾文正公首以公姓名上咸豐辛亥郎中俸滿截取壬子京察均蒙

恩記名旋

簡授直隸保定府遺缺知府補河間府知府癸丑冬擢直隸永定河道

甲寅正月復奉

諭署理直隸天津道閏月升直隸按察使均以軍務未竣仍留河間府任臬司兼郡守前此所僅見也乙卯正月連鎮奏凱二月交卸郡篆入都

召見三次垂詢守城事甚悉六年冬山東布政使缺員

上難其人政府以劉源灝曾任東藩爲請

聖意遲回久之

諭曰何如吳廷棟乎遂得

旨補授公具摺乞

覲許之丁巳正月再入都

召見四次敷陳事宜極懇至從未宣播外人無由知也三月抵濟南五月東撫崇恩公述職疏上

硃諭著來見山東巡撫著吳廷棟署理時濬師官中書是日適輪值

圓明園親詣軍機房領

旨發鈔

上向用公方殷亟欲以公代崇公政府有奏公資格淺者故崇公仍回本任戊午奏銷遲滯戶部嚴議降一級調用實皆前任事公不置辯將作歸計而降補直隸按察使之

命下并

敕公速赴新任公於是再領提刑者三載自外擢惟斯任爲最久

派赴張家口審辦口北道賽某受傷案又

派辦古北口糧臺又

派往天津查辦事件辛酉

穆宗臨御調補山東按察使同治癸亥

特旨擢大理寺卿旋升刑部右侍郎

派赴察哈爾查辦事件調戶部左侍郎兼管三庫事務

賜紫禁城內騎馬署吏部右侍郎

派通州驗收漕米乙丑復調刑部右侍郎

聖眷優渥將昇正卿而公病不及待矣公宦轍不出畿輔山左使車來往兩省士民垂髮戴白滿其前若忘其爲尊官者守河閒時四郊兵燹州邑陷賊者踵相接公處以定靜修城垣設民團晝理餉精夜則登陴巡邏故帥勝保督兵至知縣王烜迫於應付自刎不殊公憐之纂偶車牛親赴大營陳說勝保重公卽飭麾下聽命倉場侍郎慶祺公繼至兵丁占住民房頗騷擾公沿民居步行勸諭并與各官并約曉以利害人心乃定典史程某隨慶侍郎委員王錫籌辦捐輸事程乘閒詐索舉人孔某銀公遴知之立提訊得實程畏罪自盡嗣是大小官吏悉遵約束直隸臬司署有屋數十楹俗稱曰班裏爲書吏之親戚學習公牘所人多關防不謹公嚴行沙汰於署東立一總門派人守視出入皆有常度一應官文書隨閱隨辦立限五日內卽發各府州縣解囚亦立限五日內覆訊詳院積壓需索之弊一清公慮囚不輕用刑但悉心熬審遇可疑之案地方官規避處分改供朦混往往自相矛盾公飭承審官來省與發審委員再加研鞫寬其處分而平反者尤夥嘗定爰書大府非之

屢申屢駁公親齎面陳大府卒如公議總督幕友孫姓之弟謀奪良家女被控當事者以總督故爲緩頰公曰徇私情而壞風化豈長吏之所爲嚴懲如例總督無如何也屬邑連出逆倫案總督某公以一月之內頻入奏恐干

上怒公曰此吾儕大僚不能教化百姓之過待罪之不暇敢再欺飾耶某公失色公言笑如平常大名各屬被黃水泛濫民居田廬悉成澤國奏請發帑銀振濟議者擬由省易錢可以不致折減大名至省九百餘里一車費至京錢八十緡公謂輦錢與輦銀同一價一車銀可抵二十餘車之錢以此籌算孰得孰失力排其議旋奉

旨赴大名督辦振務所全活者數十萬人當行使大錢之壅滯也戶部奏請直隸錢糧兼收大錢鈔票各三成奉

旨責成總督奉行通省惶駭迄無善策適公擢東藩入

覲蒙

垂詢現辦情形公對名爲行使實不流通立法必先便於民方可行必先信於民方能行今條科太多朝夕更改

國家先不自信何能取信於民

上始而靜聽繼而連聲相應曰據此無論官運商運仍是不行公復以不可操之太急對

上稱善會譚端愨公以制府入

朝乃奏罷前議而公至山東亦陳請巡撫奏明停止山東吏治浸壞公獎廉懲貪首劾曹州府某官場以肅司庫有餘勇口糧經前撫奏准開銷各屬請領者司中輒折扣入己公如數給發既奏停大錢票綠營弁兵養廉口糧除照新章減成餘皆予以實銀通省感戴州縣應徵銀兩向多遲延拖欠委員守催則又但取差費公擇其最疲玩者嚴飭之分限報解逾期立予撤任故雖委員不至而上下忙錢漕均掃數清完初有海口立局收捐之議民情不順公力持不可繼公任者銳行之遂構訟人益服公先見其貳刑部也諸司官遇疑獄輒詣公剖決公不憚煩瑣媿媿相告如師之課弟子每謂相驗首重比對凶器傷痕分數及屍屬當場口供此時入細後來必有把握又謂鞫獄無論大小輕重速問速結稍涉延閣必有匪人從中別生事端不惟羈押拖累無辜而自己亦爲案累又謂辦事不可稍有所懼昔年承審崇文門監督書公拏獲私酒一案

上意頗震怒予時

召對從容爲

上言之事竟得解彼時若稍依違必爲眾口指摘矣軍興以來司農告匱公綜理庫款量入爲出精於理財者歎爲不及爲政獨持大體不屑毛舉細故甲子克復江甯公上敬懼持恆疏奉

旨交存

弘德殿用資省覽都城內外覓公疏藁者幾於紙貴某編修陳奏事發公與

廷議說者謂富韓於韓歐陽兩公敷陳時有異同均不失爲名臣公之心實堪共白焉公體氣充實標鑒遐明每退食私室端坐如塑不輕出一語及遇政治之得失與夫人心風俗之邪正上下今古不厭不倦湛深宋五子書由雒閩而上游鄒魯取諸家撰述辨晰毫芒求其性分所固有職分所當爲期於古人相合其他天文術數之學靡不窮原竟委於醫則抉河間丹溪兩家闢奧於地理則合楊曾廖賴而得其精微在公視之皆以爲餘事也著拙修集十卷涂閩仙方伯宗瀛爲刊行之詩一卷法律直追韓杜濬師亦將爲校刊公居恆所守在義利之關尤

不肯借假者在儒釋限界服官四十年清操絕俗引疾後歸無一椽寓
居日食不給處之晏然倭文端公會文正公並年小於公事之如兄敬
之等嚴師文端弟令淄川公輒訓戒之無私語文正督兩江念公貧一
日值中秋節欲以三百金贈攜以往晤對良久微詢公近狀公答以貧
吾素也不可干人文正唯唯終不敢出金而去此文正見濬師時親言
之者嗚乎可以風矣公生乾隆五十八年癸丑五月十八日辰時享年
八十有一夫人葉氏公母太夫人姪也勤儉慈惠主持中饋俾公無內
顧憂公之孝於親友於昆弟河潤九里澤周三族夫人實佐助之先公
十六年卒葬山東諸城縣亮甲山子二人長應熾先卒次應焯候選布
政司理問出嗣公弟廷桂孫兆張三品廕生候選知縣兆學先卒均應
熾出兆傳兆書兆英兆毅兆鍾均應焯出孫女五人曾孫口人曾孫女
二人謹敘次於左用備

國史采擇并系之以銘曰

家經戶史漢砭宋鍼究厥指歸心憤口瘖塵障功利霧塞心性不揚則
墨惟狂罔聖仰仰吳公徽國鄉人格物窮理體該用純上據素功出佐
明主

主知公學結實足取銅符始縮石畫罕儔賊首屢梟民志賴鳩侯燕侯
魯來旬來宣三月曷寄萬頸企延民口有碑公面比鐵矧伊胸懷冰壺
不熱持平廷尉司寇秋官五宅三居屏申黜韓邦典計吏食貨陳書公
兼司之弊杜用舒

朝廷視公股肱心膂中外望公臯夔伊呂王臣蹇蹇匪敢乞身二豎弗
去一疏陳情

文母廬念特頒

溫旨戀戀

國門迢迢梓里梓里莫歸言尋鍾山誅茅結屋圖書是耽左圖右書被
服儒者冬雪立門春風拂廈蓮溪花安鹿洞雲迷天不憇遺哲人其萎
宰樹覲髮鬢臺并久我泐貞珉千秋不朽

吏部侍郎胡公家傳

方濬頤

公姓胡氏諱肇智字季臨號霽林安徽績溪人曾祖某祖某考培翼妣
氏張三代以公貴皆

贈如公官公兄弟五人齒居四六歲入塾從大父讀書聰穎異常兒七
歲秋仲目失明醫者莫能治迨次年仲春兩目忽自愈家人咸異之年

十五偶汲水墮池中時方盛夏水深滅頂無援之者幸池旁多石得攀而上竟不死十九歲隨叔父中書公培輩至京師受業於農部胡心泉先生教以立身行己處世待人之道謂凡事當返躬自克不可苛求於人學遂大進課蒙童讀朱子大學序至無不有以知其性分之所固有職分之所當爲二語公曰自古聖賢學問功業不過完此二分字初無矜伐之意而世人則不能滿假之念多實踐之功少蓋皆於此二分字未曾體念明白也是年補弟子員公先聘章氏有殘疾將爲改婚公力持不可卒迎娶焉公之師邑宰朱君艘延公課其子朱廉吏公在署無所干求有託爲關說訟事者悉拒絕之朱以是益重公公嘗語人曰朝廷設立牧令乃最親民之官民有曲直賴官判斷一經請託是非倒置者無論已卽令曲直不爽雖公亦私豈不人已兩失乎登道光丁酉

拔萃科

朝考以七品小京官用籤分吏部文選司行走並辦驗封司事己酉舉發許祥和捐職僞造部照一案奉

旨下兩江總督按治卒得其人寘之法公以風俗虛浮仕途躁進輒與同志者言之太息咸豐初元充

宣廟實錄館校對官詳校官迭荷麇鹿瓜果之

賜書成議敘加二級補考功司主事掌文選司印凡中外官升除調補及班秩品級之典事最繁劇胥役眾多與各行省書役鉤通舞弊者不一而足公志在釐奸剔弊整綱飭紀遵守成憲杜絕請託友朋皆不可干以私卽有訾議公咸聽之胥役舞文弄法者懲處不少寬貸謂同官曰今之吏部非古可比部臣職宜守法吾輩責有攸司要以例案爲斷問心無媿違恤人言凡事可以下對胥役卽可以上對

君親天下雖大官員雖多苟持正不阿皆無不可以對之也司中事無大小不能逃胥役之耳目稍涉於私他人或不知先爲若輩所鄙矣丙辰升稽勳司郎中截取引

見記名以繁缺知府用辛酉二月擢福建汀州府知府十二月莅任時郡城南復公精選嘉應贛州勇分守各要隘同治壬戌浚城濠巡視濟川橋古城黃苜嶺嶺嶺觀音嶺一帶地方訛言賊至又訛言端金土匪自西來偵探並無其事賴公持重民以不驚甲子署理汀漳龍兵備道撰官箴云官身本是民官心須愛民如果恃官勢虐民虐自身又云眼前圖快意作孽禍兒孫事事捫心省良法在行仁公自記云後四句不

獨居官當戒凡有心欺人者皆當以此自惕尋補汀漳龍道六月抵任
公論吏治云近時吏治之壞莫甚於京銅局從前捐例之開或一年而
停或二年而停其條款祇定各官雙單月銀數以及內選外補簡明易
曉畫一易遵今則捐輸蟬聯十數年不能停止而條款屢更成數不一
兼之外省各自爲例報捐者便宜是驚直與市僧無異且從前捐例銀
數一定並不減成當時報捐者非懷才欲試借捐途以見用卽家道殷
實得名器以爲榮今則或減或增名器至濫非特無行之人希僥倖以
入仕卽窮途之子亦挪借以求名皆視官場爲利藪並不知國計民生
爲何事如此而欲吏治之有起色也得乎況銀數既有增減卽選補班
次亦因之變更無論計較錙銖有傷國體而章程屢改條款愈繁記憶
旣難檢查匪易稍有疏忽百弊叢生以致開捐數十年而經費仍不足
吏治日益壞其效可觀矣爲今之計欲祛弊端先務刪例欲刪捐例須
復舊章條款簡明銀數畫一斯仕途可以清釐而名器不致冒濫必如
此始可以言吏治八月擢陝西按察使旋奉順天府府尹之
命再遷宗人府府丞兼署府尹再擢吏部右侍郎管理戶部三庫事務
戊辰復兼署順天府尹以夏弢甫先生所著

聖諭十六條附律易解及檀弓辨誣述朱質疑各書進呈
乙覽調補吏部左侍郎辛未六月十六日薨遺疏上聞

九重震悼

賜卹如例公原配章夫人繼配洪夫人子五人姓萊萱葉葵公長身玉
立言笑不苟動必以禮法自持尤篤於師友之誼在銓部日剛正廉明
爲上官所倚重晚歲荷

特達之知由外臺掌京兆擢少宰

朝廷嚮用方殷公感

三朝知遇雖躋卿貳無異單寒力疾從公以身報

國屢荷

恩旨慰留公亦意不忍去向使天子耄耄之年則其所設施者詎止於
此也哉

方濬頤曰公於先叔父曉林公爲丁酉同年生而友蘭先兄亦於是科
舉京兆予官京師公折節下交待以儕輩之禮朝夕過從公之佼佼不
羣予固久心欽之及來揚州公入爲六官之長位望尊崇猶不忘春明
故交時通尺一道殷勤有古君子風所期勉於予者倍至每南中人士

入都必詢予近狀嗚呼孰知竟不獲再見耶其孤晉甦服除以浙江候
補知府過邗上持公自訂年譜見眎乞作家傳謹銓次如左公之學問
經濟超越尋常斯固未足以盡之願就公所自言者列諸家乘其信今
而傳後初非予一人之私言也

記刑部侍郎石公事

方宗誠

太守名贊清字襄臣貴州人知天津府數年潔己愛下深得民心咸豐
八年英吉利至天津制軍某走太守聚水二甕於堂階曰夷如入脅則
與吾妻死此矣未幾相國桂良與議和而去十年英吉利法郎西入天
津總督以下多受辱夷分住官舍惟贊清倔然不屈夷令其去曰取吾
頭以往官舍不可讓也夷驚訝之一日夷以五百人持兵入署扶贊清
坐肩輿導入夷館曰非敢相難聞有兵欲燒吾船故假君爲鎮耳贊清
不食後數日民情洶洶夷恐命之去贊清不可曰吾如何來當如何歸
也夷復命五百人前導肩輿送之常首屈一指僮之曰此好官也夷居
天津數月贊清終不離衙署後晉刑部侍郎剛直不阿治獄亦稱明允
誥授資政大夫封光祿大夫吏部左侍郎吳公行狀

譚廷獻

曾祖文運

贈光祿大夫吏部左侍郎

祖世昌 贈光祿大夫吏部左侍郎

父士珪 贈光祿大夫吏部左侍郎

江蘇南通州泰興縣本貫安徽徽州府休甯縣吳存義年六十七狀
公字和甫先世爲休甯望族父修餘公始遷泰興著籍焉公中道光十
二年壬辰科副榜貢生十七年丁酉科舉人戊戌會試成進士官翰林
二十二年任雲南學政邊徼士惇樸而信公翼翼以慎校藝至丙夜不
休諸生悅教于日親人園方音多不能辨四聲公于音均毋串今古
乃以李氏音鑑教之歲月改觀是時回民煽亂公巡試永昌竣事扃行
出郭數里城中火燭天駭詢左右則曰回人構兵旣期矣使者清德不
敢犯俟出城而後舉火也公先後在雲南兵火相望夷然無梗云回京
一年丁太夫人憂歸里二十八年江北大水泰興饑公倡士大夫議振
募富人資至踈曰吾爲數十萬人屈也泰興知縣張興澍公同年生相
善也一以荒政聽公方水盛時饑民棲樹杪數日無炊煙公親擣小舟
散麩餌必徧水退又爲苦蔽露處者是歲饑而不害服除入都直
南書房充

日講起居注官京察一等擢侍講咸豐五年乙卯科雲南鄉試正考官

留任學政其視學也益誠士民益親學使如家人願回亂益烈至偏省城圍之城中英又闔掠各牙門及富家獨不入學政解一步民攜婦孺藜藿來匿者數千人號舍皆滿公居雲南久習其亂端獨居愀然恆曰滇事一紙書可定而疇實蹙之比復

命奏對陳變亂始末最詳其後置臣雜用征撫小定復橫中原道阻幾等絕域者數年彙遷侍讀至學士嘗署順天府丞當泰西各國自天津深入

乘輿出狩都門戒嚴閒曹多攜家屬出走公方臥病謂所親曰慎之妄動自貽悔也事定既出復入者遇公有慚色論守禦功公署牘曰府丞吳某抱病干撤詰姦皆不與今病未瘳不敢冒濫奏上廷臣嗟異已而升太僕寺卿改通政司通政使遂擢侍郎署禮部侍郎日慨文廟從祀位次多舛奏請審定績圖頒行從祀諸儒增設既鯨于代用其書垂於國胄之義漸失疏奏各直省臣工不得濫請署刑部侍郎日核議秋審冊籍秉燭鈎稽惻然於人命之重時有直隸民聚眾抗運總督奏當抗糧律抵辜者且數十人公爭於管部大學士曰糧抗而不納謂之抗糧糧納而不行謂之抗運刑部法天下之平也當示區別卒如公議減等

公用文章進用學有經術溫溫不出諸口詩文藁草不輕示人性廉儉無妄取子敝衣惡食讀書一室如寒士自通籍至宦成不邇權貴超然榮利之外惟臨利害侃侃持論不撓人以爲不可測也同治三年以戶部侍郎

簡放浙江學政調吏部左侍郎當是時浙江全省被寇城邑蕭然前學政國子祭酒吳保泰輾轉戎馬間一試衢州府丁母憂去官公繼之省城初復人士離枝喘喙繭足逡巡來歸勾筆研赴學使者檄公與爲坦夷嫗响拊循之士氣漸定從容飭粥比歲考一周秀良者遂奮於學公進與之言經史小學剗好高無實之論而一以讀書爲歸吏有虐士及民者畏公持之斂手不敢逞補行辛酉科選拔貢生考取辛酉甲子丁卯科優貢生所得皆知名士六年任滿三載中公中風數病乞休歸嘗告其子曰歐陽文忠旣遷潁上瀧岡先墓曠遠足爲盛德之累旣謝病乃赴休甯經營宗祠買田百畝祭祀之外分贍宗姓工未竟而卒次子寶清成之七年九月公卒於泰興里第遺疏上奉

旨照侍郎例賜卹娶李氏前卒生長子寶慈二品蔭生候選府同知繼娶汪氏生次子寶清候選郎中三子寶讓泰興學生孫四人曾孫一人

公著有榴實山莊文二卷詩六卷詞一卷葬于泰輿某原既葬之次年碑志未具寶清走杭州乞獻撰述先師行狀將請當代碩儒表厥幽宮謹敘次大略同治九年夏六月受業門人仁和譚廷獻謹狀

王發桂傳

畿輔通志

王發桂號笑山直隸清苑人舊籍山陰中道光十六年進士授禮部主事二十四年充軍機章京咸豐初擢員外郎三年遷郎中時粵匪竄楚連陷武昌漢陽各省騷動發桂以賊之所恃在船乃進火攻之策

上嘉納之尋授湖廣道監察御史時賊已竄踞金陵分股北犯發桂奏言臨洛關以北順德正定地當衝要順天府府尹宗元醇熟悉情形請飭駐南路以資坐鎮貴州道員胡林翼捕盜鋤奸有膽有識其平日訓練丁勇仿戚繼光法而變通之勇不滿三百銳健果敢一可當十所著保甲團練條約及團練必要諸篇均有成效若畀以重任誠無慮也疏入

命林翼留湖北交督撫差遣又奏言賊匪蔓延各省宜訓練新兵充補營額請遵明臣戚繼光紀效新書練兵實紀成法並條陳都城巡防事宜

上躋之時逆蹤竄逼直隸統兵大臣守禦無功發桂具疏劾之略曰軍興以來獲罪效力人員職分較卑者由統兵大臣驅策之或可效奔走之勞至一二品大員平日養尊處優雖經斥革驕氣未除留於行閒差之既不便差委之又不便委軍營多一廢員糧臺多一支應統兵大臣瞻徇情面附列薦章希旨起用帶罪幾同無罪圖功適以冒功達洪阿此次退縮失機致奮不顧身之謝子澄佟鑑同時陣亡此等劣員死不足惜至

欽差大臣勝保

皇上賜以神雀刀令其便宜行事乃自入直境未聞斬一失律將弁而於獲咎大員屢經奏保非瞻徇周旋何以如是請

飭該大臣將達洪阿查明正法此後劣員無得奏留瞻徇既絕

國法自伸紀律既嚴軍威自振疏入

上嘉獎之四年擢鴻臚寺卿奏請試行北省水利特舉直隸臬司吳廷棟直隸在籍西安府知府徐棟總理其事疏入不果行九年遷太僕寺卿十年升通政使司通政使十一年擢都察院左副都御史署兵部左侍郎同治二年御史孟傳金奏參前安徽巡撫王植門丁陳小山罪僭

用四品冠服與長官抗禮謂聞發桂所言

上命發桂查覆奏治如律三年授禮部右侍郎調刑部左侍郎五年授工部右侍郎兼管錢法堂事務病歸九年卒

戶部左侍郎宋公墓志銘

方濬頤

濬頤曩官京師十餘年尙意氣好結納交遊徧海內而性情相洽終始弗渝者則莫如雪帆侍郎侍郎長濬頤十歲當甲辰釋褐諸同年咸尊爲兄而杜筠巢少宰又偕其兄繼園與同年十人締金石交侍郎居首子亦得廁其閒自是聯轡看花圍爐煮酒文字之會殆無虛日侍郎與此九人者視如手足真摯坦率儕輩萬弗能及之迨己酉以後濬頤迭遭大故重以寇擾淹滯不出者六稔再到春明重荷侍郎與通緩急予悒悒不自得顧時時規勉以遠大相期倖獲外轉嶺南距京師七千里又時時函尺一道殷勤不以山川爲阻及量移兩淮通問尤密而於時事艱難政令得失則必舉以相告忠君愛民之忱與濟困扶危之念蓋無日不往來於胸中當代如侍郎者有幾人哉嗚呼已矣侍郎今歸天上誰復知予者予爲侍郎痛更自傷也光緒丙子秋其孤陳壽扶櫬道揚州予往哭之陳壽持狀乞予爲文

志其墓嗚呼予烏能已於言哉按狀公姓宋氏諱晉字錫蕃號雪帆溧陽人八世祖檄明諸生從祀鄉賢九世祖臣熙廣東新安知縣從祀名宦高祖陽森曾祖烺祖維城考緒四世皆以公貴

贈光祿大夫妣皆一品夫人公兄弟四人齒居長壬辰鄉試中副車己亥舉人甲辰成進士改庶吉士散館授編修丙午充順天鄉試同考官丁未大考第四擢中允己酉典試河南以題字錯誤移咨監臨奏請議處奉

旨革職留任庚戌遷司經局洗馬充

文淵閣校理本衙門撰文

實錄館總纂壬子大考二等遇缺題奏拜文綺之

賜擢侍講學士充武鄉試副考官癸丑轉光祿寺卿尋署禮部左侍郎直粵寇陷金陵分股北竄畿輔震動奉

命總辦京師團防公披肝瀝膽竭盡忠讜凡有關於國計民生安危利害知無不言言無不盡極陳各省蹂躪情形籌畫攻剿勝算連劾不職大吏與貽誤戎機者一歲之中章數十上會

朝廷屢詔求賢公則悉舉平日所知之鴻才碩德臚列入告

先帝鑒公之誠俯加采納任以封圻畀以節鉞卒能削平大難戡定東南嗚呼公之所建白者大且遠已甲寅遷宗人府府丞乙卯升內閣學士兼禮部侍郎銜丙辰升工部右侍郎充

國史館副總裁

文淵閣直閣事稽察中書科事務公以受

恩深重目擊時艱不忍緘默同塵取容當世雖平居謙卑自牧和易近人而遇眾議盈廷是非所在則斷然不苟且以直言招忤遂不免有齟齬之者丁巳乙未兩次干役

興京修

陵工辛酉

文宗顯皇帝龍馭上賓奉

命恭理喪儀未幾出爲倉場總督先是河運改爲海運

天庾正供每歲幾三百萬石

欽差部臣駐天津驗收轉運京倉自津門至大通橋三百里內居民藉此爲生沿途偷漏歲短米石甚鉅顧癸丑軍興江浙郡邑紛紛淪陷南漕起運纔二十餘萬不及從前十分之一而偷漏者如故公至則洞察

情弊力加整頓深省倉虧甚鉅而不敢遽發蓋自癸丑壬戌十年之間侍郎及監督官凡數易率皆因循粉飾上下相蒙舉發則均干吏議且須賠償米石公誼不忍爲而甘獨任其咎嘗語弟子曰吾居此如臥於積薪之上恐不免貽子孫憂丁卯倉事起吏議綦嚴蒙

恩左遷內閣學士攤賠米至兩萬石之多公設法屏當以補倉虧七年不調意豁如也而遇大事則譽譽諤諤不避嫌怨一如其在

文廟時癸酉

穆宗毅皇帝親政八月

命署吏部右侍郎旋補戶部左侍郎公受

三朝恩遇益圖報稱職司天下出納軍事未了度支浩繁亟思酌盈劑虛主持大計以節糜耗心力交瘁而公遂一病不起矣以甲戌九月十二日薨享壽七十有三遺疏上聞

天子震悼

賜祭葬如禮公配陳夫人先公薨生子三長陳壽直隸邢臺縣知縣次文壽工部郎中先卒貽壽刑部主事孫四人曾傳曾寶曾祜曾順公爲京朝官垂三十年無少長貴賤皆傾蓋相與周旋人罔不敬公愛公者

自奉儉約凡戚黨故舊所求則無弗應其或遠在數千里外者音問闊絕公則於其鄉之官京師者詢之弗得則致書士大夫之官於其鄉者必得其消息而後已山林韋布里閭田野之夫斂門請見公必延之入不作寒暄語卒問曰客何所事有事則已無事則不待其求而已心許之陳壽告子曰先大夫平時訓諸子曰吾生平喜爲人謀尤急人之急往往於力無所顧惜故天之待我亦總無過不去之事生平與人爲善不屑於逆億雖屢爲人欺而待之如故曰吾不逮吾父吾猶知人之欺我也而甘受其欺若吾父則并不知人之欺已也而卒亦莫肯相欺度量相越有如此者嗚呼子聞陳壽言追思疇曩公之立朝建白卓然有古名臣風舉世以浮詐相矜乃獨視友朋爲性命茲何幸其孤之能追述行誼闡揚先德也嗚呼公有子已將以某年月日葬於某銘曰公初釋褐主文愨家朝出宣武夜返西華我服公眞絕無緣飾跌宕騷壇拍浮酒國羽書旁午乃奮經綸下而推轂上則從繩扈蹕木蘭陳書痛哭弗爲利疚弗爲威怵碩鼠之蠹視爲畏途代人受過公則若愚嗟公豈愚惡彼谿刻履險如夷心安理得十年偃蹇再掌農曹騎箕而去巫陽下招歸侍

先皇神依

金闕公言不朽公名不沒茫茫人海所見惟公必昌厥後食報豐隆我文匪諛公論罔異藏之幽宮儀型萬世

光祿大夫刑部尚書叔祖恪慎公墓誌銘

鄭日敬

光緒十一年乙酉六月初九日刑部尚書長沙鄭公薨於里疏聞

詔以公清廉勤慎品學兼優

賜祭葬如制

子諡恪慎事蹟宣付史館時宅兆未定殯於某山閱十年乙未七月二

十二日子先皓卜吉於長沙尊陽都之蓮花墩奉葬如儀命姪孫日敬

屬文以銘其幽宮禮也公諱敦謹字叔厚號筱山曾祖諱光邦妣王氏

祖諱重妣陳氏生祖妣張氏考諱世寶妣蕭氏三代皆以公貴

贈光祿大夫妣皆一品夫人公中道光甲午科鄉試乙未成進士由庶

常改刑部主事薦升郎中嘗語人曰予生平學問頗進於為部員時其

盡心於其職可見矣

宣宗知其能

特旨簡放山東登州府知府未市月

擢河南南汝光道由是歷官廣東河南直隸等處布政使司河東河道
總督湖北河南山西巡撫兼山西提督軍門山西鹽政內補太常寺卿
大理寺卿戶部兵部刑部侍郎都察院右副都御史左都御史工部兵
部刑部尚書皆稱厥職又嘗提山東山西學政典山東順天鄉試一典
會試得人甚盛公在官以清節著於天下肅順擅權時勢燄熏灼名流
顯宦多奔走其門以公雅望多方羅致公卒不往迨肅順籍沒後治其
與通函往來者公無片紙隻字所至謝絕餽遺屏除供張有一塵不染
之風雖以曾文正公同年夙契奉二百金爲壽而公弗受視學山東時
署冷如冰而陋規悉行裁革府縣棚費人因仍而取之者公一概屏絕
視學山西亦如之其清操拔俗大率類此故居官二十年未嘗增一田
置一宅澹泊之性出於天然其官太常也囊橐蕭然值畿輔蝗災歲歉
官俸折減乃以瓜蔬和糜粥合家啖之有謁公者見座上瓜纍纍然方
共相嗟歎嗚呼此公之清德所以自然而非勉強者歟自世道陵夷在
位者不免縈情於祿公獨淡然埃壒之外雖陟大位處膏不潤非其德
之純養之邃曷克臻此居官無赫赫之功而獨負重名於當代豈偶然
哉以同治九年奉

旨往江南審理案件乞

假回籍優游於退園者十餘年享壽八十有三性孝友丁外內艱皆獨居三年未嘗入內兄弟七人怡怡然白首無閒族中貧不能讀及嫠不能自存者捐膳田三百畝贍之配蕭氏

封一品夫人側室樊氏

貤封夫人張氏王氏張氏無子以弟敦訏公子先皓敦諲公子先暄嗣皓議敘光祿寺署正暄三品蔭生以知縣用公薨後三月以哀毀致疾卒孫業淦邑庠生業靄業需曾孫家騏家珪家琬銘曰

眾流渾濁而氣獨清百事盤錯而道則亨四十餘年敷歷中外厥德不渝厥施乃大飄然歸老知足不辱塵外浮游還醇反璞嶽雲高高湘水磷磷留此清白遺之後人

續碑傳集卷十三

江陰繆荃孫纂錄

光緒朝部院大臣

贈太子少保兵部尚書毛文達公神道碑銘

周壽昌

毛氏故洪洞人明初遷武陟先世習儒以乙科顯自公之考芾邨先生起家翰林仕至倉場侍郎乃益大其門生兩男子皆進士公其長也公幼內慧而簡易不飾或疑爲魯倉場公官京邸友多名德公侍側習聞讜論或從叩經義必詳審不倦異日覆詰之靡一字遺人始驚爲國器塾師講易義至姤卦初爻公曰此與坤初爻杜漸防微同意而慮小人之進尤切至師大奇之時年十四二十一補邑弟子員二十三爲道光己亥舉於鄉癸卯倉場公病癱瘓上章請篤歸公侍親疾年餘不離側興居寢饋時以意消息之無不中親隱手滌穢膾不假僕婢倉場公奏廁穢液濺其面公急拭之倉場公已覺愍之而笑曰令汝弟記此事他日表吾墓當入之也乙巳春倉場公病小減命公入都會試成進士入翰林秋卽假歸侍疾終倉場公事庚戌服闋入都授檢討旋官御史升給事中巡視中城勅立保甲水會事至今遵其法其緝獲天津壯役張

老謀殺孟六發山西部曹某偪嫁兄妾諸事出人耳目外故街巷閒小
小冤抑皆欲向赴訴步軍統領某曠弛失望大學士某鄙瑣徇私公露
章劾之直聲震輦下他所奏皆中外至計無一進熟語庚申五月
命以順天府府丞加左副都御史銜督辦河南團練抵汴定條規十二
入奏

允行連奉幫辦巡撫剿匪仍督辦河南團練之

諭連擢順天府府尹太僕寺卿內閣學士先是粵寇擾東南殆徧河南
雖閒有捻寇兵堅將良饒運自給是年頻被焚掠野豬岡之戰大兵屢
敗數亡健將士馬精銳略盡全省囂動公受事於新敗後僅以五千人
屯歸德窘迫枝梧警告日至因疏陳捻匪與粵匪情形不同粵匪屯聚
勢合捻匪散處勢分其出竄必先裝旂演劇召客糾各圩匪目定人馬
數約日至某處取齊皆逼近亳州亳州者賊吭也宜
命科爾沁親王僧格林沁統步隊二三萬人東三省馬隊數千人駐亳
州城分所部爲數起更番進擊此歸彼出此出彼歸循環衝突於各捻
賊圩閒遇邊馬殲之遇輜重焚之使毫無從句結諸圩聲息不通惴
惴然日防剿殺自不能四出竄擾然後以重兵次第圍剿兼用招撫立

可解散不必盡煩兵力僧營馬隊本多其將弁多材勇上年屯濟甯毫東捻匪多薙髮逃者今趙浩然數萬眾已爲僧營殲盡乘此進駐毫城必能制賊死命臣所部五千人尙稱驍勁亦當策往會剿奏入

上臚之後皖捻大創及張洛刑苗沛霖各巨憝以次就殲實基於此公駐兵杞縣以事往汴同治壬戌正月皖捻傾巢西出公聞報馳歸聞僧王在許岡貽書請入助城守時各匪多占民圩樹旂徧野僧營遠來飢疲公濟之食疊遣兵縋城擊賊連有斬擒賊少退僧營休息數日兵氣復振公乃督部將成景巴揚阿陳文平蔣學耕等與僧營合剿連勝破所占民圩殺賊萬餘逆宵遁捻氛遂衰金樓賊圩教首郅姚氏楊玉聰者兇悍善戰與王雙樓賊圩鄰互相結公會合僧營克王雙樓寨五月晦一鼓克金樓圩殲殄無遺歸德肅清河南全境亦次第戡定時已遷禮部侍郎調吏部乙丑

命回京丙寅調戶部升左都御史七月捻匪平公疏請勤

聖學崇節儉飭吏治固根本

詔嘉納之升工部尙書庚午五月天津民與法人構釁直隸總督曾文正公奉

命往邁疾亟公奉

旨往并署三口通商大臣至津親登夷船侃侃辨折法人屈服尋回京上言三口事務簡於五口今五口歸兩江督臣辦理三口通商不必別設大臣但宜責成直督特頒

欽差大臣關防增海關道一司新鈔兩關稅務

詔從之由是津務海防全歸直督矣壬申調吏部自咸豐丙辰分校禮闈光緒乙亥主順天鄉試同治辛未光緒丁丑兩典會試歷年充

殿試讀卷者三

廷試閱卷者十一皆以公明稱公忠慎勤篤無弛事無虛語上結

朝廷知故終始

眷注無異自

經筵講官

國史館副總裁

實錄館總裁

武英殿總裁管理三庫事務教習庶吉士凡要職必

命公而戊辰十月有紫禁城騎馬之

命甲戌五月太夫人姜氏壽八十有扁額如意綉段之

賞乙亥有

穆宗毅皇帝遺念御用袍袿之頒庚辰以內艱服闋甫入都卽

諭在總理各國事務衙門行走辛巳充翰林院掌院學士皆未補缺也
壬午正月以病在告卽枕上拜兵部尙書公彌留之辰伏枕感泣以未
能圖報爲恨不逾時卒二月初九日也遺疏入

上悼惜

特詔褒卹

贈太子少保

賞陀羅經被

遣貝勒臨奠

賞其子繩恩員外郎孫慈望舉人

遣禮部堂官致祭

宣賜祭文諡文達

詔沿途有司護其喪歸卹終之典渥逾常分生於嘉慶二十二年六月初四日年六十六公諱昶熙字煦初曾祖諱景萇貢生本生曾祖諱景

遂歲貢生

欽賜翰林院檢討祖諱睿邑廩生考諱樹棠嘉慶丁丑進士倉場總督

戶部右侍郎自高祖以下

贈如倉場公官曾祖以下

贈如公官妣皆一品夫人母姜氏

封一品太夫人妻張氏一品夫人河內嘉慶丁丑進士同知銜山東商

河縣知縣諱楷之女也子四長繩慶辛酉拔貢壬戌舉人先公卒次繩

武戶部員外郎次繩恩

恩賞員外郎次繩錫女子四長適工部員外郎尉氏劉銘德次適北河

候補通判山陽李鼎璜皆先公卒次適輝縣張毓慶次適候選員外郎

河內畢登雲孫男一慈望一品廕生

恩賞舉人繩慶出弟亮熙以進士官工部主事卒公篤養其寡妻孤子

愛遺孤尤過於所生去夏孤子繩武等扶輓旋里營窀穸得地於河內

之東北明月山今歲癸未卜葬有期繩武乃入都衰經造門奉狀稽顙

伏泣階下以納壙之文請予喟然歎曰予四十年同年生且執友也忍

以不文辭且昔嘗為公銘母墓矣前歲夏過公坐小池亭上公語次忽

謂曰君他日其善爲我銘予笑曰我長於君數歲既老且病異日將累君作佳傳何銘君之爲君聞蹙然亂以他語而罷嗚呼孰知予今日之竟爲之銘耶乃按狀次第之而銘曰

公昔語我大行之絡沁水之流遠企盤谷近臨百泉竹木修修我園其閒因樹結屋水亭山樓園對月峰是名印月翠溼嵐浮行將奉母此焉卜宅樂哉斯邱公後來京吾以質公語胡不讐公則愀然謂時孔棘宵旰有憂吾儕任職竭蹶圖濟其曷忍休矧敢耽佚娛我林泉晷我田疇我偉公語悔量公淺公無我尤體魄所藏名山佳水匪公之求精爽不味竭忠祐助或贊諸幽皇天后土鑒公此心以揭千秋千秋之揭龔石鐫辭蔚乎松楸石則可磨字則可泐公名永留

翁同龢

誥授光祿大夫刑部尙書諡文恪常熟龐公墓志銘

今皇帝嗣位之初四方嚮平兩宮求治日切大臣中有以碩學清望未入朝列者曰順德羅公常熟龐公其年羅公薨朝士大夫期公以必來越一年而公赴繼至天子念公舊臣

賜祭葬

子諡文恪公之孤遂以年譜事狀請銘於蘇嗚呼蘇與公三世昆弟交也其可不銘公爲人和易廉介衷懷坦然立

朝數十年言依於經事準於當世之法尺寸無踰越故中心之誠慊於人人僉曰龐公恪謹君子人也公年二十三舉於鄉越三年丁未成進士

宣廟擢置上第授翰林院編修大考升庶子五轉至內閣學士聞贈公赴奔喪歸其明年爲咸豐十年粵寇軼金陵連陷蘇常大江以南無完郭常熟距蘇州百里義民輸金錢繕什具忍死奮忠枝梧其閒有旨卽家起公爲團練大臣公率義旅搏賊於西鄉數十戰亡其精銳而南東各鄉民團且守且戰勢日蹙城竟陷夫以數十百創殘飢羸之夫守彈丸之地遮數十城驕悍之寇前湖後江飛走路絕遠近無援萬端瘳曳論者固決其不可守矣而公獨深自引咎上疏自劾

上鑒其誠

詔特原之仍責以規復之策公至上海撫夷傷設閒謀力陳小民在湯火中得盡蠲積年逋賦而尤偉者在請援一事方是時蘇常淪爲異域上海一隅形單氣渫塵塵自固而國曾公方督師沿江指金陵爲順

攻之策兵阻不相聞公閒道貽書略言上海爲饜源重地請以奇兵萬人一勇將統之倍道而來卽萬人可當十萬之用曾公得書以舟師界今相國李公浮江而東厥後卒從上海以次剗復常熟蘇州東南郡縣由是底定嚮使遷延歷時日賊勢益牢其禍未知所屆也於是歎公之識真足達兵家順逆之機而其苦衷曲折以善全終始者爲不可及已服除再授內閣學士同治元年奉母至京師擢禮部侍郎充湖南鄉試正考官授順天學政任滿歷戶部吏部侍郎都察院左都御史充經筵講官

賜紫禁城騎馬晉刑部尙書公旣以仁厚誠信被

恩遇每奏對言益切直於刑獄尤兢兢雖小罪慘怛溢於詞色在位一年母夫人卒公持喪歸與蘇握手衰麻中相憐也已而相勸蘇行公送之深夜苦語淚下不能收蓋自是與公訣矣公諱鍾璠字寶生常熟龐氏生於道光二年七月十日薨於光緒二年閏五月六日年五十有五曾祖清標祖敬熙父大莖皆

贈光祿大夫曾祖妣李氏祖妣葛氏前母陳氏趙氏皆一品夫人母趙氏

封一品太夫人配周夫人食貧奉親有賢行先公卒子鴻文翰林院庶吉士鴻書舉人孫樹庭樹階樹韡女字楊同穎其葬在縣西太平橋落字圩公承贈公之學治經守師法長於制舉之文居臺閣以詞賦名一為學政久任國子祭酒以經學造士其著書曰孔廟祀典考五十卷古文詞若干卷奏議若干卷海內之士以文章學行推公而蘇則服公在兵閒久而不輕言兵事推賢與能而不尸其名為國家任艱鉅而不驚苟且補苴之術千慮百圖若畏若訥易所謂慎密而不出者公足以當之矣遂系以銘銘曰

羣囂營營文夸武競爰有德人鎮紛以定在

朝卅年勇文吐謨伏廬闇然白頭一儒公於先人著籍弟子友吾伯兄諏摧經史嗚呼吾兄古訓是程彌天一棺戢恨邊城謂公尙健墜緒終理天平不遺吾學其已凡人之生或剛或柔俎豆金革聖不並謀慎守吾拙善用吾弱無功無名萬命攸託有苑者山有沔者江告我邦族仁人之藏

誥授光祿大夫薛公墓志銘

郭嵩燾

公諱煥字覲堂姓薛氏四川興文縣人曾祖錦奇祖漢父啟樞以公貴

贈光祿大夫妣一品夫人公兄弟三人皆以學行顯兄某黔江縣教諭弟某華陽縣訓導而君用甲辰科舉人援例注選授金山縣知縣甫至大府察其能會新陽災檄署新陽視振訖事乃赴金山數月婁縣盜發與金山有連坐罷旋以獲盜功復職廣西賊陷金陵公奉檄輸糧於軍向忠武公留贊軍事保知府江蘇巡撫許公勦賊上海檄公自隨向公惜不遣公以上海重地餉源所出賊烏集利速進遲恐滋蔓請往規形勝自效向公壯而許之屬以川勇千五百人賊果平

賞花翎授松江府知府會奉賢民抗糧勢洶洶將爲變公聞馳至繫治一二人皆帖服無敢譁者調蘇州府知府遷糧儲道擢江蘇按察使轉江甯布政使旋改江蘇大府既優公才事巨細倚公辦尤以上海洋務利病所繫自糧儲道調署蘇松道其後屢遷官皆以留辦洋務居上海已而賊陷蘇州巡撫徐公殉焉總督何公以罪逮問詔晉公巡撫兼權兩江總督是時江浙各城淪陷獨上海一隅倚公爲重而兵無可集將無可選惟張空名號召徵集乘城拒賊曾公文正督兩江奏以肅毅伯合肥李公視師上海攝巡撫事而公以欽差大臣辦洋務公疏言洋務交涉地方宜總督兼任徒假虛名無益

上是之召入爲禮部左侍郎充總理衙門大臣補工部右侍郎時英人
理太虢獻議募西洋水師助攻金陵曾文正公奏言金陵距江三十里
西洋大艦無所施理太虢以有成約持其議公爲疏析成約之言示以
進退之權在我英使額爾金屈服卽日趣理太虢回國在總理衙門專
務尊崇

國體正言侃侃念京營兵積弱請增練餉固根本坐與言事者互訐
上怒落言事者職而鐫公級仍留總理衙門旋以親老乞養歸光緒元
年雲南戕斃馬加理

命湖廣總督李公往勘公副之由籍馳赴雲南卽定讞仍乞病歸公爲
政持大體高瞻曠覽規畫遠利不爲苛細尤嚴邪正公私之辨意所許
可屬吏微員委已下之其所不可雖貴勢與引決當否未嘗趨和承意
卽有造請必視其立身植行可擇而取是以生平於朋友矜已服善斷
斷論辨而意常有餘歷久無變其初家居倡爲布政使劉公蓉建專祠
及廣科舉中額勅置尊經書院有關吏治及人才學校之原其功尤偉
始以乞養歸旣終喪奉使雲南而公亦遂病病三年卒光緒六年庚辰
二月初三日也實生於嘉慶二十年乙亥十一月二十一日享年六十

有六夫人趙氏次夫人金氏子三人華垣鹽運使銜以道員分省補用
華坤蔭生按察使銜河南候補道先公卒華培庠生女五人長適戶部
主事周鴻年次適一品蔭生李經畬湖廣總督李公之冢嗣也餘皆幼
孫四人嵩燾始督糧蘇松公以

欽差大臣駐上海論洋務利病公喜稱善曾文正公疏辭通商大臣嵩
燾抗言總督兼銜奚避爲人世非意之遭艱難險阻罵譏困辱惟當以
常道處之負天下之重而任其謗苟求避之誰當任此者公聞益喜及
聞嵩燾出使西洋公慨然曰吾兩人以洋務爲詬天下其庶幾奠安
國家一湔斯言乎而嵩燾終以病免逾年李公函告公喪且屬以墓銘
之文曰此公遺命也已又告言公葬有日不速銘無以掩諸幽於是敘
次公生平大節遺諸其家泐之貞石而系以銘曰

發跡一邑兼圻貳卿以彰有功邁德揚聲進榮於

朝退休於里延慶一身光明俊偉終其所懷已溺已飢道羸志絀所施
蓋微施雖不多名則弗敝卒全終始光昭來裔

又誥授光祿大夫頭品頂戴工部右侍郎總理各國事務大臣薛公行

狀
錢保塘

公諱煥字覲唐四川興文縣人曾祖錦奇祖澐父啟櫛竝以公貴

封光祿大夫曾祖妣梁氏祖妣張氏妣郭氏

封一品夫人公年十九與兄煥同入縣學道光二十四年舉於鄉援例
謁選二十九年秋選授江蘇金山縣知縣甫至省新陽災檄署新陽縣
事冬振事訖赴金山明年以事至蘇州婁縣盜發事連金山坐罷旋以
獲盜復職咸豐三年江甯賊陷鎮江公奉檄輸糧大營帥向忠武公畱
贊餉事月餘得餉數十萬連克七甕橋雨花臺諸壘保知府江蘇巡撫
許公勦賊上海檄公自隨向公惜不遣公以上海餉出甚鉅可維東南
大局力請自效向公畀以川勇一千五百人隨勦西人以小故與軍鬩
諸營潰獨公三營堅壁不動事聞授松江府知府奉賢民謀抗糧聯舟
數十持械橫行三泖間公聞警率輕騎往治吏卒羅跪力白是不可捕
捕之且爲亂公不顧馳至繫治其魁數人餘皆帖然無敢動者事遂集
五年正月官軍復上海凱旋道松江前鋒不戢民乘城不納一軍怒將
攻城公挈一卒出曉諭之犒以羊酒軍按隊去松人爲繪單騎犒師圖
頌之六年七月調蘇州府知府先是大營汰廣勇數百人散居蘇城密
與賊通時出擾掠大府弗能治命公圖之公於中秋夜潛軍躡其巢賊

憑柵力抗礮火燎公須矛傷及郝弗爲動戰益力禽斬殆盡七年擢蘇
松糧儲道調蘇松太道八年授江蘇按察使十年轉江甯布政使晉巡
撫銜改江蘇布政使辦理五口通商事務
文宗皇帝知公可大任又以公熟悉洋務自調蘇松太道後皆以留辦
洋務

諭不得輕離上海已而蘇常連陷賊烽及淞東西公方將兵克太倉嘉
定

詔公巡撫江蘇兼署兩江總督時逆氛徧江淞賊李秀成以數十萬人
由松江嘉定環攻上海城中兵纔二千餘人大營廣勇數千人潰至公
慮其通賊立營要隘誅其劫掠者百餘人餘悉收其械方令過而廣勇
游弋城外不肖出居民洵思商賈不前餉立絀議者請募之守城否則
將爲賊用公不聽請者益力公厲聲曰公等能保其不反乎今東南賊
無慮百萬益此數千賊奚足言而坐令餉源重地餌於虎口上海不守
飢軍立潰公等能善其後乎又請逐駐江北公曰上海雖縣城而平時
海口月入稅餉可二十萬抵江蘇財賦之半必固守此城方有進剿之
基如賊有之旣握利源又梗海口國事將不可問願與此城共存亡也

請者乃不敢言旋訶得都司余義政爲賊謀暗散賊號於民間以計禽
斬之分命登陣守禦公自守西門以當其衝李秀成親攻西門公厚賞
募人持火箭然賊營火光燭天賊以無內應不敢近火息肉薄仰攻城
上鎗礮雨下秀成臂受創退賊解圍悉遁出兵追之遂復松江是役也
賊以全力圍攻志在必得竭力拒守七日夜不下城兩足爲腫礮自冠
上過耳爲礮震幾聾賊力竭去卒保危城

優旨嘉獎晉頭品頂戴賊既退所募各軍始漸集分命副將李恆嵩率
洋將華爾守松江都司姜德守寶山提督曾秉忠參將梁勝章往來嘉
定青浦松江金山之境一二年間賊屢犯屢卻戰無虛日十一年八月
蘇州嘉興賊十萬餘陷金山衛城公自將至大泖塘督勦力戰復其城
賊乃退冬李秀成再陷杭州復以數十萬人分六路東竄由海鹽平湖
陷金山奉賢南匯川沙諸城連營黃浦之東圖扼吳淞口犯寶山聯絡
嘉定太倉諸賊遠作長圍坐困上海公嚴兵固守寶山松江督諸將分
道迎擊同治元年李恆嵩華爾敗賊十餘萬於松江北之廣富林追賊
敗之天馬山又敗浦東賊於高橋蕭塘又會英法兵敗之於王家寺龍
珠庵等處上海解嚴諸軍乘勝復金山嘉定青浦軍勢稍振

詔今大學士李公督師上海撫江蘇公專以
欽差大臣辦理五口通商事公疏言通商大臣宜於長江適中地擇督
撫之勛望素著者以警服遠人足兼任之若專設大臣統南方數省通
商各口數千里難以遙制各國公使於撫馭遠人稽察稅務徒擁虛名
而歲糜餉糈數十萬於事無益深爲
朝廷惜此巨費也

詔如所議施行明年春

召公入署禮部左侍郎充總理各國事務大臣補工部右侍郎管理溝
渠河道大臣公在上海久熟悉洋務利病知西人天性忿摯堅執而負
氣好勝易動以利當上海被圍時賊與西人約不相犯無一矢加遺者
公諷知賊出松江道殺一傳教西人密緹人出城泄其事西人果忿以
炸礮助擊賊勢爲挫後使華爾練常勝軍數百人益至千餘人慮其驕
悍難馴以我兵千餘人與俱進止累戰有功不靳厚賞華爾戰死所部
將美國人白齊文統其軍請易冠裳受爵秩公察其心不誠密疏言通
商海口練兵如或不能驟廢洋人但令聽受節制不必虛假冠裳或令
充作教師不必寄名版籍得

旨所奏甚是照所議辦理後白齊文果跋扈犯法立斥逐而易一英人
統之一時洋將如華爾何伯勒伯勒東卜羅德等皆得其助勦之力事
定徹軍亦無後患厯辦比利時布路斯荷蘭諸國和約事皆有

旨嘉許既入總理衙門益務崇

國體維持大局稅務司英人李泰國請募西洋船礮助攻江甯曾文正
公格其議李泰國以有成約不爲止公疏析成約之由示以進退之機
在我英使屈服趣李泰國歸國署貴州巡撫田興恕多殺西人傳教者
英使必欲議其專殺之罪抵以法公力爲辯論反復數四卒從輕減其
正言不撓消弭事端類如此嘗忿京營兵積弱疏言京師爲天下根本
欲培根本先固藩籬請於直隸分設四鎮每鎮練兵萬人擇久厯戎行
有勇知方之將各一人主之仍歸總督節制不預外省調遣神機營亦
分四營每營練兵五千人與直隸兵相輔而行一二年閒庶幾可用其
餉責各省督撫分籌按月解京或議外省需餉正繇力恐不給不知君
臣猶父子也子雖貧未有不竭力爲父謀者必待子先温飽始救其父
之飢寒有是理乎且言西使駐京知我虛寶始侵利權近漸預我軍事
稍拂所欲輒以用兵挾制若徒以口舌爭勝而不求自強終非長久之

策此軍練成使西人目覩富强可息其要求之念亦安內攘外之至要也

詔議行之公感

上知遇遇事盡言無少隱用是同朝多有相忤者三年坐與言事者互劾兩罷乃畱公總理各國事務之任奉使天津辦日斯巴尼亞國和約事竣還京明年春太夫人里中疾甚急足至京師公得書傍徨待旦乞卽歸省執政交畱之公曰吾違色養十餘年矣徒以蒙

國厚恩昇以重寄不敢遽萌歸志今中外幸漸無事而親被篤疾日夜望子於數千里外此豈可須臾俟者且方寸旣亂於謀事又何裨焉朝廷知其不可畱也遂得請馳歸太夫人疾爲少減旣念二親年老善疾不忍離左右假滿乞養不出杜門不與外事然地方利害之大者無不爲當道言之宜賓民積穀萬餘石備荒大府議以充軍餉府縣不敢言公冒暑至成都力白其非事得止廣鄉試中額二十名省城勦建尊經書院經費皆賴公一言決之旣終親喪舊疾時動光緒元年命副湖廣總督李公馳赴雲南勘土夷殺英人馬加理事力疾就道事定有欲薦公復出者力辭之仍乞疾歸日益困六年二月初三日卒距

生於嘉慶二十年十一月二十一日年六十有六夫人趙氏次夫人金氏子華垣鹽運使銜分省補用道華坤蔭生按察使銜河南候補道華培縣學生華坤先公卒華垣後公數月卒女五人長適戶部候補主事巴縣周鴻年次適湖廣總督合肥李公長子蔭生經畬三字其次子經楚餘幼孫五人師錫同知銜湖南候補知縣廷錫嘉錫齡錫皆華垣出公爲人伉爽無城府言無粉飾篤於師友親舊虛己服善歷久不忘爲政務持大體不規近利意所不可斷斷辨論無所避同列皆倚重公卒後二月大學士直隸總督李公入告追論其力守海濱以待援師之功請以侍郎例議卹奉

旨允准保塘於同治二年正月始識公於上海嗣隨之航海入京館其宅者二年餘公素好蓄書入都時已有三十餘篋在都二年幾兩倍之與保塘約閱書日盡一卷事多亦盡半卷遇有疑難必相商推或援他書證明其說輒大喜嘗喟然歎前此讀書之日少也精於鑒別多臧宋元以來字畫碑刻公餘展閱摩挲意甚有得一日指示曰它日歸里持此終老毋笑吾爲此不急之務也既歸發舊臧經史有用諸書畀省中書院刻之自後蜀中書漸多士知崇尚樸學風氣爲開卒前數月貽書

保塘言方手校讀史方輿紀要郡國利病二書補刻其漫漶者豈意工垂竣而公卒矣華培既於六月二十八日葬公於宜賓縣之古木灣以保塘素知公哀公奏議書牘并臚列生平事跡屬爲敘述爰詮次其大節著之篇以備史館采擇焉

阜保傳

吉林通志

阜保姓甯古塔氏隸滿洲鑲黃旗道光二十五年進士改翰林院庶吉士二十七年散館授編修同治三年累擢兵部右侍郎兼署工部右侍郎充

冊封朝鮮國王正使時吉林盜匪王五餘黨糾眾竄擾復西至大孤山句結回匪楊發等肆掠

命署吉林將軍嚴飭所屬會同黑龍江奉天官兵合剿內閣侍讀學士于凌辰疏稱吉林開闢日廣訟獄日繁請專設理刑大員或如臺灣添設道員例加按察使銜

命察議疏言吉林地方苦瘠若設監司大員則衙署及僚屬書差廉俸一切所需不貲日後公用仍無所出驟難輕議吉林與熱河俱在關外壤地相接情事頗同應照熱河設立刑司之例由刑部揀選正途出身

漢郎中或員外郎一員使之主稿添設主事一員使之幫辦其理藩院郎中一缺本辦理蒙古事件其實蒙文無多擬改派刑部漢郎中一員使之掌印即原設協佐領仍留一員使之幫印即遇蒙文事件亦足辦理辦事衙署仍在刑司統歸將軍管轄三年期滿無過由將軍出具考語備文送部引

見

從之明年疏陳吉林賭風甚熾利重法輕罔知儆畏為奸宄之藪實盜賊之源請

敕刑部分別覈議酌量變通俾各知警下所司議行又疏盜匪之竄奉天鐵嶺開原者復由大孤山東南圍場出竄擾及吉林放牛溝該處為兩省毗連之區此挈彼竄最易藏奸請增兵進剿得

旨迅飭所添派佐領那斯洪等覘賊所向實力兜擒五年回京光緒四年歷遷刑部尚書正紅旗蒙古都統以疾乞休

許之八年卒

賜祭葬

誥授光祿大夫頭品頂戴吏部左侍郎邵公墓志銘

俞樾

光緒九年六月壬子吏部左侍郎邵公薨於位其明年諸子奉公之喪以歸葬有日矣以公所自定年譜乞銘於余余與公同舉於鄉同成進士同入翰林銘幽之文非後死者之責而誰屬哉按年譜公諱亨豫字沛生姓邵氏江蘇常熟人寄籍順天府宛平縣曾祖淵曾祖妣歸氏以節孝

旌祖同善祖妣錢氏考元章山東東昌府同知妣歸氏張氏自曾祖以下皆以公貴

贈光祿大夫妣皆一品夫人公生於河南開封府東昌公卒公南北奔走幾廢學而其時諸老輩皆知公爲大器厲翼之得無廢道光十九年以太學生應順天鄉試中式副榜又五年中舉人至三十年會試成進士改翰林院庶吉士散館授編修與修

宣宗成皇帝實錄咸豐六年充會試同考試官明年補贊善八年典河南試官試畢拜安徽學政之

命安徽學政故駐太平自孫文節公死難後繼之者移駐徽州環徽亦皆賊也公至數月始得舉試事而借浙闈鄉試之議起浙撫以號舍不敷爲言於是又有請至明年爲安徽特開一科者公曰辜較皖士不過

三千人仍與江蘇同考便言於

朝從之又議中額公言皖北人數已逾往年之半而徽甯廣一隅籌備

鄉試經費甚鉅皖北之士跋涉可念皖南之士踴躍可嘉乃有

旨視舊額取十之六公既畢徽試試甯國試廣德廣德之分棚考試自

公始也今廣德試院有公生祠云時蘇撫上言安徽撫藩遠在皖北科

場事俱歸安徽學政主持公目閱試卷手治官書自朝至莫無少息其

至浙錄送遺才也皖士之倉卒自賊中來者髮猶毳毳然公亦不詰也

榜發後新中舉人應由巡撫給咨公言皖北道路未通其在皖南者請

由皖南道詳請學政給咨士皆便之試事畢賊益熾其明年陷涇縣陷

績溪徽甯大震時督皖南之師者張公芾也浙撫王公有齡以浙事亟

請張援浙而議以公統張之師徽人咸喜公曰徽防軍僅萬二千張公

固不能獨行分其半則止六千何以資戰守況餉又不繼行且譁潰吾

受
恩深義固不得辭心所不甘者異日謂徽禍始我耳已而

朝廷命曾文正公督兩江浙撫所請不果行公崎嶇戎馬中屢以書抵

曾文正及張公云兵事所言有用有不用而徽事已不可爲未幾聞英

吉利寇京師

天子幸熱河益感憤遂得疾其年十月以疾乞歸迂道由江西湖北河南至山東之文登樂其僻遠有終焉之志明年同治建元毅皇帝登極

皇太后訓政公曰此內憂外患之時非臣子泉石優游之日也二年閒關至京師卽上疏言吏治宜飭軍旅宜整招撫宜慎捐納宜核旋補贊善充

顯皇帝實錄協修官大考列二等俄以國子監祭酒視福建學福建學校之弊爲天下最公以耳目之難周也創爲草案之法如某縣應進若干名先出草案倍其數以坐號榜示進而面試之每有正場文字甚優而面試不得一字者於是考試之弊絕其冒籍匿喪者所在有之知其事者初不攻訐及其旣入學乃發之以求賂賂足則曰吾懷疑而妄言然事非無因兩置不論公曰事不兩全果冒籍匿喪耶論如律果誣告耶論如律閩民難治有司畏之一鄉一村有一學中人悉舉以責焉其族或械鬪殺人責其縛送其田賦有逋負責其輸納公曰是驅之爲不肖也持不可公雖職在文衡而閩故多訟訟必涉學校試卷與訟牒常

並閱也及報滿已累遷至內閣學士會閩撫乞養歸閩士大夫及里巷細民皆言代之者公也公戀

闕思北歸公配嚴夫人每夜至焚香籲天已而果受代還

朝拜禮部右侍郎權吏部右侍郎旋以倉場侍郎權陝西巡撫逾年卽真陝自大亂後各營之兵徵調者多歸伍者少所存纔十之二而陝於是無兵司庫歲入百六七十萬而所出浮於入者數十萬陝於是無餉公至三月賊由鄜州深入犯澄城郃陽距省城百里公飛檄調諸軍擊之盡殲其類已而楊世俊所部潰於馬營監公慮其出汧隴入鳳翔將不可制乃命曹提督克忠率師赴岐山收撫之事乃定而曹所部曰銘軍故劉公銘傳之兵也曹與劉齟齬軍中不悅其右軍前後兩營先已鼓噪欲變至是其武毅右營潰陝中大震

朝命將軍穆公穆圖善來公曰穆公於銘軍不相習非弭變是速變也疏請用遇缺題奏按察使劉公盛藻

從之劉至一軍帖然軍事麤定乃治民事華陰之地有濱黃河爲河水衝陷者免其糧延榆綏鄜間荒蕪特甚招集流亡使耕治之秦民舊苦差役之累喇嘛差尤重一喇嘛入京則自川省從之者不可勝計公議

令自四川至直隸各委員接遞護送而川員勿入京於是附行者始絕
公初至汚萊滿目至是大熟麥一斤直錢十二三而華州有麥秀五歧
之瑞公又使牧令課民紡織蠶事與焉光緒元年舉行鄉試陝甘始議
分闈總督左公欲定甘額爲四十公曰若然則部中執舊額相繩而陝
額無幾矣請援乾隆閒江蘇安徽分額之例蘇七十二徽四十八溢於
原額者二十一彼分額猶可況分闈乎如此則於隴有益於秦無損卒
從其議定甘額三十而陝額不減公昔視皖學有借闈之舉則力爲皖
士謀至是撫秦有分闈之議又力爲秦士謀其所至惠及士林類如此
公以衰病乞休屢請乃

許之還京師杜門養痾者一載三年秋拜湖北巡撫未發
命偕侍郎崇公崇綺赴河南案事蓋是時河南大旱巡撫李公慶翱藩
司劉公齊銜均爲言者所劾公偕崇公廉問之劉於災區仍徵收如額
而李亦不能察致窮民困於誅求均不爲無咎疏入李降三級劉免官
公遂至鄂鄂自輪船入長江人咸以爲便公曰江海自茲失其險商賈
自茲失其利南方舟楫北方車馬自茲失其用吾未見其爲益也吾自
中州來見小民無食之苦利民之事莫大於積穀方議行旋調湖南巡

撫去湖南自曾文正公興義兵夷大難其民習戰事喜金革不畏法其地山川叢雜奸宄易潛匿公甫至所屬永綏益陽及岳州府均有竊發者悉擊平之然兵餉實奇絀而水患又洊至是歲西水大盛汎濫於上游潰常德府老隄亟籌巨貲修築之幸是冬少雨工作不輟次年春隄成內患平外患又作自西洋人入中國所至無與梗獨湘人力阻之竟不得入城西人恥焉有計約翰者熒舟城外挾刃而登湘人大鬪圍之者無慮數萬人公曰是又雲南殺馬加里之故事矣命散其眾驅計約翰出逾年計約翰又至長沙堅請入城公命府縣至其船警諭之乃已公遇事不務張大而務持大體有辰州守請開礦公不可又有請於瀏陽醴陵開采銅鉛者公曰開礦一事最爲弊政鑿山川之氣脈聚無業之游民貪絲豪之利而貽無窮之憂甚勿取也嗚呼所見遠矣公之撫湘猶撫秦也乃撫秦無閒言而撫湘則言者甚眾

上命總督李公瀚章案之皆無實而言者猶以提督羅大春違制妄奏及候補道李鎬旣丁憂仍從事齟局爲公罪然提督例得言事不先咨督撫督撫不知也李鎬由兩江總督劄委湘撫固不與聞

朝廷知公實無咎乃內用公爲禮部左侍郎至則

召見於養心殿詢楚事甚詳

命至內閣看羣臣言俄羅斯事諸章奏又

命至總理衙門會議蓋

眷注固未衰也明年以協濟陝甘軍餉功

賜一品冠服調吏部左侍郎兼署戶部工部右侍郎管錢法堂事公舊勞於外精力久衰七年冬始感疾八年春請開缺不許凡侍郎謝病慰留者甚鮮公感

知遇厚不敢復言去其年戶部雲南司報銷事起農曹被逮者十餘輩波及堂上官公謂其子曰人無欲則剛吾歷官中外無一介妄取不然吾此時能安枕乎汝曹識之九年夏偶觸熱發宿疾五月甲辰猶力疾入內至六月辛亥自知不起草遺疏并言時政數事明日遺疏聞有持躬勤慎之

諭賜祭葬如例公卒年六十七娶嚴氏故河道總督嚴公烜次女也

封一品夫人生子二松年光緒九年進士翰林院庶吉士椿年二品廕生刑部主事女子二刑部郎中顧紹鈞翰林院編修丁立鈞其壻也孫六福昇福瀛福湘福仁福燧福新孫女一十年十二月葬公於虞山北

麓新阡銘曰

公視學於皖皖人曰嘻我公桓桓宜總師干公視學於閩閩人曰嘻我公勤勤宜撫我民公以詞臣出使而眾望若此宜其撫秦撫鄂撫湘勳業爛然有光青史

天子曰來爾歸京師典禮爾咨黜陟爾司公以病告
温言畱之

帝眷無斃臣力奚惜如何不淑一朝易簀我作銘詞勒之石千百年後尚識公之幽宅

誥授光祿大夫建威將軍內閣學士前戶部尚書軍機大臣顏札公神

道碑銘 李慈銘

光緒十有一年八月甲寅內閣學士顏札公卒於位維公早歷臚仕中躋於外逮晚大用終始一節而以際時艱錯政柄不恆朝論是非牽連去位至歿而

卹典不及天下惜之然識與不識無不稱公爲長者恭繹甲申三月

慈禧皇太后懿旨謂祇能循分供職經濟非其所長蓋公之純固一心久孚

堂陸之閒更歷時歲必復枋用而惜公之遽去也公諱景廉字儉卿一字季泉顏札氏正黃旗滿洲人世爲吉林鉅族五世祖諱喀爾吉善前鋒統領雍正中以副將軍出師西藏凱旋授內大臣曾祖諱長生官頭等侍衛妣尼嗎察氏祖諱和英額官頭等侍衛妣舒穆魯氏考諱彥德乾隆癸卯科舉人官綏遠城將軍妣瓜爾佳氏側室任氏三世皆以公贈光祿大夫妣皆一品夫人公任太夫人出也於兄弟行爲季幼沈敏好讀書天性純孝年十四遭任太夫人憂閒一歲復遭外艱哀毀骨立弱冠補諸生道光己酉選拔貢生第一是秋中副榜咸豐元年舉於鄉二年成進士改庶吉士三年授編修遷侍講充

文淵閣校理四年充

日講起居注官晉侍講學士充

文淵閣直閣事五年四月擢內閣學士兼禮部侍郎銜由庶常不三年至卿貳前此未有也旋充福建鄉試正考官六年充會試覆試

殿試

朝考及散館等讀卷閱卷大臣授鑲白旗蒙古副都統七年正月授工部右侍郎兼管錢法堂事務十一月

賜奠朝鮮嚴絕苞苴東國稱頌八年三月復

命適英夷至天津故輔耆英以侍郎銜命往

文宗召見公問某能任事否對曰其人怯懦恐辱國

天顏不懌已而果然

文宗益眷公有大用意而時枋國者側目矣六月調鑲紅旗滿洲副都

統八月充順天鄉試監臨九月科場事發忌者欲因是中公以失察議

降調

文宗察其誣改留九年二月調刑部右侍郎三月署吏部左侍郎十月

出爲伊犁參贊大臣

文宗召諭公曰汝年尙壯須歷練邊疆重寄非左遷也公感激流涕誓

以死報十年四月抵任凡奏疏皆自屬草旋命鞫前塔爾巴哈臺參贊

大臣濫保異姓台吉冒襲哈薩克汗獄十一年八月鞫阿克蘇辦事大

臣改征回賦私設鹽課獄十一月鞫葉爾羌參贊大臣苛斂擅殺獄所

至皆得情無縱濫者同治元年七月調葉爾羌參贊大臣葉爾羌者南

北八城之轄轄也漢回雜處餘孽潛伏時西事萌芽反側螫動俄人眈

眈哈薩克布魯特諸部多貳於俄安集延部屢出蠢擾公籌饒治軍持

以鎮靜時

朝廷方倚重公公於中外交涉事屢密疏以聞二年十二月以舊疾發乞休同官中以事遂落職發甯夏軍營自效四年十月故安徽巡撫翁文勤公卒於花馬池軍中公代領其眾屢有戰功五年十月授頭等侍衛爲哈密幫辦大臣時甘涼道阻六年冬始募勇得千餘人騎不滿百持二十日糧餒隘西進七年正月抵玉門時則有黃花營之捷安西州三道溝之捷公以哈密巴里坤皆孤懸不可守請暫駐後路扼肅逆之衝得

旨報可閏月抵安西時則有四五道溝清水泉之捷雙城堡之捷羅家莊之捷三水梁之捷大山口之捷白家莊之捷十月移鎮敦煌益布置設張逆不得逞八年八月抵哈密時漢城殘破築壘於蔡把什湖與辦事大臣文麟公連營相倚角時烏魯木齊回逆安得璘率吐魯番和卓瑪納斯漢回等萬八千餘人東犯至沙棗泉潛約哈密回王邁哈默特爲內應王素愚駭其母福晉邁里巴鈕以賊書呈官軍誓眾力守公遣使獎勞助以兵而與文麟公分飭所部逆勦賊指授方略前後夾擊凡大捷三小捷五連戰六晝夜斃賊千七百餘人奪獲器械牲畜不可數

計賊始竄遯事聞得

旨嘉獎十年八月

密詔以俄人已得伊犁將圖烏魯木齊

命公亟往規復公卽率所部度天山駐巴里坤十二月授烏魯木齊都
統十二年四月進駐古城七月陝回白燕虎率眾萬餘圍哈密破回城
分黨擾巴里坤安集延酋怕夏率漢回撲沙山子以應之公以一軍搗
拄其間日飲酒習射故示閑暇而分遣部將往援兩城先破賊於沙棗
園解沙山子之圍復大戰於哈密之泥基頭殺賊千餘遂復回城白逆
遠遜於是哈密巴里坤復完論者謂是役也新疆治亂大局系焉未幾
復破白逆於三道廠十三年二月復破之於西泉六月復破之於濟木
薩又大破之於柳樹河禽斬無算八月授

欽差大臣督辦新疆軍務公規畫全局將大有所設施而爲忌者所尼
光緒元年五月授正白旗漢軍都統

召還京九月入

覲授都察院左都御史

賜紫禁城騎馬二年二月署工部尙書三月

命在軍機大臣上學習行走四月充會試覆試閱卷大臣五月充教習
庶吉士七月充崇文門副監督十月充總理各國事務大臣三年正月
授軍機大臣擢工部尚書四年二月調戶部尚書十二月充

國史館正總裁六年三月充會試正考官八年十二月充
經筵講官九年六月以失察戶部司員雲南報銷事降二級調用仍留
軍機大臣總理各國事務大臣七月補內閣學士九月遷吏部左侍郎
十一月授兵部尚書十年三月復降二級調用十一年四月補內閣學
士八月署鑲藍旗蒙古副都統綜公一生出入敷歷外總師干內握政
本恩榮光顯受

三朝之知遇不可謂不深而柴立無黨屢起屢蹶其翕訛之口固不足
論卽知公者亦以爲忠厚慎密應變將略非其所長故以左文襄公之
知人其始亦推爲西北諸帥中第一而終以書生少之然當公之初抵
伊犁也故事哈薩克貿易事訖卽出境後以貨帶鬻許畱兩三人於西
門外支廬樹柵守以度歲後漸築室易柵而垣公至時已列屋三百餘
間周二里許矣公謂患在肘腋發將不可制議毀之將軍札拉芬泰公
執不可未幾札公卒公攝將軍乃疏言利害請以便宜先事蹋平或恍

續碑傳卷十三
以勢迫恐激變公不爲動又請俟

旨公曰

聖明在上無不允者卒毀之

命下如所請其在葉爾羌也嚴禁防軍之以錢貸回民而重取其息故去之日回民男婦數千哭於瑪札爾之廟其在樞廷也戊寅冬停捐納例公竭力贊成或曰能保後之不復開乎公曰名器濫則廉恥消雖一日之停庸愈於已庚辰冬文恪公全慶正揆席

皇太后意以協揆屬公公以文恭公靈桂名位在前力讓之新疆旣定將軍忠介公金順上公昔年戰守功公謂邊帥推功樞臣恐開迎合之漸請勿許壬午以後言事者蠶起以詆訐大臣爲切直同列或不平公曰政府如射之有的吉者期中的耳何憾於我且居政柄而言者無忌國家之福也此輩年少氣盛不知擇言奚足校嗚呼卽此犖犖數大端公之嚴正仁恕務持大體雖古名臣亦何以加焉慈銘以庚辰會試出公門下六稔之中惟一進見而公心知其賢在戶部時陝西司員主藁缺出公欲以相屬有同列爭之公笑曰是非以此爲得失也遂別授人是可謂愛人以德者矣公生於道光癸未六月二十五日享年六十有

三配宗室夫人齊齊哈爾副都統署黑龍江將軍諱玉英女子四人長治麟光緒丁丑科翰林國子監司業次雙格殤均宗室夫人出次樹格殤側室張孺人出次兆麟尙幼側室王孺人出三女皆不育治麟以十二年十一月二十七日卜葬公於西直門外經廠莊之邊持公行狀屬文神道之碑慈銘竊惟碑志之例辭尙簡重偏裨戰績不宜著之帥臣所以備書之者欲見公之與西事相終始而天山南北回夷之向背形險之得失亦略具於此俾後有攷焉系之銘曰

公遇

文宗四載隆隆將以大庸赤舌中梃畀以西極是撫是塞溫宿讞絲鼎湖上超攀弓而號息夷環覩花門羣獠戈壁以沸公秉戎旃炊矛寢鋌出入廿年橫流漸平謂公厭兵

召還

帝京遂陟八坐幹樞執舵以息水火鎮靜不驚地官受成養福不名匪鼎覆餗大白若辱盛兮衰伏臣力已殫願國以安形去神完營葬都邑高原是式利禩千億

桑春榮傳

順天府志

桑春榮字柏儕宛平人祖籍浙江山陰父錦堂爲河南睢州吏目有隱德宦歸傾貲贍族黨負償者輒燔其券貧如故游京師家焉春榮道光二年舉人十二年進士改翰林院庶吉士十三年散館授編修二十二年補河南道監察御史掌四川道監察御史

簡放雲南臨安府知府丙午丁未閒值漢回互釁時林文忠則徐方總督雲貴所在虛衷諮度鎮撫得宜事平調補雲南府尋以卓異擢池南道咸豐元年兼署鹽法道督辦官錢局靡廢不舉商民便之三年授貴州按察使四年遷雲南布政使綜稽吏事黜陟以公次年升巡撫兼署雲貴總督督辦雲南軍務時滇匪猖獗羽檄交馳寢以援絕餉窮賊氛近逼省垣十閱月春榮從容坐鎮以忠義激士卒誓勿去人心益固卒全其城自以曠日墮功貽誤全局陳劾奉

旨來京候簡九年補內閣學士兼禮部侍郎銜十月督辦順天直隸團練所至撫慰百姓令兵弁不得居城邑民以安堵畿輔軍聲益振事定還

朝同治元年署兵部右侍郎五年授刑部右侍郎
賜紫禁城騎馬十年兼署戶部左侍郎十一年升都察院左都御史旋

擢刑部尙書十二年充

經筵講官先是辛丑會試充同考官至同治四年暨光緒二年兩充會試副考官得人稱盛光緒五年以老病乞休

許之春榮長刑部十餘年案牘繁重手自勘定日昃不遑越大寒暑必單車入署無少間平反大獄務持情法之平不動聲色綱紀秩然老吏毋敢欺年踰耆耄強識靡遺援引律例言之鑿鑿同官皆翕服凡所矜恤獄囚冬衣夏藥悉捐俸倡之嘗誦歐陽求其生不得之語以誠僚屬謂獄者天下之大命不得其平中已負疚何以董理庶獄故遇事持大體不爲赫赫名亦不說眾同異每奉派查辦事務力求實際懲罰法如於雲南謝煥章覆試復其舉人亦一事也八年壬午重赴鹿鳴宴賞加太子少保銜是科孫奮亦中式藝林榮之其年十一月卒遺疏入

上震悼

賜祭葬諡曰文恪生平公廉自矢常推己以利物任雲南府時倉庾久虛歲捐廉萬金實之或曰何不積帑弗顧它日總制雲貴會運道絕發倉食士卒穀將盡而餉至矣人服其先見權鹽法道時本任道督兵赴黔計一年之久凡道署所入悉歸其家上官諭止之則云彼出以公例

不得取耳督辦團防暨諸差務與馬所資皆自備不取諸有司奉身澹泊迄老無一嗜欲公暇惟覽書史自娛而已身後無長物門庭肅然子孫恂恂若寒素京師言家法者必歸之子三長燿刑部員外郎次彬分省補用知府炳兵部主事燿炳先卒孫安廕通判鶴舉人案縣學生賞主事寶員外郎

賞郎中

刑部左侍郎袁文誠公神道碑

吳汝綸

公姓袁氏諱保恆字小午河南項城縣人咸豐初廣西盜洪秀全等反天子詔各行省在籍大臣治團練其在朝者遣歸其鄉於時團練紛起於湖南則曾文正公於安徽則呂文節公及今大學士合肥李公父子於河南則袁端敏公爲最著云公端敏公冢子也道光庚戌進士改翰林院庶吉士咸豐二年授編修三年謁假歸覲端敏公請留公助治軍天子許之是後端敏公三奉詔督師公一隨軍軍中呼爲少帥當是時南則粵盜北則羣捻二寇蔓延交通鉤聯根據端敏公提一旅飢軍浮淮潁搗拄賊閭不摧不折十有餘年中外恃賴公與有勞焉端敏公不使子弟與將士分功有功

輒寢不奏七年

欽差大臣勝保始論列公穎毫間戰狀

天子嘉之加侍講銜花翎後會諸軍破賊於太和河南巡撫恆福上其功

賞伊勒圖巴圖魯會端敏公奏事至

手詔批答曰汝子奮勇衝鋒可嘉也九年端敏公奉

召還公隨入充

文淵閣校理順天鄉試同考官未幾端敏公再出視師仍命公赴軍入

對
溫語移晷十年六月會攻定遠幫辦軍務穆騰阿移書端敏論公功端

敏持不可疏言臣世受

國恩死無以報臣子不敢與諸將爭爵賞

優詔褒美且誠曰後有功績無引嫌端敏公卒堅持初節不變故公在

端敏軍中功最多終不得論十一年會克鳳陽定遠有

旨遇缺題奏則

文宗特簡也同治元年擢翰林院侍講轉侍讀遷詹事府右春坊右庶

子其秋端敏公謝病

詔公留撫其眾丁繼母憂歸而端敏公復起視師又

詔公佐軍逾年端敏公薨擢公侍講學士是時淮上已平兵事粗定公雖在憂感

上恩知急自效上疏言八事其一爲屯田久之不報其明年復抗言臣前所條淮南北募民屯墾議未卽行請詣京師與廷臣面論事可否

詔責公過自信又坐擅發駟遞左遷鴻臚寺少卿公侍端敏公在軍久積功勞寢爲

上知忠悃勃鬱思得當以報

君國而戶部尙書羅惇衍順天府尹蔣琦齡又先後薦公才可大用會羣搶張總愚竄畿輔公以端敏公治軍久志事未竟今皖豫諸將多先

臣舊部請赴軍自效

詔赴合肥李公軍李公以爲行營翼長盡護諸將諸將或淮或皖豫咸與公安驩寇平

詔嘉公克成端敏未竟志還公侍講學士加三品銜又以公志在治軍自效

命赴左文襄公軍文襄優禮而斬之權

朝廷知公可倚

命筦西征糧餉得專奏事十一年擢少詹事轉詹事

賞頭品頂戴十三年升內閣學士兼禮部侍郎銜大軍出關

詔公襄左公轉餉遷戶部左侍郎兼筦三庫事務稍重其權以與左公

議異光緒元年

召公入公自少隨端敏公治軍端敏薨先後佐李公左公不離軍旅廿

餘年至是始謝兵事

朝廷且大用公

命兼署吏部右侍郎二年調刑部左侍郎充順天武鄉試正考官公性

疏朗好持議議皆國之大事在官必舉職官戶部時欲仿古人國計簿

月一冊使出入相準絕奸欺未成移刑部在刑部日與曹司治律獄必

再三反是時中外多言臺灣海門戶當以時經畫絕外國覬覦公建議

設臺灣巡撫專責成而省福建巡撫官併其任於總督

廷議從之宅所言多遠慮類如此於是河南旱饑

詔公往振時公私耗竭公所以籌策之百端事垂竣而公遽卒光緒四

年四月六日也遺疏入

優詔矜卹

賜祭葬予諡文誠卒後五月河南巡撫疏言去年災故刑部左侍郎袁某麓衣糲食旦夕憂勞拊循饑民雜處吏胥閒其乞貸各行省書讀者淚下卒之日饑民婦孺皆痛哭失聲請河南省城建專祠其陳州則附祀端敏公祠

詔從之已而安徽江蘇所在請附祀端敏祠子世勛用廕補戶部員外郎初端敏公與曾文正交善其治軍聲勢相倚曾公以故人子視公汝綸嘗見公於曾文正坐中聽其論議颺發瀾翻甚可偉也曾公殂謝左文襄公合肥李相公並負天下重望公於左公不爲苟同於李親善矣至持議亦不盡合而

朝廷卒嚮用公者以公忠誠有以孚格上下也公始隨端敏公積苦兵閒後慟父功不成輒欲以兵事自效周旋李左軍中卒未一信其所志而勞勤於振災以死死時春秋五十有三曾不登於中壽悲夫端敏公諱甲三自端敏已上三世皆以端敏公貴

贈漕運總督公前後二母皆陳氏娶王氏皆一品夫人側室楊氏以子

世勛貴

贈淑人女二人皆適士族孫三人克紹克益克忠光緒六年七月葬公陳州城南之袁氏新阡廿三年三月王夫人祔又二年公從兄之子慰庭侍郎巡撫山東謂汝綸曰公墓碑未有刻子無用辭乃爲銘曰抑抑端敏以子隨軍子父蹈危而功不論光光文誠用忠爲孝平進九列而志未效才之不究壽亦豈多垂成天阨況人謂何維後之昌維宗之強世其孝忠以永不亡

戶部左侍郎孫公墓志銘

譚廷獻

朝廷臨御大臣進退以禮爲大臣者進盡忠退補過以督責羣下故偶蒙薄譴惟以不慎而未默引咎必無幾微悻悻之色古所謂精白一心者侍郎孫公以之公諱詒經字子授浙江錢唐人曾祖廷桓祖嘉謹力田孝悌父人鳳潛德有文矜式於鄉里至公承祚昌顯稽古榮遇達尊在卿貳迹其生平竺厚得之家學淬厲經教以湛敏整肅匡國載績炳如也咸豐乙卯舉人庚申進士翰林假旋奉親避地甬上乃激厲義眾攻克甯波紹興二府城仁者之勇督師左文襄公馳章入告以功甄敘公時已散館授編修矣而公學殖優重館師倭文端公薦舉

遂直

南齋先後歷二十年自國子監司業依流進擢至長戶部中間典陝甘福建順天鄉試督福建順天學政推賢進士尤素所蓄積也光緒十年奉

命毓慶宮行走古保傅之任也公在官建白犖犖大者中與大本請懋聖學勤經惟有疏鄉試鉅典請杜弊端有疏西學蔓衍易炫奪經史大業請止正途同文館學習有疏其請廣言路停園工鑿北塘之變念外人要挾能戰然後能和請調勁旅防東路並辦津永民團二疏尤舉朝所難言佗所條列多以樸誠啟牖答

知遇比筦戶政益深念利弊廣用耳目吏莫能蔽然積重歷年所山東河工領帑事起公廉得婪賂主名謂非發獲所入金錢積猾且自脫有辭乃先召主名誘令呈獻俾閱實靡遞遷延數日言官章先上公自陳委曲洎理官鞫吏卒以無據脫其辜公苦心卒隱議處罰奉同日並罷入直公謝過引愆客有謂公且引退者公以當官職業殿最所時有九列近臣無懟於吏議專心部政杜口不道前事在戶部遂十載於設銀行開鐵路斷斷持異議違時論或合辭或獨疏期無負於官無負於學

云爾光緒十有六年公年六十五歲十一月朔六日卒官公娶沈

封夫人能詩無子前卒繼娶朱

封夫人古之賢明婦人也孝於尊章公赴禮部試賊犯杭州夫人侍翁
出走覲賊將加刃夫人蔽贈公前竟被二創居恆承祭忠敬侍公謹數
十年如一日不以褕翟自逸勤儉先家人先公二年卒於邸第生一子
二品蔭生寶琦次子太常寺典簿寶瑄側室富生公卒之明年寶琦兄
弟奉喪歸葬合窆錢唐西鄉張家園沈夫人前丁卯年祔葬姜家塢先
隴公弟詒紳今江蘇府同知獻以井里素交游於伯仲間垂卅餘年遺
孤不鄙以志墓之文請習公成績於義宜銘辭曰
橋俛梓印學名其家古訓名理抱瑜抉瑕曰升于
朝交衢御車載都載嘒斐用吁嗟檄斯弦斯弓理亡邪
王路夷止夙夜華止饗矣攘詢忱恂奢止景厥忱恂全歸允嘉歸藏在
斯式墓踣躅

續碑傳集卷十三

續碑傳集卷十四

江陰繆荃孫纂錄

光緒朝部院大臣

彭剛直公神道碑文

俞樾

光緒十有六年三月乙亥前兵部尙書太子少保衡陽彭公薨於里第

四月壬寅遺疏聞
天子震悼以公忠清亮直卓著勳勞

贈太子太保銜

加恩予諡立功所在許建專祠擢其孫候選員外郎見紳爲郎中見綬
見粹均由吏部引

見已而內閣擬諡以請

御筆用剛直二字

賜祭葬皆如律令蓋

朝廷眷公之厚知公之深如此而海內自搢紳之徒下至兒童走卒無
不咨嗟而涕洟曰噫彭公逝矣其年十二月庚子見紳等奉公之喪葬
於樟寺山乞文以文其墓道之碑余惟公名滿天下而不自表襮詩文

年譜無手定者傳之後世懼失其實余與公交好二十餘年重之以昏
姻雖極知不任又何敢以辭公諱玉麟字雪琴彭氏其先江西太和縣
人明洪熙時有顯明者官於衡因家焉遂爲湖南衡陽縣人所居曰查
江曾祖才昱祖啟象父鳴九安徽懷甯縣三橋巡檢遷合肥縣梁園巡
檢皖中稱循吏母王氏浙江山陰儒家女賢明有識鑒嘉慶二十一年
公生於梁園巡檢司署十六歲從父還查江舊居父卒爲族人所甚母
命出避禍公因入城居石鼓書院然無以自給投協標充書識支月餉
視馬兵時衡州知府高公人鑑善相士見公奇之使入署讀書衡陽一
邑應童試者千人入學不易是歲縣試羣擬公必第一案發乃第三越
數日召入見曰以文論汝宜第一今乃太守意也太守曰彭某異日名
位未可量然在吾署中讀書若縣試第一入必謂明府推屋烏之愛耳
是其終身之玷矣公聞而深感之是歲竟不入學又二年始隸諸生之
籍云道光末新甯民李沆發反發協標兵捕討公從大軍戰金峰嶺禽
李沆發上功總督誤以爲武生也拔補臨武營外委賞藍翎公辭歸衡
有富人啟質庫於耒陽請公往董理之歲入數百金悉以賙人之急其
時粵賊由永安北犯將掠耒陽以趨衡公入見耒令問計將安出令曰

吾請兵請餉無一應可奈何公曰患無兵耶城中百姓皆兵也患無餉耶吾質庫中尙有錢數百萬在末令曰然則竟以屬君矣出縣印授之公卽募勇數百人多製旗幟使巡行雉堞閒賊知未有備由甯鄉趨長沙而未與衡皆獲全公以無戰事不敘功但請償還所假質庫錢然公亦自此知名曾文正以侍郎治兵衡湘廣求奇士常君儀安薦公有膽略可用文正弟靖毅公國葆又言公與楊載福並英毅非常文正亦雅知公未陽之事及立湘軍水師以公與楊公分統焉咸豐四年二月水陸軍俱發衡州不利引還而公以孤軍留西湖中曾文正涕泣謂必死竟全師而還乃益重公文正議悉水師之眾先攻湘潭公請先行望湘岸連檣皆賊舟然多輜重少戰艦公計士卒爭利必亂乃以三營攻其首尾自攻其中縱火同時燒之賊死無算城中賊皆走公還大軍恂恂如未嘗戰輜重一無所取敘功以知縣

賜藍翎公固辭不獲然公牘猶自署衡陽學附生其後

詔補金華府知府乃始署官云其年秋公與楊公旁湘東下公從君山楊公從雷公湖張兩翼先以小舟誘賊賊舟出抄其後燒百餘舟賊退保雷鼓臺攻之不克公與楊公乘三版船衝入賊中公中鎗子傷指血

濱襟袖皆赤進益猛燒其坐船賊遂潰退軍中憎服號爲彭楊時羅公澤南等所統陸軍連戰皆捷遂至沌口謀攻武昌公曰是宜渡江先燒其屯自塘角至青山賊礮環列丸發如雨諸將皆露立三版櫂船徐進無俯首避礮者賊大驚於是沿江賊悉潰漢口漢陽皆復陸師不血刃復兩名城一巨鎮水師之力爲多羣寇乃聚於田鎮依半壁山夾江爲五屯連舟斷江纜以鐵索大鎖布木爲筏置大礮焉又護以礮船望之噉然水師下攻之則爲蘄州江岸之賊所撓公麾師船掠蘄直下分水軍爲四隊頭隊悉令具鑪輔椎斧之屬哨官孫昌凱故鐵工也方鼓橐吹埵有小船視筏下劣容舫試入之竟度二船呼曰鐵鎖開矣賊愕亦呼驚走墮水擲炬燒筏筏舟俱燼山下賊亦顛越坑谷屍相藉此一役也湘軍水師名聞天下公與楊公旋至武穴養傷而別將蕭捷三率水師由湖口駛入姑塘爲所扼不得出公乃於新塘鎮設廠造船別立新軍而水師始有內湖外江之分矣五年湖北巡撫胡公林翼攻武昌賊閉城不出水軍無所事自沙口還沌口道經武昌漢陽寇礮雷鳴萬聲同發公所乘船桅折船覆公隊於水或以三版船拯之力挽不起則水中抱持公足者舟人呼曰速釋手此統領也公在水中鬪然曰此時

豈顧統領耶已而並出水中則抱足者卽本船司舵者也公笑罵曰若知是爾我提擲數丈外矣公當生死之際猶從容談笑如此曾文正自江西召公自助公時適在衡將趣南昌而袁瑞並陷道不通公易衣操皖音僞爲賈客摩寇壘而行徑達南昌巡撫以下皆大驚湘軍聞之氣勢十倍六年正月公破賊樟樹鎮又破臨江賊壘三月營於吳城鎮以遏賊鋒又會黃虎臣之師克建昌縣轉戰吉袁臨瑞建南饒廣閒無虛日七年以惠潮嘉道協理水師曾文正疏言公任事勇敢勵志清苦有國士風堪勝總統水師之任而公在江西餉不時得乞火藥亦不與曾文正每歎曰吾負雪琴旣而湖北陸軍再克武漢水陸俱下圍九江攻湖口賊扼石鐘山遏內湖之軍不使得合於外江公率全軍分三隊出戰賊於石鐘山置巨礮適當我船之衝傷十餘船矣或諫公曰今驅士卒與飛火爭命徒死無益公泣曰不度此險終無生理今日我死日也義不令將士獨死鼓棹赴之賊礮裂礮者斃我舟遂銜尾直下俄頃之間與外江合歡聲如雷陸軍應之進奪小姑山復彭澤連破樅陽大通銅陵峽口寇壘而還遂攻克九江府城十年賊復圍湖口公赴援舍舟登陸雨立數日夜力戰卻之十一年授廣東按察使時文正弟忠襄公

國荃攻圍安慶賊陳玉成率悍賊三萬來援營於菱湖公創立飛划營
擡划船入湖合陸軍大戰毀其壘遂克安慶是爲肅清東南之始俄授
公安徽巡撫公上疏三辭於是改公提督又以武職望輕改以兵部侍
郎候補旋補右侍郎賊自據金陵以蕪湖爲屏障以東西梁山爲關鍵
同治元年公與曾忠襄水陸會攻銅城閘水師攻其東石壘陸軍攻其
西土壘破之於是收復巢縣含山和州三城又襲破雍家鎮王溪口諸
要隘而克西梁山又由鮎魚嘴進次采石磯時忠襄之師已由西梁山
南渡偏金柱關而營公分水軍爲三一隊守險一隊衝入內河一隊輦
礮登岸環城而轟之夜半射火箭焚其西門輾樓賊從火燄中逸出積
骸滿渠遂復金柱關而東梁山亦一鼓而下東西梁山旣復蕪湖賊孤
循江而進復蕪湖而忠襄之師已進攻秣陵關公率水軍由烈山赴之
會陸軍拔頭關進攻江心洲有二石壘屹若堅城公選壯士登岸蛇
行蘆葦間偏壘縱火焱焱燭天洲遂破又破蒲包洲進泊金陵之護城
河口而忠襄之師遂進而營於雨花臺以規復金陵二年五月攻復江
浦浦口兩城乃議攻九洲洲九洲在驚湍急浪中賊築壘數十列舟
環之爲金陵犄角又有攔江磯草鞋峽七里洲燕子磯中關下關諸隘

相倚以爲固前督師向公和公皆以攻洲不克故無成功公議先破其南岸諸隘命丁泗濱等循南岸而下預以枯荻灌油焚其舟乘勢薄其壘猱而升草鞋峽燕子磯下關諸隘悉平次日昧爽兩岸並舉人皆死戰賊在中關者竟不爲動自朝至暮公令夜戰且曰洲不破不收隊矣是夜選精隊四十人人持短兵懷火蛋令巴里坤總兵成發翔率之登岸於黑霧中潛燒賊壘諸將蛾附而上前者殪後者繼踐屍復登乙夜大破九洲洲羣醜聚殲無一脫者最公生平田家鎮之戰石鐘山之戰九洲洲之戰皆肉薄血戰所謂勞苦功高洵不虛矣是年八月解青陽之圍十月收復高瀆甯國建平溧水諸郡縣奪還水陽新河莊東壩要隘東壩旣復駐重兵焉而金陵僞都糧道始斷

詔并論前九洲功

賜黃馬褂三年江甯復大功成

賞一等輕車都尉世職加太子少保銜四年

命署漕運總督再疏辭言臣本寒儒傭書養母咸豐三年丁母憂曾國藩謬采虛聲強令入營初見卽自誓不求保舉不受官職十餘年來自知府至巡撫由提督改侍郎並未嘗一日居位歷任廉俸及軍營例支

官品銀從未具領分毫

恩雖實授官猶虛寄若責臣以必赴惟有負罪而再辭

上鑒其誠從之乃與曾文正奏定長江水師之制自荆岳二州至崇明縣五千餘里設提督一員總兵五員以六標分汛營哨官七百九十八員兵萬二千人月餉及雜費銀皆取給長江釐稅不煩戶部公在軍垂二十年初時軍餉奇絀公商於鹽政捆鹽自賣以供一軍之餉至是軍餉有額支實款公以所領鹽票犒諸將領之有功者而歷年餘存鹽銀無慮六十萬咨明兩湖兩江督撫發南北兩鹽道生息存爲長江水師公費且以備外患一無所私公疏言臣以寒士來願以寒士歸又言士大夫出處進退關繫風俗之盛衰臣墨經從戎志在滅賊賊已滅而不歸近於貪位長江既設提鎮責有攸司臣猶在軍近於戀權改易初心貪戀權位則前此辭官疑於作僞三年之制賢愚所同軍志已終仍不補行終制涉於忘親四者有一焉皆足以傷敗風俗天下之亂不徒在盜賊而在士大夫進無禮退無義臣豈敢稍犯不韙以傷朝廷之雅化古來臣子往往始有建豎末路隕越由精氣竭也臣每歎其人不能善藏其短又當日朝廷不能善全其長知進而不知退聖人

深戒之乞開臣兵部侍郎本缺回籍終制疏入

報可旋命公滿百日卽出公既歸以查江舊居久圯卜郡城東岸作小樓自居是日退省庵時往母墓及查江家廟布衣青鞋不設輿衛補制滿竟不出種樹灌園有終焉之意而自公之歸長江水師規制浸弛以侈靡相尙篙舵工有不能操舟者眾論至謂水師無益可廢十一年曾文正薨

詔復起公視師公一出劾罷營哨官八十餘人於是長江水師又大振公入覲

命署兵部右侍郎

賜紫禁城騎馬

大婚充宮門彈壓大臣

恩命稠疊卿貳清閒或謂公可無辭矣公始終一轍再疏力辭始許公南歸仍

命每年巡閱長江得專摺奏事應需公費由兩江湖廣各總督籌備公乃奏定巡閱長江章程一歲自上游本籍衡州出巡至江浙度歲一歲自下游江浙出巡至衡州度歲於浙江西湖築室三楹亦名退省庵爲

下游事竣休息之所而經費卽取給前存鹽道生息之款歲支銀四五千兩其兩江兩湖籌撥銀一萬兩皆奏罷之自是歲以爲常輕舟小牒往來儻忽不獨將佐畏之如神卽地方有司亦望風震懾而民間諸不軌之徒作姦犯科愍不畏法者輒相驚曰彭宮保來騃瞿奔觸伏不敢出台州賊黃金滿束手來歸威聲震動數千里他帥莫與比也

朝廷知公廉直凡有大事輒以屬公如兩江總督左公宗棠劉公坤一湖廣總督涂公宗瀛兩廣總督張公樹聲皆

朝廷倚重大臣而一經言官劾奏皆

命公察覈公平心論斷務得其實眾論韙之時

朝廷以洋務爲重巡江之外又命出海會操各省兵輪船公則以清吏治嚴軍政端士習蘇民困爲自強要策製船造器皆爲末務七年

詔公署兩江總督辭八年京察一等九年補兵部尙書辭不允其後京察又列一等以旣開缺之侍郎未任事之尙書而三載考績與焉異數也法越戰事起

朝議以廣東海防尤要

詔公酌帶舊部速往廣東適有疏乞養病至是力疾請行調湘軍四千

由海道往自由衡州單騎入粵審度形勢以虎門爲第一重門戶由虎門而進至常州爲省城第二重門戶自此而進左則漁山珠山是爲北路右則海心岡大黃滘是爲南路公無事駐大黃滘有警駐虎門省城官吏爲公治行館不居也支帳爲棚蔽以蕉葉風雨沾濡暑日蒸炙與士卒共之維時省中議者以虎門遼闊難守不如退守黃埔公親往履行見虎門以外卽零丁洋大海浩瀚無涯而屈曲清流實止一綫無論帆船輪船必循此綫而進進則必經由沙角山下公發健兒鑿穿山石以爲礮洞兵隱其中敵不得見十三年冬民間爭傳夷人將以明年正月犯粵公自駐山上令暮夜不得有一舟入口至除夕有舟入焉發礮擊之帆桅俱斷於是遐邇咸知所守實扼險要狡敵寢謀粵境安堵虎門以外尙有橫門厓門及虎跳磨刀諸門可繞至省城之右公編查沙戶漁船數千艘分守支河汊港而瓊州者近接越南尤夷所必爭初擬自往士民籲留乃令道員王之春往議者徒謂公以平素威名懾服夷人而不知規畫周詳有如此也和議將成公抗疏力爭謂有五不可和法夷無端生釁不加懲創遽與議和不可者一法夷未受懲創而請款是必中藏詭譎不可者二法夷不索兵費但求越南通商恐將必有十

倍取償於後者不可者三以外疆中乾之法夷不問其罪降心就和諸夷必環向而起不可者四雲南物產富饒爲西人垂涎若與議款必許通商廣傳邪教以張羽翼一旦竊發將何以支不可者五又言有五可戰揣敵情而可成者一論將才而可戰者二察民情而可戰者三采公法而可戰者四卜天理而可戰者五然朝議意主柔遠不果用公又嘗密飭道員鄭官應親赴暹羅約令潛師襲法人占踞之西貢又欲率全部十四營由欽廉度十萬大山過五峒出越南收復北甯此二者或咎公之輕發不知當日實因諒山興化諸軍早經撤入關中故二策皆不可行非公策之不善也治軍之暇留心粵東利弊請豁攤捐以免賠累核釐捐以杜侵漁補署差委務宜公平著名劣幕概予驅逐皆於吏治有益及議和成軍務畢又陳善後事宜請海軍總統駐紮吳淞分設兩大鎮一駐南洋一駐北洋而練陸軍以輔之東三省宜創設兵輪購配鎗礮分置要隘以杜俄人窺伺臺灣宜練土勇簡任賢能專任其事皆深識遠慮所見者大公前在西湖得偏枯之病在粵三年感受瘴癘宿疾大發自粵北歸至不能飲食言語行步須四人扶掖連疏乞休皆慰留至十四年始

允開兵部尚書缺俟病痊仍巡閱長江如故而公病已不可爲矣公卒年七十有五娶鄒氏子永釗皆先卒有孫四人其第二孫曰見綏以後其弟玉麒故

詔書不及焉公性豪邁善飲喜讌客而自奉至薄不御肥甘旁無姬侍惟一老兵給事其旁遇部下舊將若布衣昆弟而紀律極嚴安徽有候補副將胡開泰召倡女飲使妻行酒妻不可殺其妻又有湖北忠義營營官副將譚祖綸誘劫其友妻用計殺其友治兩獄者相持未決公召至詰得實立麾出斬之軍中股弁性喜文士折節下之工畫梅海內傳者近萬餘本公歿未久卽有以二十金易一幅者能詩文下筆立就所爲奏疏皆自屬稿與人書亦不假手記室敷暢條達忠義之氣溢於楮墨間是以易名之典略其功業而獨表其性情

上之於公有特鑒矣敬本斯意而爲之銘銘曰
人之生直其爲氣剛剛則近仁直大以方明明

天子知公特詳錫此二字紀於太常公之故舊私議其旁情性似矣功業未彰豈知功業非公獨長卽在當時並稱彭楊至於性情日月爭光睥睨宇宙笑傲侯王直如矢筈剛若箭鏃同時元老令名孔臧曾曰文

正左曰文襄歷觀史策後先相望公曰剛直自古未嘗

皇朝諡法稽之舊章曰剛曰直莫克兼當惟

帝知公特筆褒揚傳千百世久而彌芳朝野共識婦豎不忘辟除魑魅

激發忠良剛直之澤永永無疆

誥授光祿大夫太子少保兵部尚書詳勇巴圖魯世襲一等輕車都尉

欽差巡視長江水師贈太子太保衡陽彭公年七十有五行狀王闓

公彭氏衡陽查江人諱玉麟字雪琴梁園君之長子也其先吉安太和

縣人當明洪熙時有顯明者字聲揚以進士官于衡譜云光祿大夫而

不詳其職位蓋指揮使晉文階故子孫世居查江何隆甸克守先業樸

謹有家法梁園君以善書充供事敘懷甯三橋巡檢大計卓異遷合肥

梁園鎮巡檢廉介明幹勤于緝捕合肥李瀚章巡撫湖南特為作傳推

為皖中循吏之最事具衡陽縣志公以嘉慶二十一年生于梁園鎮巡

檢司署岐嶷穎悟盼矐有威年十餘從父還查江有田百畝為親族所

乾沒反以供養責償所舉債故無所寄止僦屋以居父卒益困奪田者

患反覆則或虐其孤公母王氏山陰儒家女閉戶戒備一不與校公弟

玉麒甫數歲一日偶行田壟閒禾中有人突起擠之幾墮水俄聚無賴

登門叫呼反責數其不教於是族人共憤怒責奪田者歸其田十分之二及屋一椽令母子居之奪田者劫于公義而怨益甚日夜伺隙侵辱孤子王氏召兩子泣告曰此鄉不可居若等皆男子當遠出避禍努力自立成人而後相見公是時年十六讀書已通文義以母命遂入城居石鼓書院從諸老生問經義學詩習書諸生以其聰悟勤學稍稍異之因與游諸名家貴公孫子間縵袍敝冠介然自守辭氣清雅風采秀雋未嘗有飢寒之歎城中聞人欣然願交焉然書院課額少膏火銀超等者不足給日食初學孤生尙無緣得之乃投協標充書識例補馬兵得支月餉兼試書院月可得餘錢三四千迎母至城中母子復相守而弟已從賈客遠服賈久不聞消息貧薄單寒人所不堪母子怡然安之猶以爲出水火而履天衢也衡州知府高人鑑以鑒裁自許一日詣協鎮適公送文書稿未及收協鎮入內具衣冠知府視几下有文字取視之問何人所草對曰營書彭某也知府曰此字體奇秀當大貴且有功名卽召至客坐見之益大喜語之曰可時入吾署中遂執贄爲弟子知府親課之如嚴師繩摘疵謬不少假借然評語輒獎借每有他日柱石名臣之譽及當府試眾以爲必第一乃置第十越日縣令告之曰太守以

子名位未可量不欲其速化也學院試竟黜明年學使陳壇取附學生員賞其文目爲國士而公名李大聞于郡縣協將令爲子師卽臨桂麻維緒後以鄉舉官湖南知縣有才名者也道光末新甯愚民李沅發爲亡命獠民所脅稱亂破城步戕官大發兵捕討徵衡州協標公荷鎗徒步從行營中尊書識爲稿公協將見之呼曰彭公何不騎對曰方往殺賊安敢自逸協將悚然言于谷總兵軍中事往往詢之自新甯靖州越境至貴州廣西邊遇寇下溫敗之軍屯開泰奉檄至桂林軍府總兵以所乘馬借之遣二兵從道雨從兵病瘴不能行單騎度萬崖山至軍中復從戰金峰嶺寇散走禽李沅發上功總督見銜名列生員以爲武生特拔補臨武營外委賞藍翎鎮將欲爲聲敘更請保獎訓導公辭以年幼學淺不堪人師且效力有日凱旋侍母爲幸多矣遂還衡陽清泉場江子春有典鋪在未陽值歲荒亂商旅不能自保請公往經理至則散錢振饑貧貸困屨不責其券息費緡錢千數不待請報眾以告子春子春曰錢已用可復還耶遂不復問其後郴桂陷寇未陽土寇蠢動日夜思劫掠然過典鋪門輒曰此嘗施惠吾輩不可掠也以此竟從容收贖本還報主家論者謂公一貧生爲人司出納視其財若己有放散無所

顧慮子春最謹于財當其時未必知後當收其報而無幾微吝惜之意絕不問其出入皆可謂豪傑人也公在耒陽見坊市無賴聚積多謀不逞知必亂陰條列姦宄渠魁數十名請縣密捕縣令不能用渠黨頗有知者謀伺其出窘辱之公在營稍習拳棒恆縛行纏中置鐵尺以二健兒護前後一日遇少年摩肩過排之不動反推少年顛數步外又嘗詣縣門無賴呼譟從之僅而脫去是時曾文正以侍郎治兵衡湘博求奇士衡陽常豫儀安薦公有膽略可倚任因勸公謁文正公時居母喪未踰年意不欲出文正亦居母喪遣謂曰鄉里藉藉父子且不相保能長守邱墓乎公感奮遂入軍檄佐曾國葆陸營自此三十八年諸將帥或官或罷或先亡逝唯公旦夕軍中未嘗一日息亦未嘗一日官也咸豐三年冬總督所將軍潰于田鎮有

詔徵湖南鄉軍援武昌帥水師具礮船曾文正始大治水師船船三等曰快蟹長龍三板船制營制具公所奏定水師章程大要以三百八十人爲一營始立湘軍水師十營以公領一營爲營官其九營皆總把武員或新進不敢專達多倚公以白事故公雖領一營而實統水軍以附生驟將三千餘人湘軍之不循資格往往如此然他人或隨敗散分析

唯公始終總其事云四年二月從曾文正陸軍俱發衡州時寇分部踞
岳州湘陰旁破甯鄉旋引去水陸軍徑下湘渡湖屯岳州城內外公別
帥所部繞西湖防寇伏抄三月陸軍攻羊樓洞敗還寇躡之岳州陸營
潰退水軍引還長沙公孤軍留湖中曾文正涕泣謂必敗死俄聞全軍
還大喜過望自是益倚公四月寇復旁陷甯鄉上破湘潭大眾逼長沙
屯靖港百餘里中寇勢相接烽火照耀省城閉門不問戰事曾軍陸師
盡出赴援獨水師十營屯湘中流用幕府議悉軍攻湘潭召十營官決
之皆推公居前定策公毅然請當前其夜即發未至十里聞礮聲則
塔齊布從甯鄉來援已接戰再勝公乘三版望湘岸連檣十里皆寇舟
然多鎡貨無戰艦默自計進軍得勝士卒貪擄獲必自亂因約三營首
尾攻之自衝其中屯縱火同時燒之寇逃走燒溺無算城寇失氣開城
北走財貨一無所取捷聞湘中士民歡慶以爲軍興戰功第一公還大
軍恂恂如未嘗戰督師上功竝前全師功議敘知縣
賞藍翎公初入軍時約誓不私財不受官至是固辭每啟事猶自署附
生後蒙
特簡補金華知府乃以官繫銜然自府道至尙書于交友在卑位者未

嘗令依官禮終身若布衣昆弟之好當世稱其高雅六月曾文正所奏
調水師大將陳輝龍至自廣州而前調知府褚汝航游擊沙鎮邦等自
桂林俱會長沙更遣塔齊布合羅澤南陸軍護水師徬湘東下公率舟
先進寇亦具船礮據南津蘇勝夏鑾趨之公從君山楊載福從雷公湖
張兩翼寇扼南津不出陳前鋒分小船入港寇遣舟接戰小舟遽反走
寇舟爭出公及楊公抄之燒百餘舟奪小船數十其夜寇走踰五日寇
復駕巨舟來攻再敗之寇退保雷鼓臺進攻不利會暮欲退楊公謂公
曰我軍船不滿百寇眾十倍非冒死出奇不得免乃乘三版礮直下
公從之中鎗子傷指進愈疾遂陷寇中衝入燒其坐船寇還救見屯舟
火起遂大亂敗散公還血盈袖裾自此與楊公均以勇略冠軍諸將無
與比號爲彭楊陳輝龍後至以爲書生新軍猶敗賊賊易與耳遂自將
先進乘柁罟大舟旌旗鮮明洋裝銅礮響振山谷湘軍自失以爲不及
公與諸營官皆乘三版往觀戰至中流柁罟膠寇小舟爭赴之我軍三
版往救水急風利盡吹入寇屯中寇更出陸師遏之遂大敗兩廣水師
將皆投水死公與諸將單舸僅得還自是水戰專任彭楊公以此益知
水戰利害陸軍連戰皆捷遂至沌口謀攻武昌武昌城外皆寇壘公與

諸軍議當渡江先燒其屯自塘角至青山寇緣岸列礮丸發如雨諸將皆露立三版櫂船徐進有俯側避礮者皆目笑之以爲大恥寇從城上望見相顧失色縋城逃者殺百數不能止沿江屯寇盡潰悉燒屯壘及其舟船而還寇遂棄城走漢口漢陽寇皆走陸師不血刃復兩名城一大鎮下游羣寇聞之大思聚黨田鎮夾江爲五屯依半壁山連舟斷江纜以鐵索大鎖平布竹木爲犬筏施大礮密如列筍筏前更護以礮船後列輜重船五六千艘望之如大城市陸軍攻山屯小勝因斫鐵索軍還營寇復纜合之水師欲下則蘄州江岸寇撓之公議掠蘄直下合陸營併力攻之兩岸礮雨下哨官軍士傷死相繼軍氣無沮竟逼田鎮屯焉蘄寇亦走合田鎮寇屯公閒行至陸軍刻日合戰分水軍爲四隊頭隊船悉令去礮具鑪韜椎斧炭翦戒曰無仰視順流疾進至筏下斷鎖纜自將二隊爲距援楊公將三隊突纜燒下游寇舟四隊守屯半夜陸軍出攻半壁山水師頭隊皆小船無篷桅鼓櫂直下俄頃逼筏前哨官孫昌凱故鐵工也方鼓鑪銷鎖環未開有小船視筏下船隙劣容舫試擠而過後者從之竟度二船遂謹呼曰鐵鎖開矣寇愕亦謹筏上皆爭走相踐墮水楊公率諸軍徑下至武穴乃回船擲火燒而上天明東風

起乘風上公乘流下合軍盡燒寇舟筏山上寇顛隕尸相藉田家鎮之
戰湘軍水師名聞天下
文宗采其戰法手詔宣諭江南北水軍未幾寇夜襲大營燔帥舟曾文
正入陸軍自保湖廣總督陸軍亦潰退寇勢大盛公所部軍入姑塘陷
圍中寇斷湖口公帥軍往救不利師無統將公無部曲乃還新隄新船
寇復陷武昌漢陽湘軍水陸相保悉從九江入湖就餉南昌公更募士
造船立新軍與楊公合三千人自岳州以來水師續增新舊營皆公與
楊公部曲二人分統之非復初出營制矣咸豐五年湖北巡撫胡文忠
促進兵攻武昌要公同攻漢口而楊公出江屯沙口寇不出我陸師不
能戰水師空屯三日議引還沙口在武昌下游三十里還屯沌口在武
昌上游三十里舟從武昌漢陽城下過經寇壘下無生全理胡文忠由
陸循漢入沌令水師從之楊公以爲懦微笑曰丈夫行何所避浮江下
則泝江上耳公聞憤然卽登舟張帆先行寇先檣舟中流且縣礮城上
以爲我師必不敢掠而過公旣行部下莫敢後之楊公亦愕出不意恩
恩皆發小船如鳧鴈散礮丸飛鳴萬聲同發我軍但冒進不暇計生死
公所乘船桅折船覆公落水起攬船底橫漂江中流楊公舟掠而過未

及下帆瞬息已去成發翔棹三版來拯公還營失四船死者三百人胡文忠親拜公請百叩以謝且曰水軍徒猛無益宜大治陸軍乃可爲也其時湖口內水軍頻挫敗死一營官喪船數十曾文正急召公至江西自助留楊公湖北公泝江還湘趨南昌而袁州瑞州並陷水陸道絕無可通之理眾議當由廣東繞閩浙入廣信計程百日乃達公曰江西危急旦夕赴之猶憾不及義不可圖自全卽易衣裝選廉從數人從且戒之曰卽遇寇若等自去無顧我初僞爲賈客操皖音經寇關卡數重無覺者及將出寇境居民言稽禁甚密從者二人逃去公更敝衣懷一盃僞爲游學乞食者竟出寇卡無復訶問閒行至江西省城城門官吏亦弗疑也時曾文正屯南康公先上謁江西巡撫城中官大驚湘軍聞之兵氣百倍自此立內湖水師游擊吉袁臨瑞建南饒廣閒日有戰事凡統十營大小船六百七年曾文正還籍治父喪公時已擢惠潮嘉道而楊公署湖北提督官位尊奏爲水師總統以公協理蓋水師雖分外江內湖終當合併非公不能助楊公故各遙領焉曾公旣歸久不出公在江西歲餘餉不時得借火藥亦靳不與曾公每曰吾負雪琴其年湖北陸軍再克武昌漢陽兵勢益盛水陸同下復圍九江攻湖口寇扼石鐘

山梅家洲力竭內湖軍不令合外江公率全軍分三隊出戰楊公臨江發礮爲聲援不能進而寇度石鐘石巖腹置巨礮正當船衝公令三版先出大船繼之前鋒中礮哨官立斃公令前船還後船次進有死者復回後者復迭進傷十餘舟公一不顧或諫曰今驅士卒與飛火爭命徒死無益非兵法也公泣曰水陸用兵五千精銳忠勇之士斃命千數湖南江西民士屠戮者數十萬每一念之恨不卽亡不破此險勢無生理今日我死日也義不令將士獨死亦不令怯者獨生矣鼓棹赴之寇礮焦裂銅飛礮者震死船銜尾直下與外江合軍歡聲動江陸軍奮踔從城背山下應之寇大奔城外山上洲中寇皆轟走遂進奪小姑山復彭澤望江東流寇望風遯逃前隊水軍過安慶城城寇不敢出連破樅陽大通銅陵峽口寇屯而還合圍九江公督所部二營駐湖口令八營屯防江西九江旣復楊公進軍黃石磯自九江至湖北省城置十二屯營明年公移營與楊公合屯於時金陵大營潰蘇杭徽甯繼陷寇復上陷東流建德彭澤圍湖口公赴援舍舟登城雨立數日夜寇引去十一年詔授廣東按察使寇上犯蘄黃德安公率軍上巡江防會陸軍攻孝感克之遂復天門應城黃州德安胡文忠薨

詔以李續宜撫湖北授公安徽巡撫公上奏曰臣衡陽一諸生父母棄
養終鮮兄弟少習舉業不知韜鈴亦無搏擊之勇徒以逆賊猖獗激于
義憤遂從帥臣曾國藩于軍旅之中矢念殺賊初時創立水師曾國藩
以臣粗有膽識飭同今福建提臣楊載福製造礮船編立營哨候習風
濤沙水之性久而稍諳駕駛與賊搏戰仰賴

聖主威福諸將維持士卒用命幸不覆沒中間疊荷

鴻恩超擢不次每一除授臣必具稟帥臣自陳才力粗疏不諳公事請
為代奏開缺曾國藩亦深諒臣愚衷非出矯激屢請留辦軍務皆邀
俞允不圖

恩命有加無已臣亦何心敢自外

高厚乎顧念封疆大吏有節制文武之權鎮撫軍民之責措置一有未
當必致上負

朝廷下誤蒼生以臣起自我行久居戰艦草笠短衣日與水勇舵工馳
逐于巨風惡浪之中一旦身膺疆寄進退百僚問刑名不知問錢穀不
知譬之跛者行生僻之路其為顛蹶不待履蹈坎坷而後知也且臣不
學無術褊急成性十年江上身受風溼筋骨痛疼心血虧損善忘多病

更虞不勝重任連日與督臣熟商浼其代爲陳情督臣以向無此體制必獲譴責臣再四思維與其勉強負荷貽誤

國家不若冒昧直陳冀見原于

君父爲此顛懇

聖恩准開臣缺簡放賢明精幹大員接任安徽巡撫整頓吏治兵事使臣得一意辦賊努力前驅

詔獎其真實不欺仍著帶兵勇赴任旋以苗練反覆鴟張潁州岌岌楚豫無兵促公馳赴兼

詢剿撫之宜公覆奏苗逆應剿不應撫可一言而決唯必俟廬州克復乃可併力臣從軍八年專帶水師長江上下千有餘里船隻千餘號臣與楊載福當一駐下游一駐上游以資控扼若一旦棄舟而陸無一旅

一將供其指揮倉猝召募必致憤事強統客軍又難相孚有

詔皖撫難得其人宜籌商人材薦賢自代會李續宜亦辭湖北巡撫乃以李代公而改公水師提督未幾又

詔帶領水師有節制鎮將之任改膺武職不足統率著以兵部侍郎候補旋補右侍郎時雖與楊公分將而名位相壓動多嫌忌軍中重文輕

武勇將復猜侮文官公自奉統率之

命調和倍難于協理時矣然彭楊齊名垂四十年終始無閒論者多爲楊公屈而不知公之苦心而協爲尤不可及也是年別立淮揚水師以江路未通留助攻守同治元年春楊公以母病再請假公進屯銅陵并將外江內湖淮揚三軍十八營攻金柱關烏江蕪湖東梁山皆克之悉調上游水軍集濡須又別立太湖十營亦統于彭楊自此公常屯濡須楊公常屯蕪湖日月苦戰不可勝紀諸將衝鋒公每乘小船督戰以紅旗爲識營官戰罷來候見則紅旗船又已還去或前或後將士皆惴惴各盡其力亦閒入陸軍察戰狀嚴明無所瞻徇諸軍畏之然公終身不言陸軍長短特以往來候忽難物色其所經行畏民莫敢爲大姦宄後巡長江一出而江岸煙賭館不禁自絕威聲震動數千里諸帥無與比也二年五月公與楊公合兵攻九洲洲以合金陵之圍時沿江府縣次第肅清寇于洲築屯壘數十外作大城列舟環之水陸相護以爲江甯城犄角前督帥向榮和春皆以攻洲不克敗退李世忠又嘗以三萬眾掘洲不勝移軍去都興阿等言九洲危險曾國荃圍軍當退

朝廷懸疑屢以爲慮故大舉攻之名將勁卒畢集公陳船上流南隊向

下關北隊向草鞋夾各設後隊爲援應楊公躬督船攻燕子磯破之陸軍亦分三隊掘洲埂攻中關三版悉繞洲洲寇不出但發火鎗死者數百人相持不能進至夜公傳令諸軍更番夜攻且曰洲不破不收隊矣諸軍具炊傳餐附洲諸軍皆皇皇莫知所爲洲中船上礮不絕以小船蟻附鉛丸不能及反多傷後隊俄有從火叢中登岸者一人登一船人畢登則諫曰洲破矣諸三版附岸者謹譟騰蹕而上寇眾大駭小鎗羣子紛亂雜擊登者皆忘其死踐尸直進大破洲邊屯防洲諸寇船人悉赴之一方擾亂一洲皆擾亂寇眾萬餘潰散自田鎮以來肉薄死戰之事終于此役克江甯成大功由此戰也江北諸帥偵知之飛書先報捷有

詔問狀公奏功疏猶未上於是寇黨從福建出江西寇池州謀撓官軍公還救青陽未幾

詔楊公督師江西自是公專統水師明年江甯復大寇悉平論功以創立舟師爲首公前以九洑功

賞黃馬褂至是諸將帥封爵者八人公亦

賞一等輕車都尉世職加太子少保銜明年被

命署漕運總督公奏曰臣以諸生從戎十有三年仰蒙

文宗顯皇帝暨我

皇上逾格恩施叨竊

寵遇夙夜祇思若涉春冰茲又欽奉

恩命署理漕運總督以臣之愚再四忖度有不能不披瀝上陳者伏查東南轉漕關係甚鉅軍興以來河運久停幸軍務將竣規復舊制本年漕臣吳棠試辦河運三萬石此後通籌全局重立新章臣於斯事全未諳究何可冒昧嘗試貽誤京儲此臣之不敢受

命者一也臣於咸豐十一年蒙

恩簡任安徽巡撫自揣才力三次疏辭仰荷

聖慈改補今職彼時粵逆鴟張苗練捻匪交相構煽皖江南北有岌岌不可終日之勢臣方專力水師其艱難與皖撫相等區區愚忱既爲皇上優容亦爲天下所共諒以目前情形論之漕臣責任雖重較之十一年之皖撫則有勞逸之別難易之分若辭皖撫於昔年任漕督於今日未免辭勞而就逸舍難而就易旣變易乎初心恐貽譏於物議此臣之不敢者二也臣本有失血之證久居水次逐漸加甚右手右足悉作

麻木早欲以疾上陳而新設長江水師上下四千餘里分汛設官事事創始兩江督臣曾國藩以臣於風濤沙水江面港汊較爲諳習屬擬章程屬稟凝思卽覺心搖搖不能自主執筆在手偶一停頓心手不相貫注往往筆落於几不能自知蒲柳早衰萬難重任此臣之不敢三也抑臣更有請者臣久失怙恃終鮮兄弟本無室家妻子之戀兼少期功強近之親祖宗邱墓祭掃闕如去秋大功粗蕪亟欲上陳而彼時楊岳斌曾國荃鮑超相繼離營與督臣始終兵事者祇臣一人金陵新復猶須幫同彈壓今江南諸事均有頭緒長江水師已由臣粗擬條目與沿江督撫會同具奏微臣身在行間濫廁卿貳揆之於心更有未安惟有再乞

天恩開臣兵部本缺臣亦不敢遽作歸計容將營中各事清理再行請旨回籍有

詔迅赴署任無庸固辭公再奏言臣本寒儒傭書養母咸豐三年丁母憂曾國藩謬采虛譽強令入營初次謁見卽自誓不求保舉不受官職曾國藩察臣語出至誠比時許諾十餘年來不求保舉而膺破格之獎者已非一次不受官職而蒙非分之榮者幾躋極品返之初心愧汗浹

背然臣猶有以自處者自知府而擢至巡撫由提督而改補侍郎并未嘗一日居於其位歷任應領養廉俸銀及軍營例支官品銀從未具領絲毫誠以

恩雖實受而官猶虛寄也若

皇上責臣以必赴臣惟有負罪而再辭於是

淮開著缺仍留水師時捻寇北犯羣帥馳驚東南五省戒備空虛而三載晏然公之力也七年兵事大定長江水師營制既立自荆岳二州至崇明縣五千餘里凡設提督一員總兵五員以六標分汛營哨官七百九十八員兵丁萬二千月餉襍費歲銀六十萬以長江釐稅供支不煩戶部公與曾公合奏事宜三十營制章程二十四奉

詔編爲六卷載入方略頒之天下垂示後世公在軍幾廿年矣初時軍餉奇絀而淮鹽積滯惟水師小船閒道可通公商於鹽政捆鹽自賣以供月餉及江路大通商販未集江西淮北鹽利五倍水軍糧臺所餘鹽銀五十餘萬兩曾文正設三省督銷局招商領票水軍鹽票大小數百張至是軍餉有額支的款餘銀及票貲本巨萬公一不私取乃以五之一取息助水師公費之不足且以備外患倉猝之需餘分解雲貴廿萬

甘肅甘萬助軍餉以十萬廣本縣學額而以鹽票犒諸將有大功者既
乃奏言臣墨經從戎創立水師非敢曰移孝作忠良以先臣曾受
朝廷一命之榮臣母亦時以忠義相助當多難之日義不得顧私情也
臣素無室家之樂安逸之志治軍十餘年未嘗營一瓦之覆一畝之殖
受傷積勞未嘗請一日之假終年風濤矢石之中未嘗移居岸上求一
日之安誠以親服未終而出從戎旅既難免不孝之罪豈敢復爲身家
之圖乎至嘗聞士大夫出處進退關繫風俗之盛衰臣之從戎志滅賊
也賊已滅而不歸近於貪位長江既設提鎮責有攸司臣猶在軍近於
戀權改易初心貪戀權位則前此辭官疑於作僞三年之制賢愚所同
軍事已終仍不補行終制久留於外涉於忘親四者有一焉皆足以傷
風敗俗夫天下之亂不徒在盜賊之未平而在士大夫之進無禮而退
無義伏惟
皇上中興大業正宜扶樹名教整肅綱紀以振起人心臣豈敢稍犯不
韙以傷
朝廷之雅化況人之才力聰明用久則竭若不善藏其短必致轉失所
長古來臣子往往初年頗有建樹而晚節末路隕越錯謬固由才庸亦

其精氣竭也臣每讀史至此竊歎其人不能善藏其短又惜當日朝廷不知善全其長知進而不知退聖人於易深戒之固有由矣臣本無經濟之學徒以負性愚贛精力強壯恃勇往直前之氣妄欲掃蕩賊氛然性情褊躁思慮憂傷月積年累怔忡暈精力日衰心氣日耗若再不調理必致貽誤

國事伏維

皇上孝治天下合無仰懇

天恩開臣兵部侍郎本缺回籍補行終制藉可修理祠墓以贖十餘年遠離先隴之愆靜養病軀得以醫治則報

國之日正長斷不敢永圖安逸有

詔聽許未十日復

詔於百日後迅赴江皖扼要駐紮兼以養疴仍不畀以員缺公奉

諭感泣因奏俟布置周妥明春起程又密薦文武堪重任者五員時官

曾左李諸帥任寄益隆往往以公事

訓勸言官論劾惟公奏上必奉

哀旨勉慰有曲體重臣之

諭廷臣言事交推其清正廉直一時功名爛然矣八年春還衡陽以查江舊居久荒圯于府城東岸作草樓三重自居置妻子別院略不省視時往母墓廬及查江家廟皆布衣青鞋不設輿從補制滿三年不出種樹灌園翛然也而長江水軍多慕綠營頗事攤派以侈靡相尚篙舵工或不能操舟提督寬假之眾論以水師無益可撤罷十一年曾文正薨詔促之出視師聞

命卽行始發衡州而長沙風動前提督以病免奏薦將材及劾罷沙汰營哨官百八十餘人杖責革去者各當其罪而尤以提鎮相見及文移不得卑屈爲諄諄蓋欲存鄉軍之舊俗使將士相親習而不陵蔑故公生平治軍嚴而不倨兵法卽在乎此事竣

召入見卽日被

命署兵部右侍郎加

恩賞朝馬

大婚充宮門彈壓大臣僚友謂公屢疏辭官特憚絲劇令

恩命稠疊卿貳清閒宜可以少安公復再疏力陳不能服官及始終一轍之意

優詔從之

命每年巡閱長江專摺具奏兩江湖廣總督供辦公經費銀蓋有事而非差無官而有祿

朝廷特爲公設例外之例所以優異倚畀者至矣其後公力辭辦公銀言者復請起楊岳斌巡江講官盛昱復劾公不應朝命欲以脅起公皆未足以窺

穆宗當日之聖意也公自奉

命巡江經十九年以經歷萬里勞擾上下奏築別業于杭州西湖以衡陽草樓榻之亦曰退省盦皆自建不煩公費其辦公銀每年萬兩不敢支領于前存鹽餘銀生息萬兩提用充之然又省嗇歲提息銀未嘗過五千兩計所節省又卅餘萬兩長江官兵皆整肅充足無游惰飢困之敝行舟千里如庭戶直省城鎮劫奪時有江湖荒僻渚澹數十年無寇盜而公威望亦益隆顯每有大政督撫所不能了者輒以

命公如樊口之事江西水師統將萬重暄之案兩江總督劉公被劾之奏安徽巡撫裕祿公被論之奏兩江總督左文襄湖廣總督涂宗瀛被劾之奏給事中鄧承修廣東貪吏之奏兩廣總督張靖達被劾之奏廣

東藩司龔易圖副將利輝學政葉大焯先後被劾之奏皆

命公查辦覆奏如所議行語具公奏議中文多不載光緒七年

詔公署理兩江總督並辦理通商事務大臣時注意江海礮臺故公再

辭不

允已而公復言礮臺及兵輪江防皆臣專責而兩江地大政殷臣不善

理財不習夷情必多決裂或生釁隙

詔以左文襄代公而留公督江海防如故八年

欽定京察列一等九年補兵部尚書疏辭不

允其後考績復列一等以開缺侍郎而

特予京察尚書未任而再得

優敘皆人臣未有之知遇論者以公爲無忝其年法越戰事起分

命大臣籌防以廣東近越南又爲南洋前衝

詔公募軍速往公適於八月拜疏乞病九月奉

諭力疾治行調湘軍四千由海道而身率隨丁輕裝度嶺十一月初至

廣東省城湘軍八營俱集躬乘輪船相度形勢以虎門爲海口要隘常

洲次之又次則北有漁山珠山南有沙路海心岡大黃滘皆屯軍設礮

爲扼守計其間道有橫門厓門虎跳門磨刀門皆募漁船守港汊未十日布置略定人心帖然因自請率陸師出關擣西貢助越南驅法兵蓋公於通商約和積憤久每思一當敵以死泄其怒而中外搖搖多以爲未可戰初至軍卽聞法國終歸於和時方有

旨切責議和者尤以和爲諱但嚴戒開釁將帥皆觀望持兩端公知夷船終不入虎門廣東必無戰事故舍舟登陸之說昔嘗自陳以爲必貽誤者今反自請入陸營誠恥其不死也又據公法禁各國船貨入口奉密諭無庸封港已而法人先行封港南北洋不能詰問福建海口戰船坐待敵礮防兵潰散和議復興唯廣東法船竟不至聲言當攻瓊亦竟不來眾以公重名所懾然所屯去越南福建甯波皆絕遠遣援艱危將領零落公性卞毅又移營海口居草棚暑溼寒雨內外煎逼發病遂不可治十一年和議定猶上二疏力爭于

朝乃復請疾歸度嶺至浙疾篤不能飲食言語行步須四人扶持連疏乞休皆

慰留

賜人參且問病狀終不得謝事所上疏言病前後屢數十或一年再請

同于例摺諸大臣亦無爲言者十四年復扶病巡江至安慶安徽巡撫陳彝新擢用初未識公見公病狀大驚固留公入城調養公以巡江事未畢不可陳乃奏言臣與彭玉麟向不相識今見其行步龍鍾語言蹇

澀

朝廷必欲用之則當聽其養疾以收他日之效奏上

報聞以此乃知公篤老其年公再乞病得請仍

詔無庸開去巡江差使公奏謝有子子孫孫感激之詞猶以在軍數十年經手事繇仍不得遽歸十五年冬乃還衡州昇負登樓遂不復下十年三月甲戌病革昇至正寢乙亥薨夫人鄒氏子永釗皆先卒旁無姬侍僮僕四孫童幼絕于部曲兵官之手可謂丈夫矣公剛介絕俗然至性過人幼而失怙事母至孝居貧奉養先意承志外祖母居懷甯無子孫公時恃傭書爲活歲不足衣食以太夫人憂念艱難跋涉往返五千里迎至衡陽太夫人得奉母終天年所謂孝思不匱者也鄒夫人以樸拙失姑愛終身無房室之歡自太夫人卒後遂不相面弟玉麒游客秦豫遭亂隔絕廿年及公授安徽巡撫見邸鈔識其名始聞關至軍中相見哭失聲護愛甚篤與其寢食而弟久客州縣服藥煙成飲公軍中

尤嚴煙禁以情告公大怒立予杖四十斥出之曰不斷煙飲死無相見
弟感愧自恨臥三日夜瀕死竟絕不更服復爲兄弟如初以其習商業
令行鹽致貲巨萬公一無所取弟亦豪邁揮霍恤貧篤義鄉人流落江
淮者悉收卹資之歲散萬金亦先卒遺妾女與公子婦同居以孤孫見
綏後之公自領內湖水軍及後總全軍軍餉無所出不以煩公家前後
惟領銀十七萬兩作鹽本軍餉外所應得公費悉出以佐義舉凡出資
助本縣學田銀二千賓興費銀二千育嬰公費二千修縣志書獨供筆
札刻資銀五千獨造船山書院銀萬二千衡清試館銀一萬兩其濂溪
墓昭忠祠京師及各直省湖南衡永會館凡募助公舉者動以千計所
部有功者凱撤時及疾篤時均舉贈各萬金凡費銀十萬兩族中老者
歲有饋又計丁口徧資給之凡數萬兩計其兄弟所散財幾滿百萬而
當軸要人無一字之問十金之遺以孤潔無援自喜至于接對友朋協
和羣帥煦煦恂恂未嘗有傾軋驕倨之心五十以前有氣陵之者必勝
之而後已其後望重年耆人皆推敬亦深自斂抑誘接文士尤能折節
素工畫法蘭入妙品而尤喜畫梅全樹滿花所至輒奮筆潑墨海內傳
者過萬本藏于篋者一牛車不能載尤惡浮華厭絕饋遺治軍廣東時

民士恐餉不繼共輦銀十七萬送軍中謝不受及歸眾以金排萬人姓名列二繳志感頌其直萬金悉諭令各還其主且戒其奢焉其繡字頌功者送海幢寺中治軍嚴肅恆得法外意所誅者必可以正民俗安慶有候補副將胡開泰召倡女飲而使妻行酒其妻不可遂抽刀剖其腹街巷詢詢事聞院司方聚議謀所以處公適至聞之曰此易耳遣召之來但詢姓名居止便令牽出斬之民大歡湖北忠義前營營官總兵銜副將譚祖綸誘劫其友張清勝妻清勝訪之陽留居密室出偽券索償債得遞去訴營將州縣皆為祖綸地置不問因訴于公公先問黃州漢陽道路藉藉欲治之無端得清勝詞為移總督先奏劾祖綸且遣清勝赴武昌質之

詔公與總督卽訊祖綸令人微伺清勝于輪船擠之溺死遂餌其妻父母及妻劉氏反其獄忠義營統將方貴重用事總督昌言誘姦無死罪謀殺無據公揣祖綸根據盤固不可究詰適總督監臨鄉闈卽驟至武昌檄府司提祖綸至行轅親訊忠義營軍領營往觀祖綸至陽陽若無事公數其情事支離狡詐及謀殺蹤跡祖綸伏罪引令就岸上正軍法一軍大驚然已無所及夾江及城上下觀者數萬人歡叫稱快故公之

所至老幼瞻迎長江聞其名字肅然相戒牧令輯其隸役曰彭宮保至矣非獨威聲使然所行事深感民心庶乎不侮矜寡者也遺疏聞奉
上諭前兵部尙書彭玉麟忠清亮直卓著勳勤以諸生從戎轉戰東南
各省所向有功會同原任大學士曾國藩創立長江水師籌畫精詳規
模悉備受

先朝知遇由知府洊擢封圻內陟卿貳迨粵匪蕩平蒙
穆宗毅皇帝眷念勳勞賞給一等輕車都尉世職並加太子少保銜朕
御極後擢任兵部尙書嗣因患病迭次陳請開缺降旨允准仍派巡閱
長江水師十餘年來力疾從公不辭勞怨復因病勢增劇請開差使當
經寬予假期並准其回籍養病頒賜人參方冀調理就痊長資倚畀茲
聞溘逝悼惜殊深彭玉麟著追贈太子太保銜照尙書例賜卹任內一
切處分悉予開復應得恤典該衙門查例具奏加恩予諡并于立功省
分建立專祠其平生戰功事蹟宣付國史館立傳伊孫候選員外郎彭
見紳著以郎中選用彭見綬彭見粹均著由吏部帶領引見用示篤念
盡臣至意五月十六日
予諡剛直公功績昭著其在鄉里行誼可敦薄立懦嘉言奇行不可勝

紀今掇其落落大者及外所不知次爲一篇以待
國史徵采及當世名公碑誄備削橐焉

續碑傳集卷十五

江陰繆荃孫纂錄

光緒朝部院大臣

禮部右侍郎童公墓志銘

翁同龢

公姓童氏諱華字惟充號薇研鄞縣人曾大父諱忠鎬大父諱孝源隱
 德不曜考諱槐嘉慶十年進士官至山東按察使遷通政司副使生六
 子公其次也副使公名德碩學尤善教人子弟著籍者多通顯故公少
 時已駸駸知學問矣道光十五年舉於鄉又三年成進士選庶吉士年
 二十一明年丁生母憂二十四年散館授編修自通籍至終於位凡五
 十二年
 朝廷論科第先後者無與為比嘗一充湖北鄉試正考官山東鄉試副
 考官再充順天鄉試副考官一任江蘇學政屢為

殿試

朝考讀卷閱卷官自侍講侍讀左右春坊庶子侍講學士侍讀學士歷
 光祿太常大理寺卿左副都御史工部吏部侍郎以磨勘處分降二級
 調用仍授左副都御史未幾署兵部侍郎復補吏部侍郎擢左都御史

兼管順天府府尹事務京察開缺以侍郎候補禮部侍郎前後直
上書房者二十六年再充

經筵講官又爲

國史館副總裁

賜紫禁城內騎馬

御書珍玩文綺甘鮮之屬惠賚稠疊不可勝紀文臣之遇可謂榮矣然
公之自處恆若不足儉約類寒士敦篤純懿近老子所謂全德者及其
因事奮發也秉正察微不顧危殆光緒四年以吏部侍郎奉

旨偕禮部尚書恩承查辦四川事件時總督丁公寶楨銳欲有所興作
其屬官善爲逢迎政日以壞公至蜀勘灌縣隄工奏舊隄用竹籠作塌
去後改用石工加寬加厚河窄水勢湍激冲刷一百三十丈督臣原奏
僅沖金剛牆三丈不實又奏機器局費用過侈製造未精宜停止因劾
去成縣龍道丁士彬等奉

旨如所請行東鄉知縣孫定揚提督李有恆一案言官屢疏論奏

廷旨迭派文格丁寶楨及前兩江總督李宗羲查辦皆未能結公至應
論如律侍郎閻公敬銘方查振陝西撫華州途次供張之費劾奏使者

部議失察家人需索降三級留任御史鄧承修言近來奉

命查事有關督撫者皆敷衍了事伏見恩承等查辦四川巨案一旦平反以此必多斂怨今言者據一紙之呈入

告便蒙罪責恐適以褻

國體而快姦邪時

諭旨已行

朝廷亦不復追改也及查熱河圍場雲南勇營事均能廉得其實前後降調者二革職留任者再並坐幾微小事是時言官類能彈劾大臣矯厲風節日伺察人過失亦無能掩飾於公者則公可知也公事親孝己亥丁未兩以內艱歸喪葬如禮咸豐二年副使公年八十乞假歸養得奉事者六年所學以天文輿地爲尤粹中歲以後歲誦五經論語孟子一過日對此如見古人也治官書畢正襟端坐圖書几硯位置井井夜必記旦之所業暨明日所應爲者書之於版數十年如一日凡其懿行讜論不可悉書書其大者公卒於光緒十五年年七十二夫人盛氏有淑德前卒子二人德厚丁卯順天舉人刑部郎中秉厚丙子浙江舉人正三品廕生女三人長適陳壽祚次適趙時桐次者在室孫二人承徽

監生重佑縣學廩生曾孫二人書敬書敏將以十七年二月二十五日
葬公鄞西鄉楊家港之原盛夫人祔焉而來請銘公之舉於鄉先文端
公所得士也余又與公同官京朝三十餘年誼不敢辭銘曰

丹穴秉靈辰宿降精是生名德代傳公卿顯允君子既惠既淑爰在弱
冠鴻飛在陸瞻望庭闈式詠陔蘭息我朝軌求我新懽孝畢終始端是
朝履我我儒冠翼贊邦美學以誠遂道以淵冲秉清玉衡映秀黃中輶
車載馳風節彌懋如彼鷲翰揚聲崑岫匪礪其銚匪快其私劑我民病
惟帝之慈迴翔禁闈難進退易位不期榮名不自致上壽莫期台揮掩照

同僚歎慕

皇心有悼貞徽明德久而可思敢勒遺範用詔來茲

王定安

致仕都察院左副都御史前工部尚書賀公神道碑銘
光緒十七年十一月丁丑光祿大夫致仕都察院左副都御史前工部
尚書賀公薨於天津公故督學畿輔有殊績畿輔士大夫相率哭於其
邸自御史孟君繼堦編修華君金壽暨儒士父老四百五十人臚列事
狀白直隸總督李相國以聞

詔復故官

賜祭葬明年承重孫綸夔等歸櫬於楚十一月壬辰葬臨湘縣桐梓山之原樹石神道屬東湖王定安序而銘之禮也公諱壽慈字雲甫先世自江西樂平遷湖北遂爲蒲圻人代有隱德康熙閒有諱邦興者嘗出穀帛振四縣活萬人於公爲高祖公之曾王父諱受益妣陳氏王父諱魁南早慧十齡補諸生妣沈氏父諱安宗歲疫劑藥餌療病者歿則具槥櫛以瘞之有聲於時妣余氏生子男五人公其長也三世以公貴贈光祿大夫如其官妣皆一品夫人公生而敦敏五歲熟數經弱冠補郡學生員舉道光丁酉科鄉試明年試禮部不第大學士穆彰阿公聞其名以禮延聘公力卻之登辛丑科進士第七卒以忤時相不預館選試官吏部久之補考功司主事遷驗封司員外郎文選司郎中咸豐初年充軍機章京旋授戶部坐糧廳差竣仍直樞廷補江南道監察御史掌貴州道監察御史累縮街道巡東城十一年遷內閣侍讀學士分校順天鄉試同治元年轉大理寺少卿太常寺正卿典試廣東明年遷大理寺正卿署左副都御史又明年爲眞六年擢禮部右侍郎出爲順天學政轉刑部左侍郎任滿回京歷署戶吏禮工部侍郎十年擢都察院

左都御史光緒三年擢工部尙書公自釋褐迄掌冬官垂四十年敷歷
清要

天子嚮用甚殷卒因細故屏弗用五年二月李鍾銘獄起事頗牽公有
詔明白迴奏李鍾銘者南城書賈言路所指交通權貴者也公奉

命演

龍輶訖入其肆閱書餘無他吏議演

龍輶重禮不宜枉道入市竟鑄三級六月授左副都御史言者猶未已
遂乞骸南歸公之監督通倉

上聞倉戶侵蠹鉅嚴旨籍沒以償公牒所司一夕盡局百數十戶空其

居令戶留二人居外自衛

上意解悉還其產檢視一無失閭閻大懼其居台諫首請崇儉黜伏數

上封事條時政議裁南河總督所論皆經國大猷恥攻擊猥瑣之談

上嘉納之其在卿貳恪恭敬慎務存大體

穆宗踐祚恭邸爲議政王講官蔡壽祺疏劾疆吏語侵王

詔下諸王九卿按問無實或欲坐誣寘之法公曰壽祺誠有罪然恕之

益以彰

聖朝之仁而全賢王之譽主議者以爲然僅黜其名其掌文衡祓幽振滯鉤姦扶僞吏憚其嚴士樂其寬其按視定州捻首張總愚自秦晉渡河北犯賊騎日蹕數百里官軍常失之不及而定州城故不完或勸公急趣保定公叱曰學政無守土責然

天子之使義當與城存亡急繕守具手劔登陴士民皆大奮負板築乘城雉堞皆滿賊不虞其有備則睨而驚走當是時京師戒嚴中外震駭公以儒臣卻賊屏蔽畿南厥功甚鉅或請上其狀公笑謝弗居惟言近畿兵單請召威望重臣率師會剿

上可其奏於是肅毅伯李公鴻章恪靖伯左公宗棠皆奉

嚴旨促援捻以誅滅曾文正之移督直隸也造公訪時政公悉舉民間疾苦長吏賢否及興廢所宜以告曾公驗試如所言政遂大舉其居正卿因災異陳四事以爲牧民者州縣而察吏者監司道府也州縣不得人責在監司道府監司道府不得人責在督撫舉劾實則吏治自肅數十年來之將才體用宏達如左宗棠而駱秉章識之於客幕英武善戰如塔齊布而曾國藩拔之於弁備樸誠謀勇如羅澤南李續賓而曾國藩胡林翼擢之於伏處之儒生今以四海之大豈謂無人或投閒置散

則精力消亡志氣摧沮故宜廣儲將才以備緩急也各省常平倉歲久
虧糜一遇歉歲窮民難延旦夕之命宜隨時買補足額以廣儲積軍興
後散勇遊民結爲哥會又有傳習齋教者宜於各鄉之中擇族長以糾
合族擇戶長以糾眾戶不必峻數家連坐之法期於開導之有方不必
拘編查戶口之文期於簡約而可久日移日化不勞誅殺而奸自弭矣
疏入

詔下直省行之公位既通顯尤喜宏獎後進有片長嘖嘖稱誦弗衰天
下士歸之工書善詩持楮帛求題者駱繹於門手評莊騷陶杜諸集丹
鉛交錯老尤嗜荀卿言謂精粹不在子思孟子下也公之致仕長子良
楨官南昌知府迎養江西比遷長蘆鹽運使移居天津遂家焉自號贅
叟又號楚天漁叟所著詩文集若干卷子孫請付梓公曰吾以陶寫性
情不必與操觚家爭一日名也公初名于達繼名霖若生嘉慶十五年
五月廿五日卒年八十有二配黎夫人繼配但夫人皆以孝慈勤儉爲
戚里矜式側室鄭宜人公丈夫子三黎夫人生良楨咸豐戊午並補乙
卯科舉人厯官南康贛州吉安南昌知府長蘆鹽運使除貴州按察使
未至卒於京但夫人生良樾浙江候補知府鄭宜人生良樾幼讀女子

子二長適同邑錢氏次字湖南魏氏孫二綸夔光緒辛卯科順天鄉試
舉人刑部員外郎綸晉中書科中書孫女二曾孫二曾孫女二定安受
公知三十餘載不能發名成業副公平生之所期今老矣追迴疇昔執
筆嗚咽不能成辭既傷公遇益自悼也銘曰
四明高躅載潛其葩歷今千祀既薶而芽篤生大賢克昌厥家孽菁抗
璞殖爲

國華初官銓曹遂乘驄馬諫章洋洋論其大者

帝納昌言龜協筮從曰匪子聖謩謩汝忠

命長西臺匡弼朕躬遂掌冬官爲周司空寒峻怵野士歡於

朝祝公總揆師長百寮千譽不足一喙遂囂公笑置之迺漁迺樵公之

尙友荀孟莊騷哦詩誰和秋蛩夏蠋有子從政監司郡守長孫郎官北

闡南首公顧而嬉疇其余詬嗟嗟尼父憎茲彼婦周避東山遑論其後

公固盛德付之杯酒諸詠幡幡不置然否

帝念耆臣

優詔飾終過則原之盛衰其功匪私其功以勸勛庸鐫銘樂石垂示無

窮

兵部左侍郎郭公神道碑

王先謙

公諱嵩燾字伯琛筠仙其自號晚更號玉池老人築室曰養知書屋學者又稱養知先生湘陰郭氏余昔爲公弟意城先生碑銘旣詳其世系矣公自幼端慤有成人之度稍長游學嶽麓書院與湘鄉曾文正公國藩劉公蓉相友善切劑以道義於書靡不通究雖蓬戶獨處其意淵然以天下爲量尤自厲勤苦質直好義必忠必信矢之終身蓋其得於天性與自力於學者如此由縣學生中式道光丁酉舉人丁未成進士改翰林院庶吉士回籍丁父母憂粵寇起犯湖南曾公以侍郎居憂奉詔辦理團練未出公至其家陳說大義曾公感動起視師時苦費絀公爲親歷郡邑勸捐濟饗並請於巡撫開鹽釐捐局商定章程大局遂振賊圍江西省城公率勇馳援言於江忠烈公忠源賊踞江路勢盛官兵無船宜製戰船備攻勦江公韙之公爲草奏奉

旨允行後曾公用舟師踏賊金陵由公發其端也江西圍解論功授編修回京供職入直

南書房咸豐九年隨科爾沁親王僧格林沁辦理天津海防

賞花翎

命赴山東海口察辦稅務引疾歸同治元年

特授蘇松糧儲道

擢兩淮鹽運使

賞三品頂戴署廣東巡撫嘉應州賊平晉二品頂戴五年解任十三年

特召赴京光緒元年授福建按察使尋

命以侍郎候補在總理各國事務衙門行走充出使英法大臣補兵部

左侍郎差旋抵滬以病免公之官運使也時庫儲垂罄兵饟積懸公具

詳總督請各營配鹽由運司掣驗提督李世忠擁重兵行私鹽莫敢何

問公遣人緝獲入官運政大暢饟給庫充粵盜艇多師船與盜比為商

旅害公別造戰艦領以能將破東江石龍盜村遂收汰師船次及西北

省河悉斂歸官歲省饟十餘萬裁釐卡以杜中飽增入數十萬別庫儲

捐罰款不領於經費者糧道司之兩歲亦積二百餘萬其綜理精密多

此類嘗以

國朝二百年來休養生息民物熾豐聲教訖海外環地球諸國羣集戶

庭非撻伐所及既以違言積釁隱忍曲全臣子與

國為體當深思因應之宜力戒宋明紛呶積習以弭近憂而宏遠謨故

其與外人交一持公誠屏氣矜罔不歸於和劑於必應辨難者仍據理直爭無段借西人咸敬服焉自海外歸十三年以光緒十七年辛卯六月十三日卒於家距其生嘉慶二十三年戊寅三月七日年七十四夫

人同邑陳氏繼室太倉錢氏妾周氏鳳氏梁氏李氏子三剛基陳出能文早卒焯瑩鳳出縣學生立瑛梁出女五適左周李其二殤孫本含本謀縣學生曾孫道傳道伊公廉介不苟得任運使時書吏白收數倍前相什例可支匣費萬餘金公曰此偶然耳卽久任未必能如是行事當令後人循守今多取後援爲例迺階之厲也不許出使三年取諸公者唯薪水屋租二事律已厚而待人寬嘗言廉者君子以自責不宜以責人惠者君子以自盡不宜以望於人時以爲名言歸後主講城南書院兼闢思賢講舍曾公祠東祀船山王子與學者肄習其中啟迪後進如不及尤以扶植善類獎拔孤寒爲已任歿後多流涕者生平撰著大半散佚存者禮記質疑四十九卷大學質疑一卷中庸質疑二卷訂正朱子家禮六卷養知書屋文集二十八卷詩集十五卷奏疏十二卷讀書記若干卷湘陰縣圖志三十四卷會合聯吟集一卷家譜六卷已刻行其未刊者周易釋例四卷毛詩餘義二卷綏邊徵實二十四卷官書若

干卷尺牘若干卷公自卜兆縣東七十里飄峯山首已趾亥葬以歿年九月九日焯瑩等涕泣請銘其墓道之碑迺爲銘曰

謂公弗顯聯翩節麾志業宏多欲如未施鼎鑊我輩趨與世睽思以先覺覺彼後知利在

國家豈圖其私蠻貊可行州里或疑匪誠未至人心積熾

召歸輟駕邁疾江湄天日掩照時命孔哀心不負

君魂清魄夷孰聞天馬徒戀敝帷傲爾風節百世之師文章滿家鸞鳳

其儀謗與身滅積久彌輝攷三不朽視此穹碑

又郭筠仙先生西法畫象序贊

王先謙

光緒元年乙亥郭筠仙先生以兵部侍郎奉

命爲出使英法大臣

中朝使臣駐外國自此始越四年己卯先生還

朝以疾乞休其明年曾劾剛通侯自海外寄歸英人石印先生畫象又

九年爲光緒十五年己丑先謙始拜觀於長沙前譯英人庫伯爾所爲

先生小傳稱西人敬愛先生甚至於其歸同聲相望而惜其早退未竟

厥施又言先生和厚坦直外文明而內剛健自有各國使臣以來無如

先生者蓋泰西印行名人畫象通及諸國有名蹟者歲僅數人其重入畫者或數十年一見先生始至英之歲已列畫象至是復列而敘之在西人以

中朝駐使爲彼國光榮而其慕說先生歷久而彌永則先生誠有以取重於西人也先生當咸豐己未從僧王贊理天津海防於當日中外違言積釁其機易轉其事至順卒以至計不定一潰不可收拾拊膺裂眦憾事權之不已屬厥後外縮疆符內趨譯署熟覩外患日深中國應之愈無其具其密陳於

君父之前及與同僚爭論侃侃不少避屈常思發抒志慮爲國家定長治久安之局而卒不得一遂及奉使務平情達理一切決去壅蔽順事而恕施之使人驩然自通其意此先生學問之緒餘而西人所以尊重先生惟是而已至於沈幾覘國常維持於未然而國家隱受其益則西人無由知而中國亦未有知先生之深者近世人言西學務師外人所長爲富強計而拘墟之徒以爲當一掃刮絕持論互爲是非先生於泰西利用之道推究本末其有利無弊者必思仿而行之至勢所難爲或時有未可不肯徇眾志爲苟同如近與合肥相國

書力言鐵路不可行於中國是也駐西二歲費國帑不逾八萬金在英時遇各國公會必身帥從官往眾頗苦之而先生以為邦交之義當然且裨益中外機宜卒事如一日以此見先生謀

國之忠足以契

帝心而孚公論者非庸眾所庶幾外人之敬慕固不足為先王異也係以贊曰

大西之通粵自有明

聖皇布化旁流八瀛遂環地球咸集戶庭曷以妥之柔遠有經

皇命重臣往駐法英邦則有交夷亦有情毋俾不通以干

皇靈先生在西察事知萌挈其綱要用贊機廷凡百究圖維勤維誠西

人大驩僣僂將迎公歸謳思託於畫形搏搏海天嶽嶽榮名

紫光作繪耀此先聲

又書郭筠仙侍郎事

繆荃孫

郭筠仙先生由道光丁未翰林值

南齋膺

使命假歸後起為蘇松道

貴中集卷之十一

擢粵撫罷官再起爲閩臬遷侍郎出使英國諸事齟齬以病乞歸先生
丁酉舉人禁煙起釁罷戰議和割地賠費傳教通商均所目擊心焉傷
之因上覽古今之事變旁觀四國之情僞於舉世譁笑之中求其所以
爲保邦制治以自立於不敗而知宋以來士大夫之議論虛僞誇張不
求實用一禍宋再禍明以至

本朝所言均決於機先言曾文正公天津一案誅亂民賠教堂均不當
訾議當訾議者乃在不明立科條分別從教良莠以對百姓與教民兩
無猜嫌又言左文襄平定西域必收伊犁一城以完全功在俄人初以
給還兵費爲言左相宜自與議結自與畫界不但勝於崇厚當并勝於
曾惠敏乃以委之總理衙門致貽巨禍並以鴉片爲當禁教民應分別
約束鐵路應辦礦務應開一切內政當整頓而練兵爲後皆閱歷有得
之言不肯附和者公身歿二十年拳匪之役爲宋明議論之結果今法
亦變矣官職改矣制度更矣仍務其舊不務其實流於浮夸習於奢靡
先生有知又豈以爲然哉

先生撫粵時毛鴻賓爲總督諸事專擅決不先商幕府納賄招權屢
見先生自記因率屬捐廉助餉交部從優議敘再奏所得獎敘移獎

子弟奉旨斥其卑陋發還銀兩交部議處部議降三級調用毋庸查級議抵加恩改革職留任謝恩摺內有云自去年三月以來江西竄匪由甯都南安擾近粵邊東北兩江同時告急臣一力倡捐催繳軍需局支放募勇經費耿耿愚忱但有顧公之心實無營私之意曲荷聖慈之戒飭衷隱難陳更蒙淵量之包容勞累日有罪而邀矜貸原期激勵臣工已捐而又領回何顏對諸寮屬惟有仰懇皇上天恩仍准容臣報捐軍餉賞免發還雷霆雨露無非教恩威所被一本至仁天地神明詎敢誣懲戒之餘彌深私禱自記云此疏實礙難著筆而私衷憤鬱之氣又不能不稍稍自明與此曹共事公私交受其累爲之拊膺浩歎而已

吏部右侍郎江蘇學政夏公墓志銘

譚廷獻

公諱同善字舜樂浙江仁和人曾祖綸祖建寅考錫齡三世竝贈如公官妣皆

贈夫人公性行醴粹幼而篤孝母喪哀毀長事繼母蕭太夫人親愛揭於中誠晚猶孺子慕中式咸豐五年舉人明年第進士官翰林時賊蹤徧六七行省十年二月陷杭州五日官軍復之公特疏請任侍郎曾國

潘統諸軍十一年杭州仍陷賊據之公家避兵烏鎮公丁贈公夔聞關
奔喪奉母轉徙至上海鄉人流亡乃合衣冠數輩移書會侍郎乞援未
至服除入都補庶子原官洊升詹事蓋兩以大考高等超遷公念書生
侍從惟昌言得失積誠開悟答高位於百一故於同治六年二月上言
禮貴因時請緩

行幸敬

天未至於南郊游幸先臨平府第不安者一聖功資於養正不宜使耳
目之娛閒不安者二軍旅未平先事游觀無以慰天下之望不安者三
遠人肘掖闕伺莊敬日彊彼自弭服示以懈則難免生心不安者四非
時不舉古有名箴書曰改過不吝時止則止益章

聖德於無窮公立朝匡救此其大者

兩宮禮遇儒臣未始不由於此是秋

簡命江蘇學政未行遭蕭太夫人喪九年起復十年擢兵部侍郎督學
順天敦勉人士先行後文使還兼刑部公嘗奏復盜案仍分首從舊例
下部議行公仁心爲質爲民請命先後陳乞如卹被寇難民晉豫災黎
請加振帑飭荒政豈弟君子不欲搏擊豪彊徒以鷹鷂自許而耿耿未

慰之心恆在停捐職撤抽釐如古名臣仰屋竊嘆而莫可告語者卒之遺疏猶申此悒光緒元年冬十二月

懿旨命公偕翁侍郎同蘇赴毓慶宮授

皇帝讀拜疏力辭不許於是日夜思所獻納退食橫經蠹沒求諸古訓一充順天鄉試副考官再充讀卷大臣慎於造士至四年遷吏部左侍郎仲冬再奉

命視學江蘇陛辭面陳今日捐輸已成弩末徒病行政無裨度支公未出都已

詔下停直省捐局使車欽承

寄諭察東河決口形勢奏報附陳浚海口直河灣通支河皆當務之急

按試出減損供張推誠愛士復自深念

沖人輔導伊古阿衡太保之責遠使以來纏緜觚稜之夢痲焉疾疾遂巡不起六年七月終於江陰使院卒年五十伏念獻韋帶之日疇昔周旋識公通顯以後檢身若寒峻圖度大政若身家之榮瘁教成於妻子夫人屠氏儒門令儀以孝慈佐公成德贈公之逝方轉徙急難儲豫纖悉附身附棺咸中禮而一夕數驚則檣舟在門往往奉姑以登權入葦

叢瀕危得濟公之沒也廉裝綦貧廬州吳壯武公朝鮮軍中馳書招公
子敦復將振拂之夫人則曰士當困不可過受人惠吳公厚意謹辭之
敦復遂不往公在官日持介節某官投巨金有所屬堅卻之子弟微聞
焉乃終不得其姓氏然則夫人清梗亦無負公生平云公喪歸葬長男
庚復負土未竟又卒於鄉夫人京邸已病家人不敢以聞夫人以十一
年三月憂勞繼歿實後公五年又闕六年仲叔子卜地改葬先公奉夫
人合窆錢家山生三子庚復庚辰進士戶部主事敦復蔭生刑部主事
賞舉人偕復諸生獻以後死故人茹哀志墓系以銘曰
巨綱所頓或躍在淵依流平進孰翼予前

兩朝右文器識則先云有遺章

天容瘁焉猗與少宰惟

聖知賢執忠以求孝于以孝繫臣束修負荷名教

中興之期吁咈所造孀矣嘉猷齊絜入告習以出內鮮赫赫名職在保
又百慮一誠昔其風雨匪晦有鳴九京可作隨武如生墓櫃可材風回

與清

誥授光祿大夫 經筵講官工部尙書兼管順天府事務祁文恪公神

道碑 王先謙

公姓祁氏諱世長字子禾敏齋其自號先世系出春秋祁大夫之裔元季自山西洪洞徙壽陽壽陽古馬首祁氏七邑之一也曾祖文汪優貢生長治教諭祖韻士乾隆戊戌進士翰林院編修歷右中允改戶部郎中父窩藻嘉慶甲戌進士官大學士道光咸豐朝軍機大臣同治初授穆宗讀卒

贈太保諡文端入祀賢良祠三世皆光祿大夫妣皆一品夫人文端公督學湖南而公母陳太夫人誕公長沙官舍幼者深湛之思每講解古訓大義豁然立悟年十三隨侍江蘇學署文端公用樸學倡導後進一時幕府若俞理初苗先路張石州胡光伯諸先生訓詁攷據輿圖之學競號專家公一見能領其要闡然內修不以通敏先人被服儒素造次必於繩墨冥心孤詣所得於宋儒性理獨多石州贈詩云垂老媿黃童蓋其爲耆碩推重已如此咸豐辛亥由廕生授戶部員外郎特旨召見垂詢家世迴避改工部旋中式舉人庚申成進士改庶吉士授編修丁文端公憂

特旨以侍讀候補服闋補翰林院侍讀四遷至禮部侍郎先後署兵刑

部調吏部筦戶部三庫事擢左都御史工部尙書兼順天府尹公之爲曹郎也文端公方直樞密公莅事維謹處同列無倨色無墜言文端公以疾乞休不關家事值寇亂久計捐奉入助軍饟公力贊成之然家實無餘怡顏戶庭處困彌歡文端被

詔再起授書

殿廷公供職詞垣出則左右趨承入則隅侍論學清風滿室充然各有自得之容人以爲東漢桓氏父子醞藉敦厚之美莫能尙也旣以清望躋顯秩見時事孔棘感激益奮光緒初

簾聽孜孜使臣肇釁俄恣要挾公則有守經行權或合於權宜離經行權必累於權詐之疏諒山罷戰與法連和公則有急攬人才維繫民心以禦外侮靖內訌之疏籌饗之弊莫甚於借洋款有展轉剝削恐傷元氣之疏富强之計不在專習夷務有請停開鐵路之疏礦廠寢多流弊滋甚有養地利清弊原之疏往往朝入造膝夕歸削牘根本獨見務達其誠不肯逞詭激以沽名驚新奇以諧眾凡所開陳多見

采納充

經筵講官賜紫禁城騎馬先後

命會辦山西團練察辦山東事件凡督學安徽順天浙江主湖南鄉試
一會試二武會試鄉試各一

殿廷試輒與閱卷蓋

上信公忠正廉慎倚任日隆公亦行無越思職靡曠事尤工文章精衡
鑒崇雅黜浮杜絕私謁凡所識拔多名於時以光緒十八年壬辰八月
六日卒距其生道光五年乙酉六月二十九日年六十八遺疏聞
上軫悼

賞經被侍衛奠醊

賜卹如例

賞銀五百兩治喪長孫師曾卽補員外郎子友蒙及歲引見尋

賜祭葬諡文恪配同邑李氏

封一品夫人先卒側室張氏宜人子三友慎李出二品廕生

欽賜舉人內閣中書先卒友蒙友鼎張出二女皆先卒孫二師曾一品
廕生師儉曾孫一某遺集凡奏疏若干卷文若干卷詩若干卷公天性
純篤先人忌日祭祀豐絜致敬盡哀有終身之慕而自奉不四簋一裘
十餘年當官絕苞苴有餽必拒親族故舊恩誼周浹對家人若賓客詞

氣無遽疾暑不袒坐不敬門生屬吏虛懷傾接務盡其懽雖竟日端凝而卽之藹如可謂卓然有道君子矣先謙蒙被公知以道義文章重相期勉歲乙酉奉視學江蘇之

命公出家藏文端公寄園消夏圖指示幼時隨侍及諸老談讌之所且曰園今燬矣圖中事依依垂五十年顧念前徽猶潸然欲泣也先謙到官捐奉葺園爲文寄公迨任滿假歸而公遂不可再見悲夫師曾等郵書走狀屬文其墓道之碑先謙曷敢辭迺爲銘曰

道本一原歧分漢宋理責躬行文資貫綜咀華落實同體互用仇嫉憤攻俗儒一閔繫公家學鄭伯朱仲純厚稟天夙成驚眾平持衡石一埽秀孳蔚起詞林挺爲

國棟秋韜四駕春士再貢虛公厥心學子流頌公之進思從容議諷籌策時屯息長哭慟公之退食規矩曲中道味在躬水止山重表裏融明質文斲礪如何一老遽踐夜夢懷有遺章室無畱俸

深宮嗟惜萬口悼痛小子承顏如鳥慕鳳步趨在目琴瑟罷弄仰歎周

聃俯慚衛贛鐫詞章德百代欽誦

許恭慎師墓志銘

馮煦

世宗朝征西北諸部軍書萬里達不以時愆內閣之不密而倉卒或無以應也迺設立軍機處以親信大臣領之諸部平此制仍而不革凡題本歸內閣奏摺歸軍機處二者並筦天下之樞且內閣執詳軍機處執要其任尤重且劇大臣不能以獨理也迺遴中書之能者爲之佐後復廣之六部司員凡兩班日章京大臣日一朝或再三朝承

上旨章京珥筆侍大臣口授所聞於

上者章京退而屬草

諭令之寄章奏之批答動至千百言皆繫於黜陟興革之大未發不以宣故非開敏而慎密又習於朝章國故官方民隱者不與焉章京積階至二品則罷直其後復爲大臣者恆難其人

高宗朝唯戴文端公衢亨吳公熊光今又得之我師仁和許公矣二公

見知

高宗

仁宗自章京而大臣公見知

穆宗及今

皇上少閒矣然自其爲章京時已與大臣同直其寵遇同一公精敏絕

人事無鉅細應機立斷洞見耑末公究心當世之務凡所規畫恢恢有餘其器識同二公不阿和珅公不阿肅順其風節同顧二公遭時隆平挈持綱維與天下休息遂以仰孚天地覆燾之德公入直三十年與兵事相終始粵撫回苗蹂躪幾十八行省而淵默雷聲弛張不形卒措天下於磐石二公爲其易公爲其難然公雖弼亮

三朝躋中興之烈矣而天倪冲夷功成而不尸煦嘗燕閒侍末坐公爲道西湖之勝且曰丙寅丁卯閒予有母憂棲丙舍介某山之麓林壑尤美負土之後數登陟之一笠一屐與樵牧相酬答有終焉之志王事敦我已已再出然丙舍舊游未嘗一日忘也或寂對深語迥然思鬱然歎若盡若不盡豈其中有不自克者邪蓋世之否泰相倚伏而公所荷者重洞微之識殆有窺於幾之所萌而枝梧萬端力不足以折之故欲歸以遂其初志也於戲孰意志不一遂而公遽棄天下邪公沒不半歲東事起發言盈廷徵調半宙合卒無尺寸之績於是中朝士大夫降至海外內之眾無識不識僉曰使公在中樞當不至是於戲世變匪一朝夕藉令公當之濟否亦不可知或且無以塞悠悠之望此正公之忠誠上通於天天故促之使不與斯役也公諱庚身字星叔生道光五年六月

十四日卒光緒十九年十一月三十日年六十有九以某年月日葬某鄉某原其世系子姓若行己歷官之實照既狀之上翰林院國史館矣茲復舉公之直軍機久係乎國家之故與其志之未竟者埋諸幽俾後之直軍機者有則焉銘曰

乾崙坤倪毅然相萬

帝不獨治唯一个臣左禹右皋備之翼之海宇沸羹以摧以廓還我太夷其所施設百晦一顯維國安危安危者時翺翺如一不卹其私長人千仞索我元輔天乎難知漸水之湄吳山之陰公宅於斯億祀千齡不泐不竭眎此銘辭

兵部尚書徐公墓志銘

俞樾

光緒二十有六年十二月故兵部尚書徐公故吏部侍郎許公故太常寺卿袁公同日被

恩命復原官於是薄海內外咸知三公之死果非

上意也又知三公皆爲

國而死非其罪也一時翕然有三忠之目靈輿南返士大夫無識不識皆往助執紼祭奠相望哀輓盈塗時未一棋事已大白固由

天子明聖而三公之精誠亦自有不可磨滅者矣余與三公皆相識而尤於徐公有連故徐公之葬也其孤具狀請銘其墓按狀公諱用儀字吉甫別字筱雲浙江海鹽人其先世有諱應奎者冬日父病思食瓜泣禱而得瓜故世稱孝瓜徐氏曾祖錫命國學生祖養惠歲貢生父槐廷道光十五年舉人廣東潮州府同知三代以公官並

贈光祿大夫公自幼外順而內剛遇事有不可必委曲自申其所見人始或不信後皆服焉年十七入縣學道光二十六年應鄉試登副榜遂入都納貲爲主事分刑部咸豐九年順天鄉試中式舉人未幾考充軍機章京兼總理各國事務衙門行走補雲南司主事再遷至湖廣司郎中保送御史

廷試第一恭惠親王者之曰梁棟才也公於同治初入軍機其時軍書旁午而公綜事精良從容裁汰擬

詔旨動中契要樞廷諸公咸引重焉遷四五品京堂補鴻臚寺少卿浸大用矣俄以憂歸服滿還

朝累遷至工部右侍郎充總理各國事務大臣又由吏部左侍郎充軍機大臣公居官廉儉處事勤慎爲

朝廷所信任

太后見公風度端凝書蹈規履矩四大字賜之其閒屢以疾請開缺未允也及日本構釁舉朝爭和戰公以東人之勢方熾未可輕戰與朝論齟齬後從眾議竟以債事公歎曰此後事愈難為矣面求退出樞廷譯署公自充總理大臣十有三載遇事彌縫匡救心力交瘁至是自幸息肩而德索膠州俄索旅順大連灣英索威海衛九龍島法索廣州灣外侮狎至公雖不與其事心竊憤之光緒二十四年皇太后訓政仍以公為總理各國大臣公以譯署之事難於樞府乃引太常寺卿袁公入署共事而侍郎許公奉使海外歸亦與焉公喜曰吾得朋矣未幾由左都御史授兵部尚書於西苑門內

賞騎馬

賞乘船

賞用拖牀異數也又以

萬壽慶典

賜蟒衣一襲

天眷優隆有加於昔而拳匪事起矣拳匪起於山東巡撫毓賢實袒護

之公力請勦治乃以袁公世凱代毓賢撫山東時

廷議固主勦也毓賢入

朝力言拳民激於義憤與西人爲難兵力旣不足恃正宜借用民力王公大臣多爲所眩惑拳匪遂益煽熾侵尋闖入京城以扶清滅洋爲名號召徒類橫行市廛謀殺西國使臣毀西國使館公會同列入告請嚴行禁遏又擬按公法請各國使臣出京於是德使臣克林德親赴總署會商中途爲官兵所戕公歎曰禍始此矣言於管理總署之慶親王棺斂從厚而忌公者遂日夜媒孽其閒矣時各國兵輪麤集津沽屢召廷臣與決大計公與許袁二公及尙書立山內閣學士聯元二公皆極言民團不可深恃外釁不可輕啟凡

召見四次所言益切

太后猶命公至使館議之美國使臣猶允爲調停乃當國者力主用兵謂不殺議和諸臣則士氣不振而許袁二公遂朝衣東市矣公自知不免然意氣如常不稍貶損七月十六日步軍衙門率拳匪擁公至莊王府公不置辨但曰天降奇禍死固分也越日戊辰遂與立山聯元二公同及於難是日陰霾蔽天日色無光嗚呼慘矣公死後三日

兩宮出狩各國兵入城見德使棺斂豐厚乃稍稍禁戢其兵勿多殺戮猶公之隱賜也公平時巽順與物無忤而事關

君國安危至以死爭之乃歎其幼時外順內剛固天性然矣公有丈夫子二士鍾士恆某年某月某甲子士鍾等葬公於某原余特書其大節刻石而納諸壙銘曰

以公之忠而不能勝羣小之私以公之信而不能破羣情之疑國事乃瀕於顛危而臣力遂窮於扶持苟一言之有裨雖九死其無辭公之苦心人所悲公之精誠天所知果天鑒之昭垂不逾年而雪之千載而下觀此刻詞請勿以公爲龍比也而仍以公爲皋夔

兵部左侍郎楊公神道碑

王先謙

公諱頤字子異蓉浦其自號晚更號蔗農茂名楊氏系出宋龍圖閣直學士文靖公時明正統間有諱蘭者官廣東瓊州府教授遭亂流寓縣之白村遂爲其縣人曾祖盛秀□□□□事迹具府縣志傳祖敏修父儒望俱縣學生三世以公貴

贈光祿大夫妣皆夫人公九歲通五經十歲能屬文十六爲諸生學使李文清公棠階才公之文以優行貢成均招至署中飲食教誨期勉敦

至咸豐壬子中式順天鄉試舉人同治乙丑成進士改庶吉士散館授編修兩爲會試同考官一爲甘肅正考官以纂修

穆宗實錄敘勞遷侍講轉侍讀充

日講起居注官擢順天府丞調奉天府丞兼學政以大理寺少卿督學江蘇遷左副都御史爲會試總裁官順天鄉試副考官知會試貢舉晉兵部右侍郎轉左兩署工部請假修墓光緒二十五年二月二十九日卒於家距其生道光四年十月二十五日年七十有六某年日月葬某鄉某原妻某氏妾某氏子彥深舉人彥澂彥涵彥潏初公舉於京兆而歸值赭寇亂東南兩粵無完土高州毗連梧鬱土寇葉牙其閒乘隙竊發公與郡人舉鄉團清內姦劇盜陳金缸爲粵西官軍所創竄岑溪歲辛酉某月一日夜馳三百里陷信宜踞之圖犯府城勢張甚民競逃徙城中羸卒百械餉不給官吏束手公倡言曰城守須兵兵非難籌餉難無餉是無城也盍速圖之毋以家委賊眾噉然曰諾括質庫得萬緡立集團練數百募兵千繕庸浚隍籌禦完密信宜距郡八十里賊聞備不敢犯人心大安輸貲十餘萬金益增營扼隘賊閒道襲城夜蟻附登礮斃數賊迺驚遁屢攻皆卻之由是城守益固鄉民挈家來者數萬人迨

官兵大集陳金缸伏誅始末三年公日在行間治軍書籌饋運值餉絀慮眾譁潰質家產三千金濟軍口絕不言事定後郡中羣不逞以勒捐濫費控在事諸紳耆公置不與辨久而公論始明方倉卒召集時公志保固鄉里而已不暇計它利害及疑謗大興非公處事當持已廉幾不免齟齬然後歎無權位而與公事者之難也同治閒李文清公入直樞密以正學倡導後進公受知最深恪守師資尤嚴操履嫉貪墨高州屬化州稅廠蠹吏藉軍需名誅索無厭公條列其弊請榜稅則曉眾詔從之商旅稱便光緒閒中外多故公屢陳事宜甲午日本之役請懲夫律以肅軍令雖未施行時論韙之然公性固和易不立崖岸在都與濟甯孫文恪公毓汶吳縣洪侍郎鈞太谷溫學士紹棠天門胡中丞聘之太和張布政端卿及余爲文酒會酣嬉淋漓極一時友朋之樂不二十年相繼以逝存者惟中丞及余而公督學江蘇余先後任知余將病免貽書勸沮彥深等請文其墓道之碑追維疇昔許與氣誼泣然不敢辭乃爲銘曰

伯僑之裔厥惟楊侯失官徙蜀別派分流成都之雄鬱爲漢豔中立耀宋實居南劍將樂有後釐宅於高積慶於公英聲遠劭初舉孝廉不慕

榮仕狂寇宵驚將踰我里袒臂四呼眾懾且應不有其貲指揮立定蠡
訶域伺有備卒完我尸其勞貽眾以安翩然賓王鳳翔文苑炳譽詞華
飭躬道本出馳輜傳豐

國羽儀入貳卿寮補袞有思逝矣倭人越水遼海孰總師干任其咎悔
公時抗疏王殊必加

廟謨深遠時議驚嗟

國威不揚再致蹇難公已九原靈其憤歎武略定亂文明進賢有攷公
迹揭此高阡

會惠敏公墓志銘

俞樾

昔在咸豐同治閒盜賊警牙有震且業天乃篤生惇龐耆艾表裏文武
之臣以剗被荒荼經緯區宇而吾師曾文正公實爲中興元功冠文正
公薨惠敏公嗣又繼之以雄才偉略爲

國家宣布德意奮揚威稜談笑樽俎之間折衝萬里之外將天之鍾美
於曾氏乎乃天之篤祐我

聖清也光緒十有六年閏二月癸巳惠敏公薨於位越二日乙未
詔以公才猷練達任事勤能

賞太子少保銜照侍郎例

賜卹三月癸巳又從大學士直隸總督李公鴻章請以其事實宣付史館加

恩予諡明年某月某甲子其孤奉公之喪歸葬於長沙曹家坳之原而乞文以銘其幽宮余惟公以元功侯籍弱冠登朝智深勇沈中外翕服固不待余言以爲重然公仗節出疆慷慨辨論有中外大局所關不可不垂示後世者則又安敢以不文辭公諱紀澤字劼剛文正公長子世牒炳然可無述也自幼究心經史喜讀莊子離騷所爲詩古文辭卓然成家兼通小學旁涉篆刻丹青音律騎射靡不通曉從文正公在軍中十餘年戰守機宜山川形勢咸得其要領同治以來與泰西互市中外之事益繁公遂精習西國語言文字講論天算之學訪求制器之法海外諸大洲地形國俗鱗羅布列如指諸掌先以正二品蔭生用戶部員外郎及文正公與歐陽夫人相繼薨逝公連遭大故哀毀幾不勝喪然聖廬之中仍潛心有用之學服闋入都襲一等毅勇侯朝廷知公才命以四五品京堂候補同治四年充出使英國法國欽差大臣

賜花翎以寵其行是年補授太常寺少卿明年遷大理寺少卿公在海
外遇事侃侃英人法人多爲折服

朝廷益知公可大用明年遂有出使俄國之

命先是中原多事俄人竊據伊犁至是議索還之而侍郎崇厚實以全
權大臣往乃爲俄人恫喝諸事多從其請又以全權大臣例得專行竟
與定約而歸

上震怒奪其官治罪改命公往毀約更議當是時俄人要挾萬端且目
我毀約使彼有辭沿海震動以爲兵事將起公受

命於艱危之際力任其難與其國外部書格爾斯及駐華公使布策諸
人筆舌辨難往復十數萬言卒毀已成之約更立新議其大端有七一
曰交還伊犁原約以伊犁西南兩境分歸俄國而南境之帖克斯川實
爲南北要區尤重於西若南境屬俄則俄有歸地之名我無得地之實
力言於俄俾南境悉歸於我二曰定喀什噶爾之界原約所載地名按
圖懸擬未足爲憑俄必欲如原約者乃爭蘇約克山口也公與辨論再
三始定議兩國各派大員勘定不以原約爲準三曰定塔爾巴哈臺之
界前將軍明誼奎昌等已分有定界及崇厚至俄以分清哈薩克爲言

於是爲俄所占者又三百餘里公力爭於俄乃於明誼崇厚所定兩界
閒酌中勘定更立新界四曰嘉峪關通商原約許俄商由西安漢中行
走直達漢口而向來通商從無指定何處許西商減稅行走之例公與
定議嘉峪關通商如天津例而西安漢中兩路及漢口字均刪去不入
載書五曰松花江水道松花江直抵吉林愛琿城從前誤指混同江爲
松花江致俄船駛入無禁崇厚許至伯都納俄猶未饜也公與力爭竟
廢此條不特於新約奪其利并爲舊約辨其誣矣六曰烏魯木齊領事
公初意盡廢各城領事官俄謂各領事廢則烏魯木齊必須增設一員
公又與爭乃改爲吐魯番增設一員而烏魯木齊不增餘領事並罷七
曰天山南北路稅務新疆兵燹之後凋敝殊甚轉運維艱是以原約有
均不納稅之說公改爲暫不納稅俟商務興仍開徵以充國課凡所定
界務三端商務四端皆毀舊約更立新章而又有償款一端改兵費之
名爲代守伊犁之費減盧布五百萬圓爲盧布四百萬圓自光緒六年
至七年凡十閱月而議始定前使者以頭等全權大臣僅得伊犁之半
而諸要隘盡棄以與俄公以二等使臣又無全權之名乃能取已成之
約而更之烏宗島山帖克斯川諸要隘仍爲我有伊犁拱辰諸城足以

自守而又得與喀什噶爾之阿克蘇諸城形勢聯絡其有功於新疆甚大旋補授宗人府府丞遷都察院左副都御史至九年而法越事起公任滿將代

詔留公任公與法人辨甚切法人憚之又陳備禦日南之策六條悉中何綮十年補授兵部右侍郎是年奉

命與美國議定洋藥稅釐并徵條約增歲入銀二百餘萬兩十一年始有

詔以江西布政使劉瑞芬代公公在外蓋九年矣歷使俄英法三大國適值多故憂勞備至鬚鬢皆白至十二年冬受代還朝未至卽

命幫辦海軍事務既至又

命在總理各國事務衙門行走

醇賢親王知公諳達洋務每事必諮焉調戶部左侍郎

命筦同文館之事又嘗攝刑部吏部侍郎公自以受

恩厚鞠躬盡瘁不敢自暇逸而在俄時積受陰寒得中消之疾至十六年春方與諸王大臣會議朝鮮事咸欲取決於公而公旋病病且不起

矣年五十有二

醇賢親王親臨哭奠謂年甫及艾何遽至此有其才而不竟其用惜哉旬日之閒電傳中外無不同聲太息爲

朝廷惜此柱石之臣嗚呼如公者眞我

國家之蓋臣而我師文正公之肖子矣公娶賀氏雲貴總督賀公長齡女繼娶劉氏陝西巡撫劉公蓉女初無子以弟子廣銓嗣後生子廣鑾公卒廣銓

賞員外郎廣鑾俟及歲引

見女子子二長適合肥李經馥次適歸安吳永所著奏疏及詩古文若干卷又著地輿輯要未成其早年所撰則有佩文韻來古編說文重文本部考羣經臆說諸書均藏其家公合中學西學而成一家之學宜其所樹立者大也銘曰

天生文正光輔

聖清掃除羣盜東南砥平內亂既平外患未已天成公志與以賢子賢子維何曰惠敏公中學西學一以貫通始以小侯醇登卿列

帝知其才授以使節俄恃其強據我新疆誰與定議自毀隄防公踵其後十易八九折衝樽俎奪肉虎口不辱君命不激不隨公此一舉傾動

續碑傳集卷十五
四夷方今隱憂實惟平壤俄所覬覦我之屏障安得如公高議雲臺雄
圖未展隆棟先摧我作銘詞刻其墓石赫赫令名千載無斁